

XVI°

8499

MICROFICHE
- 930 -

CINQ LIVRES,

De la maniere de nourrir
ET GOUVERNER
LES ENFANS DES LEVR
N A I S S A N C E.

PAR

Vigier

*M. Simon de Vallambert, Medecin de madame
la Duchesse de Savoie, et de Berry, et
depuis peu de temps, de monsei-
gneur le Duc d'Orleans.*



A POISSIERS,

Par les de Marnefz, & Bouchetz, freres.

1 5 6 5.

Le contenu des cinq Liures.

LE PREMIER,

La maniere de bien choisir vne Nourrice.

I I.

L'instruction de la Sage-femme des accouchees, & de la Nourrice, au gouvernement de l'Enfant nouveau né.

I I I.

La maniere de nourrir & gouverner l'Enfant avant que le seurer.


. I I I I.

La maniere de nourrir & gouverner l'Enfant apres qu'il est seuré.

V.

La maniere de guarir les maladies des Enfans.

A LA ROYNE MERE DV ROY,
FELICITE' PERPETUELLE.

 I DES CHOSES qu'on publie pour l'utilité commune des hommes, la cognoissance doyt appartenir aux Roys, peres et conseruateurs du bien public: a vous, Madame, a bon droit, qui estes Royne, mere du Roy, et gouuernante du Royaume es premiers ans de sa majorité, et chef de la conseruation des profits publiques de son peuple, ie desire estre presentee ceste mienne Euure, auant la publier, contenant une instruction pour le gouuernement et nourriture de l'enfance, et premier eage des hommes, non seulement de ceux qui sont et seront, voz subietz, mais aussi de ceux qui se voudront ayder et valoir du langage de France, auquel elle est escripte. Et combien que pour le regard de la petitesse de l'Auteur elle ne soit digne d'atindre iusques a ces sacrees mains, lesquelles portent sceptre, neantmoins en cõtemplation de ce que la doctrine en icelle comprise vient de Dieu, et que le propre des maistres Royales est de vouloir que les bonnes doctrines accroissent de plus en plus, et soyent diuulguees au profit de leurs subiets: cela me fait penser que ie ne seray rien indigne, en m'assurant de la vous presenter, et

qui vient encore de plus grand' assurance, la vous
dédier. A quoy faire i'ay encore esté incité d'une
autre consideration, que ie l'ay composée premiere-
ment, et principalement, pour le service du petit en-
fant, Prince de Piemont, fils de madame la Du-
chesse de Sauoye, vostre tres-chere seur, ma mai-
stresse: considerant, qu'en faisant ce deuoir de mon
estat a son Altesse, enuers son fils, en enseignant par
escript, en faueur de son nom, la maniere de nourrir
et gouverner les enfans, ie ne puis faire sinon chose
que ie pense vous pouuoir estre agreable: comme
ainsi soit que ce n'est qu'un cœur et une ame de vous
et d'elle, et que ce qui se fait pour le service de l'une,
ne peut estre separé du service de l'autre. Cela seul
pourra suffire, Madame, a excuser enuers V. M.
ceste asseuree entreprise de mon cœur tres-humble,
et a vous faire trouuer bonne l'offre d'un tel ensei-
gnement, lequel tres-humblement, a ceste mesme
Maieslé ie presente et dédie. Que si la composition
d'iceluy, pour sa rude forme, ne merite la faueur de
voz yeux, au-moins il ne puisse estre desdaigné ne
reietté, puis qu'il vient d'un des Medecins de cel-
le que vous aimez comme vous-mesme, qui vous
ayme comme soy-mesme: laquelle apres vous est cel-
le que plus ie reuere en ce monde.

De V. M. tres-humble & tresobeissant subiet
& seruiteur, SIMON DE VALLAMBERT.

I e n'estois pas ignorant que plusieurs des anciens excellens Medecins, tant Grecs qu'Arabes, & beaucoup depuis de ceux qui escriuent en Latin, ont escript de la maniere de nourrir & eleuer les Enfans, avec le moyen de guarir leurs maladies : apres lesquelz neantmoins ie n'ay point crainct la moquerie de mettre la main a la plume pour escrire de mesme chose, & ne m'a semblé, ce faisant, mon labeur estre vain & superflu, non plus qu'a fait a ceux d'entre-eux qui en ont escript apres les autres : desquelz on prise & lit volontiers les eures. Car ie scauois assez que Galien ha enseigné la maniere de choisir la Nourrice, & de nourrir l'Enfant, au premier liure Du regime de santé, ce que depuis ont fait Oribase & Paul, Medecins Grecs : qui leur eut peu estre reputé vne folie & vne peine superflue, auoir escript mesme chose, & encores moins amplement, apres vn plus scauant homme. Eux mesmes ont escript de la maniere de guarir les maladies des Enfans : combien que ce ha esté si peu, qu'ilz ont donné occasion aux Arabes d'en escrire plus amplement. Et ceux-cy n'ont pensé faire vne chose superflue ni temeraire, escriuant non seulement des mesmes choses, apres les Grecs, en leur langue Arabique, mais en la mesme langue, plusieurs les vns apres les autres, encores que n'ayēt guere adiousté les derniers aux premiers, ne changé de sentences, ni de style. Haly-abba ha prins des Grecs ce qu'il en ha donné par escript. Rasis en ha composé excellentment, & le plus amplement de tous. Auicenne n'a fait que des redittes apres eux, & neantmoins choses dequoy on fait cas. Depuis sont venuz plusieurs de ceux qui parlent Latin, lesquelz en ont escript assez grossierement, mais clerement : & du nombre des derniers, Miron, Medecin du Roy Loys XII. ha recueilly les autoritez de tous les Anciens, & de ceux de fraische memoire deuant luy, de mot a mot, & ha tout mélé & amassé en vn gros volume, avec vne langue Latine, & façon d'escrire telle que de son temps. Et moy apres luy, & apres tous, ayant traité le premier en langue François le mesme subiet, & en autre style, & avec la plus grande breueré & facilité qu'il est possible, escriuant partie de ce que de moy-mesmes ay inventé de bon, & practiqué, partie de ce que i'ay choisi de meilleur d'eux, auray- ie point perdu ma peine, & seray reputé authent vain & temeraire ? Non, comme ie pense, & ne prisera aucun moins mon ceure, s'il n'y ha autre mal que d'estre de la fuyte des autres : considerant que c'est vne chose qui auient communement aux hommes de s'entresuyure quelquefois en vn mesme cours de penées, & d'estudes : & que les premiers ne sont point reculer les derniers, se retrouvant tousiours quelque diversité & difference entre-eux, qui fait trouuer belle & bonne l'œuvre de chascun. Comme on

voit premierement que plusieurs en diuers siecles, & Grecs & Latins, & d'autres nations, ont escript de la Gramaire, chaſcun en leur langue, & plusieurs de Dialectique, les vns apres les autres: plusieurs de Rhetorique: plusieurs d'une meſme hiſtoire, & en meſme langage: plusieurs d'une meſme fable, & en meſme genre de vers & de Poëſie: & en tous ces arts & es autres, bien ſouuent les moins ſcauans apres les plus ſcauans. Combien ſont qui ont escript de Geometrie apres Euclide? Combien de l'Architecteure apres Vitruue? Combien de l'Aſtologie apres Ptolomee? Combien de la Phyſique & Philoſophie naturelle apres Ariſtote, prince des Philoſophes? Et n'eſt pas ſeul celuy qui ha escript des Politiques, & du gouuernement des Citez, & des peuples, ni celuy qui ha donné preceptes d'Oeconomie, & du faiſt & du meſnage, tant aux champs qu'à la ville, ni celuy qui ha enſigné les meurs ciuiles, & les deuoirs de chaſcun, & ainſi conſequemment des autres arts & diſciplines: eſquelles toutesſois les derniers n'ont point eſté deſtournez par les premiers, comme j'ay dit, & ſe liſent les liures de chaſcun, ſans les blamer de choſe ſuperflue: deſquelz on apprend & rapporte toujours quelque profit ou plaiſir, ou pour quelques bonnes ſentences & enſeignemens que donnent d'auantage les vns que les autres, ou pour la difference de leur methode, ou pour la diuerſité, beauré, & bonne grace de leur façon d'eſcrire: Car c'eſt ce que fait trouuer la Nature belle, & ainſi comme ſe remire la beauré de ce grand monde, pour la varieté des choſes qui y ſont: auſſi fait du petit monde, qui eſt l'homme, pour la diuerſité des eſprits, & effects d'iceux. Et ce n'eſt pas tout ce que lon voit beau de l'homme, que luy ſeul, apres Dieu & les Anges, contemple l'vniuers, & ha en ſoy les natures des autres animaux & corps ſenſibles, & les facultez de l'ame des plantes, & les idées de toutes creatures, ſeul diſciplinable de ſoy-meſme & de ſon induſtrie, ce que n'eſt concedé à aucun des autres animaux: ains eſt choſe plus belle & plus admirable de luy, qu'eſtant diſſerant de toutes choſes par ſa forme & par l'eſſence de ſon eſprit, lequel eſt raiſonnable, & né aux ſciences, il eſt encore diſſerant de ſoy-meſme en ſes indiuidus, c'eſt à dire, en chaſcun homme particulier, pour la diuerſité des actes & effects d'iceluy eſprit meſme, comme ſpecialement des eſcriptz: laiſſant à part ſes autres ouurages, & les occupations des autres choſes à quoy il ſ'applique. Et n'eſt pas encore le principal de ce qui eſt beau de luy à veoir, que l'un ſpecule de ſon entendement le ciel, les mouuements des eſtoiles, quand elles ſe leuent, & quand elles ſe couchent, & met en eſcript ce qu'il en ſçaît, & en lumiere, un autre ſ'addonne à une autre eſtude, & à une autre ſcience: mais eſt encore une plus belle choſe, qu'en un meſme ſubieſt ſe trouuent pluſieurs, avec diuerſité de façon de dire & d'eſcrire, comme j'ay dit cy deſſus de la diuerſité des arts & diſciplines, eſquelles non ſeulement pluſi-

eurs ont esté occupez distinctement l'un en l'une, l'autre en l'autre, mais plusieurs en chascune. Et a fin de ne laisser la Medecine en arriere, & en obly, en autre matiere que du gouvernement des enfans, cobien y ha il de Liures au monde de ceux qui depuis Hippocrates l'ont traictee entierement, Grecs, Latins, Arabes? Combien d'autres qui n'en ont traicte, si non vne partie seule? Ne voyons nous tant & tant qui sont escriptz seulement de la Physiologie & des choses selon la nature de l'homme? tant & plus de la Pathologie & des dispositions contre Nature? tant & quasi vn monde de la Therapeutique & de la maniere de remedier aux maladies & de l'usage des remedes? Et passant outre aux parties des parties, & poursuyuant par le menu, ne lisons nous vne infinité de ceux qui sont composez singulierement des fleurs? & autant ou plus de ceux qui de la Chirurgie, & non seulement du temps passé, mais aussi du present? Et tant s'en trouuent de ceux qui ont glossé sur le neufiesme de Razis a Almanfor, de la cure des maladies, depuis le sommet de la teste iusques a la plante des pieds: outre vn nombre infiny de tous temps, de ceux lesquelz sans recognoistre aucun chef, & sans faire glose ni comment, d'icelle mesme chose, s'intitulent auteurs eux-mesmes. Dioscoride ha escript des medicamens simples, est-il tout seul? Ne l'ont fait depuis luy, Plin, Galien, Serapion, & vn million d'autres? Que diray-ie de la faculté des nourrissemens, & du regime de santé? Il y en ha tant qui en ont traicte, qu'on n'en scait le nombre. Pour le faire court, de toutes les pieces de la Medecine n'y ha celle dont plusieurs n'ayent esté bons tailleurs, & maistres ouuriers, escripuans les vns apres les autres, voire en vne mesme langue: & nonobstant que les premiers y ayent assez bien besongné, les derniers n'ont laissé pour cela d'y mettre la main, & besongner apres eux: pensant ou adiouter quelque chose d'auantage, ou arranger mieux la chose si aiantee par les autres, ou la traiter & escrire plus briueement, ou en plus beau style, ou en meilleur langage. Car vn seul n'escript pas tout, ni tous d'une maniere, ni de mesme ordre & disposition, ni de mesme facilité, & lumiere de sentence, ni de mesme grace, beauté, & richesse de parolles: ainsi comme tous ne se ressemblent pas ne de visage, ne de voix, ne d'habitude ou stature du corps, ne de contenance: comme nous voyons aussi qu'un ne plaist pas a tous, pour la diuersité des gousts, & iugemens des personnes: toutesfois que ceste derniere similitude n'est pas a propos, car l'intens & veux dire que plusieurs escripuans & traittans d'une mesme chose, se peuvent trouuer tous agreables a vn homme de sain iugement, pour la diuersité & de leurs escriptz, & de leurs façons d'escrire. Ainsi toutes ces considerations & raisons mises en auant, ie n'ay doubte de mettre ceste mienne Euure en lumiere & en barbe a toutes celles des autres escriptes de chose semblable, m'assurant qu'elle meritera quelque

faueur, tant pour le regard de ce qu'elle est ainsi, comme les autres, pour le bien public, & singulierement de nostre nation, au langage de laquelle elle est la premiere, que pour ce qu'elle tient son rang à part, & a sa methode & la façon de coucher par escript aucunemēt différente, à mon aduis plus claire & plus aisée qu'aucun des autres : & est aussi escripte & traitée plus briuement, & plus entierement, non moins polie de parolles, que richement de sentences. Que quand ie l'aurois escripte en Latin, ou autre langage, elle retiendrait encores cela, & ne seroit moins despourueue que les autres, de ce qui peut faire trouuer vne censure agreable, ou au moins qui seroit approchant de ce qu'on estime le plus es auteurs. Ce que ie ne voudrois qu'on pensast estre dit de moy par ventance, ou vaine gloire. I'ay departy toute la matiere en cinq Liures, & chascun liure en certains chapitres, & poinctz principaux, & chascun chapitre en certaines circonstances, & poinctz particuliers : & au dernier liure, qui est de la cure des maladies, apres auoir mis la generalle en vn traité à part, auant la particuliere, ie distribue les maladies en quatre rangs : puis suuant la methode acoustumee de tous les Medecins, & tenant l'ordre de chascune maladie, ie mets premierement quelle chose elle est, puis les causes dont elle procede, puis les signes & marques pour la cognoistre, & pour seauoir de quelle cause elle est engendree, puis l'augure & iugement de sa longueur ou breueté, & de ce qui en peut aduenir : finalement les remedes & la guarison. Si i'ay bien fait, le profit en soit au monde, & louange a Dieu seul.

LA MANIERE DE BIEN CHOISIR
VNE BONNE NOURRICE.
L I V R E I.
P A R

*M. Sim. de Vallambert, Medecin de
Madame Marguerite de France,
Duchesse de Sauoye et de Berry.*

S MAISONS des grands, communement quand vne femme grosse s'approche de son
E terme, on tient la nourrice presté, qui ha esté choisie pour nourrir & gouuerner l'enfant, si tost qu'il sera né: qui est vne chose qui procede de sagesse & prudence: car il n'est pas temps de se pouruoir, quand la necessité est venue, & est le propre de tout homme sage & prudent, de faire prouision de bonne heure de gens & de choses propres pour luy ayder & seruir quand il en aura à faire. Nature mesme, qui est la mere de tout, le fait ainsi: laquelle auant que former l'ame dans le corps, luy appreste ses organes & instruments pour s'en seruir en ses actions. Parquoy ce n'est pas soy hastier trop tost, ni fait sottement, auant que la femme soit accouchee, luy chercher & choisir vne nourrice, qui sache nourrir & gouuerner son enfant des l'heure de sa naissance. Et parce que i'ay entreprin. d'enseigner la maniere cōme l'enfant doit estre nourry & gouuerné, i'enseigneray premier la maniere comme celle qui le nourrira & gouuenera, autre que la mere, doit estre choisie. Mais auant que ce faire, ie declaireray les causes pourquoy on laisse la mere pour bailler l'enfant a vne autre femme a nourrir: a fin de satisfaire a ceux qui demandēt, S'il n'est le meilleur que la mere alaiete son enfant.

*Qui sont les causes pourquoy on laisse la Mere pour
prendre une nourrice. C H A P. I.*

QUAND il se pourroit faire, disoit ce grand medecin Arabe, Haly-abba, que la mere nourrist son propre enfant, son lait luy seroit beaucoup meilleur, que d'une autre femme, pourueu qu'il ne fust corrompu par quelque maladie : laquelle sentence il ha prise de Galien, le plus grand des Medecins, qui au premier liure du Regime de sante, escrit, que le lait maternel non seulement est le nourrissage familier & accoustumé, mais est propre & grandement profitable a tous enfans, attendu que nous sommes tous nourris de sang dans le ventre de la mere : & n'est le lait autre chose sinon le mesme sang, qui ha prins seulement changement de couleur es mammelles. Et par ce disoit bien Auicenne, que la mere, en toute maniere possible, doit bailer son lait a succer a son enfant, pour troys raisons. Premierement, parce qu'il est plus semblable a la substance de ce dont il estoit nourry dans le ventre de sa mere : c'est a dire, au sang, lequel venant es mammelles s'est blanchy & conuertie en lait. En apres, l'enfant y prend plus grand plaisir qu'en vn autre lait, pour la grand' similitude qu'il ha a son premier & accoustumé nourrissage : ce qui se cognoist par experience, que mettant la mere le bout de sa mammelle en la bouche de l'enfant, cela luy profite a oster ce qui luy nuist : c'est a dire, le pleur, la douleur, le mal-aise, & chose semblable. Finablement, il luy conuient mieux que celui d'une autre femme, pour estre fait (ainsi que dict Jacques des Pars, ce grand Medecin Parisien) de mesme maniere qu'ha esté formé l'enfant pour la plus grand part de sa corpulence : car de mesmes que nous sommes faits nous

sommes nourris, dit Aristote. Mais pour faire que la nourriture de la mere soit meilleure a l'enfant, six ou sept conditions sont requises : lesquelles conuiennent aussi bien a la nourrice. La premiere est, qu'elle doit estre loin de son enfantement, vn moys pour le moins selon aucuns : combien que nous monstrerons, au chap. suyuant, que le temps cōmode a la mere d'alaiçter l'enfant n'est point determiné. Secondement, il est requis qu'elle soit sans fieure, ou autre maladie, qui corrompe le laiçt. Tiercement, qu'elle ne soit grosse, ni enuieuse de coucher avec l'hōme. En apres, qu'elle ne soit cholere, yurongne, ne autrement moriginee. Outre plus, doit auoir le bout des mammelles idoinies a alaiçter : & faut qu'elle ayt assez de laiçt. D'auantage, elle ne doit estre vexee d'aucune forte euacuation, soit naturelle ou artificielle. La derniere cōdition est, que son laiçt ne soit corrompu & n'ayt aucune mauuaise qualité, parce que non seulement il ne profiteroit, ains seroit pernicious a l'enfant. Ces conditions obseruees, ne faut douter que le laiçt de la mere tousiours est meilleur que d'une autre femme. Que si nonobstant ces conditions, necessité contraint de changer la mere: soit, dit Auicenne, qu'elle est debile, ou delicate, ou soit, cōme aucūns disent, que son enfant soit tombé en quelque dyscrassie ou maladie notable, qui pourroit causer que son laiçt ou elle mesme ne vint en semblable: on doit eslire vne nourrice qui ayt toutes les condiçōs requises pour bien nourrir de laiçt vn enfant. Ce sont les troys causes principales, qui engardēt la mere d'alaiçter son enfant, encore qu'elle eust toutes les condiçōs susdites. La premiere chose donc est la debilité d'icelle, soit naturelle ou accidentale, qui l'empesche de soustenir la peine comme elle est requise : sauoir est d'estre

vigilante & prompte, maintenant a le baigner, maintenant a le faire tetter, maintenant a l'appaiser, selon que Galien enseigne au premier liure susdit du Regime de santé, chap. .ij. Qu'il faut, cōme il dit, auoir soing que l'enfant n'en-
coure es passions immoderees: & auiser ce dont il est be-
soin, quand il pleure & crie, ou se fasche, en se remuant des-
ordonnément. La seconde, est la trop grand' del'cateſſe de
la mere, laquelle ne peut porter la senteur des ordures qui
sortent de l'enfant, ne le cry & les pleurs, ni les veilles ne-
cessaires a l'entour de luy, ne l'abstinence de coucher avec
l'hōme, ne la grosseur des māmelles augmentees & pendan-
tes, & baueuses de laiēt: ayant mieux auoir le corps menu,
le sein beau, les tetins fermes, ronds & polis. La troyſiesme
est ia exposee, venant de la crainte de prendre le mal de l'-
fant, si d'auanture il estoit malade. Si donc lon voit aucunes
de ses troys causes empescher que la mere ne veuille donner
a tetter a son enfant: ou que son laiēt ne soit bon par faute
des condiōs susdites: faut choisir & prendre vne nourrice
qui soit conditionnee selon les qualitez que declairent Ga-
lien, Oribase, Paul d'AEgine, Haly-abba, Rasis & Aui-
cenne: lesquelles s'ensuyuent.

De quelle qualite doit estre choisie la Nourrice.

C H A P. I I.

P O U R bien choisir vne bonne Nourrice, faut considerer
sept ou huit choses: l'eage, la disposition & habitude du
corps, les mœurs, la forme du sein, des mammelles, &
tetins, la nature du laiēt, la distance du temps depuis son
enfantement, le terme auquel elic ha enfanté, le sexe de son
dernier enfant, l'estat de n'estre point enceinte. Selon
lesquelles choses autant de conditions sont requises pour la

choisir telle que doit estre. La premiere, qu'elle ne soit ne iouuencelle ne vieillotte. La seconde, qu'elle soit de complexion temperée, non subiette a maladie, de bonne couleur & corpulence, ayât le col, la poitrine & les bras forts, la chair belle: l'habitude, ne meigre, ne grasse, ne grosse. La troisieme, qu'elle soyt diligente, gaye, sobre, chaste, nette, douce: non melancholique, non paresseuse, non gourmande, ne friande, ne yurongne, non paillard, ny amoureuse, non sale ny orde, non cholere ny despit. La quatrieme, ses mammelles non petites ne trop grosses, non lasches ne pendantes, non molles ne trop dures: la poitrine large & ample. La cinquiesme, son lait ne gros ne petit, de quantité suffisante, de couleur pure & blanche, doux au goust, ne sentant point mal, vny & amaisé de toutes ses parties, ne coulant sur l'ongle, ne trop lentement, ne trop vistemment. La sixiesme, qu'elle ne soit lointaine du temps qu'elle ha esté accouchée. La septiesme, qu'elle ayt enfanté a terme, non subiette a auortement, & ayt fait son dernier enfant masle. La huitiesme & derniere, qu'elle ne soit enceinte.

I. De l'age.

Toutes lesquelles conditions ne sera que bon de declarer plus amplement. Commançant donc par l'age, par ce que de là depend le temperamēt de sa complexion, & la bonté nature de son lait. Premièrement, elle ne doit estre plus ieune que de vingt & cinq ans, ne plus vieille, que de trente & cinq: parce que l'espace qui est entre-deux, est l'age de la vigueur de ieunesse, de santé, & de perfection: d'autant qu'il est plus temperé que les autres eages, & plus sain: parce qu'il n'abonde de superflues humiditez, com-

me l'adolescence : & ne se flestrist par seicheresse, ou diminution de chaleur naturelle, comme la vieillesse : & est plus accöply, d'autant que le corps en iceluy l'est aussi : & ne croist plus, abonde en sang, ha les sens plus parfaicts, & les mouuemens des membres plus agiles. Mais au deffous de vingt & cinq ans, le corps croist encores, & n'ha pas le nourrissement ne le sang si parfait : & depuis trente & cinq ans en sus, les mois cessent a beaucoup de femmes, ou elles en ont bien peu : & partant ont moins de nourrissement, & moins de bon pour alaiçter l'enfant.

I I. De la disposition & habitude du corps.

En apres, faut la choisir qu'elle soit bien saine, non subiette a maladie, qu'elle ayt bonne couleur naturellement, le col fort, la poitrine puissante & large, gros muscles, la chair ferme, le corps moyen entre gras & meigre. Car si elle estoit maladiue, atireroit le corps de l'enfant en semblable disposition. La couleur vermeille, viue & claire, est vn signe de bõne temperature, & par consequant, de bonté de laiçt. Du col, viét la force du mouuement, cõme du lieu prochain de l'origine des gros nerfs, que quand il est fort, la nourrice est meilleure pour porter longuement l'enfant sur ses bras, & le soustenir pendãt à son col, tant qu'il prendra plaisir d'estre porté ainsi. Sa poitrine pareillement si elle est forte, soustient l'enfant plus aisément, & sans sentir douleur quãd il presse dessus : & si elle est ample, le laiçt ha espace pour mieux s'espandre au large, sans estre foulé, & flue plus librement & en plus grand' abondance. Elle doit auoir les membres charnus, & la chair ferme, ^{à fin qu'elle} soit plus forte & plus adroite a faire ce qu'il faut faire, a porter la peine de porter l'enfant, & de le nettoyer, a en-

durer aisément le froid, le chaud, & ne sentir pas tant de mal en la necessité de veiller a la garde de l'enfant. Encore faut qu'elle soit de moyenne corpulence, ne meigre, ne grasse, ne grosse. Car la grosseur & la graisse la rendent pesante, lourde & paresseuse a se mouuoir, a aller, a venir, a porter l'enfant, & mal adroite au soing qu'elle doit auoir enuiron: & outre cela, son lait est aqueus & petit, d'autant que ce qui est gras au sang, va tout en la gresse du corps: d'autre costé, la meigreté fait qu'elle blesse l'enfant de l'eminence & dureté de ses os: & mesmement quand la nuit, oyant incessammēt crier l'enfant au berceau, elle se leue nue, & le prend tout nud, l'apporte en son lit, l'embrasse, essayant s'il pourra entre ses bras reposer & dormir: d'auantage, elle ha trop peu de lait, & auenāt qu'estant meigre, elle soit melācholique, son lait est de couleur brune, & de goust acerbe, ou qu'elle soit cholerique, son lait est outirāt sur le iaune ou trop fort. Mais quand elle est charnue & de bōne habitude & corpulence, son lait est bon & suffisant, & son corps est comme vne douce couche, sus le-
quel se repose l'enfant, s'il en est besoin.

III. Des mœurs.

Ses mœurs doiuent estre bonnes & louables, femme diligente, alagre, gracieuse, chaste, sobre, nette, ioyeuse & riante a l'enfant: tardiuē a se courroucer, non facile a auoir peur, non soudaine a estre marrie ne troublee. Car ces passions & troublemens corrompent & alterent la cōplexion de la nourrice, & consequemment son lait. Dont il aduient, peut estre, que l'enfant refuse la mammelle, & ne voudra pas tetter, ou que la nourrice troublee, sera nonchallante de l'alaieter, ou ne luy donnera la mammelle a

l'heure conuenable. A raison de quoy, aucuns Legislateurs ont defendu que la femme folle ne soit nourrice, par ce qu'elle pourroit ou submerger l'enfant en le baignant, ou le suffoquer en le faisant gesir avec soy, ou luy causer quelque mauuaise complexion & façon, tant du corps que de l'ame. Car l'enfant ne tire tant du naturel de personne, apres le pere & la mere, que de sa nourrice. Il est donc expediant auiser diligemment qu'elle soit sage & bien moriginee, soigneuse de l'enfant, nullement despite ne malicieuse : car sa malice, aussi bien comme nous auons dict du troublement de l'esprit, la tireroit iusques là, qu'elle ne se soucieroit de l'enfant, & ne luy feroit point douce, ainsi comme veritablement elle doit estre, luy ablandissant, le cherissant & traitant doucement : maintenant le baignant, maintenant chantant, quelque fois dancant avec luy, le tenant en ses bras, vne autre fois luy baillant la mamelle : brief, faisant toutes choses qui le renouyffent & engardent de l'ennuyer, selon ce que Galien ordonne au liure premier du Regime de santé, chap. vij. Il faut, dit il, que la nourrice soit prudente, & cognoissant la coustume de l'enfant, pour luy bailler ce qu'il demande, & luy oster ce qui l'attriste, en luy faisant feste, le mouuant entre ses bras, en disant des chansons, en nettoyant les ordures de son corps, & de ses vestemens.

*IIII. De la façon naturelle des mammelles,
& des tetins.*

Et tout ainsi comme cy deuant nous auons dit, en la condition de son habitude, que sa poitrine doit estre forte & assez ample, aussi nous disons en cest endroit de la condition

de ses mammelles, (iaçoit qu'elle pouuoit estre traitée, entre les parties de l'habitude du corps: toutesfois pour plus clai-
re doctrine, l'auons cy tirée a part) qu'il est requis qu'elles
soyent assez fermes & grosses, non lasches ne pendantes,
moyennes entre dures & molles. Car celles qui ont vne
fermeté, digerent mieux le laiçt de leur chaleur naturelle,
laquelle est tousiours plus forte en vne chair ferme & soli-
de, pleine de veines & arteres, qu'elle n'est en vne chair las-
che & mollasse, en laquelle elle est quasi estouffée par les
humiditez: & celles qui ont moyenne & suffisante gros-
seur, comprennent du laiçt suffisamment pour la nourri-
ture de l'enfant. La grosseur ou grâdeur desmesurée, char-
ge trop la poitrine, & les parties pectorales: puis la vertu
lactifiante, qui est en icelles espandue au large, ha moins de
force: d'auantage, elle est ennuyeuse & desplaisante, voire
a la nourrice mesme. Celles qui sont lasches & pendantes,
ne peuuent par leurs bouts, qui tirent pareillement en bas,
ietter droit le laiçt en la bouche de l'enfant: & l'enfant tra-
uaille a les dresser & tenir droicts, suççant le laiçt. Celles
qui sont dures & ferrees, ont le laiçt quasi foulé & pressé, par
quoy il flue difficilemēt quād l'enfant le succe: puis encore
l'enfant imprimant le bout du nez en la māmelle, la trouuāt
trop dure, se tourmente. Les molles qui sont ainsi cōme les
lasches, n'ont point la vertu lactifiante, viue, & assez forte.
Les bouts des mammelles ne doiuent point estre retirez ne
enfoncez, pour ne trauailler l'enfant a les tirer & succer: &
a la verité ne les pourroit prendre qu'a grand' peine.

V. De la distance du temps depuis son enfantement: & en
quel temps la Nourrice perd son laiçt.

Iacoit que selon l'opinion d'Auicenne, de Gordon, & du commun peuple, la mere peut nourrir les deux premiers iours passez son enfant, s'il n'y ha aucun empeschement, cōme nous declarerons au liure suiuant : touteffois si nous croyons audit Auicenne, mesme la cinquiesme condition qui est requise en vne nourrice, est, que pour le moins elle soit lointaine d'un moys & demy, ou de deux, quand elle commance d'alaiter l'enfant nourrisson depuis qu'elle ha enfanté. Car cōme dict Iaques des Pars, son expositeur, tout le premier moys quasi elle n'ha pas esté nette : & pour n'auoir bougé du liēt, & par faute d'exercice, ha amassé beaucoup de superfluitez. Parquoy attendant que son laiēt se restituera en bonté, il conseille que par l'espace de quinze iours, pour le moins, apres vn moys passé, elle s'exercite moderément, & vse de bonnes viandes, puis cōmance d'alaiter l'enfant. Or qu'elle cōmance plus tost, ou lors seulement, tant y ha, que Paul d'AEgine dit, que ce sera vn grand bien a l'enfant, qu'on le baille a nourrir a vne qu'il n'ayt pas long temps qu'elle ha enfanté : parce que le sang lors vient en abondance aux māmelles, dont s'en endre plus de laiēt : que si apres les deux moys, la nourrice demeure sans donner a tetter, ou autrement tirer son laiēt, Nature deuient nonchallāte d'en plus engēdrer, & celuy qui est engendré, cōmance d'enuicillir & moisir, declināt a corruption.

VI. La qualite, & le terme de son enfantement & le sexe de son enfant.

Ce sera encore plus grand bien pour l'enfant nourrisson, dit l'AEginete, que la nourrice ayt fait son dernier enfant masse : qui est vne sentence tiree d'Hippocrates, estimant que la femme qui ha enfanté vn masse, ayt le sang plus elaboré & moins excremēteux, dont le laiēt engendré est sem-

blement meilleur, & ha moins d'excrement. Et pourtant dit bien Auenenne, qu'il faut entre les autres conditions que doit auoir vne bonne nourrice, qu'elle ayt esté accouchée d'un enfant masle. Et adioust, qu'il faut encores que le temps soit naturel de son accouchement, & qu'elle n'ayt point auorté, n'accoustumé d'auorter. Ce qui ha esté déclaré par Iaqués des Pars, Il est requis, dit il, que le dernier enfant qu'elle ayt fait, soit masle : parce qu'une telle nourrice ha le lait plus pur, & mieux digéré que celle qui fait vne femelle. Car l'enfant masle durât qu'il estoit dans le ventre de sa mere, l'eschauffoit de sa chaleur naturelle plus que la femelle, d'autât que le masle surmonte la femelle en chaleur : ce qui se cognoist par experience, car la femme grosse d'un masle se porte mieux, & plus alaigremēt, & est mieux colorée. En apres il couient que son enfantemēt soit venu a terme naturel, c'est a dire, au bout de neuf mois, ou pour le moins au bout de sept : & ne faut qu'elle ayt perdu son fruit, ny soit subiette a faire auortemēt : car cela est signe qu'une telle femme n'est saine en ses membres generatifs, ny en ceux qui leur seruent, ou qui ont avec eux grand alliance.

V I I. La Nourrice ne doit estre enceinte.

Outre les conditions susdites, on doit choisir vne nourrice qui n'ayt conceu, & ne soit empeschée d'enfant : car celle qui est pleine ne doit estre nourrice, attendu que le meilleur de son sang est employé a nourrir le fruit qui est dedans son ventre : car l'enfant conceu ha en soy cōmancement de vie, par lequel il attire sa propre viande de tout le corps de sa mere a soy, & ne demeure plus sinon du mauuais lait es mammelles. Parquoy auenāt aussi que la mere qui nourrit son enfant fust empeschée, faut trouuer vne autre nourrice.

En la huitiefme & derniere condition, qui est requise a bien choisir vne nourrice, on considere la nature de son laiët. Et combien que i'aye mis ceste condition la cinquieme: toutesfois parce que le discours en est long, ie l'ay reservee en ce lieu:& pour en faire vne doctrine plus claire, & mieux ordonnee, i'en ay fait vn ou deux chapitres particulierement.

Des conditions requises en vn bon laiët, & de la difference des natures de laiët. C H A P. I I I.

ON FAIT iugement & preuue du laiët a la substance & corpulence, a la quantité, a la qualité: c'est a sauoir, a la couleur, a l'odeur & au goust. Car il est bon, quand il est moyen entre gras & meigre, vni & semblable en toutes ses parties, ne petit, ne gros, ne trop fluide, ne de beaucoup d'escume, de quantité suffisante, de couleur blanche, doux au gouster, ne sentent point mal. Au contraire, celuy est mauuais, qui est gras, gros, espois, ou meigre, petit & aqueux ou escumeux, & quand on en met sur l'ongle du poulce, coule trop viftement ou lentement: de couleur plôbine & grise, ou verte, ou iaune, ou rouge: de goust amer, ou salé, ou aigre, ou fort, ou stiptique & aspre: de mauuaise senteur & fade. Parquoy en l'espreuue de la bonté du laiët cinq conditions sont requises: premierement que sa substance, puis sa quantité soyent moderees: puis la couleur, la saueur, & l'odeur soyent telles que plus amplement declarerons cy apres.

I. De la substance du laiët, & la maniere de la cognoistre.

La substance du laiët doit estre moyenne, entre subtile ou

aigueuse, & grosse ou fourmageuse : les parties dont elle est composée, pareilles & vnies : car par ce, est signifié que la vertu lactifiante ha pleine domination en la digestion du laiçt. Le laiçt qui est aigueux & fluide comme meigue, demontre qu'il est indigeste, ne donnant point de force a l'enfant, ni de nourrissement stable : celuy qui est trop gros & abondant en substance fourmageuse, se caille facilement en l'estomac, cause opilations, engendre calculs. Et si l'on cognoist au laiçt visiblement & distinctement la partie aigueuse & celle qui est fourmageuse, on peut iuger qu'en la māmelle il n'est pas digéré vniformement : & pareillement il ne se digererait pas tout d'un train ni facilement dans l'estomac de l'enfant : ains la partie aigueuse & fluide ferait penetrer & passer outre la plus grosse & visqueuse auant qu'estre digeree, & se ferait oppilation de foye. Si le laiçt est abondant en escume, telle abondance signifie ou ventositez meslees en la substance du laiçt, lesquelles ont empesché en la māmelle sa parfaite digestion, & l'empescheroient pareillemēt en l'enfant : ou bien elle donne a entendre qu'il y ha ebullition faicte au laiçt par vne chaleur superflue. Or maintenant pour esprouer de quelle substance le laiçt est, on en tire de la māmelle quelque goutte sur l'ongle, & s'il coule & se respand sans bouger l'ongle, il est aigueux, & petit : & s'il ne coule point en baissant l'ongle, il est gluant & gros : mais s'il demeure ferme sans incliner l'ongle, & en le panchant il coule tout bellement, c'est signe qu'il est de moyenne substance, & tel est bon. On l'essaye encore en vne autre maniere. On met du laiçt tiré tout chaudement de la māmelle de la nourrice, dans vne ampoule, ou autre vaisseau, puis on iette dessus vn peu de myrrhe mise en

poudre, ainsi comme conseille Auicenne, la meslant avec le doigt : car par la myrrhe se separe l'aquosité du lait d'avec la substance fourmageuse : que si elles sont égales, signifient que le lait est temperé en sa substance : & s'il y ha plus d'aquosité, le lait est trop petit : s'il y ha plus de substance fourmageuse, le lait est trop gros. Oribase & Paul d'AEgine conseillent de l'experimenter avec de la presure, ainsi comme on fait cailler le lait de vache ou de chieure.

II. De la quantité du Lait.

Le peu de lait, outre ce qu'il ne suffist pour nourrir l'enfant, aussi ne peut estre guere bon : parce qu'il argue vne complexion trop chaude ou trop seche du corps de la nourrice, ou la complexion chaude ou froide des mammelles, ou qu'il y ha oppilation & debilité de la vertu, tant de celle qui attire, que de celle qui lactifie. D'autre costé, la trop grande quantité n'est pas bonne, tant pour la nourrice que pour l'enfant, de crainte qu'il ne se foule & caillebote es mammelles, & se corrompe. Toutesfois selon l'oppinion de M. Iaques des Pars, il vaut mieux que la nourrice ayt plus de lait que moins, pour troys raisons. La premiere, a fin qu'il flue plus librement aux bouts, & que l'enfant ne le tire point de loin du dedans avec peine. La seconde, a fin que la nourrice puisse quelques fois en nettoyer les ordures des yeux, & adoucir les aspretez du cuir de l'enfant. La troysiesme, a fin qu'apres en auoir tiré deux ou troys fois le matin, principalement auant qu'alaiter, il en demeure assez pour la nourriture de l'enfant.

III. De la couleur du Lait.

Et parce que le lait n'est autre chose sinon cōme vn sang blanchy, & que celuy qui est de sang temperé est tout blanc,

on doit reietter celuy qui est d'autre couleur. Car s'il tire sur le brun, c'est signe de melancholie: s'il est verdoyant, il signifie adustion: s'il iaunist quelque peu, il demôstre qu'il y ha de la cholere: & s'il est rouge, il declare que la vertu lactifiante est debile, & que le sang venant aux mammelles ha trouué leurs veines & arteres, & leurs chairs glanduleuses, tellement debiles, qu'elles ne sont pas suffisantes de le conuertir en blâche couleur: ou bien que le sang demeure si peu es mammelles, qu'il ne peut estre blanchy suffisammêt.

IIII. De l'odeur du laiët.

Le laiët doit auoir la senteur douce, & non autre. Car s'il est puant, il signifie putrefaction ou disposition a icelle: & s'il est fort a sentir, ou s'il sent l'eschaufaison, c'est signe de chaleur superflue, ou de sang aduste: & s'il sent l'aigre, il donne a entendre qu'il y ha permission ou domination de melancholie naturelle, ou de flegme aigu, ou bien que le laiët mesme seroit aigry es mammelles, a cause de leur froideur, ainsi côme il luy aduient quâd il est en vn estomach froid: & s'il ha la senteur comme d'une chose verte, c'est signe qu'il est d'humeur terrestre & melancholique.

V. Le goust du laiët.

Il ne faut pas aussi que le laiët soit amer, ne qu'il ayt le goust salé, ne qu'il soit aigre a sentir a la langue, ne stiptique, ne aspre, ne fort. Car l'amertume donne a penser qu'il y ha beaucoup de cholere meslee, ou de l'adustion: la salure argue le flegme salé, ou meslé avec cholere, ou que le laiët ayt ceste saueur par decoction superflue: l'aigreur demontre l'abondance du sang aigueux, & le peu de chaleur naturelle: le goust stiptique & aspre signifie l'humeur terrestre & melâchologique. Le laiët fort ayât goust d'espice, vient

totalémēt de sang trop chaud & cholerique, lequel combien qu'il soit mauuais a l'enfant, encor est pis quand la nourrice le baille a succer estant a ieun, pour troys raisons. Premièrement, par ce que tout ainsi que le iusne aiguise la cholere & le sang, aussi il rend le laiēt aigu & corrosif. Secondémēt, parce qu'a ieun & en la fain, le corps de la nourrice rauit & tire a soy le meilleur sang, & du pire, qui est enleué aux māmelles, s'engendre le laiēt. Tiercement, c'est que le plus souuent la nourrice qui ha le laiēt de ceste qualité, quand elle est a ieun, elle sent mal, & de sa senteur peut faire nuisance a l'enfant: sinon qu'elle ayt mangé & prins quelque chose qui empesche les vapeurs & fumées puantes de venir en sa bouche.

Comme on doit corriger le mauuais laiēt de la Nourrice.

CHAP. IIII.

OR POVRCE qu'on ne trouue pas tousiours des nourrices qui ayent les qualitez & perfections susdites, & que bien souuent celle de qui on est contrainct de se seruir, encor qu'elle soit parfaicte, neâtmoins ha quelque faute & imparfection en son laiēt: apres qu'on voit qu'on n'en peut trouuer vne autre qui l'ayt parfaictement bon, il le faut preparer & corriger selon qu'on le vera imparfaict en substance, ou en quantité, ou au goust, ou a la couleur, ou en la senteur: faisant tenir a la nourrice le regime selon la discretion que le laiēt requiert.

I. La maniere de corriger la substance du laiēt.

Si le laiēt est trop gras & gros, parce que c'est a dire qu'il est flematique & excrementeux, pour le changer, faut purger la nourrice, luy faisant vomir le flegme: laquelle se prouuera

prouoquera le vomissement avec le doigt mis dans la bouche, apres luy auoir fait boire de l'oxymel simple tiede, ou comme aucuns conseillent, de l'oxymel squillitique, lequel outre ce qu'il incise & fait sortir les humeurs grosses & visqueuses, échaufe les parties pectoralles. On rend l'oxymel plus vomitif, quand on fait tremper dedans, par l'espace de deux heures, du raphane coupé menu : puis apres auoir ietté le raphane on boyt l'oxymel. Le raphane même est vomitif, quand on le mange beuant puis apres de l'eau tiede. Raphane est vne racine dont il y ha deux especes, l'vne est appelée rayfort, l'autre minson, dit autremét, pain de pourceau, non celuy qu'on appelle artanita : lequel minson est fort vomitif. Apres on trouue bon, par le conseil d'Auicéne, que la nourrice pour inciser & amenuiser ses flegmes, boiue par quelques matins de l'oximel simple, ou de celuy que des Pars son expositeur, appelle diaspermaton : c'est a dire, composé avec des semences principalement apperitiues, ou celuy qu'on appelle oxymel diureticon : c'est a dire qui prouoque les vrines, estant dissout avec vn apozime de mente, hyssope, thym, origan, ou seblables, fait en ceste maniere. R. mentastri, hyssopi, thymi, origani montani, singulorum siccorum manip. singulos, fiat decoct. in aqua fontis ad lib. ij. in qua percolata dissolue oxymelitis diuretici vnc. viij. fiat potio, de qua dentur vnc. iiij. nutrici quotidie, mane. Et luy faut aussi, dit Auicenne, bailler a manger du cresson alenois, qu'il nôme atharech, les Latins nasturtium, & autres diuretiques semblables, comme persil, fenail, anis : & luy faire vser en ses viandes, comme en bouillons, en purees, en faufes, du thym, origan, sarriette, safran, clou de girofle, & semblables. Et si elle est de complexion choleureuse, & ne-

antmoins ha son laiët gros, faut luy donner a boire de l'oxymel simple, ainsi comme conseille ledit Auicenne, avec du petit vin ensemble, ou chacun a part, l'un apres l'autre : car vn tel vin ainsi temperé, subtilie les humeurs, & n'eschaufe point la personne. La nourrice doit prendre exercice deuant le repas, a fin de subtilier son sang & son laiët : car l'exercice prouoque & fortifie la chaleur, laquelle eschauffe l'humeur froide, fond l'humeur visqueuse, & la subtilie, & fait sortir les superfluitez. Apres le repas l'exercice n'est pas bon, & porte plus de dommage que de profit, engendre le flegme, parce qu'il raut de l'estomac, & distribue es venes les viandes auant qu'elles soyent digerees. Si au contraire le laiët est trop petit, on le corrige en ceste maniere. On ordonne premieremēt qu'elle se repose, & ne prenne exercice, qu'elle se nourrisse de viandes qui font gros sang, cōme de pain non leué, de ris, d'oreilles & pieds de pourceau, de ventre & pieds de veau, de mouton, de tetines de vaches, de poisson, d'huistres, de fourmage, de potages, de grosse chair s'abstenant de salades, de fruiëts, fors des figues & raisins de Damas: qu'elle boiue, s'il n'y ha rien qui empesche, du vin doux, couuert, ou du vin cuyt, comme conseillent Oribase & Paul, ou du moust cuyt, comme ordonne Auicenne. Et faut aussi qu'elle dorme longuement, car cela fait le sang gros, & par consequant le laiët.

II. La maniere de corriger la petite ou trop grand' quantité de laiët.

Quelquesfois aduient que la nourrice ha trop peu de laiët, & quelquesfois aussi qu'elle en ha trop. Si donques on voit qu'elle n'en ayt pas assez pour nourrir l'enfant, il faut

cōsiderer qui en est la cause: si c'est point ou quelque mau-
uaise complexion de tout son corps, ou de ses mammelles
seulement. Car si c'estoit ou qu'elle ne mangeast guiere, ou
qu'elle vst de viande de peu de nourrissement, ou qu'elle
eust des sollicitudes & ennuy, on y trouuerroit bon &
prompt remede, luy faisant faire bonne chere: ou qu'elle
eust heu quelques trop longues & superflues euacuations,
on auiseroit de les restraindre, & de la refaire. La comple-
xion qui plus diminue & consomme le laiçt, est la chaude,
& aussi la seche. Celle de tout le corps se cognoist par cer-
tains signes, & celles des māmelles par attouchemēt, & a la
veüe. Parquoy faut corriger la chaude par vn regime refrai-
chissant: comme de manger espinars, pourpié, laiçtues, or-
ge-mondé: ie dy speciallement laiçtues cuittes, lesquelles
outre ce qu'elles refraichissent, font venir le laiçt, luy fai-
sant boire de la tisane ou eau d'orge. Et ce que indetermi-
nement Auicenne ordonne a quelque occasion de faute de
laiçt, specialement est bon a ceste complexion, faisant mā-
ger a la nourrice des bouillons & potages faiçts d'orge & de
son, en ceste maniere: On fait tremper deux poignées de
son en bouillon de chair, tout chaud, & le laisse on repou-
ser quelque peu de temps: puis on le coule, puis on y met
cuire deux poignées d'orge-môdé a perfection. & puis on le
baille a manger a la nourrice. La complexion seche requi-
ert en general l'usage de toutes choses qui humectent, cō-
me de bons potages de chair de veau, de porc, de ieune
mouton, de poullaille, euitant toutes espiceries, le vin-
aigre, & le verius. Les tetines specialement de brebis, ou
de chieure cuittes avecq' leur laiçt, ainsi que conseille A-
uicenne, outre ce qu'elles sont bonnes a manger a vne

nourrice seiche, profitent aussi a remplir les mammelles, soit par similitude de substance, soit par quelque propriété qui est en icelles : & pour cela sont encores bonnes a toutes nourrices d'autre cõplexion : & pareillement les chaudiæ de laiçt de vache, & de chieure luy sont bons, lesquels Haly ordonne a toutes nourrices qui ont faute de laiçt : & est fort propre pour vne telle nourrice, l'ordonnance que faict le mesme Haly a toutes autres nourrices, pour faire multiplier le laiçt aux māmelles, d'vser de bouillon de pois ciches entiers, ou de leur farine cuitte avec du laiçt, ou de fenoil vert tant des fueilles que de la semence, ou de lanis, le tout pareillement cuiçt avec du laiçt. Le vin doux luy sera bon, ou autre vin, pourueu qu'il soit petit & trempé d'eau, en laquelle on aura fait bouillir les fueilles & racines de mauue, avec fenoil, tant pour humecter que pour augmenter le laiçt : & ne faut qu'elle prēne beaucoup d'exercice, & n'ayt point de soucy, & qu'elle dorme longuement. La complexion froide, specialement des mammelles, peut aussi estre cause de faire perdre le laiçt : car le froid empesche la digestion, reprime la multiplication du sang, lequel est chaut naturellement, & par consequant la generation du laiçt. Il aduient aussi quelquesfois qu'il y ha oppilation es veines qui sont es chairs glāduleuses des māmelles, laquelle empesche l'abondance du laiçt, soit a cause de la cõplexion froide susdicte, ou pour ce que les humeurs sont trop grosses & visqueuses, qui oppilēt lesdictes veines. Et peut estre aussi que la vertu des māmelles, tant attraçtue que lactifiāte est foible & debile. Parquoy pour faire venir le laiçt, faut corriger ladicte complexion, & oster les oppilations, fortifier la vertu, laquelle attire le sang, & forme

le lait es mammelles : en ordonnant vn regime conuenable a ces trois choses, lequel deura estre de nourrissement subtil declinant a chaleur, & neantmoins ayant la vertu de produire le lait par certains propriete. On nourrira doncques la nourrice, ainsi comme cōseille Auicenne, de bouillons de chair ou de bouillons de iaunes d'oeufs, cuiets avec feuilles ou semence ou racine de fenoil, ou avecq' legums, comme feues, pois, & ciches, ou avec racine ou semence de pastinague, dicté en Arabe, banchia : en Latin, daucus : ou avec la semence d'anet, ou avec la semence de nielle : lesquelles choses, par le tesmoignage de Dioscoride, ont la vertu de faire venir & augmenter le lait aux femmes. Haly fait cuire les ciches avec du lait, aucuns avec du macis, du rommarin, & semblables. Plusieurs baillent pour cela, a humer le bouillon de pois, avecq' du poiure. Oribase & Paul, font prendre de l'orge mondé, qu'ils nomment tiszane, cuiet avec la racine & semence ensemble, ou seulement avec la semence de fenoil : le fenoil doux luy est bon a manger en toutes manieres. Elle mangera aussi des capres, & de la salade de racines de pastinague, tant sauvage que domestiques, lesquelles ont manifestement la vertu d'eschauffer, & subtilier les humeurs, & occultement d'engendrer le lait : la semence en est bonne a manger au matin, ainsi comme la semence de fenoil doux, la quantité d'vne petite cueilleree. Elle boira du vin trempé d'eau horillie avec du fenoil. Et ceste est la plus gracieuse maniere de viure que lon luy puisse ordonner a ceste intention. Auicenne ordonne autres sortes de breuuages estranges & facheux a prendre, cōme du vin avec du beurre fondu, ce qui est toutesfois assez vûté en Flandre, & en Allemagne : mais pour autre intention.

Aussi des bouillons de testes de poissons salez, comme de haranes, sardines, anchoyes, cuittes avec de l'anet, & en prendre le matin & le soir par plusieurs iours, en ceste maniere. R. aqua decoctio nis anethi lib. iij. in qua elixentur sex capita halicum, fiat colatura, de qua bibantur quaque vice vnc. iij. Et donne pareillement du vin, auquel on ha fait bouillir du rayfan & du son, en ceste maniere. R. furfuris P. j. radicum raphani minutatim incisarum drag. ij. bull. in vini lib. j. coletur vinum, & bibendum detur nutrici. Et fait encore vn autre breuuage, qui est assez espois, qu'il dit estre de grand'efficace, composé en ceste maniere. R. sem. anethi vnc. iij. sem. fülle, id est, herbae arthriticae, sem. fenugraeci an. vnc. ij. terantur & permissceantur succo feni- culi, melle, ac butyro: detur nutrici ad bibendum vnc. j. singula vice, inquit Iacobus Partianus, cum vnc. iij. vini. Et fait quelques fois boire aussi du vin coulé, apres qu'il ha esté mélé avec de la farine de sisame, le matin & le soir: dont la mesme Mars fait ainsi la recepte. R. farinae sisami, recepta et mola triti, vnc. s. misce cum vnc. iij. vini: deinde coletur vinum per totam aut stramineum, & propinetur. Et dit d'auantage, qu'aucuns ont expérimenté, qu'une dragme de poudre de vieux bois pourry mangé de vers, prinse au matin au leuer, ou au soir au coucher, avec vn bon traict de tisane, est vn singulier remede a faire venir le lait a la nourrice. Et dit encores, qu'aucuns font prendre a la nourrice, en la mesme dose, avec tisane, des lesches, c'est a dire des vers de terre ditz lumbricz, sechez & mis en poudre. La semence de buglosse sauuage mise en poudre, & beüe avec du vin ha mesme vertu, ainsi comme dit Tragus: aussi ha la semence de nielle prinse pareillement en breuuage. Ori-

bale & Paul, reçoit qu'ils ne rient que toutes telles choses medicinales, que les anciens ont accoustumé d'ordonner, pour faire venir le lait, ne soyent bones aucunement: toutefois ne conseillent d'en vser continuellement, comme les estimant estre choses qui consomrent les humeurs violement, & desechent la personne. Ils ordonnent vn cataplasme fait de semence de nielle, cuitte avec du vin passé, c'est a dire du moult, ou du vin cuit, & de semence d'anet, & de racine & semence de pastinque: puis l'appliquent chaudement sur les mammelles: qui sont les mesmes choses qu'Auicenne fait prendre par la bouche. Le mesme Auicenne fait faire vn liniment ou emplastre de fiente de tourde (c'est vn oiseau, dit laques des Pars, de couleur grise, qui fait son nid de terre, aucuns l'appellent traye ou griue) la meslant avec du lait & de l'huile d'oliue, en ceste maniere. R. ster-coris turdorum lib. s. teratur, superfundatur lactis & olei an. parum, donec coeant in spissitudinem emplastri, extend. in aluta vel tela, & applicetur. La nourrice outre cela, doit frotter sa poitrine & ses mammelles, pour faire attraction du sang en telle part. Et sera fort bon par l'ordonnance des susditz docteurs, d'y appliquer des ventoses au dessous, sans grande flâme, de peur qu'elles ne tiennent trop fort au cuir, parce qu'estant la chair molle, elle s'enderoit facilement, & la ventose pleine s'attacherait difficilement: que s'il auenoit il conuiendroit, dit Oribase, environner la ventose d'une esponge mouillée d'eau chaude, pour la faire lascher, ou bien la percer & rompre.

III. D'oster la nuissance de la trop grand' quantité du lait.

Le lait nuit quelquesfois quand on en ha trop: ou parce qu'il est retenu par compulsion, ou par son espaisseur. Et

pour le diminuer & remettre en quantité mediocre, Aui-
cenne ordonne les remedes qui s'ensuyuent. Le premier
est, que la nourrice mange peu, & vse de viandes de petit
nourrissement, cōme sont purees meigres, herbes, fruidts,
pain bis. Le second, qu'elle mange souuent de la mente.
Le troisieme, emplastrer les māmelles de limon broyé avec
vinaigre : ou de bouë de terre, ou d'argille avec vinaigre :
ou de l'entilles cuictes avec vinaigre. Le quatriesme, apres
auoir mis l'emplastre sur ses mammelles, luy bailler a hu-
mer vn bouillon de quelque chose salee : ou vn peu de vin-
aigre salé, melle avec de l'eau. Le cinquiesme, elle mange-
ra aussi des lentilles cuictes avec vinaigre, dequoy mesme
elle aura faict vn empiastre.

IIII. La maniere de corriger la mauuaise odeur du lait.

Si le lait est sentant mal, on corrige la mauuaise senteur
en deux manieres : l'vne en preparant le lait pour le don-
ner presentement, l'autre en reiglant la nourrice par re-
gime. Premièrement doncques on doit donner a manger a
la nourrice des viandes de bon suc, & de facile digestion,
apprestees avec canelle, girofle, sandaulx : & luy bailler a
boire de bon hypocras, ou maluoisie, & vin semblable : luy
faisant vsier de choses aromatiques & de confitures, euitant
repletion & crudité. Quant a la maniere de preparer le lait
qu'elle doit presentement donner a tetter, auant qu'il puis-
se estre corrigé par regime, lors qu'elle aura ia commencé
de nourrir l'enfant, par ce qu'il ne le faut laisser sans nour-
riture, ce temps pendant qu'elle mettra peine a corriger la
mauuaise odeur de son lait, par le regime susdict : elle ne
laissera d'alaicter l'enfant, en tirant vne bonne quantité de

son lait, qu'elle mettra a l'air, & le laissera reposer quelque peu, pour faire euaporer par ce moyen la chaleur qui faisoit la lenteur forte.

V. La maniere de corriger le lait de mauuaise couleur, & saueur.

Il faut instituer vn regime totalement opposite a la generation des humeurs, qui sont le lait a elles semblable, & purger icelles par medicamens propres. Quant a la saueur, si le lait est trop aigu, & trop fort, se doit donner a teter estant la nourrice a ieun: & pource qu'un tel lait est trop chault & cholerique, elle ne doit trauailler ne prendre trop grand exercice, euitera espiceries, vsera de bouillons & potages de chicoree, bourrache, & semblables: mangera chair de veau, & de porc, pour rebouscher l'acuité de l'humeur bilieuse, sinon qu'elle soit ou de petit estomach, ou subiette a oppilation de foye, & de reins: parce que le porc est vn peu visqueux: boira de petit vin avec beaucoup d'eau: se gardera de se cholerer.

V. I. Du lait caillé, & si la mammelle est malade.

Si d'auanture le lait estoit caillé, & que la nourrice eust inflammation en la mammelle, ou quelque autre maladie, ne doit aucunement donner a tetter, ains se doit faire guerir: & ce pendant pourueoir a l'enfant du lait d'une autre femme.

De regime de la Nourrice en general.

C H A P. V.

LE REGIME de la nourrice se doit traicter en deux sortes & manieres, en general & en particulier. On reigle particulierement le regime de la nourrice, ou

selon la complexion d'elle mesme, & la qualité & quantité de son lait, ainsi cōme nous auons declairé cy dessus : ou selon la complexion, disposition & habitude de l'enfant, en opposant regime a ces choses contraire : comme si l'enfant est trop chaud, la nourrice doit vser de regime refroidissant son lait, sinon qu'elle mesme soit de complexion froide, & contraire a celle de l'enfant, & ainsi consequemment des autres complexions de l'enfant : & s'il est meigre ou gras, tiendra regime opposite a l'un & a l'autre. Le regime general de la nourrice est celuy qui est temperé, conuenable a toutes complexions & dispositiōs tant de la nourrice que de l'enfant. Ainsi Galien conseille d'auoir soing de la nourrice de ce qu'elle doit manger & boire, comme elle se doit gouverner en son dormir, & en son exercice, a fin que son lait soit temperé : lequel sera tel, dict il, si son sang est fort bon : le sang est fort bon de prendre exercice moderé : de dormir suffisamment, non trop, & en temps conuenable : de manger viandes de bon nourrissement en quantité mesurée, & en temps raisonnable : d'euitier le mauuais air, & ainsi cōme Paul defend, les odeurs puantes & senteurs trop fortes : finalement de s'abstenir de coucher avec l'homme. Ce qu'il vaut mieux expliquer plus amplement, & par le menu.

I. De l'exercice que doit prendre la Nourrice.

On doit ordonner a la nourrice qu'elle vse d'exercice moderé, au matin & au soir deuant le repas, se pourmenant & travaillant sans peine par la maison : car par cela ses superfluités s'euacuent, sa chaleur naturelle se fortifie, & la digestion du lait s'en fait mieux : doit principalement exercer ses bras & ses espaules, mesmemēt a pestrir la paste : parce que les parties superieures exercitees & esmeues, atti-

rent plus de sang, pour engendrer plus de lait, & moins excrementeux.

II. Du manger & boire de la Nourrice.

En après, la nourrice se doit nourrir de viandes qui engendrent bon sang, lesquelles Galien décrit au liure De la vertu des nourrissemens. Il faut premierement que le pain soit de froment bien fait, cuit du iour mesme, estant rassis; que la chair soit de toute poullaille, veau, cheuteau, lapins, perdrix, faisans, pigeonneaux, tourtres, & semblables, qui soyent aisées a digerer. Que le poisson ne soit ne dur ne mol, ne visqueux, ne limonneux, ne nourry en vilaine eau: que les œufs soyent cuits mollets: qu'elle euite les aigreurs, espicerie, fortes, les choses acerbés, stiptiques, ameres, & autres qui corrompent le lait. La roquette, iagoit qu'Auicenne dit, au chapitre du regime de la Nourrice, qu'elle engendre le lait: toutesfois parce qu'elle émeut le coit, fait le sang & le lait cholerique, & excite douleur a la teste, doit estre euitee, & pareillement la moustarde, pour ce qu'elle est chaude & seche au quatriesme degre, & n'est de merueille si elle brulle le sang. La laitue est de bon nourrissement, engendre bon sang, augmente le lait, oste l'enuie du coit, parquoy est fort propre. Les fruits ne luy sont bons, fors les raisins de Damas, & les figues, & selon Auicenne, les amandes & auellanes, lesquelles il dit estre d'assez bonne nourriture: car les amandes, dit Auerrois au cinquiesme de ses Collections, sont temperees en chaleur & humidité, & ont beaucoup de bonnes proprietéz: les auellanes, dit Auicenne, non seulement nourrissent assez bien, mais profitent au cerueau, ce qui se doit entendre les prenant apres le repas. Le vin doit estre claret, & de bonne

odeur : & ne faut qu'elle le boiue, soit naturel ou aromatique, sans y mettre beaucoup d'eau : ains, qui plus est, Aristote au liure qu'il ha fait du Sommeil, ne conseille de bailer a boire du vin aux nourrices non plus qu'aux enfans : que si on le permet, dit-il, faut qu'il soit bien trempé d'eau.

III. De ne laisser coucher la Nourrice avec l'homme.

Galien admonnest, sur tout, que la nourrice, & toute femme qui donne a tetter a l'enfant, s'abstienne de coucher avec l'homme, pour beaucoup de raisons. Car premierement, cela trouble le sang, & par consequant le lait. Secondement, il diminue la quantité du lait, & prouoque les mois, en diuertissant, par le mouuement du coit, le sang des mammelles a la matrice. Et pource, dict Haly, que c'est l'une des principales causes qui corrompt le lait : car cela, dit il, émeut le sang menstruel, le fait sortir, & le lait se change de sa situation. Tiercement, il engendre mauuaise odeur au lait, & mauuaise qualité, tesmoin Aristote au quatriesme de ses Problemes, demandant pourquoy ceux qui sont eschaufez apres les femmes ont mauuaise senteur. La quatriesme raison est, que le coit est cause quelques fois, d'engrossier la nourrice, dont il aduiet double incōuenient : l'un a l'enfant qu'elle nourrit, l'autre a l'enfant qu'elle ha dans le ventre. Car le meilleur sang abandonne les māmelles, estant attiré a la matrice pour nourrir & augmenter l'enfant, qui y est conceu, & le pire se retient aux māmelles, duquel se fait le lait pour le nourrissemēt de l'enfant nourrisson, lequel se corrompt & diminue : parquoy l'enfant qui est au dedans de la nourrice ne prend suffisante nourriture, & l'enfant qui est au dehors en prend de mauuaise.

L'INSTRVCTION DE LA SAGE

FEMME DES ACCOVCHÉES,

& de la Nourrice, au gouuement de
l'Enfant nouveau né.

LIVRE II.

PAR

*M. Sim. de Vallambert, Medecin de Ma-
dame Marguerite de France, Duchesse de
Savoie, et de Berry.*

N TOUTES choses, le principal est de bien
cōmancer, & est vn homme en train d'vn grand
E auancement, quand il ha bonne entree : par-
quoy faut penser du cours de nostre vie, que si le
commencement de nostre eage est bon, tous les
autres eages iront bien, & passeront iusques au bon bout :
& au contraire, s'il est mauuais, tout le reste demourera
ou ira a mauuaise fin. Et comme lon voit es fondemens
d'vne maison, s'ils ne sont bons, tout ce qu'on bastit dessus
va en ruine : ausi es fondemens des eages de l'homme, si la
premiere enfance n'est composee comme il faut, on ne peut
rien bien esperer de la ieunesse, ne de la longueur de la vie,
ne de la santé. C'est donques vne chose de grande conse-
quence sauoir bien gouuerner l'enfant nouvellement né : &
croy que l'estat des sages femmes & nourrices, qui manient
& gouuernent l'enfance, n'est pas moindre que des peda-
gogues & maistres, qui forment & instruisent la ieunesse,
& peut estre plus grand : d'autant que de l'enfance vient la
ieunesse, & sans elles, ils ne seroyent. Je feray seulement
ceste petite exception, qu'elles sont auteurs de la saine &

30 INSTRUCTION POUR LA SAGE-FEMME
longue vie, & eux de la sainte & bonne vie. Parquoy, tout
ainsi commelon doit élire sçauãs pedagogues & sages gou-
uerneurs, pour bien endoctriner & gouuerner les enfans ia
grands, aussi conuient il choisir bõnes & sages femmes, &
nourrices, pour bien former & traiter les petis nouuellemēt
nés: mais parce que la plus grand' part d'icelles sont ignorā-
tes, & se cõmet beaucoup de fautes enuers les enfãs par leur
ignorance, i'ay entrepris d'escrire ceste instruction, pour les
enseigner: laquelle i'ay mise en lāgue Françoysse, a fin qu'
on ne le trouue estrange. Car ce qui m'ha émeu d'ainsi le
faire, est que ie la desire estre entendue des femmes de
France: en autre matiere de Medecine, qui appartiendrait
seulemēt a la cognoissance des Medecins, ie ne le pourrois
entreprendre publiquemēt: parce que nul ne peut bien sça-
uoir la medecine, ni ne doit s'ingerer de la traicter, s'il n'est
instruit & sçauant es lāgues, esquelles ont escrit les anciēs
& premiers Medecins. Et ne trouue pas bon, qu'au temps
présent tāt de gens se meslent de mettre en François, & pu-
blier Galien, Dioscoride, & quelques pratiques de nou-
ueaux Docteurs, cuydant les donner a entendre a gens ru-
des & ignorans, lesquels abusent de la Medecine: qui est
chose de pernicieuse consequence, & qui doit estre prohi-
bee par Edict de Roy, & de tout Prince: mais cecy se doit
dire en autre lieu. Ie reuiens au propos de mon entreprin-
se, prenant mon commencement des l'heure que la sage-
femme ha receu l'enfant du ventre de la mere.

*De lier le nombril de l'enfant incontinant que la sage-femme
l'ha receu. C H A P. I.*

SI TOST que l'enfant est né, faut lier premieremēt son
nombril, puis le couper. L'vne des principales raisons

pourquoy on le doit lier auant que le couper, est de peur que le couppant premierement il ne sorte flux de sang, tant des veines que des arteres de l'enfant, lesquelles se tiennent au nombril, & que par consequant il ne s'euapore grand' quantité des esprits vitaux & naturels, qui pourroit estre cause de la mort de l'enfant. Vne autre raison est, de crainte que l'air n'entre dans les veines coupees & ouuertes, lequel n'estant corrigé ne purifié par la chaleur naturelle, altereroit le sang cōtenu en icelles, & les esprits tant vitaux que naturels, qui sont enuoyez par icelles par tous les membres, & parautant seroyent les membres rendus mal-sains & debiles : & qui pis est, parce que le corps de l'enfant est delicat & sensible, estant ainsi refroidi, l'enfant mourroit.

Encor' vne autre raison est, que lon craint qu'il ne sorte par le nōbril quelque aquosité, ou autre chose, qui saliroit l'enfant, si le nombril n'estoit lié auant qu'estre couppé. On allegue encore vne autre raison qu'on le doit lier premierement, a fin que l'enfant ne sente douleur en couppât le nōbril, apres estre serré & lié, estant l'esprit sensitif empesché de venir a l'incision, par la compression de la ligature. Cōbien que ceste raison est friuole, d'autant qu'il semble que la ligature & incision du nombril de l'enfant n'est point alors sensible, attendu que le nombril qui procede de la secondeine n'ha aucun nerf qui luy communique sentiment: comme il ha veines & arteres venant de la mere pour donner nourrissement & vie. La cinquiesme raison, & la dernière, que lon fait venir a propos de lier le nombril, est en intention qu'estant les parties du nombril coniointes & serrées par la ligature, le nombril en soit plus beau, quand l'enfant croistra.

I I. Avec quoy doit estre faite la ligature.

Auicenne dit, que le nombril doit estre lié avec vn fil de laine retort de trois filets, bien nets : lequel ne soit teint d'aucune couleur de teinture, ainsi que dit Iaques des Pars son expositeur : & doit estre retort subtilemēt, afin que le nombril tombe plus tost. Car estāt le fil de laine, il est plus mol, & ne tranche pas si tost comme de chanure, ou de lin, ou de soye : toutesfois celuy de cotton vaut bien autant que celui de laine. Et n'est besoin qu'il soit de laine grasse, ou oincte d'huile rosat, ou autre, comme cuydent aucuns, afin qu'il ne face pas tant de douleur : car comme i'ay dit, le nombril de l'enfant est lors insensible.

I I I. En quel endroict doit estre lié le nombril.

Il doit estre lié a distance du ventre la largeur d'un pouce, & non plus.

I I I I. La maniere comme il doit estre lié.

La ligature ne doit estre trop forte, de peur que la partie qui est outre la ligature ne tōbe plus tost qu'il n'est besoin : ne trop lasche, de crainte que le sang ne flue, & l'air entre dedans. Et faut outre cela, que la sage-femme se garde de presser le nombril vers le ventre de l'enfant : ains plus tost le doit presser encontremont outre l'endroit ou se doit faire la ligature, de peur qu'iceluy sang ia alteré n'entre dans les veines du ventre de l'enfant, & que là detenu ne se corrompe du tout, & cōmunique sa corruption aux veines qui sont continues, & se tiēnent ensemble avec les veines vmbilicales venant de la secundine. Et pourtant deuant que faire la ligature, doit la sage-femme pousser le sang du long du nombril deuers la secundine, & non deuers l'enfant. Car le sang contenu le long du nombril depuis la secundine est
ia alteré

ia alteré, comme j'ay dit, & demy corrompu, a cause de la rompure de la secondine, & des liaisons : & n'est plus bon a nourrir l'enfant, cōme estant delaisé de celuy qui demeure au corps de la mere, pour estre apres conuertý en laiçt, pour la nourriture de l'enfant. Que si par inaduertance de la sage femme, ou autrement, aucune portion dudit sang contenu le long du nombril, entre dans les venes de l'enfant, il ne faut douter qu'il en aduiendra beaucoup d'inconueniens : cōme douleurs, pustules, fiebures, & autres maux. Et ne faut croire ceux qui conseillent aux sages-femmes de presser avec les mains le nombril auant la ligature, & faire couler de son long, du sang au ventre de l'enfant, disant qu'il est bon de le retenir pour sa nourriture, & qu'il luy est encore meilleur que le laiçt, & plus familier, cōme celuy que Nature luy ha preparé, & estoit ia en chemin pour le venir nourrir : ne considerāt point que ledit sang est fort changé par le trauail de l'enfantement : & est vne chose aisee a se corrompre quand il est hors du ventre de la mere, dans la secondine, & n'est plus bon : & encore qu'il fust bon, ce qu'il n'est, touteffoys ne peut plus estre si naturel pour l'enfant que le laiçt, attendu que l'enfantement est chose naturelle, & nature alors demande plus tost le laiçt de la mere que son sang, depuis que l'enfant naturellement est sortý de son ventre.

De couper le nombril apres qu'il ha esté lié.

C H A P. I I.

EN CE PAYS plusieurs sages-femmes couppent incessamment le nombril apres l'auoir lié, sans attendre que la deliure soit dehors du ventre de la mere. Celles qui entendent mieux ces choses, different de le couper iusques

34 INSTRUCTION POUR LA SAGE-FEMME,
a temps qu'elle soit sortie : que si elle tarde a forrir, & est re-
tirée dedans la matrice, cōseillent bien que sans dilation le
nombril soit couppé, l'enfant osté sur le champ, & baillé a
vne autre femme pour le mettre en son giron : & que sou-
dain la sage-femme retourne mettre sa main a tirer la deli-
ure dehors : mais si avec l'enfant la deliure sort, disent qu'
on doit leuer tout ensemble, saoir l'enfant, le nombril sans
estre couppé, & la deliure : puis coupper le nombril là ou
on voudra, ainsi qu'il appartient . Et n'est point neceffaire,
selon leur auis, ni n'ha apparence de profit, que le nombril
soit couppé auât que tout soit leué : ains plustost est a crain-
dre inconueniant , si plustost estoit couppé, d'autant qu'il
tient a la secundine, qu'on appelle la deliure : laquelle, si plus
tost il en estoit separé, se pourroit retirer dedâs le ventre de
la femme, non sans grand danger de sa personne . Et tant
s'en faut qu'on le doie coupper sans attendre a sortir la de-
liure, qu'aucuns, comme Gordon, ont voulu, que tout fust
leué & porté ensemble, & mis au baing , & là le nombril
couppé : la raison est, que ou l'enfant apres qu'il est tié ne
seroit plein de vie, ou seroit refroidy , en luy mettant là de
l'eau toute chaude sur son ventre, cela luy fait reuenir la
chaleur.

ij. *En quel endroit doit estre couppé le nombril.*

On ha tousiours accoustumé de coupper le nombril deux
doigts au dessus de la ligature: & Auicenne & Gordon en-
seignent d'ainsi le faire.

ijj. *Avec quoy on doit coupper le nombril.*

La sage-femme peut coupper le nombril a sa discretion,

ou avec vn rasoir, ou forcettes, ou couteau bien tranchant : & ce faire doucement, & sans aucune violence. Apres cela, au bout de quelques iours, ce qui est demeuré couppé tombe avec la ligature.

iiij. *Quelle chose il faut appliquer dessus le nombril, apres l'auoir couppé.*

Estant faite l'incision du nombril de l'enfant, il y ha trois intentions pour lesquelles il y faut appliquer quelque chose. La premiere est, a fin d'engarder que le sang ne flue par trop. La seconde, consolider le lieu incisé : lesquelles deux intentions sont accomplies par application d'une poudre de myrthe, mastic & sang de dragon. La tierce est de mitiguer & oster la douleur, si aucune y peut estre, & fortifier le membre : laquelle intention est accomplie par application d'un linge trappé en huile rosat, ou huile d'amandes douces, ou huile de myrthe, ou huile de mastic, ou de quelque autre huile semblable. Communement les sages-femmes n'y appliquent point de poudre, ains seulement vn linge trappé en quelqu'une des huiles susdittes.

De regarder incontinant a la disposition & habitude de l'enfant : & de ce qu'il faut faire a l'enfant mal habitué, ou qui n'a point force de vie.

C H A P. I I I.

APRES cela fait, auant que faire autre chose a l'enfant, il faut regarder aux gestes & mouuemens de son corps, a la façon de ses membres, & a sa disposition, s'il est pour viure ou non. Premièrement, s'il crie foiblement, ou qu'il tombe en syncope (qui est signe ou qu'il ha esté engendré debilement, ou mal nourry au ven-

36 INSTRUCTION POUR LA SAGE-FEMME,
tre de sa mere) ou qu'en sortant du ventre il ha enduré op-
pression, ou quelque autre accidant: alors les Sages-fem-
mes le prennent entre leurs bras, l'enueloppēt de linges sans
l'emmaillōter, se seent aupres du feu, si c'est en hyuer, ou
bien s'asseent en autre lieu, si c'est en esté es grād's chaleurs,
& trauaillent a le faire reuenir, ores luy halenant le visage,
ores luy mettant quelque chose en la bouche. Aucunes luy
mettēt du theriaque ou mythridat a la bouche: Aucunes luy
maschent de la canelle ou du girofle, puis luy halenent &
soufflent a la bouche, & au nez: autres luy maschent quel-
ques tablettes, ou poudre cordiale, comme diambra, dia-
moschus, diamargariton, ou quelque autre electuaire sem-
blable. Autres luy mettent a la bouche, ou au nez vn peu de
quelque huile odoriferante: autres luy donnent du vin, ou
mellent avec du vin quelque poudre cordiale pour luy don-
ner a la bouche. Mais sur tout pour le faire reuenir, le hale-
nent fort & souuent au visage, ainsi comme auons dit.

I. Pronostic & diuination de la courte vie de l'enfant.

Si lon voit que pour tout ce que dessus il ne se reuient cō-
me point, ou encore qu'il semble estre reuenue, il ha conti-
nuellement vn petit cry, & comme vn plaint, & n'ha pas
grand souffle, on peut bien iuger qu'il mourra bien tost. Et
s'il passe le premier iour, & es iours suyans si quand on le
doit alaicter, & on luy presente la mammelle, il n'ha pas l'-
enuie ne la puissance de succe le laiēt, c'est aussi vn mau-
uais signe de longue vie. Et pareillement quand il n'ha pas
le nōbril enflē, dit Auicēne, ni ne se mouue, ni ne crie, & ne
peut esternuer du tout, on iuge qu'il est debile, & ne viura
pas, a cause des humeurs superflues qu'il ha au cerueau,
lesquelles il ne peut purger en esternuant, ne mettre hors.

De ce que lon doit faire a l'Enfant plein de vie incontinent apres luy auoir couppé le nombril, auant que le mettre dormir, ou luy bailler quelque chose en la bouche. CHAP. II II.

MAIS quand lon ne voit rien a l'enfant de tout ce que dessus, ains au contraire, se monstre plein de vie, & de bonne habitude, tout incontinent apres luy auoir couppé le nombril, quatre choses sont requises de faire en son endroit, auant que l'emmailloter & mettre dormir, ou luy bailler quelque chose en la bouche. Premièrement, on luy doit nettoyer le dessus de tout son corps, & le plumer: puis refoudre les meurdrisseures & les places ternies en ses membres. Puis oster la lasseté du trauail qu'il ha heu en sortant a malaïse du ventre de sa mere. En apres dresser ses membres, s'ils ne sont bien, & tenir les côduits ouuerts, par lesquels se doit faire l'expulsion naturelle des superfluitez de son corps. Finalement, fortifier le cuir, & la superficie de tous ses membres.

I. Qu'il est besoin de nettoyer le cuir de l'Enfant.

L'enfant estant au ventre de sa mere abonde d'humidité & de chaleur: dont s'ensuyt qu'il se fait vne grande euaporation de toutes pars dedans son nid par les pores de son corps: son nid est la prochaine membrane ditte aumios, qui l'enuirõne, en laquelle icelle euaporation s'espoïssit & cõuertit en sueur, & y demeure iusques a l'enfantement. La partie la plus visqueuse de la sueur, s'attache au cuir de l'enfant, & le rend sale & plein d'ordure. Puis la mēbrane, lors que l'enfant s'estend & veut venir a chef, se rompt en plusieurs parties: dõt aucunes par la viscosité susdite sont quasi collees au cuir. A ces causes est besoin apres la naissance, plumer l'enfant: c'est a dire, le nettoyer de ses ordures.

ij. *Qu'il est necessaire oster la lassete du travail qu'a heu l'enfant, & les meurdrisseures de son corps.*

En apres, l'enfant en sortant du ventre de sa mere quelques fois est serré estroittement par la teste & les espaules : parquoy travaille beaucoup en s'eforçant de sortir, & en deuient las & debile : & s'en engendrent comme meurdrisseures en la superficie de son corps, a cause du sang estraint, & peut estre encores es venes : dont facilement peuuent auenir par apres apostumes & fieures. Et parce, a fin d'empescher lesdits accidents, faut des le commencement mediquement lesdittes meurdrisseures, & oster lesdittes lassetez.

iiij. *Qu'il est expediant de façonner & redresser les membres desfigurez, & contre-faitz, & pareillement ouurir & nettoier les conduits des purgations naturelles.*

Il auient quelques-fois, que les membres de l'enfant, & principalement la teste, a cause de l'issue estroitte du ventre de la mere, est hors de sa droite & propre forme & figure. Parquoy, incontinant que l'enfant est né, ce temps pendant que les os sont mollets & obeissans, on doyt reduire la teste & ses membres, s'ilz sont difformes, en leur forme & figure conuenable. Et outre ce, est besoin de tenir ouuertes & de bonne façon les narines, les oreilles, & le lieu par ou se purge le ventre, bref, les conduits par lesquels se fait la purgation naturelle des superfluitez, en les nettoiant & ostant les ordures : parce qu'estant l'enfant au ventre de la mere, il ne rendoit rien par ces lieux.

iiij. *Qu'il est necessaire d'espoisir le cuir & la peau de l'enfant.*

Comme ainsi soit que l'enfant estant dans le ventre, ayt le cuir tendre & delié, les pores dudit cuir fort ouuerts, & la

tissure & assemblage de ses membres rare & lasche, a cause de beaucoup de chaleur & humidité qui les rarifie & estend : dont il aduient que soudain qu'il est né, il est facile a pénétrer, & a estre offensé de l'air & des rencontres de dehors, desquelles il estoit en seureté dans le ventre de sa mere, estant là armé & enuélépé de beaucoup de couuertes : & nonobstant ce, luy est nécessaire sortant de là, prendre ce grand air, & conuerser entre les corps plus durs que luy, & qui le peuuent offenser & greuer s'il n'y est pourueu : & encores qu'on y pouruoye au mieux qu'il est possible, & qu'il vienne a l'air chaud, ou qu'on le baigne, ou qu'on l'envelope de linge, touteffoys par ce que nostre air, tant chaud soit il, est froid en comparáison du lieu ou il estoit, & que toutes les plus douces choses qu'on luy administre luy sont aspres & dures aupres des enueloppes qu'il auoit, certainemēt incōtinant qu'il est né, il sent tout ce qu'il touche, ou froid ou aspre ou dur, & se prend a crier & a pleurer, cōme sentant l'iniure & offense de l'air & des autres choses. Pour faire donques que son corps ne soit pas si sensible & subiet a souffrir les excez de l'air, & les autres choses exterieures, faut incōtinant luy secourir, en espoississant la rarité de son corps, & fortifiant la tendreté de son cuir, & le dessus de ses membres, a fin qu'il puisse mieux soustenir & supporter le hurt & les rencontres des choses exterieures.

Des moyens comme les quatre choses susdittes doiuent estre mises en effect, & de la diuersité d'en vsfer. CHAP. V.

POUR accomplir & parfaire les choses susdites, plusieurs moyens ont esté ordonnez par les Docteurs, cōme le baing, le frottement ou liniment, la salure, & autres semblables. Dont les vns en ont ordonné aucuns, les autres

40 INSTRUCTION POUR LA SAGE-FEMME,
autres,& les autres tous : considerans ou qu'un seul moyen
ne peut pas fournir a toutes ces quatre choses, ou que cesdi-
tes choses ne sont pas toutes ni également requises en tous
enfans, iacoit que cela peut venir a plusieurs : car bien sou-
uent aucuns enfans nouuellement nez, ont plus besoin de
mundification, autres de rabillement de membres, autres de
la cure des meurdresseurs & lassetez, autres de fortification
du cuir. Et parce que les Medecins ont vne regle, qu'a la
plus grande necessité on doyt premierement suruenir, il
auient quelquesfois, que plus tost doyt estre accomplie vne
desdites choses, plus tost vne autre, & cōmancent par icelle
comme par la plus necessaire: aucuns par le baing, autres par
frottement de sel, ou saumure, autres par frottemēt d'huile,
autres font autrement, autres n'y font rien : & chacun d'eux
estime telle ou telle façon de faire estre la plus commode.

I. *Le moyen duquel Galien use pour nettoier &
fortifier le cuir de l'enfant.*

Galien, le principal des escholes de Medecine, & le plus
grand des Medecins, apres le diuin Hyppocrates, en son
premier liure du Regime de santé, traictant des choses que
lon doyt faire a vn enfant nouuellement né, regardant seu-
lement aux fins de mundifier premierement, puis constiper
& renforcer le cuir de l'enfant, pour mieux resister a la nui-
sance des choses exterieures: admoneste, auant que l'em-
maillotter, ou luy faire autre chose, pourueu qu'il soit sain
& bien formé de ses membres, de le frotter de sel commun
seulement mis en poudre, si l'enfant est de complexion tem-
perée, ou bien de complexion flegmatique & humide : ou
de sel meillé avec roses & fucilles de myrthe, tant pour re-
frener la chaleur du sel, si l'enfant est de complexion chau-

de, que pour empesch. r les apostumes venans de quelconque occasion exterieure. Et tire ses raisons de ce que le sel desech & resoult l'humidité superflue & fordide, & par ce rend le cuir de l'enfant oppilé & fort dur, & fait le corps moins passible, soustenant plus aisément les rencontres & offenses des choses exterieures. Et de l'opinion de Galien est d'AEgine, & Haly-abba.

II. La maniere d'Auicenne pour nettoyer & fortifier le cuir.

Auicenne est de mesme aduis, fors qu'il cōseille de frotter le cuir de l'enfant, des le cōmancement, avec saumure de sel menu seulemēt : ce qu'il permet continuer par quelques iours, pensant par la mistion de l'eau temperer la chaleur & adoucir l'aspreté du sel. Et adioust quelques fois a laditte saumure des choses chaudes, & autres qui sont partie astringentes, partie resolutiues, selon la nature de l'enfant. Desquelles choses, laques des Pars, son glosateur, compose ainsi la recepte, Il faut, dit il, piler du coste, du sumach, du fenugrec, de l'origan, de chacun deux dragmes, avec troys vnces de sel : puis les mettre en vn chauderon plein d'eau, pour en faire saumure pour frotter l'enfant, se gardant d'en frotter le nez & la bouche. Encores sont aucuns qui aioussent du vin a la saumure, avec lesdittes poudres, pensant faire plus que les autres. Et voila deux façons presque semblables, desquelles ont vsé les plus excellens Medecins Grecz & Arabes, tant pour nettoyer, que pour fortifier le cuir & les membres de l'enfant, lesquelles auourd'huy ne sont pas beaucoup en vsage.

III. Les moyens desqueix ont accoustumé d'vsar les autres principaux Medecins Arabes, pour nettoyer la peau, lever les meurdresseurs & lasserer, & fortifier les membres de l'enfant.

Vne autre maniere de faire ordonnent Razis, Auerrois, & Auenzoar, trois les plus sçauans des anciens Medecins de l'eschole Arabique, lesquels apres les susdictes, vsent seulement de frottement d'huile, & n'approuent point celuy de sel, ou de saumure : par ce que le sel, ainsi qu'ils disent, est aspre & mordant, & d'autant plus mordant, de tant plus qu'il est menu & mis en poudre : & que rien tel que cela ne doit toucher l'enfant mol & delicat, lequel sort freschement du ventre de sa mere : & n'excuse rien de ce que l'eau est mise avec le sel, d'autant qu'elle fait qu'il est plus penetrant, & par ainsi encore plus mordant. Parquoy conseil-
lent, & principalement Razis, que l'enfant soit premiere-
ment frotté doucement & longuement avec vn linge delié : puis oinct avec diuerfes huiles, selon la diuersité de sa complexion, comme avec huile simple, ou avec huile d'aman-
des douces, ou de chamomile, ou huile rosat, ou violat, ou autre conuenable : & que cela se face par plusieurs iours, le matin auant que dōner a succer le lait. Auerrois & Auenzoar ordonnent l'huile de gland : mais par ce qu'elle n'est en vsage, plusieurs trouuent meilleur d'vsfer d'huile de mir-
the, ou de mastic, ou d'alcamia, ou d'autre astringente : & ce principalement es complexions cholériques, & a ceulx desquels les membres sont de contexture & habitude mince, & non espoisse : comprenans tous en ceste maniere, ainsi comme i'ay dit, les trois intentions principales de ce qu'il faut faire a l'enfant, incontinent apres luy auoir couppe le nombril. Car l'huile seule, comme ils disent, est suffisante premierement de deterger, sans faire mal, & nettoyer la peau des superfluitez & ordures, comme nous voyons qu'elle fait quand quelque emplastre tient a la peau, frottant le

lieu avec huile : & d'auantage elle conforte les membres, oste les lassetez, resoult les meurdresseurs : outre-plus, elle constipe & espoissit le cuir, mesmement celle qui est faicte d'oliues verdes, ou d'oliues d'oliuier sauuage, ou qui est cōposée de choses stiptiques & astringentes : comme l'huile de mirthe, de mastich, de coings, & autres semblables. Et tous ces Docteurs cy, n'ont fait aucune mētion de baigner l'enfant au commencement, fors Auicenne, qui veut bien qu'apres la salure incontinant l'enfant soit lauē d'eau tiede : ce que toutesfois est au rebours de la façon dont on vse a present. Car Galien n'ordonne qu'il soit baigné plus tost qu'apres l'alaiçtement, voulant que toute la forme de viure de l'enfant soit tendante a humidité, suyuant le conseil d'Hypocrates : par ce que l'enfance est de complexion humide. Et les autres ont estimé que le baing ramollit & relasche : & que par ce doit estre euité aux enfans nouuellement nez, qui sont totalement mols : & partant ont laissé la raison d'Hippocrates & de Galien, qui deuoit estre suyue. Bref, ils ont esté d'auis que le baing soit le dernier apres toutes les autres choses. Toutesfois, il est a presumer, que tous tant qu'ils sont, en omettant le baing au commencement, ont tousiours entendu que l'enfant eust ses membres sains, & en forme deüe, auant qu'vser des frottemens susdicts de sel ou d'huile, & de quelconques autres manieres de faire, lesquelles espoississent & endurcissent la peau & les membres.

iiij. La maniere d'accomplir les mesmes intentions que dessus, desquelles vsoient anciennement les Sages-femmes de France.

Au temps passé, les Sages-femmes, comme escrit Iaqués des Pars, auoyent autres manieres de faire, pour accomplir

44 INSTRUCTION POUR LA SAGE-FEMME,
les mesmes intentions que dessus. Car aucunes enuelop-
poyent l'enfant tout premierement de peau de mouton ou
d'aigneau, recentemente escorché & estant encor' en sa cha-
leur, en intention de l'alleger du trauail qu'il auoit souffert
a l'issue du ventre de sa mere, & de resoudre les gourfoulcu-
res de la superficie de son corps, & avec ce, deterger le cuir,
& finalement fortifier ses membres. Aucunes, cōme celles
qui estoient appellees du cōmun, le mettoient incontinant
sur la paille chaude, & l'en frottoient doucement, a fin de le
nettoyer, resoudre les humiditez, oster les lassetez, & espoi-
sir la peau. Aucunes respendoyent sur tout son corps de la
farine non sassee, puis le frottoient d'une coüanne de lard,
avec le dedans, a fin de deterger le cuir des mauuaises humi-
ditez acquises du ventre de la mere, & avec ce le soulager &
renforcer ses membres. Celles qui regardoyent que l'enfant
se portoit bien, & n'auoit point de besoin de tout cela, sans
faire autre chose, le receuoyent en leur giron preparé avec
linges & langeots de lin, ou de l'aine, ou de pelisse, ou d'es-
carlate, ou de soye.

V. *La maniere de faire du temps present pour mesmes
fins, & pourquoy on commence par le baing.*

Dépuis ce temps là, il y ha enuiron cent ans, iusques a
present, que lon compte Mil cinq cens soixante & quatre,
on ha prins vne autre maniere de faire, & suiuy vn autre or-
dre: ce qui ha esté trouué plus raisonnable & plus cōmode,
commençant par le baing, encor' que l'enfant n'ayt aucune
faute ne imparfection en ses membres, estant comprises en
ce seul moyen les deux premieres intentions susdittes, &
la preparation aux deux autres. Or faut noter que la raison

pourquoy ou doit commencer par le baing, est : que la premiere chose qui doit estre faite a l'endroit d'un enfant, est celle par laquelle se fait mieux la mundification du cuyr d'iceluy, & la cure de la lasseté & meurdresseure, si aucune est en son corps, & avec laquelle on racoustre plus aisémēt le deffigement de ses membres. Lesquelles troys intentiōs accomplies, la quatriesme apres s'accomplit par autre moyen plus cōmodement, qui est l'endurcissement de la peau, & la deffense du corps a l'encontre des rencontres exterieures. Or est il ainsi que le baing d'eau pure & tiede sur toutes choses mundifie mieux le cuyr, oste la lasseté & foulure du corps, rend les membres maniables a redresser en leur forme deüe. Car a la verité, il n'y ha rien qui tant bien & doucement nettoye les ordures de dessus le corps, ne qui tant aisémēt oste la lasseté, resoult le sang coagulé & meurty, engardant qu'il ne face apostume & deuïene sanieus, ne qui tant ayde a radresser la figure de la teste, & des autres membres, conseruāt encores les os en leur mollesse. Et ces troys choses sont premierement necessaires que de secher & endurcir le cuir : ce qui se doit faire apres, & est la quatriesme intention pour laquelle on frotte de poudre ou bien lon oinct d'huile adstringente le corps de l'enfant. Et a la verité, il ne semble estre raisonnable que le poudremēt & l'onction voïsent deuant le baing, non plus que l'endurcissement du cuir deuant la mollification & radressemēt des membres. Et par ainsi la conclusion est bonne, que lon doit cōmancer par le baing tost apres auoir couppé le nombril de l'enfant.

Comme on doyt baigner l'enfant.

L'VSAGE du baing emporte beaucoup de consideration. Car on considere premierement dequoy doit estre le baing : en apres, en quel bassin, puis la maniere cōme on y doit tenir l'enfant, & ce qu'il faut faire en le baignant : puis apres, combien longuement : finalement, combien de de fois. Toutes lesquelles choses il faut declarer par ordre.

I. Dequoy doit estre le baing.

On ordonne la matiere dequoy on doit faire le baing, telle & telle, selon l'intention de ce qu'on en veut faire. Razis & Haly y meslent des roses : autres de la chamomille : autres du laurier : autres du sel : autres du vin : autres d'autres choses, non contans d'eau simple douce. Et par ce qu'on peut auoir diuerses intentions pour faire cecy ou cela par le baing, aussi on ordonne diuersemēt les choses desquelles on veut que le baing soit composé. Si nostre intention principale est de lauer seulement par le baing, & nettoyer, ou avec ce, tenir préparé le corps a fin de dresser mieux les membres en forme deüe, nous deuons estre contans du baing d'eau pure & tiede, ainsi que Galien, au liure premier du Regime de santé, ordōne de baigner l'enfant toute la premiere année, & d'auantage, & semblablement Auienne. Et si le corps est ia en bonne forme, mais il est de complexion chaude, & de contexture rare, & parce nous voulons en le baignant le rafraichir & espoisir le cuir : alors nous ordonnons, comme Haly, de mettre des roses au baing, & des feuilles de mirthe, ou autre chose de vertu semblable. Car de baigner l'enfant d'eau froide, comme faisoient les Alemans au temps & deuant le temps de Galien, est chose barbare & dangereuse, comme luy mesme le dit : d'autant que trop refroidir l'enfant, qui est delicat, est e-

staindre sa chaleur naturelle, & par ainsi le faire mourir : & aussi espoissir le cuir, & reserrer ses pores, est empescher la transpiration du corps, & par conséquent le rendre subiet a fieures, & a suffocation des esprits. Parquoy ceux qui baptisent les enfans des Chrestiens, feroient vne grand' faute, & chose qui seroit fort a reprendre, si l'enfant qu'on baptise estoit plongé tout nud es fons de baptesme : ou s'ils le faisoient demeurer longuement en eau froide : & pis seroit si c'estoit en hyuer & en temps froid. D'auantage, si nous auons fantaisie en lauant l'enfant & nettoiyât son cuir, pareillemēt refoudre le sang estraint & quasi meurdry, & pareillement allegger les membres lassez, nous mettons avec les choses susdictes de la chamomille, de la mente, de l'origan, de la mousse des arbres, & autres choses qui ont pareille faculté. Si encores, outre cela, nous entendons de desecher & endurcir le cuir, nous y adioustons du sel, plus ou moins, selon qu'il est besoin de desechement & endurcissement. Et si lon voyoit que besoin fust de corriger quelque intemperature froide de l'enfant par chaleur de quelque chose, & pareillemēt fortifier ses membres, on le pourroit baigner de gros vin rude, meslé avec l'eau tiede : ou bien faudroit adioster au baing, du laurier, ou autres choses chaleureuses, avec celles qui sont de faculté astringente. Mais telles manieres de baings qui astreignent & reserrent ne se doiuent pratiquer, sinon quand l'enfant est ou bien formé de nature, ou bien restitué en forme naturelle.

ij. En quel bassin, ou cuuier doit on baigner l'enfant.

Le bassin ou cuuier auquel on doit baigner l'enfant, peut estre de telle matiere qu'on voudra, lequel ne doit estre trop grand ni auoir trop d'eau, parce qu'il suffit que l'enfant soit

48 INSTRUCTION POUR LA SAGE-FEMME,
en l'eau iusques aux espaules, & que l'eau ne surmonte le col
ne la teste : & faut auoir vn linge delié en forme de bourlet
autour du bassin ou cuier, a fin que l'aspreté ou dureté du
bassin ne touche & offense le corps de l'enfant.

*iiij. La maniere comme on doyt tenir & manier
l'enfant au baing.*

La sage-femme, ou vne autre femme, doyt tenir l'enfant
dedans le baing, le frottant & maniant bien doucement, en
luy dressant ses membres, se gardant bien de luy faire pren-
dre du froid, & le morfondre.

iiij. Combien de temps doyt estre l'enfant dans le baing.

Il est ordonné que l'enfant ne soit trop longuement de-
dans le baing, de crainte que la chaleur du baing ne l'eu-
nouïsse, luy empeschant la respiration de l'air froid, & fai-
sant dissipation de ses esprits : & parce qu'on regarde en le
baignant si sa face & maniere monstre que le baing le fasche
ou non.

V. Quantes fois se doyt reiterer le baing.

Par cōmune voix & consentement de tous les Docteurs,
le baing doyt continuer par plusieurs iours & long temps :
„ & sur tous autres Galien le conseille ainsi. Car, dit-il, au
„ premier liure du Regime de santé, l'enfant conseruera la
„ bonté de son habitude, si la premiere annee vous le nour-
„ rissez de lait seulement, & luy faites vser de baing d'eau
„ douce & tiede : a fin que son corps, par ce moyen, estant
„ longuemēt conserué mol & tendre, puisse mieux croistre
„ & paruenir a plus grand', & plus belle habitude. Mais ce
propos appartient mieux a vn autre lieu, parquoy le faut lais-
ser, & tenir l'ordre commandé.

Comme

Comme on doit accoustre & dresser les membres de l'enfant, ouvrir & munir les conduits des superfluités de son corps.

C H A P. V I I.

DES QUATRE choses qui se doiuent faire apres l'incision du nombril, auant qu'emmailloter & alaieter l'enfant, les deux premieres sont acheuees, qui sont la mundification du cuir, & l'ostement de l'asseté, & de sang pressé: lesquelles choses auons declairé estre faictes par diuers moyens, mais principallemēt par le baing. Reste monstrier la troisieme, qui est la reduction des membres difformes en leur forme & figure naturelle, & par quel moyen elle se peut faire, soit durant le baing, ou deuant, ou apres: & la raison pourquoy se doit faire lors & auant qu'espoisir la peau & endurcir les membres.

I. *Pourquoy on doit façonner & dresser les membres auant les endurcir.*

On ne peut ignorer que les os ne foyēt les membres les plus fermes du corps: a la fermeté desquels demeure ferme la façon des parties qui les enuironnent: parquoy ils tirent les autres membres simples a leur figure, & des autres ne peuuent estre attirez, lesquels sont mols, lasches & sans fermeté. Or est il que les os estant endurcis ne peuuent plus estre pliez ne transportez de figure en figure sans se rompre: & par consequant, ne peuuent estre radressez, ni eux ni les membres esquels ils sont. Mais durant le temps qu'ils sont encore mols, ils plient & obeissent a ceux qui les veulent accourcir ou estendre: parquoy & les os, & les mēbres qui les enuironnent, peuuent estre façonnez & reduits de forme & façon messeante & laide, en forme & façon bien seante & belle. Or n'y ha il temps ou quel les os foyent plus

SO INSTRUCTION POUR LA SAGE-FEMME,
obeissans, soit qu'on les vueille ou serrer, ou plier, ou esten-
dre, & figurer a sa fantasie, qu'en celuy temps qui est incō-
tinant apres la naissance, par ce que lors ils sont mols & ten-
dres : lesquels par laps de temps s'endurcissent & deuien-
nent roides, tant pour cause interieure, comme est la cha-
leur naturelle qui euapore l'humidité, que pour cause exte-
rieure, comme l'air & le vent qui dessechent beaucoup, &
les autres choses qu'on rencontre venant de dehors. Par-
quoy est expediant & conuenable que tost apres l'incision
du nombril de l'enfant soit faite la reformation de la teste,
& des autres membres, s'ils sont difformes, & pareillement
l'ouuerture telle qu'il appartient des pertuis naturels de son
corps, par lesquels se font les expulsions des excremens &
superfluitez, & ce durant le temps qu'on tient l'enfant dans
le baing, ou sinon, auât que le frotter de sel, ou d'autre cho-
se de ce qu'auons dit, qui endurecit le cuir & les membres,
& les rend inobeissans a correction.

I. I. La correction & façonnement de chacun membre.

Soyent donques les membres façonnez & corrigez en
la maniere qui s'ensuyt.

La teste.

Sil la teste de l'enfant est longue, & poinctue au derrie-
re, on doit mettre dessous (dit Haly) quelque chose du-
re, & lier son fronc avec vn linge, & faire qu'il soit vn peu
estreint: on luy doit bander la teste (dit Auicēne) & mettre
dessus vne coeſſe de lin, ou de fustaine, ou de chose sembla-
ble, laquelle soit pressee & estreinte: & par ce que la figu-
re de la teste (dit Gordon) doit estre comme vne sphere de
cire vn peu pressee des deux costez, si le derriere de la teste
est trop eminent, il le faut cōme repousser en dedās, en pres-
sant dessus doucemēt: & s'il n'est assez eminent, faut pres-

fer des deux costez, & l'estendre petit a petit.

Les oreilles.

Les oreilles doiuent estre pressées (dit Razis a Alman-
for) incontinant apres l'enfantemēt, & par plusieurs iours,
& par plusieurs fois, a fin de les purger de beaucoup d'ordu-
res & humiditez qui s'amassent dedans. Cōbien que d'au-
tres ordonnent les nettoyer autrement, ou en les sucçant,
ainsi qu'ordonne Haly, ou en mettant du linge dedans, ou
le petit doigt, ainsi comme cōseille Gordon, ou autre cho-
se. Aucuns pensent qu'on les doit presser & approcher de
la teste, non pas seulement pour exprimer & faire sortir les
humiditez qui sont dedans, comme est l'intention de Paul
d'AEgine, & de Razis, & d'Auicenne, mais aussi pour ne
les laisser ietter & croistre comme celles d'un asne.

Les yeux.

C'est l'ordonnance d'Auicenne, que lon mette vn peu d'-
huile d'oliue douce es yeux de l'enfant, & que tous les iours
on les essuye avec soye, ou autre chose douce: par ce que
(cōme dit des Pars, son expositeur) l'huile adoucit, & oste
l'aspreté acquise en leurs tuniques au ventre de la mere, des
humiditez nitreuses, sudorales & vринаles, qui y estoient
contenues iusques a l'heure de l'enfantement: & veut aussi
qu'ils soyent essuyez avec soye crue: laquelle huile, cōme
Auicenne au liure des Forces du cœur, dit: elle dilate l'es-
prit vital, le rend solide & fort, l'absterge & esclairecit: & si
profite a l'esprit animal & sensitif: parce que si les yeux en
sont collirizez, elle confortela veüe. *Le nez.*

Non seulement incontinant que l'enfant est né, mais es
premiers iours de sa naissance, Razis ordōne qu'on luy ou-
ure doucement le nez, en le nettoyant d'eau chaude, & avec

32 INSTRUCTION POUR LA SAGE-FEMME,
du moult, & qu'on en tire les muscositez qui procedent du
cerueau. Auicenne commande qu'on le nettoye tous les
iours avec les doigts, ayant les ongles coupez, & que lon
mette dedans de l'huile douce, par ce que non seulement el-
le ayde a nettoyer le nez, mais aussi les yeux. Car l'huile
douce, dit-il, mise dās le nez, entre par certains petis trous
vers les yeux, & par ainsi les yeux & le nez sont nettoyez
par vn mesme moyen. *La bouche, & le palais.*

Et tout ainsi comme on doit nettoyer le nez, & en tirer
l'excremēt, aussi doit on nettoyer la bouche, & en tirer les
superfluitez du cerueau (dit Haly) en frottant la langue &
le palais avec le doigt oinct de miel : & Auicenne en baille
la raison, par ce, dit-il, que le cerueau de l'enfant abonde
merueilleusement de superfluitez, a cause de sa trop grande
humidité, lesquelles venāt au palais de la bouche & au nez,
si elles ne sont bien purgees par l'ayde de la nourrice, (car
de soy-mesmes ne se peuuent purger) facilement s'amas-
sent & entrent au tuyau de l'estomach, ou au caral des pou-
mons, causant vne toux, vne courte haleine, vne enuie de
vomir, empeschement de tetter, ou quelque autre incon-
ueniant : & continuant l'amas d'icelles, en fin portent au
cerueau grand dommage. Parquoy celles qui prennent la
charge du gouuernement des enfans nouuellement nez, ne
doient pas estre nonchallātes de ces parties : fauoir du nez,
des oreilles, de la bouche, par lesquelles se fait la purgation
du cerueau : ains faut qu'elles soyent soigneuses de les pur-
ger souuant de leurs superfluitez, de peur des inconuenians
sufdits. *Le filet sous la langue.*

Donques le palais de la bouche doit estre touché de miel,
& le filet sous la langue couppé avec l'ongle du pource.

Le lieu par ou se purge le ventre.

Il faut pareillement que le lieu par ou se purge le ventre, soit mouué tout au tour, a fin de l'ouurir & nettoyer, avec le petit doigt engraisfé d'huile.

La Vessie.

Et conuient presser la vessie, pour faire sortir aisément l'urine.

Les membres.

Les espaules doiuent estre contemplees, & le dos, & s'il y ha vice, faut le corriger doucement. Puis estendre les membres, fauoir les bras & les mains vers les genoux: tirer les doigts, & les plier mollement, & faire le semblable es cuisses, iambes, & pieds, en pliant les iointures, sans faire mal. Et si d'auanture esdits membres y auoit quelque faute, en figure, en magnitude, situation, faut essayer a les corriger, soit en baignant, soit hors le baing: comme si vne iambe estoit plus courte que l'autre, on doit trauailler de l'allonger: & s'il y auoit dislocation en la vertebre de la iointure de la iambe, la reduire: car si cela ne se fait lors & es premiers iours, plus ne se fera, & fera l'enfant boiteux: parquoy faut mouuoir toute la iambe, la menant doucement deçà & delà, & l'allongeant selon le possible: & si la iointure de l'anche n'est bien, l'estendre & ramener d'un costé & d'autre, tellement qu'elle puisse estre bien situee. Pour faire court, la sage-femme ou nourrice doit façonner les parties susdites, & chacun membre en façon & figure decente & naturelle, & se donner garde, si elle n'est sçauante, en lieu de faire bien, faire mal.

III. Combien de temps la correction & façonnement de chacun membre doit durer.

D iij

Et deura continuer ceste maniere de faire autant de iours que les os & les membres de l'enfant seront mols, & obeissans au maniment & a l'industrie de la main, soit en baignant ou deuant le baing ou apres. Combien que Galien, au premier liure du Regime de santé, chap. vii j. entend qu'ayant laissé passer le premier iour, plus commodément se face a—
 „ pres le baing, vsant de telles parolles : Les enfans, dit-il,
 „ lesquels sont mal formez, doiuent estre reformez & remis
 „ en bonne forme apres estre baignez, en les frottant d'hui—
 „ le, & conduisant doucement leurs mēbres avec les mains
 „ ramollies : par ce que les enfans es premiers iours, a cau—
 „ se de la tendreur & moleste de leurs os, facilement se cor—
 „ rigent en la forme & figure que lon veut. Et luy mesmes
 „ encor' au troisieme de l'Art medicinale, dit ainsi : Que
 „ de ceux qui commencent a croistre il est possible de cor—
 „ riger la figure de plusieurs parties du corps. Et pourtant,
 „ dit Auicenne, Quand nous voulons que l'enfant soit em—
 „ mailloté, premierement la nourrice doit toucher douce—
 „ ment ses membres, & dilater ce qu'il faut dilater, estendre
 „ ce qui se doit estendre, amenuiser ou appetisser ce qui re—
 „ quiert d'estre fait : ainsi & finablement figurer & facon—
 „ ner tous les membres selon la figure & facon plus conue—
 „ nable & decente : & tout ce, par subtile compression &
 „ maniment doux du bout des doigts, & par plusieurs-fois,
 „ tant qu'on verra suffire.

*Comme on doit endurcir le cuir de l'enfant, & fortifier ses mem—
 bres, apres les auoir reduits en bonne forme. CHAP. VIII.*

ESTANT donques l'enfant nouuellement né premiere—
 ment mondifié & deslassé par le baing, puis préparé par
 iceluy, ou autrement, a la correction de ses membres,

Puis apres reduit en bonne forme: reste donner espaisseur a son cuir,& force a ses membres a l'encôtre des nuisances de l'air,& des aspres rencôtres: qui est la derniere des quatre choses qu'auons proposé deuoir estre faictes auant qu'em-
mailloter & alaiçter l'enfant. Et par ce vient bien a propos en cest endroit que ce que Galien & Auicène,& autres cō-
seilloient de faire a l'enfant bien formé, auant le baing, au premier iour, le salant & poudrant ou frottant, & luy faisant embrocation d'huile astringente: qu'il soit fait pareillemēt apres le baing, & apres auoir rectifié les mēbres de l'enfant, si d'auanture ils estoient difformes: pour luy désécher ses superfluitez, fortifier ses membres, espoussir & endurcir le cuir. Et encore, si lon veut, on pourra bien faire, non pour ceste intention seulement, mais pour toutes les autres sus-
dites ensemble, ce que les sages-femmes de France ancien-
nement disoient, qu'il falloir incontinant, & des le premier iour apres auoir dressé les membres de l'enfant, le poudrer de farine avec le son, & specialement les parties musculeu-
ses: puis par quelque espace de temps le frotter avec le de-
dans d'une coüanne de lard dessalée, estimant par ce seul moyen l'enfant estre suffisammēt mundiifié & allegé de ses lassetez, endurcy & fortifié cōtre la froideur de l'air,& cōtre les attouchemens aspres des choses exterieures. Mais quel-
que chose raisonnable que puissions faire, alleguer ou trou-
uer pour endurcir & espoussir le cuir de l'enfant: si est-ce qu'il n'est pas seur de le redre insensible a l'encôtre du froit, car deux incōmoditez auient au coprs de l'hōme a raison du cuir, cōme dit Galien: l'une par les choses exterieures, l'autre par les interieures: car ceux, dit il, qui ont le cuir delié
& rare, sont subiets a estre offensez des choses exterieures,

„ & ceux qui l'ont dur & espois, des choses interieures, les-
 „ quelles ne peuuent transpirer dehors par les pores, ni e-
 „ uaporer. Parquoy vaut mieux euitier l'vn & l'autre excez,
 & outrepassement de mediocrité, ne rendant point le cuir
 si espois qu'il engarde de sortir les fumees, ou sueurs, ou
 moiteurs, par les pores du dedans du corps: ni le subtiliant
 & relaschant, tellemēt que le corps soit offensé de quelcon-
 que occasion venant exterieurement.

De lier l'enfant au maillot. C H A P. I X.

APRES que les membres de l'enfant sont dressez com-
 me il faut, & son cuir fortifié, s'ensuyt qu'on le doit
 enuelopper & emmailloter: a quoy faire plusieurs
 choses sont requises.

I. Les drapeaux.

Premierement, est requis d'auoir du linge delié, vn peu
 vsé, qui ne soit point rude, de peur d'offenser l'enfant, & le
 faire crier: & ne doiuent estre les drapeaux ne froids, ne hu-
 mides, ains bien secs, & quelque peu chauds.

I I. Les langes.

En apres faut auoir des langes de laine fine, qui ne soyent
 trop pesans, ne trop legiers, de crainte que s'ils chargent
 beaucoup, n'eschaufent trop l'enfant, en danger de l'estou-
 fer: & s'ils le couurent trop peu, ne le refroidissent, & en-
 gardent d'euaporer les fumees de son corps par les pores du
 cuir.

I I I. La bande.

Puis on doit tenir la bande preste, laquelle ne soit trop
 estroite, a fin qu'elle ne blesse, ne trop courte, a fin qu'elle

n'estraigne trop, ains soit de moyenne largeur & grandeur, pour tenir les membres fermes : de maniere toutesfois que l'extension & allongement des membres ne soit empesché, & ausi qu'ils ne se mouuent trop.

IIII. La maniere d'emmailloter l'enfant.

Le maillot doit estre égal, ne trop estraint en vne part, ne trop lasche en vne autre : parce que par telle inegalité plusieurs inconueniens, comme gibbosité ou autre deformité, auient a l'enfant. Dequoy Galien, au liure Des causes des maladies, escrit, cōme plusieurs pour auoir esté trop estraincts es iarrets, & lasches es iambes, par leur nourrices, iettent les genoux en dedan, & cheminent en biays : & au contraire, plusieurs pour auoir eu les genoux trop lasches, & le bas des iambes ferrez en leur premiere enfance, ont les iambes tortues en dehors, & marchent de mauuaise grace : & ceux la sont nommez en Latin vari, & ceux cy vattij. Et dit d'auantage le mesme autheur, que les sages-femmes ou nourrices faillent lourdement, en estraignant, spécialement aux filles, la poitrine & les costes, en intention de faire a l'auenir leur corps graisses, & leurs anches esleuees : car par telle faute les os de la poitrine sont cōtraincts de se ietter trop en deuant ou en derriere, dont ensuyt gibbosité & bosse : & quelquesfois vne espaule ne croist pas, & demeure en petiteffe, & l'autre croist & engrosit. Parquoy „ Gordon conseille bien, escriuant ainsi, Que tost apres que „ l'enfant ha esté baigné, nettoyé, & formé cōme il appartient, la nourrice doit l'enuelopper de beaux linges nets, & estendre ses bras sur les costes, & les bander mediocrement d'une bande largette, & non rude : puis estendre aussi les cuisses & les iambes : & si c'est vn masse, mettre sa pi-

58 INSTRUCTION POUR LA SAGE-FEMME,
ne & ses deux petits dessus les cuisses: & si c'est vne fille,
laisser engrosir les anches, lachant vn peu la bande en cest
endroit.

*V. Comme se doit arranger la nourrice & l'enfant
pour l'emmailoter.*

En l'vne ou l'autre de deux manieres se peut mettre la
nourrice pour emmailoter l'enfant. Car elle est quelques-
fois assise a terre sur vn tapis, si c'est en maison riche, ayant
les iambes estendues, & les pieds pres l'vn de l'autre, tenant
dessus iceux vn beau grand oreiller, & la bande en plusieurs
plis dessus l'oreiller: puis elle met les drapeaux dessus & l'en-
fant, puis le lie en maillot: quelque autre-fois elle est de-
bout, & l'emmailotte sur vne table propre a cela, en la mes-
me façon que sur ses iambes: puis le tient vn peu entre ses
bras auant que le coucher, tenant le berceau prest en la ma-
niere qui s'ensuyt.

Comme on doit coucher l'enfant au berceau.

CHAP. X.

ON MET premierement de la paille fraische & nette,
de seigle ou d'orge, dans le berceau, qui soit bien fait
de iuste longueur, largeur & profondeur, puis dessus la
paille vn ou deux matelas: car plusieurs n'y mettent point
de coete ou couil, de plume ou de dumet, de peur d'échau-
ffer trop l'enfant: puis mettent au cheuet vn oreiller, puis
couchent l'enfant dessus tout emmailotté, puis le couurent,
& lient la couuerture des deux costez du berceau avec vne
bande large, a fin qu'elle ne se puisse oster, ne l'enfant tom-
ber. Quelquesfois, mesmement quand l'enfant est vn peu
grandelet, sans point l'emmailoter on le couche tout nud
dedans le berceau: onquel on met premierement les langes
sur les matelas ou sur vne coete, puis les draps de lin, puis

Vers le cheuet l'oreiller esleué: puis on couche l'enfant dessus, on l'enveloppe, on le couure, on le bande, cōme dessus.

I. *En quelle chambre & en quel endroit on doit tenir l'enfant en son berceau.*

On doit tenir l'enfant ordinairement couché en son berceau, en vne chambre qui ne soit pas trop claire, ou l'air soit temperé. Car la grand' clarté esgare & esbloüit la veüe de l'enfant, laquelle est tendre & debile: & au contraire, l'obscurité & peu de lumiere l'vnit & fortifie. Et d'auantage, la clarté, encore qu'elle ne soit trop grande, engarde de dormir, par ce qu'elle tire la chaleur & les esprits en dehors, cōme choses qui s'esfouissent de la lumiere. Et par ce que lon couche & berce l'enfant pour le faire dormir: & au contraire, la clarté luy empesche le sommeil, il se fait cōtrarieté de mouuement en la chaleur & es esprits, d'autāt qu'a cause du sommeil, ils se mouuent au profond du dedans, & a cause de la clarté, a la superficie, & au dehors, dont il se fait vne certaine agitation, non sans ennuy & peine. Et parce est meilleur n'auoir pas beaucoup de clarté en la chambre de l'enfant, a fin que le mouuement que fait le sommeil a profond la chaleur & les esprits, surmonte en tout le mouuemēt contraire, qui est prouoqué par la lumiere a l'exterieureté. C'est assez d'auoir seulement autant de clarté qu'il suffit pour veoir le visage & la face de l'enfant. Le dormir en lieu froid, engendre des reumes, & en lieu chaud, resoult & debilité les esprits, tirant ensemble la chaleur naturelle au dehors, lesquels a l'heure du dormir deuroient se retirer & mouuoir au dedans, a fin de fortifier la digestion. Parquoy ceux font vne grande faute, lesquels tiennent les enfans en lieu chaud & reclus, ou l'air frais n'entre point:

60 INSTRUCTION POUR LA SAGE-FEMME,
dont souuent auientent grans inconueniens a l'enfant, &
quelquesfois la mort. Comme on dit qu'il auint au premier
fils du Roy Louys xj. lors qu'il estoit encore Daulphin,
& demouroit en Flandres, là ou Charlotte de Sauoye en-
fanta, & mourut l'enfant deuant le bout de l'an: de laquelle
mort on attribua la cause a ce qu'il auoit faite de fraischeur
d'air, & estoit tenu trop chaudement en la chambre ou il
couchoit: comme aussi il auint au fils de François Duc de
Bretaigne, lequel n'eut onques puis d'enfans. Et l'une des
raisons principales pourquoy on ne doit point tenir les en-
fans ainsi reclus, ne trop chaudement, est prinse d'une des
causes principales de l'enfantement qui est venu a terme.
Car estant l'enfant dedans le ventre de sa mere, angoissé de
trop grand' chaleur, demande le frais, & a sortir en grand
air. Estant donques sorty, est grand' faute de le tenir re-
clus, comme si on le vouloit faire rentrer dedans: car par
faute de fraischeur, & de prendre le vent, sa chaleur natu-
relle est suffoquee.

*De donner quelque chose a la bouche de l'enfant, ou de le faire
dormir, lequel des deux on doit faire le premier.*

C H A P. X I.

CES CHOSES ainsi faites, comme nous venons de
dire, il ne reste plus rien a faire a l'enfant, sinon deux
choses: l'une est le faire dormir, l'autre luy donner
quelque chose a la bouche. Et de ce que l'enfant doit pren-
dre par la bouche sont proposees trois fins: l'une pour nour-
rir, comme donner a succher le lait: l'autre, pour conforter,
comme bailler de la theriaque, ou chose semblable: l'autre
pour purger seulement, cōme quand on luy donne du miel,
ou pour purger & nourrir ensemble, comme quand on luy

baille de l'huile d'amandes douces avec sucre. Du dormir n'y ha autre intétion, sinon reposer l'enfant las & trauaillé, & luy refociller ses esprits, & conforter la chaleur naturelle. Et pour ce que de toutes ces choses y ha diuersité d'opinions entre les Docteurs, pour l'ordre d'icelles, on pourroit faire difficulté de determiner laquelle doit estre la premiere. Car aucuns veulent qu'on baille incontinent la tetine a l'enfant, comme Galien & Rasis: aucuns luy font prendre de l'huile fislamine (qui est d'une graine qui ne vient point en ce pais) avec sucre, comme Haly: ou de l'huile d'amandes douces extraicte sans feu, avec sucre, comme plusieurs de nostre temps. Autres conseillent de le faire dormir premierement, comme Auicenne, & Gordon, & Gentilis, & aucunes femmes de ce temps cy. Autres luy mettent incontinent en la bouche du miel, ou de la theriaque, ou du sirop de conserue, de limon, ou autres choses semblables. Ceux qui conseillent de faire prendre le lait premier que dormir, se reiglent pour la plus part a ceste raison, que les animaux par instinct naturel, si tost qu'ils sont nez, courent a la mammelle pour conseruer leur vie: comme lon voit les aigneaux, les veaux, les cheureaux, & autres: & aussi a ce qu'on dit, qu'il n'est pas bon de dormir a ieun, & qu'il est ia temps depuis la naissance de l'enfant, & apres auoir fait les choses susdittes, de luy faire prendre quelque chose. Ceux au contraire qui font dormir incontinent, donnent vne raison: qu'on doit suruenir premierement a la plus grand' necessité: & par ce qu'ils pensent que l'enfant nouvellement né ha plus besoin de dormir, que succer le lait, d'autant qu'il ha encore suffisant nourrissement dans ses venes, acquis du ventre de sa mere, ils concluent qu'il n'est pas tant

besoin de se haster a luy donner la mammelle. Et pour confirmation, amenant vne autre raison, que l'enfant est recreu & las d'auoir trauaillé a sortir du ventre, & en trauaillant se resoult beaucoup d'esprits, a quoy n'est rien qui tant remédie que le sommeil & le repos : car en dormât, les esprits se regenerent, & la vertu animalle se fortifie. Amenant encor vne autre raison, qu'il y ha long temps que l'enfant n'ha dormy ne repose : lequel estant au ventre de la mere dormoit quasi tousiours, parquoy le retardemēt du dormir luy pourroit plus porter de dōmage que le retardemēt de la viande, laquelle il ha encor en son corps en suffisante quātité. Et encores y ha vne autre raison, c'est qu'on doit premier faire ce qu'on ha accoustumē, que cōmancer quelque chose de nouveau : le sommeil est vne chose accoustumee a l'enfant, lequel n'ha encor iamais rien pris par la bouche : parquoy il semble qu'il est meilleur le faire premierement dormir, que luy donner a succer la māmelle. Et quant a ce que les autres dient, qu'il n'est pas bon de dormir a ieun, accordent bien qu'il soit ainsi, mais que cela soit entendu quand on n'est pas las, & qu'il n'est pas besoin de restaurer les esprits : car autrement ne l'auoient pas, ains preferent le dormir, nōobstant que l'estomach fust vuide. Et n'estiment la comparaisō des animaux estre bonne, lesquels si tost qu'ils sont nez courent a la mammelle. Car l'hōme nouuellemēt né, ha plus besoin de dormir que les autres animaux : d'autant qu'il est plus debile, & que ses esprits sont plus faciles a attenuer & dissoudre : parquoy ha plus besoin de se fortifier & restaurer ses esprits par le repos du sommeil que succer le lait. Ceux qui ordonnent de bailler premier le miel, le font par vne raison, que l'enfant a beaucoup de superfluitez en

son corps, apportees du ventre de sa mere : lesquelles par le miel se purgent, partie par la bouche, partie par le bas. Les autres qui ordonnent autres choses au commencement, ont quelque raison, pourquoy vne telle chose est plus tost qu'une autre ordonnee. Et toutes ces raisons, tant d'une part que d'autre, semblent veritablement estre bones : parquoy ne faut s'esbahir si lon fait difficulté, & si lon doute laquelle des choses dernièrement dites doit aller la premiere, ou faire dormir l'enfant, ou luy bailler quelque chose par la bouche. Mais ceste difficulté est facilement ostee, si lon considère la disposition de l'enfant, faisant distinction d'icelle. Car estant l'enfant sain & bien disposé, on vse d'un autre ordre : n'estant en bonne disposition, d'un autre : & cest ordre icy est dit estre contraint, & l'autre non. Il faut donques ainsi distinguer la disposition de l'enfant : ou il est sain, bien temperé, & de bonne habitude, ou il est au rebours.

I. Ordre contrainct & particulier.

Si on voyt que l'enfant ne soit bien sain, & ayt quelque particuliere necessité d'estre secouru, ou si auons peur qu'il tombe en quelque maladie, cōme epilepsie ou semblable, ou que sa mere eut heu d'autres enfans subiets a quelque maladie : lors nous deuons changer l'ordre cōmun qui sera declaré cy apres, cōmançant par cela que la necessité exige, en nous proposant vne certaine intention pourquoy vne telle chose doit estre faite la premiere. Cōme pour exemple, si la necessité demande le sommeil le premier, faut premier le faire dormir : si le lait est requis le premier, faut luy donner le premier : si le mithridat, ou autre chose medicinale doit estre exhibee la premiere, faut obeir a ceste necessité, suiuant ceste maxime, Qu'a la chose la plus necessaire faut suruenir.

I.

Si nous voyons que l'enfant soit debile en ses esprits, & comme refroidy & appoury de chaleur naturelle, nous luy deuons premieremēt donner quelque chose cordiale, qui viuifie & restaure les esprits, comme vn peu de theriaque, ou de mithridat, avec le doigt, en la bouche, tout pur, ou détrempe avec eau de buglose, ou autre eau cordiale, ou avec du vin, selon que sera necessaire, ou du diamustum doux, ou quelque electuaire confortatif & cordial.

I I.

Si nous cognoissons qu'il soit de rare contexture, meigre & plein de chaleur, ne luy faut donner du mithridat, ou theriaque, ne du miel aucunement : ains conuient luy bail-
ler de la limonade, qui est vne confection de ius de limon, avec sucre, & vn peu de moust, ou du sirop violat, ou rosat, ou de grenade, ou de chicoree, ou autre semblable.

I I I.

S'il abonde de superfluitez, on luy donne premier du miel, ou de l'huile d'amandes douces, tiree sans feu, avecq' sucre.

I I I I.

S'il on doute qu'il tombe en quelque maladie, faut donner ce qui conuient selon la nature de la maladie: si c'est spasme ou epilepsie, la mixtion d'huile d'amandes douces, avec miel ou sucres, ou le mithridat, ou le diamustum : qui est vne forme d'opiate faite de choses cordiales, avecq' du moust. On pend au col des enfans des Princes de l'émeraude, pour preseruer d'épilepsie, laquelle ha ceste vertu, ainsi comme escrit Serapion, chap. ccclxxiij. Et le coral pareillement est bon pour mesme intention le pendant au col, en forme d'vn carquant : lequel aussi appliqué sur le cœur, ha
certaine

certaine propriété de le cōforter. v.

Si le trauail del'enfantement ha esté long,& parce l'enfant ha besoin de repos, faut le mettre dormir. vi.

S'il ha esté long temps sans rien prendre depuis l'heure de sa naissance,onquel temps est entreuenu le couppement du nombril,le baing,la rectification de ses mēbres,& l'em-maillotement : pour cela semble auoir besoin de nourriture, faut premieremēt luy bailler la māmelle. vii.

S'il crie & pleure, le plus expediant est, incontinent sans regarder a autre chose, luy mettre pareillement le tetin en la bouche pour l'appaiser. Et ne faut pas faire indiscretemēt & a l'auanture,ainsi cōme font aucunes femmes : lesquelles sans regarder les differences des complexions & dispositiōs des enfans,donnent au cōmancement a tous enfans ce qu'elles ont veu qu'on ha donné le premier a plusieurs. Si elles ont veu qu'on ha donné a aucun enfant de la theriaque ou du mythridat le premier, ou de la limonade, ou de quelque confection cordiale, ou du miel cru, ou du miel escumé, ou du miel avec du vin, ou du vin tout pur, cōme font aucunes de ce pays : leur semble auis que de laquelle qu'on voudra de ces choses on peut dōner indifferemmēt a tous : & n'ont autre raison de ce faire, sinon qu'elles ont veu leurs predecesseurs faire a plusieurs enfans en ceste maniere : lesquelles choses neantmoins ont pris leur cōmancement de l'ordonnance de quelque Medecin expert & sçauant, qui auroit ordonné d'exhiber a l'enfant nouuellement né telle & telle chose, selon telle & telle intention & necessité : & les assis-tans ayant veu que les enfans se feroient bien portez de telle ou telle chose ainsi ordonnee, auroient pensé que cela seroit bon de faire a tous les enfans nouuellement nez, sans

66 INSTRUCTION POUR LA SAGE-FEMME,
faire difference de la disposition des enfans, & sans discerner si cela seroit bon a l'un cōme a l'autre. Et en ceste maniere, sont introduits beaucoup d'erreurs entre les personnes, lesquelles voyāt que quelqu'un s'est bien trouué de la recepte d'un sçauant Medecin, sans aucune discretion, donnent la mesme recepte aux autres qu'ils pensent estre malades de mesme maladie. Donques, nous deuons prendre garde qu'elle est la disposition & cōplexion de l'enfant nouuellement né, & selon icelle choisir ce qui est bon premier luy dōner.

I I. *Ordre commun & regulier.*

Que si nous voyons que l'enfant est bien temperé & bien disposé, n'ayant rien en soy parquoy soyōs contraincts faire plus tost vne chose qu'autre, iacoit qu'on pourroit commācer par laquelle qu'on voudroit des choses susdittes: toutefois nous tenōs vn certain ordre & regulier, qui est cōmun a tous les enfans bien sains: lequel est de deux manieres pour la distinction de santé parfaitemēt bonne, & imparfaitement bōne. Car l'ordre cōmun aux enfans parfaitemēt sains, est celuy auquel n'est besoin de leur donner rien medicinal, ains les nourrir seulement, comme qui n'ont besoin que de conseruation, & non de preservation, ou alteration. Et semble que Galien veut qu'on face ainsi, quand il cōseille de ne leur dōner chose fors le lait, lequel est le plus propre & familier nourrissement de l'enfant, conforme a sa nature: & ordonne a le bailler au cōmancement auant le faire dormir: a ceste cause il adroisse son Regime de santé, a l'enfant bien temperé & parfaitemēt sain. Mais parce qu'on ne voit guiere d'enfans qui soyent parfaitemēt sains, & qui n'ayent quelque humidité superflue, tenant a la langue, au palais, a la gorge, & a l'estomac, & quelques ordures tirees du ventre

de sa mere, lesquelles est besoin de déterger & mundifier, & outre ce, exciter & éveiller les membres, les rendre dispos à prendre a l'auenir leur nourriture par la deterfion & mundification de ce qui les empesche en leurs operatiōs : a ceste cause l'ordre commun & regulier ordonné a ceux cy, est de leur bailler premierement du miel, pour nettoyer lesdittes ordures, en apres les mettre dormir, puis dōner a leur reueil de l'huile d'amandes douces, finalement le laiçt. Tout lequel ordre declarerons traitant ces choses l'une apres l'autre.

*De bailler premierement du miel a la bouche de l'enfant
auant que l'alaiçter ou mettre dormir, & pourquoy.*

C H A P. XII.

ON ORDONNE premierement a la sage-femme ou nourrice, de frotter la bouche & le palais de l'enfant avec le doigt emmiellé, en le tenant en son giron, la teste inclinee, ainsi cōme conseille Razis au iiij. a Almanfor: car alors sortent de sa bouche quelques humiditez baveuses, & quelquefois s'émeut l'esthomas a vomir les superfluites qui y sont, lesquelles est bon de mettre hors. Car non seulement on pense que l'enfant ha des humiditez superflues, & des ordures en la bouche, au palais, & en la gorge, mais il est a croire qu'il en ha encore plus en l'orifice de l'esthomas, en l'esthomas mesmes, & aux intestins, voire es pemieres venes que lon dit mezeraiques : toutes lesquelles parties est besoin de mundifier & habilitier a faire dorenauāt leurs operations naturelles : & ce faire auant qu'alaiçter l'enfant, & le mettre dormir. La raison est manifeste, parce qu'il cōuient plustost extirper le mauuais qu'introduire le bon : & le bon introduit avec le mauuais deuiant mauuais : parquoy le laiçt succé de l'efant, se meslāt avec les ordures de l'estomac, se corrompt,

68 INSTRUCTION POUR LA SAGE-FEMME,
dont se leuent vapeurs mauuaisés, qui peuuent engendrer
beaucoup de maux au cerueau & au corps de l'enfant. Il est
donc meilleur, pour obuier aux inconuenians, luy donner
quelque chose pour mundifier les parties susdittes : & est
nécessaire le faire auant qu'il succe le lait, & auant qu'il dor-
me, de peur qu'en suççant le lait & la nourriture, elle ne se
corrompe. Et pour accomplir ceste intention, les Docteurs
ont inuenté deux moyens, qui sont auourd'huy en com-
mun vsage : l'un est le miel, l'autre est l'huile d'amandes dou-
ces, tiree sans feu. Car la vertu du miel, ainsi cōme Diosco-
ride & Galien ont escrit, est absterfiue, ouure les orifices des
venes, resoult les humeurs, & fait sortir les superfluitez du
profond du corps, engarde putrefaction de la chair, preser-
ue le lait de corruption & de coagulation, le defend qu'il
ne se cōuertisse en cholere : ce qui auient quelques fois aux
ensans nouuellemēt nez, desquels on voit les egestions fort
citrines & iaunes, & quelques fois vertes, a cause de la cha-
leur brülant : iacoit que quelques fois sont vertes a cause de
trop grād' humidité, cōme on voit es eaux des lacs & marez.

II. *Quel miel on doit donner a l'enfant.*

Aucunsont eu opinion qu'on doit donner a l'enfant du
miel cuit, pour vne raison qu'ils alleguent, qu'il est plus pur
que le cru, & que les parties de sa substance, qui sont con-
uertibles en ventositez, sont éuanouïes par la cuisson : que
s'il estoit prins cru, les ventositez se leueroient, qui pour-
royent causer a l'enfant tensions, douleurs, tranches, &
autres accidans mauuais : ils ont encore vne autre raison,
disans que le miel cuit est plus nourrisant. Autres Medecins
& la plus part des sçauans, nonobstant ces raisons, ordōnent
de bailler du miel cru, pour autres raisons assez euidantes.

Car ila soit qu'ils accordent que le feu purifie le miel, luy oste les ventositez, le fait plus nourrissant: toutesfois par ce qu'en le cuisant & escumant, il pert de sa vertu absterfue, diminue sa douceur, & est rendu plus inualide a lacher le ventre, ils iugent le cru plus propre, a l'intention de ce qu'il faut faire a l'enfant incontinant qu'il est né, apres ou deuant l'auoir emmaillotté: laquelle intention n'est point pour nourrir, ains pour absterger & nettoyer le corps. Car le cru premierement est plus absterfif: secondement, plur purgatif des ordures du ventre, qui sont les choses dont l'enfant ha plus de besoin: tiercement, ha plus de douceur, pour laquelle est plus penetrant, & sans quoy ne peut valoir a l'intention susditte: & d'auantage, est plus agreable a la nature de l'enfant, auquel (c'est vne maxime) on ne doit donner chose qui soit amere, aspre, ou aigre, sinon en cas de necessité, & le moins, & moins souuant que se pourra faire. Car l'estomach, & les entrailles de l'enfant, se delectent de douceur, & au contraire, s'attristent de ce qui est de goust facheux, dequoy s'ils sont offencez dès le commencement, ils le serôt tousiours a l'aduenir. Et ne faut alleguer les ventositez du miel cru, pour estimer plus & preferer le cuit: car on ne le baille pas pour nourrir, parquoy il soit a craindre de faire tention ou donner tranchee. Mais par ce qu'il y ha plusieurs especes de miel cru, celuy doit estre choisi, lequel est beau & blanc, comme celuy de Languedoc, de bonne odeur, & de bon goust: lequel estant ainsi, n'ha besoin qu'on le face bouillir & cuire pour le corriger. Car on cuit le miel (dit Hyppocrates au tiers liure du Regime des maladies aigues) qui n'est pas bon ne de belle couleur, a fin de luy oster sa malignité, & le rendre plus subtil, & plus blanc: & n'est

70 INSTRUCTION POUR LA SAGE-FEMME,
besoin d'vser de miel cuit, sinõ en faute du cru qui fust beau
& bon: & là ou lon peut auoir de cestuy cy, puis quel'inten-
tion est de mūdifier la bouche, & la gorge, & nettoyer l'e-
sthomac, & non pas de nourrir, ils concluent qu'il doit e-
stre donné cru, & non cuit, ni bouilly, ni escumé: & ceste
opinion a preualu, & en vsons ainsi en France.

III. *Si lon doit donner le miel seul ou meslé avec autre
chose: & s'il est bon de bailler du vin a l'enfant.*

Nous tenons pour le plus seur & pour le meilleur, de bail-
ler le miel tout seul, sans le mesler avec autre chose: iacoit
qu'Auicenne au chap. de l'alaiçtement de l'enfant, le mesle
avec vn peu de vin: par ce que (ainsi comme dit des Pars,
son glosateur) le vin rend le miel plus absterisif & lenitif, &
ouure mieux les voyes de la nourriture: les autres glosa-
teurs, veulent que ce vin soit vn petit vin blanc, ne portant
point d'eau, pour seruir a plus grand' lenition & lauement
d'esthomac, & pour porter plustost le miel aux venes du
foye, & plus outre. Mais ceste mixtion de vin avec du miel
ne se fait communément, ni ne se peut seurement faire, a
cause que le vin meslé avec le laiçt (car il faudra alaiçter l'-
enfant apres) corrompt le laiçt, & le dispose a lepre, ainsi
comme Auicenne mesme escrit, & tous les Medecins Ara-
bes: & doit estre craint le vin aux enfans, non seulemēt par
ce qu'on ne le doit point donner avec le laiçt, ni a ceux qui
prennent leur nourriture de laiçt, attēdu que le laiçt est cor-
rompu par le vin: mais aussi par ce qu'il tire les enfans en
beaucoup de maladies du cerueau. Et parce, est mauuaise la
coustume d'aucunes sages-femmes de ce pays, lesquelles si
tost que l'enfant est né, luy baillent du vin a succer: lequel
tant s'en faut qu'il absterge & fortifie l'enfant, qu'au rebours

il augmente les superfluitez, enteste l'enfant, & le dispose a epilepsie. Auicenne en ses Cantiques, conseille de mettre du miel en la bouche de l'enfant, & frotter doucement son palais, ses genciues, & sa langue: mais Auerrois en la glose, dit, que cela se doit entendre non es premiers iours de la naissance, mais lors seulement que les enfans sont malades, a la sortie des dents.

IIII. La maniere de bailler le miel a l'enfant.

La nourrice doit auoir ses ongles roignez, tremper son doigt indice de miel, le mettre en la bouche de l'enfant, le tenant en son giron la teste inclinee, frotter du doigt son palais & sa langue, & faire qu'il en aualle quelque peu.

V. En quelle quantité se baille le miel.

Non en grand' quantité, pour ne le facher, ne si peu qu'il ne face rien. En quoy faut considerer premieremēt la disposition du ventre, & des parties pectorales: secondemēt, la complexion & habitude: tiercement, l'affection. Car s'il ne toussit point, s'il n'ha point de vomissement, s'il se salit suffisamment, il luy faut donner moins de miel: s'il est trop au ventre, il n'en faut point donner du tout: s'il ne se salit guiere, ou s'il ha la toux, ou le vomissemēt, faut luy en dōner d'auātage & plus souuāt. En apres, s'il est de cōplexion chaude, & d'habitude rare & seche, n'en faut guiere dōner, & peu souuant. Finalemēt, si en luy baillāt beaucoup, cela le fache & crie, faut moderer la quantité selon son plaisir.

VI. A quelle heure apres la premiere fois, & le premier iour passé.

Suffisamment ha esté dit, que pour la premiere fois, & au premier iour, on doit dōner le miel a l'enfant, soit emmailoté ou non, auant que le mettre dormir & alaićter: mais les iours suyuaus, on luy en doit bailler le matin estant éveillé:

72 INSTRUCTION POUR LA SAGE-FEMME,
& tarder quelque peu a luy donner la mammelle. Toutes-
fois si l'enfant plouroit luy baillant le miel, ne faudroit tar-
der de luy bailler le lait apres le miel, ne craignant point la
mixtion du miel avec le lait, laquelle n'est que bonne pour
garder que le lait ne se corrompe : mais si l'enfant ne pleu-
re guere, & peut attendre, sera encor' meilleur de donner
loisir au miel de faire son operation, de mundifier & abster-
ger, auant qu'il soit meslé avec le lait.

VII. *Quantes-fois le iour, & combien de iours.*

Et se doit faire tant le frottement de miel a la bouche &
au palais, que l'auallémēt d'iceluy en l'estomach, non seu-
lement auant le premier alaiçtemant vne fois le iour, mais
par plusieurs iours continuz on premier mois, puis interpo-
ser longs ou moindres interualles, plus ou moins selon qu'
on verra estre besoin, en regardant sa langue & sa bouche :
(car a la verité, par faute de frottement, nous voyons bien
souuant en la bouche des enfans s'aggreger beaucoup d'or-
dures & superfluitez, du lait qu'ils succēt, & de là s'engen-
dre des chancres de bouche) : & pareillement considerant
la disposition du ventre, & des parties pectorales, la com-
plexion & habitude du corps, & finallemēt le plaisir ou des-
plaisir qu'il ha de prendre ce qu'on luy baille, ainsi comme
ia nous auons dit. Car n'ayant point de toux, ne vomissant
point, & se salissant competemment, on luy donne moins
de miel, & par plus long interualle de iours : au contraire,
ne se salissant guiere, toussissant, ayant des vomissemens,
luy en faut donner plus, & plus souuent. Puis, s'il est chaud
& sec de complexion, peu souuant luy en deuons donner,
& en petite quantité : si au contraire, il est de complexion
humide, plus qu'il n'est conuenable a tel eage, luy en con-

uient bailler plus, & plus souuant. Finalement, s'il prend plaisir d'en prendre souuant, luy en faut donner plus souuant, & plus : si au contraire, il n'y prend plaisir, moins souuant, & moins.

De mettre l'enfant dormir apres luy auoir donné du miel. C H A P. XIII.

APRES auoir baillé le miel a l'enfant nouueau né, faut le mettre reposer & dormir auant que luy bailler a suc-
cer le laiët : premierement, a fin de restaurer par le re-
pos & regenerer ses esprits, qui estoient quasi dissipez a
cause du trauail de l'enfantement : secondement, pour con-
seruer la chaleur interieure, a fin de digerer & accôplir l'o-
peration du miel, & des autres choses susdittes : laquelle ne
s'accôplit pas si tost qu'elles sont prinſes, ains avec le temps.
Car quand on donne le miel, ne faut pas penser que soudai-
nement son operation, qui est absterſion, soit accomplie, &
que luy sorte par egestion : mais est raisonnable qu'il demeure
quelque espace de temps en l'esthmac pour accomplir
sadicte operation : pendant lequel temps le dormir & le re-
pos est ordonné pour les deux fins susdittes, & a fin qu'a-
pres auoir reposé il succe plus auidement le laiët qu'il luy
faudra bailler, & plus promptement. Car a la verité, regu-
lieremēt & par ordre, sans contrainte de necessité, l'enfant
nouuellement né doit, apres auoir prins du miel, dormir
auant que prendre la mammelle : ains, qui plus est, aucuns
des anciens ont dit, qu'il deuoit auoir vn long temps entre-
deux depuis l'heure de la naissance iusques au temps de suc-
cer le laiët. Si lon demande pourquoy on ne met plustost
dormir l'enfant que luy donner le miel, attendu les raisons
cy deuant dittes d'aucuns, qui conseillent de le faire dormir

premier, on fait response, que là ou n'y auroit autre necessité, ne seroit pas expediant, par ce qu'il y auroit trop grand' espace de temps depuis l'heure de sa naissance iusques au temps qu'il cōmanceroit de succer le laiçt, sans auoir prins quelque chose par la bouche. Car le temps est long qui ha esté employé premieremēt a la ligature & incision du nombril, puis au baing, puis a la rectification des membres, puis a l'emmaillothemēt: apres lesquelles choses est meilleur & plus salubre bailler ce qui nettoye les ordures de la bouche, & du ventre, acquises au ventre de la mere: cōme le miel ou l'huile d'amandes, ou autre chose medicinale, auāt que prendre le laiçt & la nourriture: & apres cela luy faire prendre le repos & le sommeil, pour digerer icelles choses, & pour restaurer les esprits, & pour conseruer la chaleur naturelle: puis apres estre éueillé, le remuer, & changer les linges, puis incontinant luy bailler encore l'huile d'amandes douces: puis apres tout, la mammelle.

*De l'huile d'amandes douces ordonnee a l'enfant pour
prendre deuant ou apres le dormir.*

C. H. A. P. XIIII.

ON PEUT donner l'huile d'amandes douces en deux temps, en l'vn, deuant dormir, en lieu de miel, en l'autre, apres dormir, auant que succer le laiçt: en lieu de laquelle huile d'amandes douces, Haly & Gordon, & les autres de l'escole Arabique, dōnent de l'huile de sisame, qui n'est point en ce païs, & la meslēt avec sucre seulement: cōbien que sans necessité Gordon y aiouste du miel la moitié moins que de sucre. Et n'y ha pas grand' differēce des deux huiles pour l'intētion de mundifier & absterger les ordures qui sont en l'esthmac & intestins: sinon que l'huile d'amā-

des douces est plus agreable, & mieux a cōmandement. Ceste mixtion d'amandes douces avec le sucre, premierement nourrit l'enfant, & est comme vne viande, puis elle purge doucement les humiditez flegmatiques, mauuaises & visqueuses, & les ordures congregees dans l'esthomac, & les intestins par le bas du ventre: lesquelles si elles n'estoyent purgees, pourroyent de peu d'occasion tirer l'enfant a epilepsie. Et dit Florentin, qu'il en ha fait vsr aux enfans d'un gentilhomme, duquel les enfans precedās estoyēt morts d'epilepsie: & ceux qui vserēt de ceste mixtion eschapperēt, & furēt garentis de ceste maladie. Plus elle excite la vertu attractiue de l'esthomac, des premieres venes & du foye, pour attirer plus aisement le lait qui sera exhibé a l'enfant pour sa nourriture. Car le sucre & l'huile ont telle douceur & amytié cōuenable a nostre nature, que la vertu attractiue est incitée a les attirer avec volupté. Car nature attire les choses douces, cōme dit Galien en sa glose sur le iiij. du Regime des maladies aigues. On donne donques ceste mixtion auant dormir es premiers iours, dit Nicolas Florentin, pour les raisons maintenant dites: laquelle si tost que l'enfant l'aura auallee, fera qu'il prendra enuie de dormir, & dormira: & estant éveillé & remué de linges, faudra luy en bailler de rechef, ne voulant Haly qu'il succe encore le lait.

II. Quantes fois le iour, & cōbien de iours se doit bailler ceste mixtion.

Il faut cōtinuer plusieurs fois le iour, & plusieurs iours, dit Florentin: specialemēt les deux premiers iours, sans prédre autre nourriture: de ceste opinion est Gordon, disant qu'avec ceste mixtion l'efant se peut passer deux iours sans teter, & n'est bon que plustost il succe le lait, parce que s'il n'auoit autre nourrice que sa mere, ne faudroit qu'il la tetaft plus

toft que quelques iours ne fuſſent paffez: parce que ſon laiſt ne ſeroit encore purifié ne aſſez bon. Depuis les deux premiers iours on ne baille pas tous les iours continuz ladiſte mixtion, ains par iours entrelaſſez, vne fois le iour ſeulement: ſauoir eſt, le matin, apres qu'il eſt éueillé, quelque peu deuant que luy donner a ſuccer le laiſt, ſinon qu'on la luy baille quelques-fois a autre heure, & es iours qu'on voit qu'il ha le ventre conſtipé, ou la toux, ou autre accidant.

III. En quelle forme on doit exhiber ceſte mixtion, & en quelle maniere, & en quelle quantité.

Et doit eſtre ceſte mixtion ne trop eſpoiſſe ne trop liquide: de laquelle doit la nourrice, ou vn autre, avecq' le doigt luy en mettre doucement dans la bouche, & luy en faire licher & aualler peu a peu iuſques a la quantité d'une cueilleree d'argent en tout: ou plus ou moins ſelon qu'on verra.

D'alaiſter l'enfant. CHAP. XV.

LA DERNIERE choſe qui eſt a faire a l'enfant nouvellement né, c'eſt luy donner a ſuccer le laiſt: es premiers iours, enuiron vne heure & peu d'auantage apres l'huile d'amandes douces: es autres iours, incontinant ou peu apres auoir dormy, & eſtre nettoyé des ſuperfluitez de ſon corps. Et pour bien traicter du regime del'alaiſtement, faut auoir pluſieurs conſiderations: la premiere, Si la mere peut alaiſter ſon enfant des le premier iour de ſa naiſſance: la ſeconde, En quelle maniere la nourrice ou la mere le doit alaiſter: la troiſieſme, En quelle quantité: la quatrieſme, Quantes-fois le iour, & a quelles heures. Leſquelles choſes breſuelement déduittes ſera miſe fin au preſent liure.

I. *Si la mere peut alaiçter son enfant es premiers iours de son enfancement.*

Ce propos ha esté touché au premier liure, qui est escrit de la Nourrice, auquel i'ay dit, comme Auicenne conseille, que la mere en toute maniere, s'il est possible, doit alaiçter son enfant, principalemēt pour vne raison qu'il allegue entre autres, tirée de Galien au liure du Regime de santé, & de Haly en sa pratique, chap. xxj. c'est que l'enfant estant dans le ventre de sa mere se nourrissoit de son sang, & apres qu'il est né, Nature ha fait monter le sang aux mammelles, esquelles il prent forme de laiçt pour sa nourriture: & par ce d'autant que le laiçt est plus proche, c'est a dire, plus consonant & correspondant au nourrissement accoustumé qu'il prenoit dans le ventre de sa mere, d'autant celuy de la mere est a preferer au laiçt d'une autre femme: & est beaucoup meilleur pour l'enfāt & plus profitable que sa mere le nourrisse, mais non pas la premiere fois qu'il doit tetter, dit ledit Autheur, ni es premiers iours, iusques a ce qu'elle soit en bonne disposition. Car en ce temps là, elle est encor' émeuë & alteree a cause de l'enfancement: puis son laiçt ha demeuré long temps es māmelles, dont il pourroit estre corrompu: ainsi que par sa substance & par sa couleur se peut iuger. Parquoy les femmes qui veulent estre nourrices de leurs enfans, se font es premiers iours succer le laiçt de leurs māmelles, par quelque pource femme. Et par ainsi en quelque temps que la mere sera discrassee & mal disposee, ne doit alaiçter son enfant, iusques a tant qu'elle sera reuenue en bonne temperature & disposition, de peur que semblable dyscrasie & indisposition ne soit communiquée a l'enfant par le laiçt.

*II. En quel temps peut la mere commodement
alaiter son enfant.*

On ne peut determiner absolument en quel temps la mere puisse commodement alaiter son enfant : par ce que le temps est diuers en diuerses femmes, estās les vnes plus, les autres moins alterees & indisposees de leur enfantement : aucunes plus tost, aucunes plus tard purgees de leurs vuidanges, & reduites en leur premiere disposition : & aussi parce que diuers Docteurs en ont heu diuerses opinions. Car aucuns, comme Iaques des Pars, estiment que la femme accouchee ne doit point dōner le tetin a son enfant deuant que trente iours soyent passez depuis l'enfantement, auquel terme elle peut estre purgee de ses vuidanges. Et alleguent ces raisons, que tost apres l'enfantemēt elle est distemperee du travail qu'elle ha heu, & disposee a fieure : parquoy lors ne doit alaiter son enfant, ains temperer sa complexion par regime subtil & temperé, declinant a refrigeration, euitant toutes choses qui échauffent & allument le foye & le sang, comme les baings chauds, le vin puissant, & l'hypocras, lequel souuent conseillent les gouuernantes des accouchees plus pour elles que pour leurs accouchees. D'auantage, l'accouchee est indisposée & mal nette durant ses vuidanges, & le temps de sa couche : & pourtant la coutume est que par l'espace d'un mois les accouchees demeurent en la chambre & au liēt, ou bien y doiuent demeurer : durant lequel tēps si elles alaitoyēt l'enfant, l'infecteroyēt ainsi comme elles infectent le miroir. Aucuns autres ont dit, que si elle n'ha autre mal que celuy de l'enfantement,

suffiront sept iours pour la reposer & remettre en sa température: durant lequel temps sera succer son lait par autre enfant que le sien, ou par quelque autre femme: a fin que le lait mauuais & alteré soit osté, & le bon soit de nouveau engendré: puis les sept iours passez, non suruenant accidant nouveau, pourra commodément alaiçter son enfant, sans attendre plus long temps. Et pour prouuer leur dire, font vne induction, que le mouuement de Nature reglee se trouue estre fait par nombre septenaire, comme Galien le demonstre en la consideration des eages, & des crises des maladies, & beaucoup d'autres choses: tellement qu'ils dient, que si a l'accouchee suruient quelque maladie dedans sept iours depuis l'enfantement, la crise de ces iours se doit prendre depuis le iour de l'enfantement: mais si elle suruient depuis le vij. apres qu'elle est accouchee, on ne prend pas la crise depuis le iour de l'accouchement, ains depuis l'inuasion de la maladie: par ce que desia en sept iours il semble que les émotions & alterations de l'enfantement sont rafsises & reposeses, de sorte que la maladie suruenante ne peut estre nombree avec elles.

Aucuns autres tiennent que l'interualle de quatre iours suffit: auquel si l'accouchee se porte bien, on peut iuger qu'elle se portera bien au septiesme, par ce que le quatriesme descouure le septiesme, ainsi que dit Hippocrates: & aussi qu'au quatriesme nous voyons que le lait abonde es mamelles des femmes accouchees: laquelle abondance se fait par le mouuement de nature reiglee, & soigneuse de la nourriture de l'enfant sorty du ventre de la mere: & qu'il est ainsi que nous deuons suyure le mouuement de nature reiglee, ne la troubler nullement, & ne luy estre contraire.

80 INSTRUCTION POUR LA SAGE-FEMME,
Gordon semble estre contant de deux iours, lequel, en suy-
uant Haly, dit, que l'enfant nouuellement né doit estre nour-
ry par l'espace de deux iours seulement de sucre meslé avec
huile d'amâdes douces : esquels iours l'accouchee doit don-
ner ordre que son lait soit succé par quelque vieille, ou par
vn enfant de l'hospital : & ces deux iours passez peut alai-
cter son enfant. Auicenne iacoit qu'indeterminément ayt
dit que la femme nouuellement accouchee ne doit alaicter
son enfant, qu'elle ne soit remise en bonne disposition, tou-
teffois au mesme chapitre dit, qu'il suffit qu'elle s'en absti-
enne vn iour seulement, se fiant que vingt-quatre heures
passees cesse l'émotion, & la chaleur fieureuse ephemerine,
qui prouient des douleurs & trauaux de l'enfantement. Et
ceste opinion, & aussi celle de Gordon sont les plus com-
munes pour les femmes qui veulent estre nourrices de leurs
ensans. Suffise donc pour regle generale ce qu'Auicene ha
dit, que touteffois & quantes que l'accouchee est reposee de
ses trauaux d'enfantement, & retournée en sa temperature,
elle peut commander d'alaicter son enfant : & parce qu'au-
cunes plus tard, aucunes plus tost le sont, a ceste cause ne se
peut assigner temps déterminé, ains faut le remettre au iu-
gement de l'assistent non ignorant : lequel tant qu'il verra
que l'accouchee sera esmeüe & mal saine, il dira qu'elle ne
doit encore donner a succer sa mammelle a son enfant.

III. *En quelle maniere la mere ou la nourrice doit
donner a tetter a l'enfant.*

La mere ou la nourrice auant qu'elle mette le bout de sa
mammelle en la bouche de l'enfant, le doit lauer d'un linge
mouillé d'eau seulement qui soit tiede & nette, & non de
vin, ne d'eau rose, cōme font aucunes, car cela n'y fert de
rien,

rien, a fin que l'enfant ne succe quelque ordure avec le laiçt puis le doit presser avec ses mains, & en tirer, & faire tomber le premier laiçt: cela fait, le doit encore presser, & tirer quelque peu de laiçt dans la bouche de l'enfant, a fin qu'il l'ouure plus liberalement a prendre le tetin, & qu'il soit mieux incité a succer & a tirer sa nourriture. En apres, cōme l'efant s'efforce de succer la māmelle, elle doit ayder a l'issue de son laiçt, en pressant vn peu avec la main sa mamelle, a fin que l'enfant ne trauaille pastant a la succer: & d'autant que l'enfant est debile, d'autāt est neceffaire d'ainfi faire. En apres, se doit garder qu'en allaitant l'enfant, le laiçt ne luy entre dans le nez & les oreilles. Finalement, est bon qu'en tettāt, ia soit qu'il n'ayt pas encore prins du laiçt suffisamment, elle interrompe l'alaiçtement, ostant le tetin de la bouche de l'enfant, puis le remettant, puis l'ostant de rechef, lors qu'elle voit que l'enfant vient a tetter avec trop grand' auidité, comme vn goulu, de sorte que s'il cōtinuoit avec ceste vehemence sans interruption, luy suruiendroit crudité d'esthomas, tension, vomissement, & douleurs.

IIII. *Quel doit estre le tetin, & quel le laiçt de la Nourrice.*

Le tetin de la nourrice, ainfi que i'ay escrit au liure precedant, ne doit point estre trop large, & court, ne retiré, a fin que l'enfant ne trauaille a le prendre, & ne le pouuant prendre, crie & pleure, & meure de faim. Le laiçt doit estre de bonne blancheur, de substance moyenne, entre grosse & subtile, entre espoisse & claire, de bonne odeur, de saueur douce, & en suffisante quātité. Le mauuais laiçt est ou trop espois, gras, & gros, ou trop liquide, meigre, & petit,

82 INSTRUCTION POUR LA SAGE-FEMME,
de consistance mal vnüe, & non point pareille, de couleur
plombine, ou autre non naturelle, de mauuaise senteur, de
goust salé, ou amer, ou fort, ou quelque autre estrange.
Pour éprouuer & cognoistre s'il est gras & espois, ou mei-
gre, & claiet liquide, Oribase & Paul d'AEgine conseil-
lent d'en faire degoutter sur l'ongle du pource, l'inclinant a
la clarté: s'il fluë & coule tost, il est meigre, petit, & ai-
gueux, & tel est de mauuaise nourriture: s'il s'arreste & s'
amasse en rond comme vne perle, & en le touchant tient au
doigt comme la glu, on iuge qu'il est gras, gros & espois, &
tel est flegmatique, visqueux, & de difficile digestion: mais
si, comme il tombe sur l'ongle, il se dilate vn peu, & ne cou-
le ne trop tost ne trop tard, c'est signe qu'il est moyen &
temperé: & tel est de bon nourrissement, si les autres signes
de la bonté du laiët y sont compris ensemble. On espro-
ue encore sa substance en vne autre maniere: On fait tirer,
dit le mesme autheur, vne bonne quantité de laiët dans vn
verre, puis on y met vn peu de presure ou tourneure, la
messant avec le doigt: puis apres qu'il est caillé s'il se trou-
ue plus de petit laiët cler & de mégue que de fourmage,
c'est signe qu'il est aigueux, & n'est pas bon: & aussi s'il y
ha plus de fourmage que de l'autre, il est mauuais a dige-
rer: parquoy celuy est tresbon qui est moyen entre les deux.
Haly-abbas l'éprouue sans presure, conseillant de tirer du
laiët en vn verre, & le laisser seulemēt reposer toute la nuit,
si l'on voit le lendemain la portion du clair en plus grande
quātité que celle qui est épaisse, c'est signe qu'il est aigueux
& petit: & au cōtraire, si la portion espaisse surmōte le mé-
gue, c'est signe qu'il est gros & espois: mais si les deux por-
tions sont égales, on cognoist que le laiët est mediocre &

temperé. De la maniere de corriger le mauuais laiſt ha eſté parlé bien a plein au Traitté de la Nourrice, auquel ha eſté dit que ſi d'auanture la nourrice qu'on ha priſe pour nourrir l'enfant nouuellement né, n'ha ſon laiſt parfaitement bon, ce temps pendant qu'on le corrigera ou qu'on trouuera vne autre nourrice, Paul conſeille, qu'elle tire beaucoup du premier laiſt auant qu'alaiſter, puis apres mettre l'enfant a ſa mammelle.

V. *En quelle quantité doit la Nourrice baiſſer a tetter a l'enfant.*

Galien au treziéſme liure de L'vſage des parties du corps, dit : que la quantité des choſes que lon doit prendre, ne ſe peut eſcrire ne dire abſolument & ſimplement, ne pareillement le nombre du temps qu'il les faut prendre, ne l'heure : quelquesfois ſe donne plus grand' ou moindre quantité, plus ou moins ſouuant, plus toſt, ou plus tard, ſelon que l'homme de bon iugement & prudence iuge & cognoiſt eſtre neceſſaire. Et pour mieux auifer de la quantité du laiſt qu'on doit baiſſer a ſaccer a l'enfant, elle eſt limitée & determinée par certaines conſiderations de l'age, de la complexion & habitude, & de l'affection de l'enfant : car es premiers iours & au commencement de ſa naiſſance, voire iuſques au premier mois, par ce qu'il n'ha pas le pouuoir de digerer beaucoup, luy en conuient donner peu : & au temps enſuyuant qu'il croiſt, & eſt plus fort a tirer & a ſuccher le laiſt, & a le digerer, faut luy en baiſſer a ſuccher d'auantage.

En apres, s'il est de complexion temperee, de bonne habitude, & de grand' vie, il est raisonnable de luy en donner en plus grand' quantité, sinon en moindre. Puis si lon voit qu'il crie, encore qu'on luy en eust baillé autant qu'on penseroit estre assez, si on l'auoit donné a vn autre : neãtmoins parce qu'on pense par son pleur, qu'il ha faim, & qu'il demande a tetter en criant, apres auoir obserué la maniere de l'alaiçter cy deuant-ditte, luy en faut bailler encore : mais si au contraire, on voit qu'il le refuse, & ne veut estre contrainct d'en prendre, ne le faut trop charger, ne luy en bailler contre son cœur, par ce qu'il s'en trouueroit mal. Toutes-fois, avec toutes ces considerations, faut obseruer vne reigle generale, qu'a l'enfant, quelque eage, bonne habitude, complexion, & appetit qu'il ayt, ne conuient tant luy bailler en vn coup, qu'il en soit saoul : c'est a dire, plus qu'il ne luy en faut : car par trop grande repletion, luy auient tension de ventre, inflation es costez, abondance de ventositéz, trachees, pesanteur, faute de repos, & enuie de vomir.

V I. Combien de fois le iour il faut alaiçter l'enfant.

Il semble doncq' estre meilleur donner peu & souuant a tetter a l'enfant, que d'en donner beaucoup en vne fois, & loin a loin : car en tettant peu & souuant, il digere fort bien, & le temps se passe sans crier, ne sans douleur, & si ne vient point a facherie d'esthomas, ni pareillement a enuie de vomir, & si dort beaucoup mieux, & plus longuement a son aise : & au contraire, l'enfant ayant prins beaucoup de lait en vne fois, par ce que l'esthomas est de fort petite capacité es enfans, il s'enfle & s'estend, & par ainsi l'enfant

sent douleur, & n'a repos. Vray est, que Paul d'Aegine conseille que deux fois le iour, ou trois pour le plus, on luy donne la mammelle : de sorte qu'entre l'un & l'autre allaitement doit estre assez longue espace de temps. Toutesfois Auicene n'observe ce nombre de temps, sinon es trois ou quatre premiers iours, pour plusieurs raisons : premiere-ment, pour ce que l'enfant ha changé de lieu & de regime : c'est a dire, de maniere de prendre nourrissement : & que toute mutation soudaine est dangereuse : secondement, pour ce qu'il ne se fait pas si grande resolution des humeurs de son corps a l'air, cōme dedās le ventre de la mere. Finalement, pour ce que lors il est las & trauaillé de son enfantement, cōme qui ha esté froissé & foulé par les estroicts, sortant du ventre de sa mere, ne pouuant encores en ceste lasteté porter quantité de lait, & pour ceste mesme cause estant disposé a maladies : pour le preseruer desquelles doit sobrement succer le lait esdicts premiers iours : & encores n'observe ledit Auicenne le nombre du temps susdit, tant qu'il vueille qu'on luy donne la mammelle toutes les fois qu'il crie : mais ces quatre iours passez, d'orenavant soit qu'il crie ou non, n'estant desia plus las, & ayant acquis quelque force pour mieux succer & digerer le lait, conseille de luy en donner plus souuāt le iour, & specialement si l'enfant est de bonne corpulence, & de grande vie : pourautāt que le lait de la femme est de substance subtile & nette, & se digere facilement, car ce n'est qu'un sang blanchy : & es enfans se fait continuelle & grande resolution, par ce qu'ils sont de cuir rare, tendres, & abondans de chaleur naturelle.

VII. *À quelles heures du iour faut reiterer l'alaitement de l'enfant.*

Ainsi comme nous auons dit, qu'on ne peut absolument determiner la quantité du laiçt qu'on doit dōner a l'enfant, sinon par certaines considerations de son eage, de sa complexion & habitude, & de son affection: aussi nous dirons, qu'il est impossible de limiter le temps & l'heure de luy reiterer l'exhibition du laiçt, sinon que nous considerōs saditte affection & sa disposition. On estime qu'il est temps d'alaiçter de rechef l'enfant, quand on voit qu'il y ha ia long temps qu'il n'ha rien pris, & que le laiçt qu'il ha pris ne l'ha point pris superflumēt: ce qui se cognoist, dit Razis au iiii. a Almanfor, parce que son ventre n'est point tendu, & ne fait pas beaucoup de ventositez par le bas, son vrine n'est point blāche, il ne se trouue point pesant & lasche, son sommeil n'est pas trop long, & en dormant ne se tourne point d'un costé & d'autre, & ne pleure point a cause de trop grande repletion, qui luy face tension & douleur: car quand on luy baille en vne fois tant de laiçt qu'il en est saoul, c'est a dire qu'il en ha prins plus qu'il ne luy en faut, dit Paul d'Aegine, & apres luy Auicēne, il luy suruiuent inflation, tension, abondance de ventositez, blancheur d'vrine indigeste, douleur, vomissemēt, & trachees: & alors le voyant ainsi, ne faut pas encore luy donner la mammelle. ains le laisser long temps sans prendre le laiçt: plus tost le faire dormir iusques a ce que son premier laiçt soit digeré, puis l'alaiçter de rechef. On ha parellement oppinion qu'il est heure de reiterer l'alaiçtement a l'enfant, quand il pleure & crie: iugeant a peu pres par cela qu'il ha faim, & parce demande a tetter, au temps mesmement que lon pense qu'il peut bien auoir digeré le laiçt precedant. Car la faim est vn sentiment triste, qui est a l'oriñce de l'esthmac, & l'enfant ha

ce sentiment, quand il ha beſoing de repaiſtre: dont il auient qu'il pleure & crie, iagoit qu'il le peut faire quelqueſois par autre occaſion: parquoy il ſe faut prendre bien garde que le criement & le pleur ne vienne de trop grande repletion d'eſthomac, & de ventofitez multipliees en iceluy, nonobſtant qu'il y eut ia long temps qu'il ne print le tetin: car ſ'il crioit & plouroit de trop grande repletion, on iugeroit plus toſt deuoir eſtre encores retardé le temps de luy rebailer la mammelle. Mais quand on voit qu'il ne crie point pour trop grande repletion, & que ce n'eſt qu'un petit pleur, c'eſt ſigne qu'il eſt temps de luy donner a tetter. Ce petit pleur n'eſt que bon a l'enfant, & le doit on vn petit laiſſer crier pour pluſieurs raiſons, auant que luy mettre le tetin a la bouche: car par ce petit pleur moderé s'excite l'appetit de l'eſthomac, s'éueille la chaleur naturelle, ſe purge le cerueau, & les parties pectorales ſe dilatent. Mais il ne faut pas le laiſſer crier beaucoup, ne long temps, ains luy conuient peu apres donner la mammelle: Car, dit Galien, On doit prendre grand ſoing de l'enfant qu'il n'encoure paſſions immoderees, & plus toſt aduiſer ce qu'il deſire, & luy bailler, auant que la douleur augmentee ne tire le corps & l'ame en mouuement deſordonné. Et nous voyons bien ſouuant aduenir, que par trop laiſſer crier les enfans, & ne les apaiſer, le peritoine ſe rompt, & le boyau leur deualle, & auſſi quelques fois la coeſſe du ventre. Les nourrices des riches bien ſouuant commettent grand' faute, leſquelles pour donner a tetter a l'enfant, attendent au nombre des heures, & non pas a ce que l'enfant crie & demande a ſucer le laiſt, ou a ce que ſon ventre n'eſt point trop tendu,

88 INST. POVR LA S. A. FEM. ET POVR LA NOVR.
& le laiët qu'il ha pris par-avant, depuis le temps qu'il l'ha pris, peut estre digeré: la font deux heures, dient-elles, qu'il n'ha pas tetteé, & luy dōnent la mammelle, soit qu'il ait digeré le laiët precedant ou non : & par ainsi mettent bien souuāt du crud sur crud, qui est cause de beaucoup de maux a l'enfant. Et seroit meilleur d'attendre, ou que l'enfant plorast, comme s'il demandoit a tetter, ou bien auiser s'il est sans aucune tension de ventre, & s'il y ha temps suffisant passé pour auoir bien digeré ce qu'il ha pris, sans attendre qu'il crie. Et voila toute la maniere comme l'enfant doit estre allaiëté: de laquelle reitererons le propos au traiëté qui viendra apres, De la maniere comme on doit nourrir & gouuerner l'enfant durant qu'il tette, & auāt que le seurer & detrier. Parquoy c'est assez iusques a present, que nous auons expliqué toutes les choses qu'on doit faire a l'enfant es premiers iours prochains de sa naissance.

F I N.

DE LA MANIERE DE NOVRIR
L'ENFANT DV RANT QV'IL
Tette, & auant que le feurer & détrier.

LIVRE III.

P A R

M. Sim. de Vallambert, Medecin de Madame Marguerite de France, Duchesse de Savoie, et de Berry.

V LIVRE precedant, i'ay deduit ample-
ment & par ordre tout ce qu'il faut faire a l'en-

A fant a sa naissance, & en ses premiers iours.

Comme premierement, lors qu'il sort du ven-
tre de la mere, la sage-femme luy doit ayder
doucelement, le tirant par la teste, s'il est possible, puis le res-
te du corps avec la deliure, s'il se peut faire : puis luy lier
le nombril deux doigts au dessus du ventre, puis le couper
deux doigts au dessus de la ligature, puis le mettre dans l'-
eau tiede, & le baigner, & ce temps pendant frotter son petit
ventre & tout son corps doucement, en radressant & facon-
nant ses membres : puis les desecher en frottant doucemēt
avec linges deliez, & incontinent poudrer son corps avec
du sel tout seul ou meslé avec roses & myrthes, cōme con-
seille Galien, pour endurcir ses membres : & non pas avec
mente ou calaminte, comme conseillent aucuns : ou bien le
fomenter & estuuer avec saumure, cōme ordonne Auicēne,
ou avec farine non passée, comme font autres : ou si lon
veut faire cōme Razis & Auenzoar, l'oindre seulement avec
huile, pour le peler & nettoyer, & conforter ses membres,
iaçoit qu'ils le faisoient sans l'auoir premierement baigné :

90 COMME IL FAUT NOURRIRE L'ENFANT
ou bien l'absterger & frotter avec le dedans d'une couënn
de lard, laquelle aucuns mouillent & trempent d'eau tiede,
puis soudain l'envelopper & couvrir de linges, le tenât de-
dans le giron : ce temps-pendant luy bailler du miel a la
bouche, & luy en frotter le palais, ou du mithridat, ou de
l'huile d'amandes douces, avec sucre, ou quelque confe-
ction cordiale, selon qu'on verra la necessité, assez long
temps avant que l'alaiter : puis l'emmailloter, puis le met-
tre dormir. Toutes lesquelles choses la sage-femme peut
faire au commencement de soy-mesme, ou avec la nour-
rice : puis deslors s'en déporte, & laisse l'enfant sur les bras
de la nourrice, qui ha esté choisie pour le nourrir & gou-
verner : laquelle pareillement i'ay enseigné comme au ré-
ueil de l'enfant le doit remuer, le nettoyer, luy donner de
l'huile d'amandes douces : puis quelque peu de temps apres,
luy bailler la mammelle ; en notant que tous les premiers
iours le faut aussi baigner, redresser ses membres, le remu-
er & nettoyer souuant de iour, luy donner quelquesfois du
miel pour le purger, ou de l'huile d'amandes douces pour
semblable fin, & contre les tranches. Ce qui deura estre
continué encore long temps apres, comme il sera declairé
amplement en ce liure, auquel l'enseigneray tout ce que la
nourrice deura faire tous les iours, depuis vn matin iusques
a l'autre, cōtinuant des le commencement de sa charge ius-
ques au temps qu'elle deura seurer & detrier l'enfant, &
cesser de le nourrir de son lait. Ce qui m'ha semblé estre
bon & expediant d'enseigner, par-ce qu'a la verité l'ensei-
gnement du gouvernement de l'enfant appartient aux Me-
decins : & ni la sage-femme (quelque experience qu'elle
ayt) ni la nourrice, tant bonne & sçauante soit, ne le sça-

uent bien gouverner, & ne l'entendent finon comme les Medecins le cōseillent, pour la diuersité des complexions, habitudes, & dispositions des enfans. Pour entrer donques en matiere, & entamer le propos par ou il faut, il est bon, auant toutes autres choses, declarer en quel air, & en quelle demeure doit estre l'enfant nourry.

De la demeure en laquelle on doit nourrir l'enfant.

C H A P. I.

NO v s sommes tous subiects a l'air : que voulons-nous ou non, il ne cesse non seulement d'environner nos corps & penetrer dedans par transpiration, & par les pores du cuir : mais incessamment est attiré & humé de nous aux poumons & au cœur par respiration, & par soufle, pour l'entretenement de la vie, tellement que sans cela a grand'peine pourrions nous viure vne minute de temps : dont il est plus necessaire a la vie que le boire & le manger, & toutes autres choses : d'autant que sans icelles on se peut passer pour quelque temps, mais non pas ainsi de l'air. Et n'y ha rien au monde qui ayt tant d'efficace a changer les complexions du corps qu'iceluy air, selon qu'il est plus chaud, ou plus froid, ou plus humide, ou plus sec qu'il ne doit : & s'il est mal sain & corrompu, c'est vne chose dangereuse : & s'il est au contraire, la personne se portera fort bien. Parquoy on doit bien auiser de mettre l'enfant a nourrice en vn lieu ou l'air soit bien temperé, & qui soit pur & bon. L'air est pur & bon, lequel n'est point infecté de la vapeur des estangs,

92 COMME FAVT NOVRIR L'ENFANT
des marez, des lacs dormans, des fossez, des esgouts de la ville, & n'est point enclos de montaignes de toutes pars, ni autremēt, en lieux bas & rheumatiques & estouffez, ou n'a point de soleil, ne pres des priuez, ne des fiants ou fumiers, ne des voiries, ne des tanneries, ne des maisons des taincturiers, ou faiseurs de mâches de cornes, ne des fourneaux de chaux, ou de metaux, ou de terre, ne des poissonneries, des cauernes, des cimetieres & des sepulchres. Parquoy ceux qui demeurent en maison bien airez, nette & saine, sont fort mal en faisant transporter leurs enfans aux villages, ou ailleurs, es lieux mal airez, ords, puants, & mal sains.

I I. A scauoir siles bonnes senteurs, & les perfuns sont conuenables aux enfans.

Il s'ensuyuroit doncques que les bonnes odeurs, qui sont comprises au genre de bon air, seroyent conuenables aux enfans. A la verité, encore que l'enfant, pour la grand' humidité du cerueau, ne peut pas sentir le plaisir des bonnes odeurs, ne le desplaisir des mauuaises: toutesfois, parce que les bonnes, par certaine propriété, confortent les esprits & les membres principaux, specialement le cœur, par-quoy sont dites cordiales, & cōseruent les vertus, elles sont conuenables aux enfans. Non pas qu'il faille tenir a l'entour d'eux des linges & autres choses parfumees de bōnes senteurs, d'autant qu'on craint en eux dissolution de chaleur naturelle par les fumees des odeurs, douleur de teste, rheumes & preparation a maladies: sinon qu'il fallust corriger le mauuais air par telles choses. Tant y ha, que les mauuaises senteurs leur sont fort dommageables, d'autant que les esprits des enfans sont purs, & facilement passibles.

III. *De la situation de la chambre de l'enfant.*

La chambre ou lon mettra l'enfant doit estre exposee au soleil leuant, fraische en esté, peu froide en yuer : & s'il fait trop chaud en esté, ne faut craindre, ce temps pendant que l'enfant dort, tenir la fenestre ouuerte.

De coucher l'enfant au berceau, & le faire dormir.

C H A P. I I.

PARCE que la derniere chose qui ha esté faite a l'enfant, au liure precedant, c'est qu'il ha tette, puis ha conuenu le mettre dormir : il est seant au cōmancement du present Liure de traitter du sommeil qu'il doit prendre. Et iagoit que desia ha esté declairee la maniere de le coucher, touteffois il est a propos d'en toucher icy quelque mot, pour tenir ordre de la doctrine entreprinse : en aoustant ce qui ha esté obmis, & declairant plus amplement ce qui n'ha esté suffisamment demonstté.

I. *Combien le dormir est necessaire aux enfans.*

D'autant que la complexion de l'enfant est humide d'une humidité benigne & suaue, mésmement tout le temps qu'il tette, & est nourry de lait, tout son regime doit estre humectation : parquoy le sommeil, (lequel est vne chose qui humecte beaucoup,) ainsi comme le lait, qui est vn nourrissement humide, luy est fort conuenable, tellement que la plus part du temps luy doit estre employee a manger & a dormir : & toutes choses, dit Auicenne en ses Cantiques, lesquelles luy empeschent le sommeil doiuent estre euitées.

II. *A sçauoir, si on doit mettre dormir l'enfant incontinant apres auoir mangé.*

Auicenne en suyuant Razis, escrit que l'enfant peut

94 COMME IL FAUT NOURRIR L'ENFANT
dormir de iour iusques a quatre ans, voire sur sa viande : & luy est loisible encore, dit il, dormir en mangeant, ou incessamment apres auoir mangé, & a toutes heures du iour : la raison est ia dite, que le dormir est conuenable a sa complexion: & doit l'enfant plus dormir que veiller : mais quād il aura passé trois ans, & non plus tost, dit Gordon, le faudra accoustumer petit a petit a ne dormir point de iour.

III. *La maniere de coucher l'enfant.*

Il ha esté enseigné au liure precedant, cōme il faut preparer le berceau, & que les matelas doiuent estre de laine nette, ou de coton, & non de plume. Quand on couche l'enfant, sa teste doit estre mise plus haut que le reste du corps, a fin que par telle situation les superfluitez du cerueau descendent plus aisément vers leurs emunctories, & que les humeurs du corps ne declinent point vers la teste, & les fumées & vapeurs qui montent droitement a la teste, sortent par les commissures : & pour le bien coucher, faut éleuer son oreiller ou coëssinet, lequel ne soit ne trop dur ne trop mol, pour le preseruer d'auoir son col tors en dormant : & le faut lier & bander au berceau sur la paillasse ou matelas, de si bōne sorte que l'extremité de son col, ou son dos, ne soit courbé. Et combien qu'outre cela, pour l'engarder de cest inconueniant, il est bon de le coucher sur son dos, comme le pratiquent ordinairement les nourrices : touteffois il semble qu'il seroit meilleur de le cliner vn peu sur l'vn des costez, mesmemēt quand il est vn peu grandet : car en estant couché sur le dos, les superfluitez du cerueau distillent sur la poupe & le derriere de la teste, auquel endroit n'ont point d'emunctorie pour se purger, & estāt là retenues, peuvent estre cause de beaucoup d'inconuenians, comme de

catharres, de spasme & epilepsie: & au contraire estant couché sur l'un des costez, spécialement sur le droit, il euite ses inconuenians, & iette mieux son flegme. A la verité, les inconuenians qui sont en l'une & l'autre maniere de coucher l'enfant, c'est à sauoir la corbure du dos, pour auoir longuement couché sur le costé, la retraitte des humeurs au derriere de la teste, pour auoir dormy sur le dos, ont donné occasion a plusieurs de douter & disputer en quelle sorte il est meilleur de le situer & mettre pour dormir. Car les vns tiennent qu'il est plus commode sur le dos, & incommodé sur les costez, fondant la commodité sur deux raisons: l'une parce que le dos est le soustenement de tout le corps, comme la carine de toute la nauiure, & est plus seur que tous les autres os, sur lequel l'enfant s'appuye en dormât, comme sur vn fondement qui est fort: l'autre raison, par ce que dormir sur le dos, preserue du courbement des membres. Au contraire, ils fondent les inconuenians de coucher sur les costez sur deux autres raisons: car, dient-ils, vn costé ne pourroit soustenir l'autre, par ce que les costes sont encores bien menües & mollettes, & le dos au contraire est plus fort: en apres, y auroit danger couchant longuement dessus l'un des deux costez, d'encourir en contorsion du dos, par ce que les costes sont ployables a cause de leur mollesse. Les autres pensent qu'il est plus expediant dormir sur les costez, & plus inconueniant reposer sur le dos: & alleguent les raisons de la commodité de l'un, & de l'incommodité de l'autre, celles que cy dessus ont esté dittes. Parquoy y ha discord touchât ce propos entre les docteurs: car ceux qui ont veu quelque enfât mort de repletion de cerueau, de catharre, ou d'epilepsie, ayât souuenâce de tel accidât,

ordonnent que l'enfant soit couché sur le costé. & non sur le dos: ceux au contraire qui se recordent qu'aucuns enfans sont deuenus tors & bossus, ayant oppinion qu'il soit auenu pour auoir esté couchez tousiours sur le costé, ont donné leur auis que l'enfant doit coucher sur le dos, & non sur le costé. Et par ce Galien, au premier liure du Regime de santé, veut que celuy qui aura la charge de nourrir l'enfant, soit bien sage a discerner l'une & l'autre façon de coucher, vsant d'une cōiecture subtile, laquelle foudra le differant, en ceste maniere: Durant le temps que l'enfant tette & est a nourrice, & n'vse point encore de viande solide, & n'est pas encore fortifié ne suffisamment endurcy de son cuir, de sa chair, de ses muscles, de ses nerfs, ne de ses os, il doit pour la plus-part d'iceluy temps gesir droittement sur son dos: mais lors qu'il commence d'vser de nourrissement plus solide que de lait, & que ses membres deuiennent plus durs & plus forts, lors doit estre couché tour a tour sur vn costé, puis sur l'autre, & quelques-fois sur le dos: & tant plus se fortifiera & croistra, & tant plus se couchera sur les costez, comme lors quand les dents commencent a sortir: car adoncq' cessera la peur du danger de catharre, & du courbemēt de corps. La mere, sur ce passage & la nourrice aussi, doiuent estre auerties de ne laisser coucher l'enfant avec elles, ni aupres d'elles.

IIII. *Comme on doit couvrir l'enfant.*

Après qu'on aura couché l'enfant pour dormir, faut le tenir couuert plus que quand il veille, parautant qu'en dormant la chaleur se retire au dedans, & s'il n'estoit plus couuert, il se refroidiroit: cōbien que la couuerture doit estre de moyenne chaleur, & n'est pas bon de le couvrir de pelisse,

lisse, ni le tenir trop chaudement, attendu que les enfans sont pleins de chaleur, parquoy se feroit trop grand' resolution, ioint aussi qu'ils doiuent au commencement auoir le cuir dur & ferme, lequel par la trop grand' chaleur se relache. Sur son visage faut tenir vn archet ou demy cercle de bois, & mettre dessus vn beau linge pour le couvrir, sans toucher sa face, de peur d'empescher son soufle, a fin d'engarder que les mouches ne le mordent, ou que la poudre, ou quelque autre chose ne tombe sur ses yeux, & que la grand' clarté, ou le vent, ou l'air trop froid, ne luy face nuyfance.

V. Du lieu auquel on doit mettre dormir l'enfant.

On doit mettre dormir l'enfant, comme ia ha esté dit au Liure precedant, en vne chambre ou l'air soit temperé, la tenant vn peu obscure, non trop esclairee ni des rayons du soleil, ni de la lune, ni des flambeaux ou chandelles. Car dormir en lieu froid, engendre des rheumes, & en vn lieu chaud, resoult & debilitre les esprits & la chaleur naturelle, l'attirant en dehors, laquelle deuroit a l'heure du dormir se retirer au dedans, pour fortifier la digestion: aussi gesir en lieu lumineux, distrait les esprits au dehors (qui s'esfouysfent de la clarté) par mouuement contraire a celuy du sommeil, qui les attire au dedans: dont s'ensuyt agitation & mouuemens diuers desdits esprits & de la chaleur, chose tresmauuaise, tant par ce qu'elle empesche la profondeur du sommeil, que par ce qu'elle émeut inegualement les humeurs du corps. D'auantage, par ce que la veüe de l'enfant est encore debile, la grand' clarté la debilitte encores plus fort, d'autant qu'elle la dissipe & disperse: & au contraire, l'obscureté ou peu de lueur la congrege & fortifie.

V I. *De bercer l'enfant, & chanter pour le faire dormir.*

Pour faire venir le sommeil a l'enfant, faut le bercer doucement d'un mouuement égal, & non point fort : car le fort & inégal, agite & émeut le lait qui est en l'estomac, empesche la digestion, trouble & étonne le cerueau, & quelquesfois fait vomir l'enfant : au contraire, la douceur & égalité du mouuement, prepare & excite la chaleur a la digestion du lait, le fait descédro vers le fond de l'estomac, & d'auantage, il endort, tout ainsi cōme font quelquesfois les frottemens doux, & les chansons : car par telles choses, l'ame se retire doucement a soy, & au dedans, & les esprits animaux cessent de toutes autres actiōs & s'assopissent : lesquels, parce que nous sommes cōposez de mouuemans naturels & doux, & de certaine consonance & harmonie, s'esioyissent & recreent de telles choses. Es grâdes personnes n'est bon de dormir incontinant apres le lait, ny trauailler aussi, de peur qu'il ne se corrompe par trop grand' chaleur, excitée au dehors par le trauail, & retirée au profond & au dedans du corps par le sommeil.

V I I. *Combien on doit laisser dormir l'enfant.*

Cela ha desia esté dit, que l'enfant doit plus dormir que veiller : & les Docteurs tiennent que le sommeil d'iceluy doit estre plus long que le veiller, iusques a trois ou quatre ans : mais deslors faut cōmancer de le reigler & mesurer. Aucuns dient, que si l'enfant n'est point malade, & le sommeil qu'il dort est naturel, on le peut laisser dormir xij. heures. Mais la plus grand' part tient que le dormir de la nuit, a ceux qui sont ia grandets, ne doit excéder viij. ou ix. heures, parce que le trop long dormir est nuisible. Et Galien sur l'Aphorisme, auquel est escrit : que si le sommeil passe mesure,

il est pernicieux, reprend ceux qui dient qu'il n'y ha point de dormir superflu, lequel viêt de cause naturelle: Car, dit-il, le lôg dormir refroidit & humecte trop le cerueau, & retient les superfluitez en iceluy: Et par ce, dit Auicène, Fen. 2. can. 1. qu'il estourdit & fait les vertus animales mouffes, engendre pesanteur de teste, produit maladies froides, procreë multitude de flegme, lequel empesche de refoudre les vapeurs & superfluitez qui se leuent au cerueau, estaint la chaleur qui viuifie le corps: & quelquesfois, dit-il, encore, il en auieët perte d'appetit, & mal de cœur, pour l'abondâce des superfluitez causées de trop long sommeil & repos: car lors que les superfluitez requierent d'estre mises hors, il n'y ha point de doute que le long dormir nuit grandement. On reigle & mesure le dormir de l'enfant selon la quantité du nourrissement qu'il ha pris, dit Haly: & s'il ha succé le lait & pris nourrissement plus que de coustume, dit Rasis, on luy doit prouoquer le sommeil plus que de coustume, & le laisser dormir plus que de coustume.

De nettoier l'enfant apres qu'il est éueillé, & de le lauer ou baigner, & de ce qu'il faut faire quand on le lue ou baigne.

C H A P. I I I.

QUAND l'enfant ha assez dormy & est éueillé, la nourrice le doit prendre & porter aupres du feu, puis le démailloter, puis le nettoier cōme s'ensuyt.

I. De lauer quelques fois l'enfant d'eau salee, es premiers iours.

Si l'enfant abonde en son cuir en humidité & orduze, il est bon le lauer d'eau tiede, quelque peu salee: cōme ie l'ay veu pratiquer en Bourgoigne, tant pour le nettoier que fortifier, sans toucher au nez & a la bouche, de peur que le nez, qui est camus es enfans, ne le soit d'auantage: parquoy se-

roit empesché le soufflé & la purgation du cerueau par les narines : & de peur aussi que la bouche ne sente douleur, ou que par icelle ne coule quelque peu de salure au gosier, & aux parties pectorales, qu'il écorche & face toussir. Ce la- uement salé se fait seulement es premiers iours, comme au liure precedant ha esté dit.

II. Du lauement d'eau douce.

Après que l'enfant ha esté nettoyé de ses excremens, & laué de saumure s'il ha esté expediant, la nourrice doit faire l'vne de deux choses : ou bien le baigner, ou le lauer simple- mēt d'eau tiede sans le baing : & parce qu'il n'est pas besoin le baigner toutes les fois qu'il est éveillé, pour le moins doit estre le plus souuant laué d'eau pure tiede, doucemēt avec la main : car outre que cela nettoye & humecte l'enfant, il y prend plaisir, & principalement après auoir senty la mor- dication du sel, si d'auanture il ha esté frotté d'eau salee.

III. Du baing.

Au liure precedant nous auons parlé du baing, qui est a faire seulemēt a l'heure de la naissance de l'enfant, & es deux ou trois ou quatre premiers iours, lequel estoit composé de certaines choses confortatiues du cuir & des membres : icy nous parlerons du baing & du lauement d'eau simple, qu'il faut reiterer souuant iusques a sept ans. En quoy il faut ob- seruer certaines reigles : premieremēt, pourquoy doit l'en- fant estre baigné, secondement, en quelle eau, & en quel vaisseau, & en quel air, en après a quelle heure, & en quel temps, puis, quantes fois le iour, d'auantage, combien lon- guement, plus, en quelle maniere on le doit tenir au baing, & ce qu'il faut faire en le baignant, finalement, combien de fois il le faut reiterer, & iusques a cōbien d'ans cōtinuer.

IIII. *Qu'il est bon & expediant de baigner l'enfant.*

Galien sur l'aphorisme d'Hippocrates, auquel est escript, que la nourriture qui humecte est cōuenable a ceux qui ont les fieures, & aux enfans, donne raison pourquoy cela est ainsi: car, dit-il, la maladie & ce qui est contre nature se guerit par son contraire, comme la fieure qui est seche, par humectation: & la nature & ce qui est selon nature, se conserue par ce qui est semblable, cōme l'eage & la nature des enfans qui est humide, se doit conseruer par chose humide, comme est le baing. Donques s'il se trouue que l'enfant n'ayt aucune humidité qui soit contre nature, pour raison de son eage & complexion, doit estre humecté de baing d'eau douce, laquelle humecte, & non point d'eau sulphuree ou alumineuse, ne semblable, laquelle deseché. Et par ainsi ledit autheur veut que la nourrice le laue tous les iours, nonobstant qu'il sembleroit qu'il eust besoin de desiccation pour l'abondance de l'humidité, par ce que le cōtraire doit estre osté par son contraire pour la conseruation de santé: mais attendu que son humidité n'excede point la raison de sa nature, & de son eage, & que selon icelle il est sain, & aussi que nostre vie consiste en retardemēt de siccité, l'humectation est requise comme chose naturelle aux enfans, parquoy le baing leur est conuenable. Autres raisons y ha pourquoy l'enfant doit estre baigné: l'une est a fin d'absterger & nettoyer les ordures de son cuir, car par la continuelle euaporation de son corps, se congrege au cuir beaucoup de limosité & saleté: l'autre, a fin d'exciter la chaleur naturelle: la tierce, a fin de resoudre les superfluitez & excremens fuligineux du dedans du corps, pour donner lieu au nourrissement auenir, pour laquelle fin le baing opere &

sert aux petis enfans comme fait l'exercice aux grands : encores y ha il vne autre raison pourquoy on doit baigner les enfans, c'est a fin que le corps de l'enfant, estant par le baing conserué mol & tendre, puisse mieux croistre & paruenir en vne habitude plus grande & plus belle. Et voila les raisons par lesquelles conuient baigner les enfans.

V. A quelle heure faut baigner l'enfant.

Deux temps sont a obseruer commodes pour baigner l'enfant, l'un est du iour, l'autre de la disposition de l'enfant. L'heure du iour determinee pour la plus commode a baigner l'enfant, est le matin, s'il doit estre baigné vne fois le iour tant seulement : si plusieurs-fois, l'heure n'est point determinee, mais la faut élire selon la nature du temps, & disposition de l'enfant. Or l'heure la plus conuenable, & profitable a baigner l'enfant, est apres qu'il ha longuement dormy, car lors la digestion est faite, & est temps que les superfluitez soyent euacuees, & que l'enfant soit preparé a prendre nourrissement, car il est expediant & vtile que le repas voise apres le baing, comme le baing voise apres le sommeil : que si le baing estoit fait a l'enfant ayant le ventre plein de viande, la viande indigeste seroit tirée es membres, & introduiroit oppilation, cause de beaucoup de maladies.

*V I. Quantes-fois le iour doit estre baigné
l'enfant.*

Il est conuenable & fort commode a l'enfant d'estre baigné deux ou trois fois le iour, selon l'auis d'Auicenne: car le lauement, ainsi que nous auons dit icy dessus, est comme vne preparation a prendre le nourrissement: & comme ainsi soit que deux ou trois fois le iour, ou plus, il faut nettoyer & renouueller de linge blanc & net l'enfant, & autant de fois luy bailler a tetter: aussi autant de fois le iour, si besoin est, le faut lauer ou baigner par chacun iour. Combien que cecy n'est pas gueres obserué par la paresse des nourrices, lesquelles le plus communement, & encore celles qui sont des plus diligentes, ne baignent l'enfant qu'une fois le iour, ou le matin, ou le soir: & es autres heures qu'on le nettoye, se contentent de remuer seulement de linge.

*V II. En quel lieu, en quel vaisseau, & en
quel eau on doit lauer l'enfant.*

Il conuient baigner l'enfant en lieu temperé & clos, en vn vaisseau proportionné au corps de l'enfant, & en eau douce & simple: sçauoir est, en esté temperé, faut baigner l'enfant en eau temperee: & si l'esté n'est chaud, le faut baigner en vn eau plus tiede, & vn petit plus chaude:

104 COMME IL FAYT NOURRIRE L'ENFANT
& s'il est trop chaud, en eau moins chaude & plus partici-
pant de froideur moyenne : a fin que par la chaleur mode-
ree du baing soit faite la resolution des superfluitez en esté
modéré : & par la froideur moderee dudit baing soit pro-
hibee la grand' resolution de la chaleur naturelle, & des es-
pritz, a cause de l'esté effrené en chaleur. En yuer doit touf-
iours estre le baing plus tiede, & plus ou moins chaud selon
la disposition de l'air.

*VIII. La maniere de tenir l'enfant au baing, & de le
lauer, & ce qu'il faut faire en le baignant.*

En lauand & baignant l'enfant, il faut garder que l'eau
n'entre dedans ses oreilles : car elle seroit cause de douleur,
& se pourroit engendrer en leur racine quelque apostume :
parquoy pour les preseruer est bon les boucher de coton, &
ne mener pas l'eau si haut. Et la nourrice le doit tenir au
baing en ceste maniere : premierement le doit prendre avec
la main droite, & appuyer la poitrine d'iceluy sur son bras
gauche, puis le lauer avec la main droite. La raison pour-
quoy l'enfant doit estre appuyé sur sa poitrine, & non sur
son ventre, est parce que la poitrine est ossue, & dure & fer-
me, soustenant mieux l'appuy : & le ventre au contraire est
mol, tendre, & passible, avec les entrailles qui y sont : sur
lequel s'il estoit appuyé auientroyent deux inconuenians :
l'un, que les intestins par le pressement de l'appuy seroyent
offensez, l'autre que les parties d'enhaut pesantes pourroyét
tomber dans le baing. Quand il sera grand, & vn peu plus
fortifié, il pourra estre baigné assis ou couché sur le dos.
Ainsi cōme la nourrice le tient & le laue, elle luy doit me-
ner doucemēt les pates de ses mains vers le dos, & les pieds,
vers les fesses, petit a petit, sans violence ne soudainement :

puis estendre les mains & les doigts & les bras le long des costez, faisant cela en sorte que ses membres soyent rendus souples, & agiles au mouuement. Ce tēps pendant luy doit nettoyer le nez, ce qu'encore luy conuient faire souuant, & deuant que le lauer, & baigner & apres, avec le doigt ayant les ongles coupez, a fin de purger son cerueau, qui abonde merueilleusement en superfluitez, a cause de sa grand' humidité: que si elle ne le faisoit, il pourroit affuer au nez a-bondance de morue, & seroit facilement oppilé, & par les trous du palais descendroyent les humeurs dans la bouche, lesquelles, ne pouuant l'enfant cracher, il aualleroit, & blesseroit son esthomas: ou sinon elles couleroyent en la poitrine, & opprimeroyent l'halene & le soufle.

IX. Combien de temps doit estre l'enfant au baing.

Si tost que le corps de l'enfant commence de s'eschauffer & rougir, faut cesser de le lauer, & ne l'oster du baing plus tost, sinon qu'il se fachast d'y estre tant: car l'y tenir trop longuement, tire la chaleur interieure & les esprits a la superficie du corps, & les dissipe: & aussi quand il n'y demeure pas assez, le baing n'excite pas la chaleur naiue, & ne resoult pas assez les superfluitez par les pores, lesquelles superfluitez tiennent & occupēt le lieu de la viande. Et quand il ne prend pas plaisir d'y estre, si on luy laisse, cela le fait crier, & le tire en dēpit, & en mouuement desordonné, tant de ses esprits que de ses humeurs.

X. Combien de iours, & iusques a quantes annees se doit continuer le baing.

Nous auons dit combien de fois le iour il faut baigner l'enfant, il conuient dire maintenant combien de iours, &

106 COMME IL FAUT NOURRIE L'ENFANT
combien de fois l'an, & combien d'annees. En general,
nous disons que tant que l'enfant ne peut faire exercice, ne
cheminer de soy-mesme, le faut baigner tous les iours : &
venant le temps qu'il cheminera & s'exercitera, on le bai-
gnera par interualles, par ce que le baing n'est sinon quasi
comme substitut & supplement du defect d'exercice. Et
par ce Gordon conseille que lors en esté on le baigne sou-
uant, pour lauer & nettoier les sueurs, & les ordures: en y-
uer, pour tenir lieu d'exercice: moins souuât au printemps
& en automne: & sont d'avis les anciens Medecins de con-
tinuer les bains aux enfans iusques a sept ans.

De ce qu'il faut faire a l'issue du baing. CHAP. IIII.

TR O I S ou quatre choses principalement il faut faire a
l'enfant incontinent qu'on l'oste du baing, auant que
le mettre en maillot. Premièrement, l'essuyer: puis
façonner ses membres, presser son petit ventre, pour le fai-
re vriner, puis le frotter, & l'oindre.

I. La maniere de l'essuyer.

Après auoir baigné l'enfant, estendu, & manié ses mem-
bres en le baignant, faut incontinent l'essuyer doucement,
& torcher avec linges deliez de lin: tellement que l'eau tie-
de du baing ne se refroidisse, & adhere a son cuir, & que par
sa froideur le cuir soit oppilé, & l'enfant frissonnant & mor-
fondu. Et faut ordinairement, dit Auicenne, essuyer ses
yeux avec quelque chose, comme avec de la foye crue: la-
quelle il dit, au liure Des vertus du cœur, auoir propriété de
dilater l'esprit de la veüe, le fortifier, absterger & éclaircir.

*II. La maniere de frotter l'enfant, & façonner ses membres,
& le faire pisser.*

Cela fait, la nourrice doit coucher l'enfant a boucheton

sur son giron, & incessamment le frotter depuis la poupe de la tette & la nuque, iusques aux fesses & aux pieds, le long du gras des cuisses & des iambes, en pressant & façonnant ses membres: puis le coucher sur son dos, & le frotter pareillement, & figurer les parties de deuant, & les costez avecq' douceur: & outre ce, cōprimer son petit ventre sur l'endroit de la vessie, pour le faire pisser. Car tout ainsi cōme quand nous retenons nostre halene, & estraignons les muscles du ventre, nous nous aydons a vriner, aussi faisons-nous vriner les enfans aysement, en pressant par dehors leur vessie. Puis apres conuient le frotter de rechef, & serrer & figurer ses extremitez, sauoir la tette, les bras, & les mains, les iambes, & les pieds. Ce frottement se doit faire expressement pour resoudre les superfluitez, & exciter la chaleur naturelle: ce serrement & figuremēt, pour corroborer & decorer la forme des membres, & les rendre habiles a leurs propres mouuemens. Bref, en toutes manieres la nourrice doit doucement toucher les membres de l'enfant en l'ama- doüant, & dilater ce qu'il faut dilater, comme le dedans du nez, & le trou du cul, s'ils sont trop serrez & estroicts: & subtilier ce qu'il faut subtilier, comme les espauls, le nez, & les doigts, s'ils sont trop gros: figurer doucement vn chacun membre en forme & figure decente: comme si les bras ou iambes estoient tortues, les redresser, si elles estoient courtes les estēdre, ainsi que nous auōs enseigné au ij. liure.

III. Quelle necessité & quelle vtilité est de frotter les enfans.

On doit frotter les enfans tout le temps qu'ils sont a nourrice (soit apres le baing, toutes fois qu'on les baignera, soit qu'ils n'y sent point de baing) pour deux vtilitez: l'vne pour tenir lieu d'exercice, euacuer les superfluitez, faire croistre

108 COMME IL FAVT NOVRIR L'ENFANT
& fortifier les membres: l'autre, a fin qu'ils soyent preparez a l'exercice iusques alors qu'ils seront grands, & que leurs membres soyent rendus aptes & idoines au travail, quand il sera temps qu'ils commencent de s'exercer. Et par ce Galien au second liure du Regime de santé, dit: que c'est vne chose raisonnable que ceux qui ne peuuent prendre exercice, & sont ineptes aux mouuemens du corps, vsent de frottemens, tant les vieilles gens que les enfans, & ceux aussi qui viennent en conualescence de maladie.

IIII. Les differences de frottemens, & a qui ils sont conuenables.

On fait les differences de frottemens: ceux qui sont aspres & rudes, & ceux qui sont doux & gracieux: item ceux qui durent long temps, & ceux qui ne durent gueres, & ceux qui sont temperez & mediocres.

Les aspres & forts, ou qui durent longuement, espoississent les corps rares, & endurecissent ceux qui sont tendres: au contraire, les frottemens doux & mols, & qui ne durent guiere, rarifient les corps espois, & les molli fient quand ils sont durs: parquoy ceux qui sont de rare corpulence, ont besoin de frottement fort, pour estre espoissiz: & ceux qui sont extenuiez & debiles, requierent le frottement temperé pour engraisser: & les delicats doiuent estre frottez de petit & doux frottement, car autrement ne le pourroyét souffrir. Toutesfois les enfans, iacoit qu'ils ayent les corps rares & pleins d'euaporations, a cause de l'abondance de chaleur & humidité, & que pour cela sembleroit que le long frottement, & dur, & fort leur fust conuenable, ne doiuent pourtant estre frottez de ceste maniere: ains conuient les frotter seulement de frottemens moderez, gracieux & doux, non seulement par ce qu'ils sont delicats & tendres, mais

par ce qu'ils croissent, & comme ainsi soit qu'ils croissent, il est besoin que leurs membres soyent estendus, & rendus faciles a estension, & a attraction de nourrissement, sans resolution, sans desiccation, & sans endurcissement : lesquelles choses introduittes par frottement dur & aspre, les engarde de croistre. On obserue encor' autres differences de frottemens, comme ceux qu'on fait avec la main seulemēt, ou avec des linges rudes ou deliez, ou avecq des huiles de diuerses qualitez, selon les intentions diuerses, ou avec des poudres. Aux enfans nouuellement nez, & es premiers iours de leur naissance, conuient le frottement qui soit vn peu dur & sec : c'est a dire, avec poudre, iusques a tant que les ordures du cuir soyent ostees, & que le cuir soit aucunement endurcy, avec la chair & les muscles, comme ha esté dit au liure precedant : & depuis ce temps on les frotte volontiers avec linges vsez & deliez quelque peu rudement encore, mais non pas fort, ne longuement: obseruant tousiours que le masle requiert frottement plus long & plus fort que la femelle, d'autant qu'elle doit auoir le corps plus tendre, & luy plus dur. Mais puis apres comme ils croissent, conuient les frotter tous les iours mollement & doucement selon la distinction du sexe, ou avec les mains seules, ou avec de vieux linges deliez, blancs & nets, ou plus-tost avec huile (car le frottement avec huile est plus mol qu'autrement) commençant depuis le col, & descendant iusques aux pieds, iusques a ce qu'ils soyent grandets, & qu'ils puissent cheminer, & prendre exercice deux-mesmes. Gordon ordonne de frotter la femelle avec huile sisamine: mais en lieu d'icelle, nous pouuons vser d'huile violat, ou d'olif simple. Et Galien aussi l'enseigne en son premier liure du

LIO COMME IL FAUT NOURRIRE L'ENFANT
Regime de santé, chap. 9. adioustant que l'enfant soit frot-
té d'huile douce, parlât en ceste maniere : Son corps, dit-
il, doit estre frotté d'huile douce, mesmement apres que
son laiët est tout digeré, & qu'il n'y ha rien de crud dedäs
son esthomas : parquoy on guette l'occasion de le frotter
apres qu'il ha dormy longuement. Et encore apres : Les
enfans, dit-il, mal formez, doiuent apres le baing, par frot-
tement d'huile estre composez en meilleure forme. Et si
l'enfant est masse, dit Haly, faut l'oindre & frotter fort &
longuement apres qu'il ha este laué au baing : & si c'est v-
ne femelle, peu & doucement : car ceste derniere façon
attendrit & ramollit le corps, & la precedente l'endurcit
& consolide. Le masse ha besoin d'endurcissement & so-
lidité de mēbres, & la femelle de mollification & tēdreté.

V. *Quantes-foiz le iour, & iusques a combien de temps, con-
vient frotter, oindre & façonner les membres de l'enfant.*

Et faut cela faire souuant, dit Auicenne, tant que les en-
fans sont tendres : car, ainsi que l'expose Iaques des Pars, a
cause de leur humidité, & de la tendreur de leurs membres,
ils reçoient facilement la correction de leur figure, iouxte
ce que Galien dit au .iiij. de L'abbregé de l'institution de
medecine, ditte vulgairement en mot Grec Techny, que
de ceux qui croissent encores, il est possible de corriger la
figure de beaucoup de parties, mais impossible quand ils ne
croissent plus. Haly parlant iusques a combien de temps les
faut frotter & oindre : Si l'enfant est masse, dit il, faut l'-
oindre & frotter fort & longuement apres le baing, com-
me i'ay dit, iusques a quatre mois accomplis : & si c'est v-
ne femelle, soit ointe & frottee avec huile rofat, ou violat
douce, iusques a tant qu'elle ayt trois mois, pour les

raisons que venons de dire, que l'une des façons de faire ramollit le corps, ce qui est conuenable a la femelle : & l'autre l'endurcit & fortifie, ce qui est appartenant au malle. Et pour fauoir combien de fois il le faut faire, selon le cōseil de Galien & de Razis, tous les iours, & toutes les heures apres qu'il aura esté éveillé, encore qu'on ne le baigne point, faut le frotter & oindre, pour les raisons ia cy deuant dites.

V. I. La maniere de frotter & peigner la teste de l'enfant.

Des le commencement de la natiuité de l'enfant iusques a quatre mois on doit frotter la teste de l'enfant avec vn linge ne trop rude ne trop mince, tous les iours, toutes les fois qu'il est éveillé & desmaillotté, apres luy auoir frotté tous les autres membres. Et apres que quatre mois sont passez, aucunes nourrices le peignent, ou plus tost le grattent & frottent avec de la soye de porc, ou chose semblable, continuant iusques a vn an. Venant la seconde annee, ou bien lors incontinant que ses cheueux cōmencent d'estre vn peu longuets, assez pour se prendre au peigne, elles le peignent le matin avec vn peigne de bouïys bien net, non poignant, ne trop aigu : mais auant que le peigner, faut vn peu frotter sa teste avec vn linge, & si elle suë, l'essuyer aussi de linge. En quoy faut obseruer que les enfans qui ont la teste grosse, doiuent estre moins peignez, & ceux qui l'ont plus petite, le doiuent estre plus longuement & doucemēt, pour attirer le nourrissement a la teste, & l'engrossir : pareillement ceux qui ont la teste moins charnue, doiuent estre moins longuement peignez, & plus doucement : & au contraire, ceux qui l'ont bien charnue, plus longuement, & plus fort.

De vestir & emmaillotter l'enfant, & luy donner quelque chose medicinale s'il est besoin, auant que le porter a l'ébat, ou luy donner exercice. C H A P. V.

QUAND tout cela est fait, la nourrice doit de rechef vestir & emmaillotter l'enfant : en quoy faut confiderer premierement la maniere de ce faire, en apres quād il est temps de luy bailler sa premiere chemise, & des brasfieres, & vn bonnet : puis s'il est besoin de luy bailler quelque chose auant que le porter a l'ébat, ou luy donner exercice.

I. La maniere d'emmaillotter & vestir l'enfant.

La maniere d'emmaillotter l'enfant ha esté exposée au liure precedant, & pareillement quel doit estre le maillot, & dequoy. En l'emmaillottant, la nourrice doit estendre les mains & les bras d'iceluy iusques aux genoux, tant pour les rendre agiles & souples, que pour mieux l'emmaillotter : & ce faire iusques au temps qu'il commence de prendre des brasfieres, & auoir les bras dehors du maillot : puis le doit lier & emmaillotter avec linges blancs & nets, avec bandes & beguins, pour conseruer ses membres en decente figure.

I I. L'accoustrement de teste de l'enfant, & quand il est temps de luy bailler vn bonnet.

La teste de l'enfant doit estre couuerte & bandee d'vn beguin, ou petite coëffe dougee, qui la serre & estreigne mediocrement, a fin que les commissures de son crane ne soyent laschees par la superflue humidité du cerueau, & que le froid n'entre par icelles dans le cerueau, & en ses pannicules : c'est a dire, es peaux qui l'environnent : & a fin aussi qu'il soit preserué de rheumes, ausquels il est subiet, a cause de l'hu-

de l'humidité superflue, & repletion vaporeuse du cerueau. Quand l'enfant ha enuiron vn moys, ou peu moins, on cōmance de luy bailler vn bonnet sur son beguin: vn en esté qui soit legier, comme de satin ou tafetas, vn autre en yuer, qui soit de fine laine, & ce principalement lors qu'on cōmance de le porter a l'air.

III. Quand il est temps de bailler a l'enfant des brassieres, & sa premiere chemise.

Quand l'enfant est desia vn peu grandet, cōme lors qu'il ha trois ou quatre moys, & qu'il ne peut plus endurer les bras liez en maillot, on cōmance de luy bailler sa premiere chemise, & des brassieres, principalement en esté: mais en yuer, a cause du froid, on tient encore les bras en maillot, iusques a ce qu'il ayt plus d'eage, & qu'il ne face si froid.

IIII. De luy donner aucunesfois quelque chose medicinale, s'il fait besoin, auant que le porter a l'ibat, ou luy donner exercice.

Bien tost apres que l'enfant est emmaillotté, la nourrice luy doit quelquesfois ietter de l'huile douce dedans les narines, a fin de nettoyer non seulement icelles, dit Auicenne, mais aussi les yeux, esquels l'huile entre secrettement, & s'espend par certains petis trous, par lesquels le nez communique avecq' les coings des yeux, de sorte que les lippes & bouës fistuleuses desdits coings, quelques-fois par art, quelques-fois par nature, sont deriuez au nez, pour ne salir & desfigurer la face. Et est bon aussi, dit le mesme Autheur, que la nourrice luy baille aucunesfois quelque confection cordiale, si besoin est, pour fortifier ses esprits, & quelques-fois du miel, auant que l'alaieter, si elle voit que l'enfant abonde de flegme, pour les raisons ia par cy deuant dites.

*De donner plaisir & recreation a l'enfant, exercer ses membres,
& tout son corps. C H A P. V I.*

CE TEMPS pendât que la nourrice fait toutes ces choses susdittes, & apres, elle doit esioüyr l'enfant, or' luy riant, or' disant des chançons, maintenant le tenant en son giron, maintenant le prenant par sous les aisselles, le soustenant entre ses bras, le faisant danser & sauter, le do-relottant, luy donnant recreation en toutes manieres con-uenables : lesquelles generalement sont reduittes en trois, l'vne, consiste au mouuemēt & exercice du corps, l'autre, au sentiment de la veüe, de l'oüye, de l'odorement, & du goust, la tierce, au portement a l'ebat, & en grand air.

I. Quel besoin d'exercer les enfans, & pourquoy deuant que les alaiçter & repaistre.

C'est vne chose naturelle apres le repos d'appeter l'exercice, & est necessaire pour l'entretenement de la vie vser de l'un & de l'autre tour a tour, moderément : car le trop grand repos ennuye aux esprits qui sont agiles, refroidit & & affoiblit le corps, estaint la chaleur naturelle, engendre infinité de superfluitez, qui sont causes de maladies : & pareillemēt le continuel exercice resoult & dissipe les esprits, attenne la personne, & affoiblit toutes les forces : la mediocrité de l'un & de l'autre conserue la vigueur du corps & des esprits, les recree, fait valoir la digestion des humeurs, maintient la bonne disposition & la santé de l'homme. Parquoy apres que l'enfant est éveillé, & ha assez dormy, le faut ostez du berceau, puis le nettoyer & frotter, comme nous auons enseigné, puis l'emmailoter de rechef, le resioüy-

fant ce pendant, en chantant & riant, le dorelottant, ainsi comme nous venons de dire : puis l'exercer, le portant entre les bras par la maison, ou delors, pour pousser par ce moyen hors de son corps ses superfluitez par les voyes d'e-uacuation, & pour fortifier ses membres, exciter sa chaleur naturelle, & recreer ses esprits. Et conuient ce faire auant que l'alaieter, ou luy donner a manger : par ce que le mouuant beaucoup apres le repas, esnouueroit son laiët dedans l'esthomas, prouoqueroit vomissement, engendreroit crudité, oppilation, & beaucoup de maux.

II. Des differences du mouuement, & exercice conuenable a l'enfant.

On ordonne deux genres de mouuement & exercice aux enfans, qui n'ont encore la puissance de se mouuoir & exercer d'eux-mesmes : l'vn, qui est vniuersel & de tout le corps : l'autre, qui est particulier de chacun membre. Et combien que nous auons parlé du frottement, tant vniuersel que particulier, qui est vne espeece d'exercice, ou bien qui supplie le defaut d'exercice : toutes-fois nous entendons icy parler proprement de l'exercice qui se fait vniuersellement par commun mouuement du corps, sans frottement, & particulierement de chacune partie, selon qu'il est conuenable a la puissance du petit enfant tendre. Du mouuement vniuersel, Galien fait trois espees : car, dit-il, on mouue l'enfant ou en vn berceau, ou en vn lit branlant pendu en l'air, ou es bras de la nourrice : soubs lesquelles espees on peut comprendre le portement par bateau, & a cheual, & en litiere.

III. Quel doit estre vn chacun desdits mouuemens & exercices vniuersels : & s'il est licite de porter l'enfant en bateau, ou a cheual, ou en coche, & transporter loin du lieu de sa naissance.

Le mouuement, dit Galien, est a euitier, lequel est fort & violant, comme d'vn charriot, d'vn bateau, ou d'vne litiere, & tout autre mouuement de semblable qualité, qui est trop fort pour l'enfant, qui est encore bien foible, de peur d'étonner ou faire tourner son cerueau, esmouuoir son sang, & rompre son corps. Et ne faut, dit-il encore, auant qu'il commence de se mouuoir de soy-mesme, le contraindre a cheminer : par ce que ses iambes & cuisses ne sont pas encore fermes pour soustenir & porter le corps, & auendroit courbement esdittes parties, par le plient des os, & foiblesse des muscles sous le fais & pesanteur du corps de l'enfant, qui est encore douillet & tendre. Sur quoy on donne a disputer aux Medecins, A sauoir mon que ce qui se fait au iourd'huy en France & ailleurs, contre le conseil de Galien & d'Auicenne, se peut commodement faire : c'est que les peres font transporter leurs enfans, aucuns le iour mesmes, ou trois ou quatre iours apres qu'ils sont nez, a la maison de leur nourrice, aux champs, quelquesfois loin de deux, ou trois, ou quatre lieues : les riches souuant les transportent d'vne ville en autre, les Princes d'vn pays en autre, ou en litiere dans le berceau, ou en vn panier, sur le col d'vn homme, ou d'vn cheual, ou es bras de la nourrice en litiere, ou sur vn cheual, ou en vn bateau. Mais a la verité, nonobstant l'autorité des Docteurs susdits, quand tout est bien considéré, nos Medecins n'y trouuent pas incommodité du tout, & dient que cela se peut faire par quelques raisons.

Premierement, par ce que tout ainsi qu'il est permis a l'enfant d'estre bercé & agité au berceau, ou en vn lit branlant, ou es bras de la nourrice, laquelle quelquesfois le hausse & baisse, & motue doucement en diuerfes manieres, sans qu'il s'en trouue mal, aussi ne luy peut estre defendu, estât dedans le berceau mesme, d'estre porté & mené en vne coche ou litiere, ou en vn batteau : & n'est pas inconueniant d'estre ainsi dans ledit berceau, non plus qu'estre porté entre les bras de la nourrice, ou que quand il estoit porté çà & là dans le ventre de la mere. Et nonobstant qu'Auicenne dit, qu'estre mené en litiere ou en chariot, fait troubler & bouillir les humeurs, en luy accordant que cela est bien vray es enfans qui passent sept ou huit mois, neantmoins es enfans qui sont au deffous cela n'auient guiere, & avec moindre facherie ils portent le mouuemēt : par ce que leurs sentimens sont comme rebouchez & mousses, estants quasi submergez & enfôcez en humidité. Et cela nous cognoissons par experience, veu que la plus-part des enfans nouvellement nez, sont transportez hors le lieu de leur naissance, voire les enfans des plus illustres de nostre France.

IIII. De l'exercice particulier des parties, tant mobiles que sensitiues du corps de l'enfant.

On n'ha point ordonné certain regime touchant l'exercice & mouuemant particulier des membres de l'enfant, auant que d'estre seuré, autre que les frottemens, nettoyemens, & figuremens, ou façonnemens d'iceux, qui ont esté enseignez cy deuant. Car Galien, au second liure du Regime de santé, enseigne seulement comme l'enfant doit s'exercer particulierement en chascune partie de son corps

118 COMME IL FAUT NOURRIR L'ENFANT
dépuis trois ans en sus, & deffors qu'il se peut exercer &
mouuoir de foy-mesme. Or nous auons ia dit comme la
nourrice doit auant ce temps là, sous les iours peigner &
frotter la teste de l'enfant, frotter les épaules & l'échine, &
tout le reste du corps, nettoyer le nez, les yeux, les oreilles,
tirer les doigts des mains & des pieds, plier & mener les
iambes vers les fesses, & vers la teste, puis les estendre, tou-
tes lesquelles choses sont comme exercices particuliers de
l'enfant nouuellement né, qui peuuēt estre continuez tant
qu'il sera sous le gouvernement de la nourrice, auant que
d'estre seuré. Toutesfois nous pourrons aiouster icy, qu'ou-
tre cela, la nourrice luy deura frotter les gēciues avec miel,
ou avec quelque dent de loup, ou autre chose, lors mesme-
ment que les dents commenceront de sortir: luy fera mar-
cher sous les dents quelque chose apres qu'elles seront sor-
ties: l'apprendra a gazouiller de la langue, la tourner, & ti-
rer souuāt, & essayer de proferer les paroles: le laira pleurer
& crier quelque peu, pour exercer la poitrine & les pou-
mōs: luy hauffera & baiffera les bras, luy fera tenir vn iouēt,
ou quelque autre chose, a la main droite: & pour exercer
les reins, le fera courber & redresser l'échine, cōme le fai-
sant baïsser & haïsser pour prendre quelque chose.

De l'exercice & recreation des sentimens corporels de l'enfant.

C H A P. V I I.

C'E N'EST assez d'exercer & recreer l'enfant par le
frottement & mouuement de ses membres, & de tout
son corps: il est expediant pareillement l'accoustumer
avec plaisir es operations & sentimens d'iceux, a fin que
cōme les parties sensitiues sont rendues plus fortes & plus
saines par exercice, aussi leurs actions & les sens soyēt plus

parfaict & meilleurs par iceluy. *I. De l'odoremēt.*

Iaçoit donques que l'enfant, pour l'abondance de l'humidité de son cerueau, ne peut pas sentir ne discerner le plaisir des bonnes odeurs, & le desplaisir des mauuaises: toutesfois pour luy informer petit a petit le iugement & la discretion de la senteur des choses, comme il croistra & apprendra de cognoistre, faudra que la nourrice luy presente quelques beaux bouquets de fleurs, ou autres choses de bonne senteur, & luy monstrent semblant que cela sent bon, l'appliquant a son nez, puis au nez de l'enfant: & s'il s'offre quelque chose de mauuaise odeur, luy deura faire reietter, comme vne chose abominable & qui sent mal.

II. De l'attouchement.

Quant au sens de l'attouchement, l'enfant doit estre excité & accoustumé a discerner le froid & le chaud, l'aspre & le doux, & les choses qui luy sont conuenables ou non: parquoy doit s'accoustumer aux baings chauds & froids, aux frottemens, & autres choses semblables. *III. Du goust.*

Et quant au goust, par ce que c'est vne espece d'attouchement, lequel discerne ce qui luy est bon & mauuais, il est besoin aussi de l'exciter & exercer es faueurs peu a peu, avec le temps, l'introduisant au iugement des gousts de diuerses choses, a fin que ce qu'il ne trouue pas bon, luy soit osté, & ce qui delecte son goust, luy soit donné.

IIII. De la veüe.

Et par ce que l'homme est né capable d'apprendre, & apte a receuoir doctrine, aussi est besoin de l'usiter & accoustumer des sa premiere enfance a la cognoissâce des choses par les instrumens des sens que nature ha deputé a cela: lesquels sont ij, principaux, la veüe & l'ouïe. Dōques la nourrice luy

120 COMME IL FAUT NOURRIRE L'ENFANT
doit faire veoir diuerſes choſes, & quand il eſt temps &
qu'il fait beau, le porter a l'air, l'amuſer a regarder le ciel, la
lumiere du ſoleil, les fleurs des prez verdoyans, les arbres
auec leurs fueilles, les couleurs, & tout ce qui ſe preſente a
l'oeil : & vers le ſoir, contempler la lune & les eſtoiles au
ciel : & pour mieux exercer ſa veüe, l'amuſer a regarder cho-
ſes menues & petites, en ſe gardant touteſſoin de tenir ſon
regard aux rayons du ſoleil, & a la trop grand' clarté & lu-
miere, & aux choſes qui eſblouiſſent la veüe.

V. De l'ouye.

Pareillement faut accouſtumer l'enfant a écouter atten-
tiuemēt les paroles, & luy faire entendre les noms des cho-
ſes petit a petit auec le temps : le recreer a ouyr les voix
douceſ, & les ſons moderez, cōme d'une lyre, d'un cistre,
d'un lüc, d'une eſpinette, d'un violon, d'une guiterne, ou de
quelque autre instrument doux de muſique, ou la chanſon
ſeule a voix moyenne & douce, que la nourrice chante, ou
ceux qui ſont au tour : euitier les bruits & les ſons violans &
impetueux, comme le tonnerre, le ſon des groſſes cloches,
des haquebutes, tabourins, hautbois, trompettes, & les au-
tres criemens qui eſtonnent les oreilles. Deſquelles choſes
auiennent pluſieurs inconuenians, cōme eſtourdiſſement,
frayeur, épouuantement, tremblement, ſpaſme, epilepſie,
& autres choſes qui offenſent le cerueau, & nuifent a l'or-
gane du ſens de l'ouye.

VI. Jugement du naturel de l'enfant par les choſes ſuſdittes.

Or peut on cognoiſſre par les choſes ſuſdittes, ſpecialle-
ment par la muſique & par le mouuemēt, ſelon que dir Ga-
llen, ſi l'enfant reçoit continuellement ces deux choſes auec
plaiſir, combien par laps de temps il eſt apte a s'adonner a

l'une & a l'autre: desquelles choses l'une appartient au corps, & l'autre a l'esprit. Car si lon voit qu'il prenne plaisir au mouuement entre les bras de la nourrice, ou dans le berceau, cōme s'il s'efforçoit a mouuoir & exercer soy mesmes, c'est signe qu'il sera habile da corps, viste, prōpt, soudain, prest a la chassee, a sauter, luyter, voltiger, courir: & au contraire, s'il s'ennuye incontinant, & ne veut point estre branké, ne dorelotté, on peu iuger qu'il sera paresseux, & ayment le repos: & s'il s'esioüyt & rit au babillemēt, ou prend plaisir long temps a ouyr la melodie de la chançon, il sera ingenieux & dispos a la philosophie, & aux arts liberaux: mais s'il s'en fache incontinant, & n'y prend plaisir, il sera ignorant, lourdaut, & d'entendement rude.

De porter l'enfant a l'air, & a l'ébat, & en quel temps.

CHAP. V I I I.

ON NE DOIT pas tousiours tenir l'enfant en la chambre, il est expediant quelquesfois auant que l'alaiter de le porter dehors, s'il fait beau, pour l'exercer & ébatre, mesmement lors qu'il commence de prendre cognoissance, & prend plaisir a veoir diuerses choses, & a estre tenu & porté en plus que d'un lieu. Car tout ainsi cōme estant dedans le ventre de la mere, il demandoit naturellemēt a sortir, de desir d'estre éuenté, & de venir a l'air, & a la fraischeur: aussi apres qu'il est né, & qu'il commence de se fortifier & cognoistre, comme quand il ha enuiron deux ou trois mois, desire d'estre porté d'un lieu contrainct en vn lieu plus libre, & ou l'air est plus grand, tant pour rafraichir sa chaleur en inspirāt l'air frais, que pour recreer ses esprits, voyant dehors diuerses choses. Car s'il estoit continuellement en vn lieu enclos, reclus & estoufé, mal éuenté, ne

122 COMME IL FAUT NOURRIRE L'ENFANT
ayant pas la force, pour la tendreur de son eage, de respi-
rer & pousser les fumées de son corps par attraction de la
fraicheur de l'air, il ne profiteroit point, & par faute de re-
creation & nourriture de ses esprits, ne viuroit guieres, & s'il
ne voyoit le ciel ou autres choses, ne voyât que ce qu'il voit
toufiours en la chambre, il n'auroit point de plaisir, & sa vie
luy seroit ennuyeuse: & cela nous voyôs par experiêce, que
bien souuant quand il pleure & crie en la chambre, si tost
que la nourrice le porte dehors a l'air, il cesse de crier, &
ne pleure plus.

I. En quel air est bon de porter l'enfant.

On se doit garder de porter l'enfant au serain, & aux ray-
ons de la lune, au vent, a la pluye, aux brouillats, a la pou-
ciere, au trop grand froid, au trop grand chaud, & a la trop
grand' clarté du soleil: ains le faut tenir a l'ombre, euitant
le mauuais air sur tout, comme celuy qui est pres des puau-
teurs: car encore, comme i'ay dit cy deuant, que l'enfant,
pour la grâd' humidité du cerueau ne peut pas sentir le plai-
sir des bonnes odeurs, & le déplaisir des mauuaises, tou-
tesfois par ce que ses esprits sont purs & facilement passi-
bles, la mauuaise senteur luy est fort dommageable: com-
me au contraire, la bonne, par ce que par certaine propriété
elle conforte les esprits, pourueu qu'elle ne soit excessiue,
ne luy peut estre que conuenable.

II. Que de faire la nourrice a l'enfant, estant a l'air.

En portant & en tenant l'enfant a l'air, la nourrice le doit
amuser a regarder le ciel, & toutes choses qui se presentent
a l'œil: luy exercer tous ses sens, comme i'ay enseigné cy
deuant, maintenant en dansant & chantant, maintenant en
parlant a luy, & riant, le nignardant, le caressant, le dore-

lottant, & luy donnant toutes les recreations possibles : & s'il se rencôtre quelque chose hydeuse & effroyâte a veoir, elle doit l'asseurer & enhardir, a fin que quand il fera grand, il ne craigne rien : parquoy les nourrices font mal, qui font faire le loup, ou le rabas, pour faire peur aux enfans.

*III. A sçauoir mon si lon peut porter l'enfant a l'air,
& l'y tenir estant endormy.*

On ne doit porter l'enfant a l'air, sinon apres qu'il est éveillé, ainsi comme dit Auerrois : la raison est, que le cerueau estant ia par le sommeil refroidy a sa superficie & partie extérieure, suruenant la fraischeur & l'éuentement du grand air, se refroidit d'auantage, parquoy deuient suiet aux rheumes & catharres : & la chaleur du corps qui est profondée au dedans en dormant, ne peut séuaporer a cause de l'oppilation des pores, & par mesme raison, si tost que l'enfant commence a dormir a l'air, faut le remporter a la chambre. Enquoy faillent grandemēt les femmes, qui portent les enfans a l'air a descouuert, en dormant, & les y tiennent endormis.

*IIII. Si lon peut alaiçter a l'air, & combien de temps
on y peut tenir l'enfant.*

Cela gist en la discretion de la sage nourrice, de sçauoir combien elle pourra tenir l'enfant a l'air, laquelle auisera s'il y fait beau & bon, & si l'enfant prend plaisir d'y estre : car en ceste condition l'enfant y pourra estre tenu longuemēt, puis de là remporté a la chambre, deuant que luy bailler la mammelle : ou bien l'y faire tetter si lon veut, & si lon voit qu'il soit bon : mais si tost que l'enuie de dormir le prendra, faudra le remporter en son berceau, & a couuert.

*De la maniere de gouverner le courage & les mouuemens de
l'esprit de l'enfant.* C H A P. I X.

LY HA telle communication des affections du corps a l'ame, & de l'ame au corps, que si l'un se porte mal, l'autre ne se peut bien porter: car quand le corps est malade, l'ame ne peut bien faire ses operations: & quand elle ha quelque passion, le corps ne peut profiter. Parquoy, tout ainsi comme lon ordonne aux grandes personnes, en leur regime, de reigler les passions & mouuemens de l'ame, & les imaginations & apprehensions des choses, pour auoir le corps sain & dispos: aussi doit on faire aux petis enfans, de sorte qu'on se doit garder de les irriter, & aussi de les apprendre a frapper & a menacer: & ne leur faut faire peur, ainsi comme font les sottes femmes, qui leur font peur du rabas, & du loup: car les premieres façons vicieuses, & les apprehensions mauuaises imprimees des l'enfance, ne peuvent iamais, ou a peire, les abandonner iusques a la mort. Ceux aussi font mal, qui les chatouillent trop pour les faire rire desmesurément, ou qui leur donnent occasion de les faire trop crier & pleurer: car l'une & l'autre extremité ne leur peut porter que dōmage. Parquoy disoit bien Galien, que la nourrice se doit donner garde soigneusement que l'enfant n'encoure es passiōs immoderees de l'esprit, & principalement en celles qui le font braire, crier, se dépiter, & tourmenter de la teste, des bras, & des pieds. Pour a quoy remedier, s'il auenoit, & pour l'appaiser, ie mōstreray premierement, Qu'est-ce que pleur, & quelles sont ses differences: puis apres, comme & par quelle chose se forme le pleur: & pourquoy les enfans & les femmes pleurent plus-tost que les hommes: puis, qui sont les causes en special pourquoy les enfans pleurent: puis quelles sont les commoditez qui auiennent de pleurer vn petit: & au contraire,

qui sont les inconueniens qui auient de pleurer trop fort, ou trop longuement: finalement, par quels moyens on appaise le pleur des enfans.

I. Qu'est-ce que pleur, & qui en est la cause prochaine, & la maniere comme il se fait.

Le pleur est vn mouuement de la face & des yeux avecq' effusion de larmes, signifiant apprehension de chose triste: dont n'ensuyt que tristesse, & est la cause prochaine qui fait pleurer, car par telle apprehension se fait mouuement des esprits au dedans, & s'encloft quelque chaleur vers le cerueau, par laquelle se fait vne fondure & distillation des humiditez qui y sont contenues, que les peaux qui enuironnent le cerueau estant referrees se parforcent d'expeller & bouter hors, comme vne chose nuyisible, par les yeux: & de là vient l'effusion & épanchement de larmes.

II. Pourquoi les enfans & les femmes pleurent plus tost que les hommes.

Et parce que les femmes & les enfans sont apprehensibles, & se tournent facilement d'une apprehension en autre: aussi plus facilement ils pleurent, & se tournent de pleur en ris, & de ris en pleur.

III. Les differences de pleurs.

On fait deux differences de pleurs, vn qui est grand, & l'autre qui est petit: le grand est celuy ou qui est impetueux, ou qui, combien qu'il soit petit, perseuere longuement. En petit pleur, n'y ha que la face qui se mouue, en grand pleur se mouuent tout ensemble & la face, & la poitrine, & les muscles du ventre, de sorte qu'il se fait vn grand soufle, & vne grande dilatation & estendement des parties pectora-

125 COMME IL FAUT NOURRIR L'ENFANT
les, & des peaux du ventre: dont souuent auient rompure
du peritoine, greueure, & descente du boyau.

IIII. Les inconuenians de pleurer trop fort, ou trop longuement.

Le grand pleur: c'est a dire, qui est trop fort ou trop long, porte nuyffance a la personne en quatre manieres: car premierement, il debilité la veüe, principalement le pleur qui dure long temps, pour deux raisons: l'une, que par le grand épandement de larmes se fait vne grand' vuydange & tarissement des humiditez des yeux: l'autre, par ce qu'il dilate les coings des yeux, & produit fistule en la tunique lachrymale, & oppilation en la coniuñctiue, par laquelle oppilation est empesché l'esprit visif, & la puissance de veoir. Secondement, il fait courir plus d'humidité du cerueau aux yeux, qu'il ne s'en respand par les larmes, dont il auient que ceux qui ont beaucoup pleuré, ont les yeux gros & enflés, quand ils cessent de pleurer. Tiercement, il tire avec soy vne grand' pesanteur & douleur de teste, a cause de la grand' émotion qu'il fait au cerueau, & aux parties qui sont enuiron. Quartement, a cause du grand estendement & effort qu'il fait es muscles, & es peaux du ventre, il fait bien souuent enflure du didyme, ou rōpure du siphac & l'hermie: qui est vne chose que plus on craint es enfans qui pleurent fort, & avec dépit.

V. Les commoditez qui auiennent de pleurer vn petit.

Au dernier chapitre, & a la fin du liure precedant, nous auons touché vn mot en passant, comme pleurer vn petit est profitable a l'enfant, auant que luy bailler a tetter, ce qui vient bien a propos de redire en ce lieu, estant pris de l'opinion d'Auicenne, & des autres Medecins les plus excel-

lans de l'échole des Arabes: car le petit pleur mondifie le cerueau des humiditez aigueuses qui y abôdent: & nettoye le nez, dit Iaques des Pars, s'il y ha quelque chose d'ord & sale dedans: & comme dit Gentilis, il purge aucunement les yeux des humiditez du cerueau, qui y sont enuoyees: & par-ainfi, il vaut a purger le cerueau, les yeux, & le nez: en apres, dit Auicēne, il excite la chaleur naturelle, & est quasi comme vn petit exercice des parties pectorales, comme du diaphragme & des poumons, mesmemēt si l'enfant crie fort en pleurant, car il dilate & mondifie lesdittes parties, & les rend habiles au mouuemēt de la respiration & du souffle. Parquoy, dit Haly, que c'est bien fait de donner le matin a l'enfant quelque occasion de pleurer vn peu, sans luy faire douleur, en ne luy donnant pas incontinent ce qu'il demande.

V I. Comme on doit appaiser le criement & le pleur de l'enfant.

Et puis donques que le criement & le grand pleur est tant dommageable a l'enfant: comme au contraire, le petit pleur luy profite aucunemēt, la nourrice doit estre fort soigneuse de l'engarder de crier & pleurer trop, ou trop fort: mesmement si c'est vn masle, de peur de la rompure, (combien qu'elle peut aussi auenir a vne fille) en coniecturant, dit Galien, ce qu'il veut, a fin de luy donner, & luy oster ce qui l'offense. Car pour bien appaiser vn enfant, le principal est de bien considerer, qui est la cause pourquoy il pleure & crie: par ce que ne pouuant encores parler, il declare sa douleur & ce qu'il veut par pleurer, crier, & braire. On l'appaise par certains remedes generaux & particuliers.

Les généraux sont conuenables a toutes les causes pour lesquelles il pleure, tant manifestes que non manifestes: lesquelles Galien, au premier liure du Regime de santé, comprend en ces parolles: Les nourrices, dit-il, sçauent trois remedes d'appaiser les enfans quand ils sont offensez, & qu'ils pleurent, auant que regarder qui est la cause de leur pleur & offense, leur donnant maintenant le bout de la mammelle en la bouche, maintenant les mouuant doucement au berceau ou entre leurs bras, maintenant en chantant & faignant leurs voix en mode de chanson: par lesquelles choses on cognoist manifestement qu'ils sont disposez naturellement a musique, & a exercice, qui sont deux choses lesquelles amandent beaucoup le corps & l'esprit. J'aiousté le quatriesme remede, qui est le portemēt de l'enfant a l'air, ou l'amusement a regarder quelque chose de beau, ou de nouueau: a quoy prenant plaisir, cela signifie sa disposition naturelle a l'estude de la cognoissance des choses. Les remedes particuliers sont propres a chacune chose particuliere, qui fait pleurer l'enfant: parquoy pour l'appaiser, faut regarder qui sont les causes pourquoy il pleure, dont les vnes viennent de dedans, comme quand il pleure de ce qu'il ha enuie de se salir, ou de pisser, ou de tetter, ou de dormir, ou qu'il ha trop dormy, & veut iouer, & estre porté a l'air, ou qu'il ha trop tecté, & est plein de vapeurs qui montent a la teste, & ha volonté de vomir, ou qu'il se deut de ses dents, lesquelles cōmancēt de poindre quād il ha enuiron viij. mois. Les autres causes sont tirees de dehors, cōme quand on le pique, ou qu'il sent froid ou chaud, ou qu'il est trop couuert & chargé de vestemens, ou trop serré de ses bandes, & ne se peut mouuoir, ou qu'il y ha trop

trop long temps qu'il n'ha esté remué de linges, & sent ses drapeaux sales, ou est offensé de quelque autre chose extérieure. A toutes lesquelles causes faut opposer les remedes, par choses contraires, en ostant ce que lon coniecture qui le fait pleurer & tempester, & luy faisant auoir & donner ce qui le peut contanter. Si donques on voit que l'enfant ne se peut appaiser, ne pour bercer, ne pour châter, ne pour les autres moyens susdits, & on se prend garde qu'il pleure de ce qu'il ha enuie de pisser, il est bon de luy presser sa vésie, & luy prouoquer l'vrine: s'il ha faim ou soif, & que pour cela il crie, luy faut bailler a tetter: s'il est las de veiller, & ha volonté de dormir, il conuient le remettre au berceau, le bercer, luy chanter chanson a voix basse, ou avecq' instrumēt doux de musique: par lesquelles deux choses non seulemēt on l'appaise, mais aussi on l'endort. Si au cōtraire, il ha trop esté au berceau, on doit le démailloter, puis le frotter & mouuoir ses membres, car de cela bien souuant cesse le pleur & le criement: que s'il ne se taise encore, la nourrice le doit porter entre ses bras deçà & delà, luy baillant son iouët: & s'il est trop serré, le faut desslacer, s'il est trop couuert, le descourrir, s'il est saly, remuer ses linges, s'il ha trop chaud, le rafraichir & tenir en lieu frais: si, au contraire, il ha froid, l'échauffer & garder du vent, & faire ainsi consequemment des autres choses.

D'alaiçter l'enfant de rechef.

C H A P. X.

MAINTENANT que l'enfant ha esté baigné, frotté, & ha prins son ébatement en la chambre, ou dehors, la nourrice le doit alaiçter de rechef: combien qu'on l'alaiçte quelquefois auant que l'emmailoter, quelquefois

130 COMME IL FAVT NOVRIR L'ENFANT
apres qu'il est emmaillotté, sans le porter a l'air, quelquefois
estant a l'air, s'il fait beau & bon d'y demeurer longuemēt,
quelquefois apres estre remporté a la chambre, auant que le
remettre au berceau, quelquefois apres qu'il y ha esté remis,
ainsi qu'on voit qu'il est le plus expediant. La maniere de
luy bailler a tetter ha ia esté ditte en son propre chapitre, au
liure precedant, & doit estre icy reiteree plus amplement: &
auec ce, il conuient enseigner combien on luy doit donner
de laiēt, quātes-fois le iour, a quelle heure, & en quel temps
non, & iusques a combien d'ans.

I. *En quelle maniere doit la Nourrice bailler a tetter a l'enfant.*

Toutes les fois du iour que la nourrice alaiēt l'enfant, &
principalement la premiere fois du iour, comme le matin,
doit auant que bailler la mammelle, tirer deux ou trois fois
de son laiēt, mesmement s'il y ha tache au laiēt, & le ietter
cōme inutile: & ce faire pour trois ou quatre raisons, pre-
mierement, par ce que le laiēt qui est prochain du bout & du
cuir, n'est pas si digeste, estant reculé de la fontaine de la
chaleur: en apres, par ce qu'il est plus excrementeux, d'au-
tant que le matin apres dormir, que les digestions sont fai-
tes, les superfluitez vont deuers le cuir & le bout: d'auanta-
ge, par ce que le laiēt qui est prochain du bout y ha demeu-
ré long tēps, quasi cōculqué & foulé, prest a moisir & se cor-
rōpre: finalement, par ce que celuy qui vient apres entre plus
aisément en la bouche de l'enfant, estant ia le chemin fait a
l'issue de la mammelle. Quand le premier laiēt est ietté, elle
doit incontinant bailler celuy qui vient apres, faisant qu'il
fluë aisémēt en la bouche de l'enfant, & luy ayder a le suc-
cer, en pressant la mammelle de ses doigts, a fin que l'enfant
ne se trauaille & affoiblisse en le sucçant.

II. Si la Nourrice peut donner autre chose que le laiçt a succer en voulant alaiçter l'enfant.

Et auant qu'alaiçter l'enfant, est bon de luy dōner a licher du miel quelquesfois, ou deuant que le porter a l'ébat, comme nous auons dit, ou apres, cōme en maniere d'entree de table, par ce que le miel adoucit & ouure la gorge & les voyes de la viande : & comme dit Galien au liure De la faculté des nourrissemens, il engarde que le laiçt ne se caille dans l'esthomas : & pour ce que ledit Galien mesle le laiçt & miel ensemble aux grand's personnes, il n'est pas impatient de bailler a tetter a l'enfant incontinant apres auoir donné le miel.

III. Combien doit tetter l'enfant.

Et ne faut pas que l'enfant tire beaucoup de laiçt en vne fois, ains est meilleur souuant, & peu chacune fois, pour beaucoup de raisons : premierement, par ce que son esthomas est de petite capacité, puis le laiçt de la femme facilement & tost est digeré es enfans, attendu que ce n'est qu'un sang blanchy : d'auantage, es enfans se fait vne forte & continue resolution pour la force de la chaleur & tēdreur de leur corps : outre-plus, l'enfant passe plus aisément le temps sans douleur & sans criement, succant le laiçt peu & souuāt, & n'en viēt pas en dégoustemēt & abomination de le prendre, comme quelquefois quand il en prend iusques a satiété : car lors il luy auient tension, inflation au ventre, & es costez, abondance de ventositez a cause d'indigestion, & par cela ennuy, pleur, & criement.

IIII. Quantes-fois le iour il faut donner a tetter a l'enfant.

Deux ou trois fois le iour succer la mammelle, nous auons dit par cy deuāt qu'il doit suffire a l'éfant, es premiers iours

132 COMME IL FAUT NOURRIR L'ENFANT
prochains de sa naissance, & quelque temps apres encore ne
luy est guere bon de tetter plus souuant: excepté qu'on doit
entendre, que s'il ne prend a chacune fois sa refection en suf-
fissance, peut en prendre plusieurs-fois: & aussi s'il pleure &
crie souuant, & s'il ha inquietude & mal-aïse, il faut l'appai-
ser, luy donnant souuant la mammelle.

V. A quelle heure chacune-fois.

Toutesfois si lon voyoit que cela luy suruint, & les au-
tres accidans susdits, pour auoir trop pris de laiçt, ne fau-
droit pas le faire tetter, ains faudroit le tenir longuement fa-
melique, & le prouoquer a dormir par chansons & mouue-
mens doux, iusques a ce que le laiçt precedant fut digeré.

VI. De laisser vn peu crier l'enfant auant tetter.

Et encore apres que la digestion est faite, vn petit pleur
auant que tetter luy est profitable: car il mōdifie le cerueau
des superfluitez aigueuses esquelles il abonde, comme ia
nous auons dit, & le cry luy est cōme vn exercice des par-
ties pectorales, profitāt a la dilatation d'icelles, & au soufle.

VII. Quand se doit garder la Nourrice de donner a tetter a l'enfant.

Tout ainsi comme au premier iour la mere ne doit alaiçter
son enfant, par ce qu'elle n'est pas nette, & qu'elle est de-
meuree debile du trauail de l'enfantemēt, & que son laiçt &
son sang sont troublez pour la vehemence des douleurs:
aussi en tout tēps que la nourrice se trouuera mal disposee,
ou de fieure, ou de colique, ou de flux de ventre, ou de trop
grande constipation doloireueuse d'iceluy, comme en co-
lique froide, ou de quelque autre grande maladie, elle ne
doit alaiçter son enfant, iusques a ce qu'elle soit guarie, &
bien saine: car son laiçt, a cause desdittes indispositions,

est alteré & troublé : & faut faire alaiçter l'enfant a vne autre femme. Pareillement, si lon donne a la nourrice medecine laxatiue ou vomitiue, pour elle, ou quelque autre medecine de forte qualite, comme la theriaque, ou cōme celles qui sont grandement chaudes, ou grandement froides, ou quelque chose caustique appliquee exterieurement, ne faut que ce iour là la nourrice alaiçte son enfant : car les medecines alterent & troublent le laiçt.

V IIII. Iusques a combien d'ans on doit alaiçter l'enfant.

Le terme naturel de l'alaiçtemēt de l'enfant. est de deux ans, ainsi comme dit Galien, & depuis luy Auicenne. Et combien que plus tost on luy peut donner a manger autre chose quelquesfois que le laiçt : touteffois le mesme Galien veut, au premier liure du Regime de fanté, chap. viij. qu'il soit nourry de laiçt seul, iusques a ce qu'il iette ses dents de dauant, sauoir, deux dessus, & deux dessous, & ainsi le conseille Auenzoar : suyuant l'autorité desquels, Auerrois au vj. de ses Collections, ordōne pareillement que l'enfant ne prenne autre nourrissement que le laiçt, iusques a ce que les dents luy sortent : car il est, dit il, besoin que le nourrissement soit conforme a celuy qui le prent : la nature du laiçt est comparee a la nature de l'enfant, & est le nourrissement que Nature mesme luy ha preparé es māmelles de la mere.

En quel temps bonnement on peut commencer de donner autre chose que le laiçt, pour la nourriture de l'enfant.

C H A P. X I.

PAR LES autoritez des Doçteurs susdits, il semble bien que l'enfant peut cōmancer de prendre autre nourriture avec le laiçt, c'est a dire, vne fois l'un, vne fois l'autre, au temps que ses dents de deuant cōmencent a poindre :

134 COMME IL FAVT NOVRIR L'ENFANT
& n'est pas nécessaire d'attendre qu'elles soyent du tout sorties, ains suffit qu'elles apparoiſſent ſeulement, & percent les genciues, ce qui auient au ſixieſme ou ſeptieſme mois: voulant Nature par cela dōner a entendre, que la viande plus ſolide que le laiſt luy eſt conuenable, & ne luy doit eſtre reſuſee ſi l'enfant la deſire, & ſi lon cognoiſt qu'il la puiſſe digerer: car c'eſt quelque appetit naturel qu'il en ha, & Nature luy appreſte les inſtrumens pour la preparer a la digeſtion. Parquoy, pour bien enſeigner la maniere de le nourrir d'autre viande que de laiſt, iuſques au temps de le ſeurer, il eſt requis de declarer premierement comme & par quels ſignes on cognoiſt qu'il eſt temps que l'enfant commence vſer de viande plus ſolide: en apres, quels ſont les inconuenians qui auient aux enfans de leur donner plus toſt d'autre viande que le laiſt: puis en quelle maniere on luy doit accouſtumer: d'auantage, qui eſt la viande autre que le laiſt qui luy puiſſe eſtre dōnee, finalement en quelle quantite, combien de fois, & comment.

I. Les ſignes pour cognoiſtre quand il eſt temps de commencer a donner viande ſolide a l'enfant: & a ſçauoir-mon, ſi on la luy peut donner des le commencement, auant que les dents luy ſortent.

On cognoiſt qu'il eſt temps que l'enfant commence de prendre vne autre viande plus ſolide que le laiſt, non ſeulement lors que les dents premieres de deuāt luy ſortent, mais auſſi quand il ha quelque enuie d'en māger, & que lon coniecture qu'il la peut digerer. La digeſtion bōne ou mauuaiſe ſe cognoiſt par les egeſtions, par les vrines, par le dormir, par les rots, par le vomiffement, par l'expulſion des ventofitez, par l'odeur des choſes dittes: & de ladicte digeſtion ſe fait coniecture de la continuation plus grande ou moindre

de la viande solide. Toutesfois, communément la plus-part des nourrices, & des meilleures maisons, ne regardent pas a cela, ni a aucun des signes susdits : lesquelles long temps deuant que les dents sortent aux enfans, voire deuant trois mois depuis qu'ils sont nez, leur donnent autre nourriture que le laiët, & principalement de la bouillie, & alleguent quelques raisons: car premierement elles dient que les femmes des champs, & les autres pources femmes de trauail des villes, le font ainsi, tant par ce que si leurs enfans ne prenoient autre nourriture que le laiët, ils ne pourroyent pas demourer si longuement sans tetter comme ils font, ce tēps pendant qu'elles sont absentes empeschées en leur labeur & a leur besongne : par ce aussi qu'a l'occasion de leur continuel labeur & pource vie, elles n'ont pas beaucoup de laiët, parquoy elles ne fourniroyent pas a nourrir l'enfant s'il ne prenoit autre nourriture que le laiët de leur mammelle. En apres, elles dient encore, qu'en nourrissāt leurs enfans ainsi comme font les femmes des rustiques ou des artisans, leur donnant incontinent autre nourrissement que le laiët, lesquels pour cela sont forts, les leurs aussi en sont plus robustes & plus sains. Elles amenēt encore vne autre raison pour confirmation de leur dire, & pour approbation de leur fait, c'est qu'elles dient que le laiët est vn nourrissemēt trop petit & de trop peu de duree, & qui lache beaucoup le ventre, & que par ainsi est meilleur de les nourrir de viande solide, plus tost que de laiët, ainsi cōme les Medecins cōseillent, de peur que par trop vser de laiët, ils ne soyent trop laches & debiles. Mais toutes ces raisons sont vaines & frivoles, & n'ont pas bon fondemēt, car tant s'en faut que le laiët rende les enfans laches & debiles, qu'au contraire, il les fortifie:

136 COMME IL FAVT NOURRIE L'ENFANT
parquoy Gordon leur contredit bien, quand il dit : que les
enfans malles doiuent prendre du laiſt plus longuement , a
fin qu'ils ſoyent plus robuſtes & plus forts : par ce que pre-
mierement le laiſt eſt vn nourriſſement d'une nature con-
forme a celle de l'enfant, puis il luy eſt familier & corre-
ſpondant au nourriſſement qu'il prenoit au ventre de ſa
mere, tellement que quand on le nourriroit de viande plus
ſolide, penſant qu'il en ſeroit plus fort, deuant que ſes dents
luy ſortent, on ſeroit qu'il ſeroit, au contraire, plus debile
& plus foible, & luy en auendroit inconueniant, comme
nous monſtrerons cy apres.

I I. *Les inconuenians qui auiennent de donner aux enfans
autre nourriſſement que le laiſt plus toſt qu'il ne faut.*

Premierement, dit Auicenne; pour donner plus toſt qu'il
ne faut a l'enfant autre nourriture que le laiſt, il luy en a-
uient gibboſité & boſſe en quelque partie du corps, & meſ-
mement au dos, procedant ou de ventofitez, ou d'humeurs
qui s'engroſſiſſent & deſcendent aux ſpondyles de l'échi-
ne, a cauſe d'indigeſtion, par faute de macher, comme ex-
poſe Gentilis, & Sauanorole: car ne pouuant l'enfant dige-
rer, ſuruiennent beaucoup de ventofitez, avec des flegmes,
leſquels, par le moyen deſdittes ventofitez, penetrent au
profond du corps, & de là pouſſent au dos & aux coſtes, qui
ſont encores tendres & molles, & font l'enfant boſſu &
contrefait: ou s'il n'auient tel inconueniant, il en auient d'au-
tres, comme ceux qui auiennent de trop grande reple-
tion, & de crudité, comme douleur, inflation, tranches, &
autres accidans tels que ceux que les enfans patiſſent & ſou-
frent a la ſortie de leurs dents : leſquelles choſes donnent
aſſez a cognoiſtre, ou qu'il faut les abſtenir de viandes ſo-

lides, & de difficile digestion auant qu'ils ayent des dents, & puissent macher, ou qu'ils ne fassent pas qu'ils en prennent beaucoup, encore lors qu'ils auront des dents, & pourront macher. Donques les femmes sont folles, lesquelles font grand' feste de leurs enfans, disant qu'ils mangent bien de la chair, ou de la bouillie, & qu'ils ont bon appetit, & qu'ils seront forts, veu que c'est l'opposite: pourtant que le corps d'un enfant goulé ne profite point, ainsi que dit Hippocrates, au liure De la naissance des dents, & Auicenné au Canon iij. Fen. xij. Parquoy quelque chose qu'elles songent, & dient, il ne faut croire que deuant la sortie & monstre des premieres dents de deuant, l'enfant doive vser d'autre viande que de lait, ains faut attendre le temps qu'elles sortiront & se monstrent, pour luy donner autre nourriture plus solide: en ne luy ostant pas toutes-fois le lait du tout, iusques au temps qu'il le faudra seurer.

II I. Comme on doit petit a petit accoustumer l'enfant a la viande solide depuis que ses dents commencent a sortir.

Si tost que les premieres dents de l'enfant commencent a pousser, lors conuiendra, dit Galien, l'accoustumer a la viande solide, en luy en baillant petit a petit, & par intervalle de temps, & comme dit Auicenne, par certain degré, & par ordre: car toute mutation soudaine, & en quantité, subitement faite, est totalement ennemie de Nature. Et ceste gradation & ordre se fait premierement en similitude de substance: c'est a dire, que premierement on luy doit donner nourrissement tendre, ou qui soit accoustré quasi aussi tendre comme le lait, puis petit a petit luy bailler nourrissement plus solide & plus gros. Secôdement, la mesme gradation & ordre se doit faire en quantité, de sorte que

138 COMME IL FAUT NOURRIR L'ENFANT
premierement on luy en doit donner peu : puis apres aug-
menter la quantité peu a peu. Tiercement, on y doit proce-
der comme de degré a degré par le nombre des fois, de ma-
niere que pour le cōmancement en faut donner moins sou-
uant, puis par succession de temps plus souuant, s'il le peut
porter, & s'il y prend plaisir.

*IIII. Pourquoi on doit accoustumer l'enfant a prendre autre
viande que le lait.*

On doit accoustumer a l'enfant autre viande que le lait,
a fin, dit Paul, que l'enfant apprenne a macher, & a fin aussi
qu'il suruienne au demangement des genciues: & aussi a fin
qu'il se prepare peu a peu au nourrissement de plus grosses
viandes, & a son seurement.

*V. Quel nourrissement en general autre que le lait peut estre donné
a l'enfant, depuis la sortie de ses dents, iusques au tēps de le seurer.*

Auant que declarer en particulier les especes de nourris-
sement dont l'enfant pourra vser, faut dire en general quel
nourrissement luy doit estre donné, & quel nom. Genera-
lement, dit Paul, on se doit garder de luy donner toute vi-
ande qui nourrit trop, & remplit les venes, comme prescis,
& ius de chair: ou qui rend le ventre plein & enflé, & la teste
pesante, comme purees de pois, ou quelque gasteau: ou qui
engendre beaucoup de superfluitez, comme fruits, herbes,
poissons, & grosses chairs. Et ne faut aussi, comme dit Ha-
ly, luy bailler grande quantité de viandes douces de foy, ou
sucere: par ce que Nature s'esioüyssant de douceur, attire
promptement au foye & aux venes telles viandes de l'esto-
mac auant qu'elles soyent parfaictement digerées, dont en-
suyuent oppilations du foye, & autres indispositions du
corps: & aussi par ce que de choses douces prises en grād'

abondâce, & non digerees en l'esthmac, cōmunément s'engendrent des vers. Ne cōuient aussi luy faire manger viandes grosses, ou qui sont dures & malaisées a macher, parce qu'elles sont de difficile digestion : mais ce qu'il mangera, comme conseillēt tous, doit estre semblable au laiēt en substance & en vertu, avec grosseur neantmoins vn peu plus grāde que le laiēt : parce que mutation ne se doit point faire d'vne extremité a l'autre soudainement, ains peu a peu au plus prochain, & du plus prochain, procedant ainsy, iusques au plus loingtain. Encore faudra-il que sa nourriture soyt plus propre a humer qu'a macher, ou pour le moins qu'elle soit quasi cōme machée, parce que l'enfant n'ha pas encore la force de macher : & aussi parce que les viandes a macher sont de plus difficile digestion que celles qui sont a humer, & ne rassasient pas tant, selon ce que dit Hippocrates, qu'il est plus facile d'estre remply de la viande qu'on hume, que de celle qu'on mange. Les choses douces, comme bouillies, ou panades succees, ou miellees, prinſes en petite quantité, se digerent mieux, & plus facilement & plus tost, & l'esthmac en est auaritieux, cōme dit Haly, & ne souffre pas si aisément en estre despouillé, ne qu'elles soyēt rauies de foy, & tirees outre : & telles viandes en ceste façon n'engendrent point de vers. Les autres, encore qu'elles ne soyent telles, s'il les desire, ne luy doiuent estre refusees rudement, car dit Auicēne, c'est vn appetit naturel qu'il en ha.

Quelles nourritures en especial luy sont propres iusques au temps qu'il le faudra seuer. CHAP. XII.

OR MAINTENANT, il nous faut descendre a nommer les nourritures particulieres & speciales, que les Anciens ont choisies, & qui sont auiourd'huy en

140 COMME IL FAUT NOURRIRE L'ENFANT
usage pour les enfans, avant qu'ils soyent seurez. La soupe
de pain, en plusieurs sortes, & pareillement la panade, sont
de la plus ancienne ordonnance que nous lisons, pour leur
nourriture avec le lait, es deux premieres annees, depuis la
naissance de leurs dents. La bouillie, les œufs frais & mol-
lets, la chair hachée, prise en bouillon ou autrement, sont
les nourrissemens qui ne sont pas de si long temps ordōnez
pour eux, dont nous ayons cognoissance, desquels encore
les Medecins doctes font quelque difficulté s'ils leur sont
bons & conuenables.

I. *La soupe de pain.*

Galien ordonne de bailler a l'enfant, premierement du
pain trappé en broüet de chair ou de legums, voulant com-
mencer par les viandes qui remplissent moins les venes, en
venant puis apres, comme l'enfant croist, & ha passé deux
ans, a celles qui nourrissent dauantage, cōme la chair. Aui-
cenne luy fait dōner le pain dissout ou mīncelé en du lait
ou en du bouchet, c'est a dire hypocras d'eau, fait ou de miel
ou de sucre, ou en de l'eau meslée avec vn peu de vin : &
ainsi ensuyuant leur ordonnance, la mere ou la nourrice
coupe de petites lesches de pain, & apres auoir osté la crou-
ste, les trampe en l'vne des choses susdittes, puis apres qu'
elles sont dissoutes, les fresent avec les doigts, ou avec vn
cuillier d'argent : & en ceste façon appastent l'enfant, qui
est vne chose vsitee & pratiquée pour les enfans des Princes.

II. *La panade.*

En lieu de soupe de pain, on dōne quelquesfois a l'en-
fant de la panade, faite en ceste maniere, On rape, ou esmie,
ou frase de la mie de pain bien menu, puis on la met dans vn
bouillon de bonne chair, en vn petit pot de terre, plombé,

& la fait on cuire a petit feu de charbon, sans fumee, en la menant tousiours avec vn cuillier d'argent ou de boys : on la fait cuire quelquesfois dans du bouillon de pois ou d'autres legums, avec huile ou beurre, & plus souuât on la cuit avec du laiët de chieure, ou de vache, ou d'amandes douces: quelquesfois auant que la faire, on laisse tréper le pain dans de l'eau chaude, a fin de luy oster le sel & le leuain: aucuns meslent avec la panade vn iaune d'œuf, ou l'œuf tout entier, le menant bien fort, a fin qu'il ne se caille en cuisant, mesmement si la panade se fait seulement avecq' l'eau & le beurre, ou avecq' le laiët, & specialement avecq' le laiët d'amandes: & de ceste viande on nourrit aussi les enfans des Princes.

I I I.

La bouillie.

On vse fort en ce pays de bouillie, & plus communément que d'autre chose, depuis plus de cent ans en ça, laquelle ha esté inusitée aux anciens, tant Grecs qu'Arabes: iagoit que l'usage est encore a disputer entre les doctes, si la bouillie est profitable aux enfans ou non. Les nourrices, dis-
,, soit laques des Pars, il y ha plus de cent ans iusques au-
,, iourd'huy, n'ont pas accoustumé de nourrir tousiours
,, leurs enfans seulement de leur laiët, mais aprestrois mois
,, depuis qu'ils sont nez, & quelquesfois plus tost, leur don-
,, nent de la bouillie, laquelle elles font de laiët de vache, &
,, de simole, ou farine de froment, ou de mie de pain blanc,
,, cuicts ensemble iusques a espoisseur: & y aioustent quel-
,, quesfois des iaunes d'œufs, & leur mettent en la bouche
,, avec leurs doigts, ou avec vne corne trouëe es deux bouts,
,, dont l'vn des bouts est adapté a la similitude d'vn tetin, par
,, lequel bout l'enfant succe la bouillie, comme le laiët de la

142 COMME IL FAUT NOURRIR L'ENFANT
, māmelle par letetin, pensant que par ceste bouillie l'en-
, fant en deuienne plus fort & plus charnu. La farine dont
on la fait auioird'huy, la plus grand' part des nourrices la
passe seulement par vn sas, sans autre preparation : car on
prend volontiers la plus pure partie de farine de froment :
aucunes la font cuire au four, apres que le pain est tiré, dans
vn pot de terre plombé ou vitré, a fin d'oster la viscosité qui
est en la farine crue. Le laiët qui est melleé avec la farine, cō-
munément est de cheure ou de vache: celuy de chieure est
meilleur & plus temperé, comme dit Galien au liure Des
nourrissemens de bon & mauuais suc : par ce qu'il est moy-
ennement humide & vinctueux, entre gros & subtil, ayant
vne mediocrité en toutes les substances sereuse, butyreuse,
& fourmageuse : & nuyt moins aux intestins, dit Auicenne,
& autant en dit Razis. Aucuns cherchent la cheure qui ne
soit pas trop vieille, qui n'ayt point auorté, qui n'ayt eu plus
d'vn cheureau, qui ne soit pas trop grasse ni meigre, qui ayt
esté & soit nourrie de bonne pasture, & en bons lieux, qui
soit noire, comme pensant qu'elle ayt le laiët plus digeste,
plus robuste, & moins flegmatique : finalement, quelle
n'ayt point de cornes, parce qu'Auicenne ha opinion que
le laiët des bestes qui n'ont point de cornes ne caille point :
autres au contraire pensent que la matiere qui deuoit aller a
la generation des cornes, est ia vne chose superflue demou-
ree au sang, & que par consequant le laiët qui en est engen-
dré, en est moins net, & plus excrementeux : mais on ne s'
arreste pas tousiours a cela, & est vne curiosité de rechercher
toutes ces choses. On melle avec ces deux choses, en la
bouillie, autres choses, selon la raison de ce qu'on entend
de faire pour la commodité de l'enfant. Quand on ha in-

tention de donner plus grand nourrissement, on y melle sur la fin vn iaune d'œuf, quand on veut garder qu'elle ne constipe le ventre, & que les superfluitez ne soyēt retenues en iceluy, on y melle du miel, par ce qu'il est lenitif & absterfif, ostant les superfluitez qu'il rencontre. Si on craint oppilation, pour l'engarder & pour l'oster aussi, par ce que la bouillie, mesmement de farine crue, est oppilatiue & visqueuse, & pareillement inflatiue, on y aiouste de la poudre d'anis ou de fenoil. Contre la toux, on cuit la bouillie avec eau distillee de fenoil, ou d'une herbe & fleur ditte vulgairement vngula caballina & farfara. Si lon ha peur des vers, aucunes y meslent de la poudre de semence de pourpié, ou de choux, ou de la barbotine, ou de la rapure de corne de cerf: aucunes la font cuire avec eau de pourpié, ou de la decoction dudit pourpié, ou de la racine de graminis, ou de milifolis, ou semblable. La maniere de faire cuire la bouillie est assez notoire, qu'elle ne soit trop espoisse, & ne sente point la fume.

*I I I I. Dispute si la bouillie est veritablement bonne
aux enfans, ou non.*

On fait quelque difficulté, & met on en auant, si la bouillie est bonne aux enfans ou non: par ce qu'aucuns la tiennent pour bonne, aucuns autres la dient estre mauuaise. Et ceux qui l'approuuent, se fondent en vne raison, qu'ils dient que les enfans ont besoin d'une nourriture humide, de grosseur conforme & bien semblable au lait, non par trop masticable, non dure, non de trop difficile digestion, lesquelles conditions sont en vne bonne bouillie:

& conferment leur dire par cōmune experience, qu'il semble que les enfans s'en trouuent bien: & me souuient auoir ouy dire a mōsieur Syluius, que les intestins & les premieres venes s'en dilatent d'auantage, nonobstant qu'aucuns estiment au contraire, qu'elle oppile les venes, & engendre aux reins le calcul, ce qui se pourroit estimer plus tost de ceux qui y feroient disposez de nature. Ceux qui tiennent qu'elle est mauuaise, alleguent l'autorité de Galien, lequel semble dédaigner telle viande en plusieurs lieux, la disant estre viande de rustiques, cacochyme, pesante, oppilative, & de difficile digestion, comme il est escrit au premier liure Des alimens, au chapitre du fromēt, & est redit au chapitre du mil, baillant la raison au liure Du viure qui nourrit peu, que la farine n'est point bonne, si elle n'est preparee avec du sel, du leuain, & du four: c'est a dire, si elle n'est mise dans du pain: & au liure d'Enchymie & Cacochymie: c'est a dire, du bon & mauuais nourrissement, Le lait des bestes, dit-il, n'est point bon, s'il n'est beu chaud, demēt, incontinant qu'il est tiré: lequel s'il est cuit est cacochyme, & encore plus, s'il est cuit avec farine de fromēt: ce que Rasis cōferme, lequel dit quasi en semblables parolles, au liure xxj. Continentis, suyuant l'autorité de Paul, que la farine du froment, si elle n'est preparee comme il appartient, est de difficile digestion: & au liure xxij. chapitre, Du beurre, que le lait cuit (par ce qu'en cuisant se consume sa substance aigueuse par le feu) engendre gros sang, & principalement s'il est cuit avec farine, comme il est en la bouillie, en laquelle il est besoin qu'il cuise longuement, mesmement si la farine estoit crue, & par la longue cuisson il deuient pire, perdant sa substance de mesgue & de beurre,

& restant

& restant seulement la fourmageuse, grosse & de difficile digestion. Parquoy si lon veut faire que la bouillie soit bonne, & consentir a ceux qui l'approuuent, & en font vsfer aux enfâns, elle doit premierement estre faitte de farine cuitte parauant au four, cōme ha esté dit, a fin qu'elle ne soit pas si visqueuse ne grossiere: & aussi a fin que le lait ne cuise pas si longuemēt, parce que la farine crue n'est pas si bonne, & le lait est contraint d'estre cuit avec elle plus long temps, & a ceste cause il pert sa bonté. En apres, en cuisant la bouillie faut y aiouster du miel, par le conseil de Rasis, de l'autorité de Galien, a fin de corriger la viscosité tant de la farine que de la substāce fourmageuse du lait, & faire descendre la bouillie plus aisément, & engarder qu'elle ne se lie en l'esthmac, & qu'en descendāt ne face oppilation es premieres venes, & au foye, & qu'elle n'engendre ou des vers, ou le calcule, & autres accidās qui auienent de la bouillie faitte de farine pure. En lieu de farine cuitte, on peut mettre en la bouillie pour la faire bōne, de la mie de pain blanc, détrempée en eau chaude, cōme ia ha esté dit: autrement si elle n'est ainsi faitte, les autoritez des docteurs guerroyent contre l'vsage d'icelle: ia-soit qu'elle soit permise a cause de l'accoustumance, touteffois ne doit estre ordōnee par le Medecin, sinon avec les conditiōs susdittes: & ne vaut rien d'alleguer l'experience quotidienne, & l'exemple des enfans des pources femmes, qui s'en portent bien, voire en les en nourrissant deuant que leurs dents soyent sorties: car parce qu'elles ne fourniroyēt pas a les nourrir de leur propre lait, & qu'elles ont quelquefois la puissance d'auoir seulemēt de la farine crue, & du lait de vache, ou de cheure, & non pas d'autre chose, la necessité les excuse de leur bailler ce qu'elles

149 COMME IL FAUT NOURRIR L'ENFANT
peuvent : & si leurs enfans sont bien refaits & se portēt bien
c'est plus tost d'auanture, & de bonne nature, que de bon-
té de nourriture.

V.

La chair.

Dépuis que l'enfant ha passé vn an, & est comme de l'—
eage de quatorze ou quinze mois, on luy baille, es maisons
des riches, du blanc de chapon ou de poullaille, haché me-
nu avec le broüet & les soupes de pain, ou d'une cuisse de
poulet bouilly ou rosty, ou de la perdrix : & cōmunément,
ainsi que dit Razis, au quatriesme liure a Almanfor, on ne
luy donne point d'autre chair en cest eage, ne deuant qu'il
soit seuré : mais a sçauoir-mon si ceste nourriture conuient
a l'enfant durant le temps qu'il alaicte : plusieurs maintien-
nent que non, par ce qu'ils dient qu'il n'est pas bon de mes-
ler la chair avec le laiēt : car comme ainsi soit que la chair
soit tardiuë a digerer, elle se retient en l'esthōmac, & n'est
pas encore digeree parfaitement quand l'enfant alaicte, &
ainsi le laiēt se corrompt : & de là viennent vomissemens,
flux de ventre, & autres maladies. Les autres soustiennent
que c'est bien fait de l'accoustumer a la chair petit a petit, a-
uec vsage moderé, luy en donnant vne fois le iour seule-
ment, & quand le temps de le seurer s'approche, deux fois,
ou plus : & par ainsi la chose n'est pas encores plenemēt de-
terminee. Toutesfois, si nous suyons l'autorité de Ga-
lien & d'Auienne, par ce qu'ils conseillent de nourrir l'en-
fant de viande peu nourrissant, comme le pain en bouillon
de chair, ou de legums, on ne doit dōner de la chair aux en-
fans auāt qu'ils ayēt deux ans, ne tout le tēps qu'ils tettent,
ains du pain seulement trempé es bouillons susdits, & dis-
sout menu quasi en forme de panade : pourautant qu'ils ne

peuuent encore macher ne digerer la viande non machee, & n'ont point encore de besoin grand nourrissement, qui soit remplissant, comme la chair. Parquoy on pourroit dire que la faute est manifeste de ceux qui la donnent a manger a leurs enfans, auant qu'ils soyēt seurez, dont ils se remplissent les venes, & en deuiennent malades : d'autant qu'il est difficile aux enfans de dompter la repletion des venes, a cause de beaucoup de sang procedāt de manger de la chair : & est necessaire qu'elle soit consommee par maladie, ou que l'enfant succombe.

V I. Les œufs mollets.

On donne encore aux enfans qui tettent vne autre sorte de viande, qui est le iaune d'un œuf cuit mollet, en y meslant vn petit de mie de pain fraisee, & bien peu de sel, leur faisant prendre, quand ils n'ont pas encor' vn an, avecq' vn petit cuillier, & quand ils commencent ia a macher, avecq' vne petite appreste de pain. Aucuns mettent en vn plat ou escuelle, sur menue braise de feu, deux ou trois iaunes d'œufs, avec vn peu de beurre & de sucre, les faisant cuire a demy : puis les baillent a manger avec vne appreste de mie de pain blanc, & ceste maniere de nourriture est bonne.

V I I. A sçauoir-mon s'il est bon de bailler a l'enfant a manger des chastaignes, & des noix, & choses semblables.

Voila les nourrissemens, que nous venons de dire en particulier, desquels on peut vser pour les enfans en l'eage qu'ils tettent, depuis que leurs premieres dents sont forties, lesquels sont le plus grandement en vſage en ce pays : parquoy n'est bonnement loysible de leur donner d'autres viandes, iusques a ce qu'ils soyent seurez & detriez,

148 COMME IL FAUT NOURRIR L'ENFANT
non autres chairs, ne fruiçts, ne herbes, ne poisson, n'autre
chose: & ne faut s'arrester a l'exemple de nourrices qui
leur maschent des chastaignes, & des noix, avec du pain,
& des naueaux, & autres legums, par ce que telles vian-
des sont a craindre, a cause de douleur de teste, ou de tran-
chees, par ce qu'elles engendrent ventositez, & par-ce aus-
si qu'elles remplissent les venes de superfluitez & de vents,
que la nature des enfans ne peut vaincre ne dissoudre.

V I I I.

*La maniere de bailler la viande, autre que le
laiçt, a l'enfant: & a sçauoir-mon s'il est
conuenable a luy macher ou non.*

Auicenne & Gordon, & les autres docteurs de l'échole
des Arabes, conseillent a la mere ou a la nourrice de ma-
cher le pain, soit en soupe, ou autrement, & les autres vian-
des solides: puis les prenant de leur bouche comme en les
baissant, les bailler a l'enfant, pour beaucoup de raisons qu'
ils alleguent. Premièrement, parce que l'enfant n'a pas
encore les dents machelières, ne les genciues fortes: en a-
pres, par ce que le pain & la viande ainsi donnee machée,
plus facilement se digere en son esthomac: & aussi que par
le machement, la viande reçoit vne chaleur, & vne certaine
digestion du chaud de la bouche conforme a la chaleur di-
gestiue de l'esthomac: d'auantage, par ce que la mixtion
de la salie, par son humidité, ayde a faire tomber la vian-
de en l'esthomac de l'enfant plus aisément. Mais ceste ma-
niere de faire n'est point auourd'huy en vsage es bonnes
maisons, & doit estre reiettee pour plusieurs raisons. Pre-
mierement, par ce que la salie, tant de la mere, que de la

nourrice est a craindre, ou quand elles ont leurs besongnes, ou quand elles ont trauaillé & sont échauffées du trauail, ou qu'elles sont courroucees & esmeües, ou qu'elles sont chaudes apres l'homme, ou viennent chaudemēt d'auec l'homme, ou quand elles ont faim, & sont a ieun : car adonc leur saliuē seroit venin & poison a l'enfant, & aussi de telle saliuē & mastication auient souuent que les vers s'engendrent en iceluy : en apres, la saliuē d'un chacun, dit Gentilis, ha vne certaine qualité, laquelle iacoit qu'elle soit familiere & propre a celuy qui l'ha, toutes-fois est estrange & disconuenable aux autres, parquoy il n'est pas bon de boire incessamment au verre, ou en la couppe, ou vn autre ha beu, car vne chacune personne ha sa complexion propre a soy, & differente d'une autre : & ainsi faut iuger du coit apres le coit d'un autre. D'auantage, la saliuē est quasi comme vne superfluité que Nature enuoye dehors, comme vne chose mauuaise, venant du sang contenu es venes, & comme vne certaine purgation naturelle d'iceluy. Parquoy, ne la mere, ne la nourrice, ne la voisine, ou autre, ne doit macher la viande pour la donner a l'enfant, parce qu'en donnant la viande, elle donneroit ensemble la saliuē.

*I X. Quantes-fois le iour, & combien chacune-fois on doit
bailler de la viande solide a l'enfant.*

Vne fois le iour seulement suffit que l'enfant mange de la viande solide, ainsi comme dient Rasis & Haly, sinon que s'approchant du temps d'estre seuré, il en pourra prendre deux fois : & ne faut pas qu'il s'en remplisse, ne qu'il s'accoustume a pluralité de viandes, de peur, dit Haly, qu'il ne tombe en spasme, & autres accidans qui en suruiennent ordinairement.

NONOBSTANT que le lait sert a l'enfant de boire , toutes-fois on luy baille quelquefois de l'eau pour rafraichir sa bouche, apres qu'il ha mangé de la viande solide . Le vin est totalement defendu aux enfans.

De remettre l'enfant coucher, & de la maniere de l'endormir.

INCONTINANT qu'on verra qu'il est temps que l'enfant dorme, il le faudra remettre au berceau, & faire comme nous auons dit au second chapitre, cōtinuant ainsi tous les iours : c'est a sauoir, qu'estant couché, s'il ne peut dormir, ou s'il crie & pleure, faudra le bercer doucement, de peur d'émouuoir le lait qui est encore cru dans l'esthmac : ou bien l'endormir au son d'un luc, ou d'une viole, ou d'une guiterne, ou de quelque autre doux instrument de musique, & qui ne fait pas grand bruit, ou avec la chanson seule, a voix basse & douce que la nourrice chante, ou ceux qui sont autour de l'enfant : comme Auicenne dit, que c'estoit la coustume de son temps, quand on mettoit les enfans des Roys au lieu ou ils deuoyent dormir : car mouuoir l'enfant doucement, & chanter ainsi aupres de luy, sont deux choses lesquelles non seulement rectifient sa complexion, excitent son naturel, recreent ses esprits apres qu'il est leué, & ha dormy, mais aussi le retiennent & engardent de crier, luy prouoquant doucement le sommeil, & luy font auoir enuie de dormir apres qu'il est couché.

Du iugement de la disposition de l'enfant, & du diuinement des accidans qui luy sont a auenir.

IA PAR-CY deuant ha esté fuffifamment parlé du iugement naturel de l'enfant, par l'exercice & par la musique, au chapitre feptiefme de ce present liure: que lon peut, qui veut, commodément reiterer & rapporter en cest endroit, parquoy nous laiffons de l'efcrire de rechef: & amafferons icy les autres iugemens que lon en peut faire, lesquels nous auons extraits des liures d'Hippocrates, pour feruir comme d'un coupet, ou d'un amortiffement a ce present traitté.

Du liure d'Hippocrates, de la naiſſance des dents.

I.

Les enfans qui font charnus & poupelins, ne tettent pas a la proportion de leur bonne habitude & corpulence.

II.

Au contraire, les enfans qui font goulus, & ne ſe peuuent ſaouler, ils ne font pas gros & charnus a la raiſon de ce qu'ils tettent ou mangent.

III.

Les enfans qui tettent, ſ'ils piſſent plus qu'a la raiſon de ce qu'ils tettent & boyuent, a peine viuent vn an.

IIII.

Ceux qui piſſent plus qu'ils ne ſe ſaliſſent, a la proportion de ce qu'ils tettent, ſont en meilleur point, qu'autrement.

V.

Ceux au contraire qui ne piſſent pas a la proportion de ce qu'ils tettent, & ſaliſſent ſouuant matieres crues & indigeſtes, ils ſont mal ſains.

VI.

Ceux qui tettent bien, digerent bien, & ſe ſaliſſent bien, ſont ſains, & en bonne ſorte.

152 COMME IL FAUT NOURRIR L'ENFANT
VII.

Ceux qui ne se salissent guiere, & sont goulus, & neant-
moins ne sont point gras & refaits, a la raison de ce qu'ils
mangent, sont mal sains.

VIII.

Ceux qui ordinairement sont grands tetteurs, volontiers
sont assommeillez, & tous endormis.

IX.

Ceux qui ne prennent pas nourriture a la proportion de
ce qu'ils tettent, deuiennent meigres & chetifs, & ne peu-
uent auoir grand' force.

X.

Ceux qui vomissent le lait, & le reiettent beaucoup, ain-
si comme de la baue, leur ventre se rest'aint, & ne se salis-
sent point.

XI.

Ceux qui se salissent beaucoup a la naissance de leurs
dents, ne tombent pas si tost en spasme, que ceux qui se sa-
lissent moins.

XII.

Ceux qui a la sortie de leurs dents demeurent en mesme
en bon point, sans ameigrir, & dorment profondement,
sont en danger de tomber en conuulsion.

XIII.

Ceux a qui les dents sortent en hyuer, mais qu'il n'y ayt
autre mal, sont moins en danger.

XIIII.

Ceux a qui les dents poignent en hyuer, s'ils sont bien
traitez, endurent moins de mal a la sortie de leurs dents.

XV.

Ceux a qui les dents commencent de poindre auccq' la
toux, elles leurs sortent plus tard, & a la pointure d'icelles

n'ameigrissent pas tant.

XV I.

Ceux qui du temps qu'ils tettent prennent bien de la viande, souffrent aisément d'estre seurez.

XV II.

Du liure Du mal sacré.

Quand on voit auenir aux enfans des vlceres & pustules a la teste, aux oreilles, & au reste du corps, ou qu'ils rendent beaucoup de baue & de morue, c'est signe qu'ils se porteront bien quand ils deuiendront grands: pour autant que les humiditez superflues sortent, & cela se purge qui deuoit estre purgé dans le ventre de la mere: & aussi ceux qui sont ainsi purgez, ne sont point subiets au mal caduque.

XV III.

Ceux, au contraire, qui sont nets, & ne leur sort point de pustule ou vlcere, ne de baue, ni de morue, & n'ont point esté purgez au ventre de leur mere, ne sont pas hors des dangers d'estre attains du haut mal quelque iour.

X I X.

Et ceux a qui les humiditez qui deuoyent sortir, sont tombees en la capacité de la poitrine, sont subiets a battement de cœur, a la courte halene, & aucuns en deuiennent courbes.

X X.

Du second liure des maladies epidemiques & communes.

L'enfant communément commence de ce bien nourrir au vij. mois, ou au ix. ou x. & d'auoir la voix forte, & la force du corps, & spécialement des mains.

Et voila les sentences tirees d'Hippocrates, de ce qu'on peut iuger de l'enfant. Quāt a ce qu'il escrit au iij. liure des Aphorismes du Pronostic des maladies qui auiennent aux enfans, nous l'exposerons au liure que nous escrivons, De la cure des maladies des enfans.

F I N.

LA MANIERE DE NOVRIR
L'ENFANT DEVIS LE TEMPS
qu'il est seuré, & détrié.

LIVRE IIII.

PAR

M. Sim. de Vallambert, Medecin de Madame Marguerite de France, Duchesse de Savoie, et de Berry.

A LES fondemens sont iettez de la nourriture de l'enfant, au liure De l'instruction de la sage-femme: ia l'ouuerture est faite au liure qui vient apres, des moyës de le faire viure sainement, auancez & pourfuyuis de iour en iour, de moys en moys, d'an en an, par la nourrice, iusques au temps qu'il conuient le détrier & bailler a gouuerner a vn autre: maintenant en ce present liure i'enseigne comme il le faut seurer, & comme il le faut nourrir apres qu'il est détrié, a fin qu'estant l'enfant guidé par l'ayde de nos enseignemens, il puisse attaindre iusques a l'eage auquel il soit donné a vn Pedagogue, pour appredre & former les mœurs de l'ame, & deslors de soy-mesme, mener saine & longue vie, & se garder d'enuicillir deuant le temps: & ceste guide & ce chemin, est compris en deux traittez: le premier, est du seurement: le second, du gouuernement de l'enfant: lesquelles choses i'expliqueray ainsi par ordre.

TRAITTE' PREMIER.

DU SEUREMENT DE L'ENFANT.

Donques au premier traitté, qui est du seurement de l'enfant, il faut discourir trois choses: l'vne, qui est suyuant la

CO. FAVT NOV. L'ENF. APR. QV' IL EST SEVRE. 155
demande, En quel temps on doit seurer l'enfant : l'autre, Si
on le peut seurer plus tost que deux ans, ou a vingt mois:
la derniere, contient la maniere comme il doit estre seuré.

En quel temps on doit seurer l'enfant. CHAP. I.

ON SEVRE cōmunément l'enfant quand il ha ia deux
ans, & ainsi le conseillent Paul d'Aegine, Haly-ab-
bas, & Auicenne: lesquels dient que le temps legitime
& naturel du seurement de l'enfant, est deslors qu'il ha deux
ans: premierement, par ce que lors il ha ia ses dents, par
lesquelles Nature semble demander autre nourriture que le
laiet: en apres, c'est qu'il appete & desire les viandes plus
grosses & plus folides que le laiet, & y prend plaisir: tier-
cement, par ce qu'il mange lors des viandes qu'on luy don-
ne en suffisante quantité, de forte qu'il ne luy est plus besoin
de laiet, lequel, s'il en mangeoit ordinairement, se corrom-
proit avec la chair & les autres viâdes qu'il auroit mangees:
finalement, a raison que le terme de deux ans passé, la nour-
rice commence de menstrier, si c' uenture elle n'ha point
menstrué par-avant en alaietant l'enfant, tellement que son
laiet se diminue, & n'est plus bon. Toutesfois, on ne peut
bonnement designer ne limiter expressément le temps legi-
time du seurement, pour la consideration de la diuersité du
temps de la sortie des dents des enfans, & de l'enuie qu'ils
ont des viandes, & de leur puissance de les manger & dige-
rer, & de leur cōplexion, & de leur disposition aussi, & des
saisons de l'annee, & du naturel du pays ou lon est. Par-
quoy, pour cognoistre & iuger quand il est conuenable de
seurer l'enfant, faut considerer ces cinq ou six choses, & se-
lon la consideration d'icelles, reigler & diuersifier le temps
du seurement.

I. *La sortie des dents: & mesmement des molaires, & machelieres.*

Nous voyons que les dents sortent plus tost aux vns, plus tard aux autres: parquoy faut borner le temps de détrier l'enfant par la sortie d'icelles, tellement que ceux a qui elles mettent plus long temps a sortir, doiuent mettre plus long temps a estre détriez: & ceux a qui plus tost elles sortent, doiuent estre détriez & seurez plus tost, soyent masles ou femelles: pourautant que l'intention pour laquelle Nature produit les dents, c'est le brisement & machemēt de la viande, pour la preparer & rendre plus facile a la digestion: & aussi semble que quand elles sont sorties, Nature incite l'esthmac de l'enfant a appeter le nourrissement qui se doit macher & briser par icelles: pensant dōques qu'elles ne sont produites sans cause, est bon de remarquer le temps de faire vsr a l'enfant de viādes mastiquables de plus solide & plus grosse substance que le lait, & non le faire plus tost que les dents soyent sorties. Que si plus tost l'enfant estoit seuré, dit Auerrois sur Auicenne, a ce propos, & qu'on luy donnast la viande auant qu'auoir ses dents, cela luy seroit cause de maladie, pour la mauuaise digestion & corruption, dont quelquefois suruiuent la mort.

II. *L'appetit de l'enfant a manger la viande, & la puissance qu'il ha de la digerer.*

En apres faut considerer si l'enfant ha affection de prendre autre viande que le lait, & s'il la prend bien, s'il la mache bien, s'il la digere bien: car quand nous voyōs que perseveramment il appete & demande a manger de la chair, ou autre bonne viande plus massiue que le lait, ou qu'il se degoust de du lait mesme, nous deuons penser que cela ne luy

vient pas d'vne volôté ou fantasie legiere, ains d'vn instinct de Nature qui raisonnablement l'incite a cela : parquoy le deuons lors détrier, & luy exhiber la viande qu'il appete, pourueu que l'eage, & les dêts, & la disposition le permette: & si nous voyons aussi qu'il mache alaigrement & a l'aïse, nous le détrions, autrement non: car si nous voyons au contraire, qu'il n'ayt point d'enuie des viandes solides, & n'y prent plaisir, & les mache ou aualle eõtre son cœur, encore qu'il eust deux ans, & ses dents fussent sorties, nous le laissons sans détrier: par ce que la viande prinse contre son cœur, ne se digereroit point, & se corróperoit, dont s'enfuyuroit quelque maladie.

I I I.

La complexion.

Tiercement, on doit noter la complexion de l'enfant, d'autât que s'il est temperé, & en bon point, le temps commode de le seurer est de deux ans: & s'il est trop humide, plustost doit estre seuré, d'autant que le trop long tettemēt augmente la complexion humide, plus tost qu'il ne la corrige & amande: car les choses qui excèdent, sont corrigees & amandeas par l'vsage moderé de leur contraire: & les choses temperees, sont conseruees, par leur semblable: s'il est de complexion seche, plus longuement doit tetter, luy estant le laiët bon & conuenable nourrissement.

I I I I.

La disposition de son corps.

Outre les consideracions susdittes, faut encore regarder sa disposition, pour sauoir s'il est temps de le seurer: car s'il est maladi: c'est a dire, tantost sain tantost malade, communément on ne le seure point encore, par ce qu'il ne māge pas suffisamment, ou bien on luy donne le laiët a succer

158 COMME IL FAUT NOURRIR L'ENFANT
a cause de la debilité : cōme il auient quelquefois apres que
les enfans sont seurez , on leur donne encores du laiçt de
femme, ou de chieure : les maladies ausi qui leur suruien-
nent quelquefois, contraignent de les seurer plus tost que
ne seroit besoin , comme les fieures d'humeurs corrōpues :
& quelquesfois plus tard, comme la fieure hectique, la toux,
& aucunes autres maladies.

V. *La saison de l'annee.*

La cinquiesme consideration, est de la nature du temps,
& de la saison de l'annee : car en temps chaud , comme en
Esté principalement , lequel excede en chaleur, il n'est pas
bon de détrier l'enfant, encore que les autres choses le per-
mettent : parquoy on dit qu'au mois de Iuin, Iuillet, Aoust,
& quelquefois a la fin de May, on ne trouue pas bon de le
seurer, prenant la raison de l'autorité d'Hippocrates , le-
quel dit au premier liure des Aphorismes, en l'Aphor. 18.
qu'en Esté, & en Automne on porte difficilement les vian-
des, en Hyuer tresfacilement : le Prin-temps tient le moy-
en : dont on fait la conclusion ainsi , que si ceux qui ont ac-
coustumé de manger autres viandes que le laiçt , en Esté ne
les portent pas facilement , moins les porteront s'il arriue
qu'ils s'y mettent de nouueau : ce qui se fait necessairement
au seurement de l'enfant . Car en Esté la chaleur naturelle
fort dehors du corps, & se diminue dedans, & par ce est be-
soin que le nourrissement lors soit moins solide, plus subtil,
& plus facile a digerer. Parquoy seroit vne chose déreglee,
& de mauuais conseil, en tel temps faire oster le laiçt a l'en-
fant, & luy donner de grosses viandes, & de difficile dige-
stion. En quel tēps donques de l'an est bon de le détrier ? au

Prin-temps, & sur la fin d'Autōne, & quelquefois en Hyuer, auquel nous voyons auoir plus grand appetit, & faire meilleur digestion : toutesfois quand l'hyuer est trop froid, Haly defend lors de le seurer : par ce que toute grand' mutation ne se doit faire es temps extremes, mesmement es enfans qui sont tendres, & facilement paisibles.

V I. *Le pays ou lon est.*

Et tout ainsi comme de la saison, aussi faut auoir consideration de la region & du pays ou l'enfant est nourry. Car aduenant que ce fust en pays froid, comme es montaignes de Sauoye, ne seroit impertinant de le seurer en Esté: & au contraire, en pays chaud, comme Prouence & Languedoc, quelquefois au cœur d'Hyuer.

V II. *Si on doit auoir consideration du sexe, & s'il y ha raison de seurer plus tard l'enfant masse que la femelle.*

Communément, en ce pays, on seure les filles a dixhuit & a vingt mois, & les enfans masses, a deux ans, & plus tard: ce que ne me semble estre accordant avecq' raison, & deuroit estre le rebours. Car s'il est ainsi qu'on doit prendre le temps de seurer par la sortie des dents, & par la force de macher & digerer les viandes solides : car veritablement les masses doyuent plus tost laisser le laiēt que les femelles, lesquels ont plus tost leurs dents, sont plus forts, & ont plus de chaleur naturelle, parquoy les viandes solides leur sont plus conuenables : & elles au contraire sont plus molles, & plus delicates, ne pouuant pas si bien du tout digerer les grosses viandes : parquoy le laiēt leur conuient beaucoup mieux, & doiuent tetter plus long temps, ce me semble.

106 COMME IL FAUT NOURRIR L'ENFANT
Et ne pense aucune raison estre pour eux, sinon vne, laquelle encores ne leur vaut rien : c'est qu'ils diēt que les filles sont plus humides que les fils, parquoy ils euident qu'elles doyuent vser de viandes qui humectent moins, & que le laiēt les rend humides d'auantage : ce que ie leur accorderois, si elles estoient humides, non d'humidité naturelle, ains d'humidité superflue, & contre nature : car ce qui est selon nature, doit estre conserué par son semblable, & ce qui est contre, osté par son contraire. Considéré donques que les filles sont plus humides naturellement que les enfans mâles, doyuent cerraînement tetter plus long temps, & estre détries plus tard : d'autât que le laiēt les rend molles & delicates, & les fait croistre, comme estant vne viande molle & humide conuenable a leur nature. Parquoy l'authorite de Gordon n'est receuable en c'est endroit, lequel sans donner raison, dit, que le laiēt rend les enfans mâles plus forts : & suyuant ceste fantasie, conclud qu'ils doyuent estre seurez plus tard que les filles, lesquelles n'ont besoin de si grand' force, par ce qu'elles ne bougent de la maison, & ne manient les affaires ou la force du corps soit requise.

Si on peut auancer le terme de deux ans, voire de vingt mois, a seurer & détrier les enfans. C H A P. I I.

IL AVIENT quelquefois qu'on est contraint de seurer & détrier l'enfant, plus tost qu'il ne seroit de besoin, pour deux causes, ou pour le regard de la nourrice, ou de l'enfant mesmes.

I. Pour le regard de la Nourrice.

On le seure auant le temps, pour le regard de sa nourrice, ou par ce qu'elle ha quelque maladie, ou par ce que son laiēt

laisſe luy deſaut, encore qu'elle ne ſoit malade, ou parce qu'elle eſt groſſe, & que ſon laiſe pour ceſte occaſion, ou pour autre, n'eſt pas bon: car ſuruenant tels accidens, on n'attend pas que l'enfant ayt deux ans, non pas vingt mois, ne encore dixhuiſt, pour le ſeurer, ſi d'auanture il ne vouloit tetter vne autre nourrice, & qu'il euſt tant accouſtumé la ſienne qu'il ne voudroit qu'elle fuſt changée, quelque ſainte qu'on fiſt de bailler ſes veſtemens a l'autre, ou d'oſter la lumiere, ou faire quelque autre choſe qui peult eſtre faite, pour induire l'enfant au changemēt de ſa nourrice: queſ'il vouloit ſucceſſer le laiſe d'une autre, il ne ſeroit pas encore temps de le ſeurer: parquoy on doit vſer de quelque ruse & finesſe, a empêcheſer qu'il ne ſoit oſté du laiſe deuant le tēps par faute de ſa nourrice, autrement ſi on ne peut ce faire, faudra le ſeurer du tout, & luy augmenter ſa nourriture de viandes ſolides en lieu de laiſe.

I I. Qu'il faut faire pour ne ſeurer l'enfant deuant le temps, pour le regard de la Nourrice.

Pour obuier a l'inconueniant que les enfans ne veuſent point d'autre nourrice que ſa leur accouſtume, ou beſoin ſeroit de la changer plus toſt que le ſeurer, faut faire ce que lon pratique en pluſieurs bonnes maiſons: c'eſt qu'on ne permet que la nourrice qui alaiſte l'enfant, ſe ioue a luy demy an deuant le terme de le ſeurer, ni ſe face trop aymer de luy, a fin qu'aduenant la neceſſité de la changer, l'enfant ne ſe ſoucie point de tetter vne autre.

III. Pour le regard de l'enfant.

Quant eſt du coſté de l'enfant, on eſt pareillement contraint de le ſeurer deuant le terme, ou parce qu'on voit que

162 COMME IL FAUT NOURRIRE L'ENFANT
le lait qu'il prent se corrompt dans son esthomas, ou parce
qu'il se trouue mieux de manger la viande qu'autre nourri-
ture: pour autant qu'il y ha certaines proprieté d'estho-
mac, par lesquelles il ha quelque conuenance ou disconue-
nance avec les nourrissemens, de sorte que quelquefois il
refuse le lait, lequel estant dedans l'esthomas se corrompt,
& l'enfant ne s'en nourrit point: au contraire, se delecte
d'autre viande, l'accepte bien, la digere bien, & conuertit
en bonne nourriture: parquoy est meilleur lors de le seurer,
que repugnera Nature: comme au contraire, on voit que
pour le plaisir que prêt l'enfant au lait, & le refus qu'il fait
des autres nourrissemens, on est cōtraint quelquefois de dif-
ferer a le seurer, & le nourrir plus longuement de lait.

De la maniere de seurer l'enfant.

CHAP. III.

ESTANT venue le temps de seurer l'enfant, on doit ce
faire petit a petit, & non tout a vn coup: on le seure petit
a petit en deux manieres. Premièrement, en ne l'alaiât
pas tant, ne si souuant qu'on souloit: secondement, en aug-
mentant la viande a chacune fois qu'il souloit en prendre,
& luy en baillant plus souuant en lieu du lait: procedant
ainsi par diminution d'alaiement, & augmentation de vi-
ande, iusques a ce que lon vienne au temps qu'il ne tettera
plus, & sera nourry plus pleinemēt: & ainsi commodément
il sera seuré. Rasis ordonne q'en luy diminuant les fois
de l'alaiement, cela se face premierement & principale-
ment la nuyt, & non de iour, tellement que s'il auoit ac-
coustumé de nuyt tetter trois fois, ne tettera plus que deux,
puis plus qu'une, iusques a ce qu'il ne tette plus du tout, en

l'accoustumant de dormir ce temps là, es heures qu'il sou-
loit tetter; d'autant ausi qu'il se fache moins de ne tetter
point a cause du dormir. Comme dōques l'enfant soit cou-
ché apres souper pour dormir, au premier reueil ne luy sau-
di. donner a tetter, par ce qu'il n'y aura pas grand' espace
dēpuis souper iusques alors, ains faudra le faire r'endormir:
puis venant plus auant de la nuyt qu'il demandera a tetter,
faudra luy en donner, pour la distance du temps dēpuis le
souper, & que malaisément on tiendroir l'enfant toute la
nuyt sans succer du lait. L'ordre qu'on tiendra de iour, se-
ra tel: Au matin comme l'enfant est éueillé, & est temps de
le leuer, apres l'auoir nettoyé, baigné, frotté, cōme appar-
tient, on luy baille a tetter: puis se tient deux heures sans
rien prendre: ces deux heures passees, on luy baille a disner
des viādes solides, & se tient apres sans māger trois heures
ou enuiron: puis le voulant mettre a dormir, on luy baille
a tetter: estant éueillé, apres l'auoir nettoyé & frotté com-
me au matin ha esté fait, le font iouer, ou portent a l'air, s'il
fait beau, & l'y tiennent quelque peu de tēps: puis luy bail-
lent a souper viandes solides: & apres le tiennent sans mā-
ger autant qu'apres disner: puis le couchent, luy baillant a
tetter: & cela se fait pour le commencement, en procedant
plus auant par diminution d'alaiement, comme i'ay dit,
iusques a ce qu'il mange bien de la viande seulement, & ne
veuille plus de lait. Quant au boire de l'enfant, suyuant
le dire & conseil d'Auicenne, faut pareillement l'y accou-
stumer peu a peu: en luy baillant premierement de l'eau
simple, bouillie & corrigee avecq' lingots d'or, ou car-
reaux d'acier rougis au feu, & esteints en icelle: en nous
gardant bien toutesfois d'obeyr audit Auicenne, en cela

164 COMME IL FAUT NOURRIR L'ENFANT
qu'il conseille de luy donner quelquesfois avec de l'eau un
peu de vin blanc, pensant que le vin corrige l'eau, & face
meilleure digestion de la viande, & plus facile expulsion
des superfluitéz: car nous n'entendons pas de donner aux
enfans, tout le temps qu'ils vsent de lact, du vin, en quel-
que maniere que soit, & ainsi le deffend Galien. Le temps
venu de seurer du tout l'enfant, s'il veut estre opiniastre a
demander la mammelle, & crie s'il ne tette, faut frotter le
bout du tetin, ou y appliquer quelque chose de mauuaise sa-
ueur, sans qu'il porte aucun dommage, pour faire hayr a l'
enfant la mammelle: a ceste fin Auicenne ordonne empla-
stre composé de myrhe & de mente sauuage brayez ensen-
ble. Gordon oing le bout du tetin avec ius d'ail, ou avecq'
moustarde, ou avec saue, ou avec ius d'absynce, ou le frot-
ter seulement des feuilles dudict absynce. Autres le lauent
d'eau de decoction de coloquinte, ou d'aloë, ou de thana-
sie, ou d'autres choses semblables, que l'on cognoist estre as-
sez ameres, & propres pour cela.

TRAITTE SECONDE, DE LA MANIERE DE NOURRIR L'ENFANT depuis le temps qu'il est seuré.

LEST temps maintenant apres auoir parlé du seure-
ment de l'enfant, de traiter de son gouuernement des
l'heure qu'il est seuré. Et parce qu'au departement de
la nourrice, il demene entre les mains d'un gouuerneur, ou
d'une gouuernante, il est besoin de bailler encore enseigne-
ment comme il puisse estre nourry & gouuerné sainement,
iusques a l'age de six ou sept ans, & iusques a tant qu'il le
faille donner a un Maistre d'eschole. Car ce n'est pas une

chose de petit affaire, sçauoir former les affections de l'enfant, sa parolle, l'exercice & fortification de ses membres, le reiglement de son boire & de son manger, & autres choses, selon son eage, & sa complexion naturelle. Parquoy enseignant comme ces choses se puissent faire, commençant depuis le matin, & continuant le long de tout le iour, iusques a l'autre matin, ie penseray faire beaucoup.

De ce qui se doit faire tous les matins a l'enfant apres qu'il est éveillé. C H A P. I.

LA PREMIERE chose qu'il faut faire a l'enfant le matin apres son reueil, est nettoyer le corps des superfluitez de la nuyt : car comme il soit necessaire a l'hōme, dit Galien, au premier liure du Regime de santé, de māger & boire pour reparer ce qui dechet continuellement du corps: il luy est pareillement de besoin tous les iours mettre hors les excremens & superfluitez de ce qu'il ha mangé & beu. On appelle excremēt ce que Nature ha separé d'auec ce qui est pur & net. Des excremens ils sont plusieurs genres: le premier est, de la premiere digestion, & celuy qui est poussé par tous les intestins iusques au bas du ventre, & fort par le fondement. Le deuxiesme, procede du foye, compris de deux especes, dont l'vne est ditte cholere, laquelle est enuoyee du foye a la vessie du fiel, & fort partie par la naissance des intestins, pour irriter a excretion la matiere fecale, partie s'en va outre le foye dans les grandes venes, avec l'aquosité du sang, & fort avec l'vrine. L'autre espece, est melancholie, laquelle est attirée par la ratte, & de là, va partie a la bouche de l'esthomas, partie aux intestins. Le iij. se cōgrege es venes & arteres, seblable au mégue, lequel est attiré par les reins, & enuoyé a la vessie, & se cōuertit en vrine.

Le dernier, se fait en chacune partie du corps, par la dernière digestion propre a chacune d'icelles, & est poussé hors du corps, partie par transpiration insensible, & quelquefois par sueur par les pores du cuir, partie par certains passages & conduits propres a chacune desdittes parties: comme sur toutes autres parties le cerueau, lequel est le domicile de l'ame raisonnable, & pour ceste cause enuironné d'os solides, maisifs, & espois, lequel se purge par plusieurs canaux: premierement par le nez, & par le palais: secondement, par les oreilles: tiercement, par les commissures du crane, & quelque partie flue par les yeux: iceux yeux mesmes gettent tout l'excrement qu'ils engendrent par certains & cuidans passages au coing du nez & des ioües. Tous ces excremens donques se doiuent purger tous les matins, encore qu'en autre temps du iour cela se peut faire: & auenant qu'ils fussent retenus, faudra opposer le remede aux causes de leur retention, soit par regime, soit par medecine.

I. La purgation de la premiere digestion, laquelle est du ventre.

Et premierement, a la sortie du liect, on doit presenter l'enfant a la celle: & s'il n'ha benefice de ventre vn iour ou deux, faut luy bailler vn suppositoire de miel cuit avecq' vn peu de sel: les rustiques donnent suppositoire de racine de iotte, ou d'vn trou de chou, ou du blanc de pourreau, engressé de beurre, ou autre gresse, ou d'vne chandelle de suif avec sel & miel: aucuns font suppositoire d'alun, ou de sa- uon, avec fiel, ou sans fiel, mais ils sont trop violans pour l'eage tendre & delicate. Toutesfois si on cognoissoit qu'il se fust faly la nuyt, sans attendre le matin, on le doit nettoyer, estant vne tres-mauuaise chose le laisser dormir en

son ordure, contre l'oppinion du populace des femmes.

II. La purgation du corps par l'vrine.

Faut aussi avant que le faire manger, ou faire autre chose, le faire pisser & purger par l'vrine, laquelle purgation est de la seconde & tierce digestion : & pour inciter nature a ce faire, faut, par le conseil de Rasis, & d'autres, luy faire vser quelquefois de la moëlle de semence de melon confit en forme de dragee d'amandes, si d'auanture il estoit subiet a ne pisser guieres.

III. La purgation du cerueau.

Cela fait, il conuient purger les ventres superieurs par cracher, & specialement le cerueau, lequel ha quatre conduits particuliers en la teste, par lesquels se font certaines euacuations particulieres des superfluitez d'iceluy : sçauoir, les oreilles, les yeux, le nez, la bouche : lesquels conduits est besoin aussi de nettoyer, & non le cerueau seulement.

IIII. Comme on doit purger & nettoyer les oreilles.

Le cerueau se décharge aux oreilles d'aucunes superfluités jaunes & bilieuses, outre lesquelles il y enuoye aussi quelquefois beaucoup d'autres humiditez : desquelles, si elles ne sont nettoyees, vient en icelles, & au cerueau mesme, beaucoup de grandes maladies : parquoy les faut nettoyer souuant, dit Auicenne, & mesmement tous les matins, quand on habille & apreste les enfans, avecq' vn linge net & delyé, car par cela elles sont conseruees, & l'ouye aussi : & encore mieux, dit-il, si vne fois la semaine on distille dedans les oreilles vn peu d'huile d'amandes ameres, d'autant qu'elle mundifie, resoult les ventosités, & desèche quelque peu, qui est vne chose fort conuenable aux oreilles.

168 COMME IL FAVT NOVRIR L'ENFANT
Aucunes femmes mouillent du linge en du vin tiede, & en nettoient les oreilles des enfans. Razis, au troisieme de son liure, intitulé, Cōtenant tout, escrit que le safran, & les roses, & l'aspic mis en poudre, cōseruent la fanté des oreilles, empeschent les rheumes en icelles : & par l'autorité de Paul, nous en vsons aux escorcheures & rougeurs des oreilles.

V. *Le nettoiyement des yeux.*

Les yeux doiuent semblablement estre nettoyez tous les matins, ou avec du lait de nourrice ietté dessus, ou avecq' eau rose, ou eau simple, ou avec decoction de fenail, ou de melilot, ou de fenugrec : car en ceste maniere ils seront cōseruez sains & nets, & la veüe en sera meilleure.

V I. *Comme on doit purger le cerueau par le nez, & purger le nez mesme.*

Et ne faut faillir de purger pareillement le cerueau par le nez, le faisant moucher fort, non pas seulement le matin, ains plusieurs-fois le iour. Et par ce que quelquefois il s'amasse des croustes dans le nez, qui empeschent de moucher, il faut purger le nez mesme de cela, avecq' vn linge trempé d'huile violat, ou d'huile d'amandes douces : & pour ceste intention encore eist bon de faire esternuer l'enfant, car l'esternuement moderé sert a mondifier le cerueau & le nez, conforte la voix, le soufle, & les sens.

V I I. *La purgation du cerueau par la bouche, & de la bouche mesme.*

On doit nettoyer encore le cerueau par la bouche, & non seulement le cerueau, mais la bouche mesme ; laquelle bien souuant est mal nette, a cause qu'elle est vne porte & ouuer-

ture cōmune a la purgation du cerueau, de la poitrine, & de l'esthomiac: c'est a sauoir, au vomissement qui vient de l'esthomiac, au crachement, qui procedant de la toux & des poumons, passant par la gorge, que de la distillation des superfluitez du cerueau, descendāt par l'os colatoire, & a la saliuē, qui deriue par certaines venes, qu'on nomme saliuales, venant aux glandules de la langue: dequoy auient que bien souuant les enfans sont baueux. Parquoy est bon de les faire cracher, & quelquefois de les faire vomir, & s'ils ne peuvent d'eux-mesmes, les ayder, en mettant dans la bouche le doigt trempé de miel, ou quelque autre chose, puis apres la lauer & gargarizer d'eau fraische, par ce que non seulement la bouche, pour ces causes, est mal nette bien souuāt, mais aussi & les dents, & les gēciues, & la langue: il conuient aussi les nettoyer au matin, & souuant le iour, avec vn linge trempé de vin & d'eau, ou de miel seul, ou des trois ensemble doucement, comme aucunes femmes sçauent bien faire: puis les lauer d'eau pure avec linge ou sans linge, & c'est assez dit de la purgation & nettoiyement des excremens & superfluitez de la digestion de la nuyt.

De peigner & froter la teste, exercer, baigner, & froter le corps de l'enfant, apres les purgations susdittes, auant le repas, mesmement auant disner. CHAP. I I.

S'ENSVYT ce qui se doit faire incōtinant apres les purgations & nettoiyemens susdits, encore auant le repas: c'est a sauoir, le peignemēt & frotemēt de teste auant desieuner: l'exercice, le bain, & frotemēt du corps auāt disner: lesquelles choses se doyuent faire lors, tant pour haster & faire sortir facilement les restes des superfluitez susdittes, & mesmement celles qui viennent de la derniere digestion,

170 COMME IL FAUT NOURRIR L'ENFANT
que pour augmēter la chaleur naturelle, & fortifier les parties solides du corps, & regaillardir les esprits & les sens de la personne, la preparāt mieux a manger & a boire, & a faire meilleure digestion, & autres operations de l'ame : comme ainsi soit, qu'apres auoir nettoiyé le corps, comme ha esté dit, ils restēt encores quelques superfluitez, & aussi que par icelles acquises en dormant, la chaleur naturelle s'est amoindrie, & le corps appesanty, & les esprits eslourdis.

I. *De peigner & frotter la teste.*

Premierement donques au matin, apres auoir nettoiyé la saleté de l'enfant, principalement les plus gros excrements, il conuient peigner & frotter sa teste doucement, le faisant moucher fort : & n'est pas impertinant ce faire encore auant soupper, pourautant que le peignement & frottement purge encore le cerueau, par les commissures du test, des fumees grasses & espoisses qui y montent : & cōme escrit Aristote a Alexandre, diuertit les vapeurs qui nuysent a la veüe : & outre cela, fait deuenir les cheueux beaux, engarde que les poulx ne s'engendrent, & que l'enfant ne se gratte, & ne soit galleux.

I I. *De faire ébatre & prendre exercice a l'enfant.*

Après que tout cela est fait, & que l'enfant est habillé & vestu, luy faut incontīnāt mouuoir son corps, & faire prendre exercice, sinon qu'on le face vn peu desieuner deuant. On note, cōme dit Galien, trois premiers genres de mouuement : l'vn desquels se fait quand nous nous mouuōs par autruy : l'autre, par nous-mesmes : le tiers, par medecine, lequel n'appartient aucunement a l'homme sain. Le mouuement par autruy se fait a l'enfant, quād quelqu'vn le por-

te entre ses bras, ou qu'il est porté en batteau, ou en berceau, ou a cheual, ou en litiere, ou en coche. Lesquels genres de mouuement, sont distinguez par les eages de l'enfant : car comme nous auons dit au troisieme liure, s'uyuāt
,, l'authorité de Galien, Les enfans qui tettēt, n'ont besoin
,, de mouuement si fort, comme celuy qui se fait en batteau,
,, ou a cheual : mais quand ils ont trois ou quatre ans, il est,
,, dit-il, loisible de les mouuoir doucement en batteau, ou
,, en chariot : & quand ils ont sept ans, on les accoustume a
,, aller a cheual. Quant au second genre de mouuement, qui
se fait par soy-mesme, les enfans peuuent deslors se mouuoir par eux-mesmes, quand ils commencent d'aller a quatre pieds, & encores mieux quand ils commencent a cheminer : toutesfois il ne faut pas les contraindre de cheminer deuant qu'ils ayent la force de soy soustenir deux-mesmes, de peur que leurs cuisses ne se courbent de la pesanteur du corps, & deuiennent difformes. Or donques apres que l'enfant est nettoyé, & prest de ses habillemens, il est necessaire de le faire ébatre & prendre exercice : car outre les commoditez qui en auiennent, corame la fortification des membres, le nettoiyement & purgation des menues superfluites, la conseruation & entretenement de santé, il semble que nature l'appete : & a la verité, il est aisé a cognoistre par cest eage, dit Galien, quelle societé il y ha de nostre nature avec l'exercice & mouuement du corps : par ce que quand on tiendroit les enfans en vn lieu, enclos & enfermez, on ne les sçauroit engarder qu'ils ne courent ou iauent & s'esgayent, comme les veaux & les ieunes poulains : car chacun animal appete naturellemēt son propre & conuenable exercice pour conseruer sa santé. Mais ce temps—

172 COMME IL FAUT NOURRIRE L'ENFANT
pendant, on doit noter la complexion & habitude de l'en-
fant, la saison de l'an, & la disposition de l'air : car en Esté,
& par les chaleurs, faut l'exercer moins, & a l'ombre, mes-
mement quand il est chaut, mince, & de petite corpulence.

III. *Du baing, & du frottement.*

Galien ordonne deux heures du iour commodés pour
frotter & baigner les enfans détriez, & qui sont ia grandets :
l'une est au matin, apres qu'ils sont leuez, auant que iouer :
l'autre apres qu'il ont ioué, deuant que manger. Et ne veut
Galien, que quand l'enfant se baigne apres auoir mangé, il
luy soit permis de boire auant le baing, par ce que la distri-
bution de ce qui seroit cōtenu dans l'esthomas se feroit trop
tost, ce qui est a euter es corps qui sont sains. Parquoy il
conseille que le repas voise tousiours apres le baing en vne
personne saine & temperée. Maintenant pour sçauoir de la
qualité du baing & du frottemēt, faut recourir au liure pre-
cedant, en leur propre chapitre.

Du repas, & quand il est temps de faire manger l'enfant.

C H A P. III.

» Q V A N D on ha faim, dit Hippocrates, ne faut plus
» Trauailer ne prendre exercice : & le repas, dit Gali-
» en, doit aller apres le baing en vn enfant qui est de
» bonne habitude. Et parce que le ieusner n'est pas bon aux
» enfans, ne la trop grand' nourriture, ni aussi la trop petite,
» selon l'aphorisme d'Hippocrates, il faut noter combien de
» repas il doit faire chactin iour, quelles viandes il doit man-
» ger a chacun repas, & quelles-non, & combien : qu'est-
» ce qu'il doit boire, & quoy-non : cōsiderant la complexion
» & nature de l'enfant, la saison de l'année, & le pais ou lon est.

I. Combien de repas le iour, & a quelle heure l'enfant les doit prendre.

La coustume est de faire manger les enfans quatre fois le iour, & mesmement en ce pays froid: la premiere, a desjeuner, le matin, apres qu'ils sont habillez, avant que iouir: la seconde, a disner: la tierce a ressiner, avant que de s'aller ébatre: la derniere, a souper: comptant depuis desjeuner iusques a disner deux ou trois heures, depuis disner iusques a ressiner quatre heures, & depuis ressiner iusques a souper trois heures. Car ne manger qu'une ou deux fois le iour, seroit trop peu, & seroit mourir l'enfant de faim, & manger trop a une fois, l'induiroit a beaucoup de grieues & dangereuses maladies: parquoy est bon de partir sa nourriture en plusieurs repas. Mais parce que l'intervalle entre les repas, est quelquefois plus court, quelquefois plus long, & ne se peut dire absolument la vraye heure du iour pour repaistre, ou par ce que l'enfant n'en ha point d'enuie, ou par ce qu'il n'ha pas encore digeré ce qu'il ha mangé parauant, on determine le temps commode pour prendre le repas, par la digestion & par l'appetit, en observant ces deux reigles: l'une, qu'il ne doit manger que la viande precedente ne soit digeree: l'autre, qu'il ne doit manger sur le degoustement qu'il ha: que si au bout de quelque temps, il est degousté du tout, & ne trouue pas les viandes bonnes, faut luy bailler quelque petite medecine, pour nettoyer son estomac, & les petites venes qui vôt au foye, & aux intestins. S'il vient vomissement de son propre mouvement, ou s'il ha enflure de ventre, & l'urine blanche, faut laisser passer cela, sans luy donner a manger ni a boire, & attendre que la bone disposition de son estomac, & l'enuie de repaistre soit venue.

I I. *Quelles viandes doit manger l'enfant a chacun repas,
& quelles-non.*

A desjeuner, es bonnes maisons, on donne a l'enfant quelquefois vn potage de bouillon de chapon, cuit avec du veau, & avec de la vinette ou borroche : quelquefois d'vn chaudreau fait d'vn iaune d'œuf, cuit avec du beurre & de la vinette dans de l'eau: puis vne pomme cuite sucree, ou des pruneaux cuits aussi avec sucre: quelquefois du beurre frais, lequel aucuns lauent avec eau rose, ou avec eau simple, puis le donnent avec vn peu de sel, sans sucre, sur du pain: quelquefois vn œuf de poulle, frais cuit mollet, avec des apprestes de pain : quelquefois du pain seul, sans autre chose, ce qui se fait communément en toutes maisons: combien que pour le commencement il faut nourrir l'enfant de potages & bouillons de chair, de coulis, d'amandes, & nourrisseurs semblables, qui humectent mieux. En Esté on luy baille quelquefois des cerises, ou des prunes, avec du pain: mais cela ne se doit faire que bien peu : & en Automne, des raisins, mais qu'ils soyent cueillis de deux ou trois iours. Apres desjeuner on le mene a l'ébat. A dîner on ne luy baille point ni de pomme cuite, ni de pruneaux, si d'abavanture il en ha mangé a desjeuner : mais pour cōmancement il mange du potage, avec du blanc de chapon coupé menu dedās, ou avec du poulet : puis du veau bouilly, ou du mouton, & des poullets rostis, ou du chapon rosty, ou autres oyseaux des champs, & non de riuicre. Toutesfois il n'est pas bon de les nourrir trop scrupuleusement, ains faut regarder a ce que leur appetit & leur nature demande : car ce qui est propre a leur nature, encore qu'il ne soit tant bon, leur doit estre donné plustost que ce qui ne leur est propre, & desplaist a leur

goust. Le bouilly leur est meilleur que le rosty: aussi Aulcenne conseille qu'ils soyent nourris de choses humides, & de facile digestion, ne voulant que leur nourrissement soit medicinal, cōme les salades, & les fruiets aiguenx, lesquels se corrompent facilement dans le corps, sinon quelque peu pour les contenter, comme cerises, prunes, fraizes, ou raisins a l'entree du repas. Les potages de pois & de ciches leur sont bons, & ceux des bonnes herbes, selon la saison, fors que de persil, lequel on n'approuue point, par ce que c'est vne espece de l'herbe ditte en larin *Apium*, qui fait tomber du haut mal. On doit cuiter aulx, oignons, porreaux, ray-forts, moustarde, & les potirons, & les treuilles, & leur faut encore defendre les torteaux, les œufs cuits durs, & le vieil fromage, de peur de la grauelle, & le frequāt vsage de dragées, & de fruiets cruds, de crainte des vers. Le lard ne leur est pas bon, ni le poisson, sinon sur la fin de quatre ans. S'ils sont dégoustez de manger de la chair, on leur fait quelquefois de la fause de vinaigre bouilly, avec vn peu d'eau de sucre, & de canelle, en ceste maniere, *R. aceti aquati lib. f. sacch. vnc. j. cinam. dr. f.* Aussi la fause du iust d'orange, ou de vinette est bōne quelquefois pour leur faire venir l'appetit: autrement s'ils ont dégoustement de viāde, ne les faut faire manger a contre-cœur. Les œufs mollets ou cuits au beurre avec sucre leur sont bons. Les salures ne leur sont pas bōnes, & ne doyuēt māger la viāde trop chaude ne rechauffee, fors la gelee, laquelle souuēt se māge a la fin du repas, cōme pour oindre la viande qui est dans l'estomac, & la faire descendre: auquel temps apres on luy baille a manger d'une poire cuite, ou bien de bon chrestien crue, ou des amandes nouuelles, ou des raisins de damas, ou des auellanes seches.

176 COMME IL FAUT NOURRIRE L'ENFANT
Car tel doit estre l'ordre des choses que lon mange au repas, que celles qui ramollissent le ventre, & passent plus legierement, soyent mangees les premieres, excepté la gelee, ainsi que venons de dire: celles qui sont de plus grosse substance, voient apres: & en fin, celles qui sont astringentes & serrent l'estomac, soyent prinſes les dernieres: en obseruant toutes-fois ceste reigle, qui est d'Auicenne, Qu'on ne doit manger diuerſes viandes ensemble pour le second mets, en vn mesme repas, cōme n'estāt rien tant pernitiieux a la ſanté de la personne, pour la diuerſité des complexions, des viandes, & du temps de les digerer. A reſſiner, qui est comme enuiron ij. heures apres midy, on luy baille a manger vn peu de pain tout ſeul, ou avec vne poire cuitte, ou avec des raisins de cabas, ou des maſſepains, puis a boire vne fois. Le ſouper doit estre ainsi que le diſner.

III. *Combien l'enfant doit repaiſtre.*

Et faut que le gouuerneur de l'enfant ſe prenne garde qu'il ne māge trop, ni ſe rempliſſe, de peur d'inflation d'estomac, de vomissement, & de courte halene, & qui pis est, de crainte de tumber en beaucoup de grieues maladies, qui viennent de trop manger, comme epilepsie, spasme, escrouelles, flux de ventre, gibboſité, & boſſe d'espaules. Le corps du goulu ne croiſt point, dient les Docteurs, ni ne deuient point fort: par ce que la viande indigeſte ne fait aucun bien dans le corps, & du mal beaucoup. Si faut-il ſe prendre garde auſſi qu'il ne mange trop peu: par ce que la trop petite nourriture ne conuient aux enfans, ſelon qu'enſeigne Hippocrates, en l'Aphoriſme du regime prins de l'eage des enfans: que s'il ne vouloit manger ayant l'estomac vuyde,

faut

faut trouver moyen de le faire manger, & plus tost le contraindre: car il est meilleur de pecher a donner plus que moins, par ce que l'enfant ha besoin de beaucoup de nourrissement, comme ha esté dit, & est plus facile de vuyder le remply, que de remplir le vuyde: & aussi que l'enfant ha tantost digeré pour l'abondance de la chaleur naturelle. Cependât, faut noter le pais ou lon est, & la saison de l'an, & la nature de l'enfant, qui est la cause pourquoy on ne peut determiner en general la quantité de la nourriture des enfans. Es pays froids, ils ont meilleur appetit, & digerent mieux, comme aussi en hyuer, & ceux mesmement qui sont de bonne taille, & ont apparence d'estre plus forts: mais generalement la mesure de la nourriture est selon la vertu & la force. On ne les doit point saouler de pain, par ce qu'il ne se dissout pas si facilement, ni pareillement les remplir d'œufs & de chair, de crainte de tomber facilement en fièvre, & moins encores doiuent estre rassasiez & remplis de mauuaises viandes. Finalement, & pour faire court, ils ne doiuent longuement tenir table, & ceste est l'opinion d'Auicenne, qui dit que prolonger le temps en mangeant, est mauuais. Nous auons assez parlé du manger, il est temps maintenant de parler du boire.

I I I I.

Du boire de l'enfant.

Quand l'enfant tettoit, & n'vsoit que de lait, il ne luy estoit besoin de boire, car la nourriture qu'il prenoit, n'auoit que faire d'estre amollie par autre chose humide, pour la rendre aisée a couler: mais depuis vsant de viandes solides avec le lait, pouuoit boire vn peu d'eau, pour s'accou-

178 COMME IL FAUT NOURRIR L'ENFANT
stumer peu a peu a accompagner la viande de breuuage, selon la necessité d'amollir & detremper la viande : maintenant qu'il est seuré, & qu'il n'vse plus de laiët, on luy doit donner de l'eau pure a boire, pour dissoudre & destremper la viande, & la rendre facile a couler & penetrer es venes. L'eau simple, est la seule chose dequoy doiuent vsr les enfans sains, pour leur boire ordinaire : car en santé, ils n'ont que faire de breuuage medicinal & correctif d'aucun mal, ne qui soit nourrissant, ni autre artificiel : parce que l'eau faoule & appaise la soif, par autant que la soif est appaisée par l'arrousement froid & humide : & aussi que l'eau est le vray breuuage que Nature ha administré aux hommes.

V. *Si le vin est bon aux enfans, ou non.*

Et ne doit l'enfant boire du vin aucunement, sinon qu'on veist que l'eau luy fist nuysance : Car ie ne conseilleray
,, iamais, dit Galien, au premier liure du Regime de santé,
,, qu'un enfant sain & temperé gousté du vin : la raison est,
,, dit-il, par ce que le vin eschauffe trop le corps, remplit le
,, cerueau de fumees, & rend la partie de l'ame raisonnable
,, hebetee & troublee. Que s'il y ha aucune vtilité qui vienne du vin, comme entre autres, accroissement de la chaleur naturelle, fortification de la digestion, prouocation d'vrine, humectation de tout le corps, & principalement des ioinctures, les enfans n'en ont point de besoin : par ce qu'ils ont de la chaleur ce qui leur en faut, & n'ont pas tant de cholere qu'il leur soit besoin la vuidier par l'vrine, & sont assez humides en leurs membres, par quoy n'ont besoin de les humecter d'auantage. Mais au contraire, ils sentent plus

toft les incommoditez qui viennent de boire du vin : lequel tant s'en faut qu'il leur face du bien , qu'il leur apporte du mal beaucoup. Car iagoit qu'Auicenne l'ayt permis aux enfans mal sains, avec beaucoup d'eau: toutes-fois luy meſme dit, que le donner a ceux qui ſont ſains, c'eſt mettre du feu ſur du feu, par ce que le vin engendre chaleur , & ia les enfans ſont chauds, qui pour cela ſeroient faciles a tomber en fieure. Et Gordon dit, qu'il eſt a craindre que de boire du vin, ils ne tombent en epilepſie, en conuulſion , en paralyſie, en fureur, & autres mauuais accidans : d'autât que leurs corps ſont tendres, paſſibles, & faciles a penetrer : & le vin eſt violent & penetrant, de ſorte qu'il diſſout les humiditez, & les fait penetrer iuſques au profond, & a la teſte: d'auantage, ils ont le cerueau debile, & les nerfs , leſquels le vin, qui eſt actif, & ſubtil, & fort, touche au vif, & frappe, & penetre facilement.

V I. En quel eage les enfans peuvent commencer de boire du vin.

Ariſtote eſcriuant a Alexandre , & Auerroys ſuyuant Ariſtote , defendent deuant trois fois ſept ans de donner du vin aux enfans : Galien accourcit le terme d'un tiers : Gordon leur permet depuis qu'ils ont quatre ans paffez : & pluſieurs conſentent avecq' luy , leur donnant de petit vin blanc, avec beaucoup d'eau. Mais pour le plus ſeur, ie m'accorderay touſiours avecq' Galien, en me mettant deuant les yeux les circonſtances de la complexion & nature de l'enfant, de la region & pays ou il eſt, & de la ſaiſon de l'annee. Car ceux qui ſont de chaude & humide complexion , c'eſt a dire , les ſanguins, doiuent pluſta d commencer de boire du vin, & encore plus les choleriques.

180 COMME IL FAYT NOURRIR L'ENFANT
Es pays froids, & meſmement eſquels le vin eſt en vſage, on leur en baille a boire, bien trempé d'eau, depuis cinq ans: toutesſois ſi l'enfant vient a eſtre malade, de maladie ou le vin ſoit contraire, ou ſ'il eſt diſpoſé a eſtre malade, faut luy defendre le vin. En Eſté, encore que ce fuſt le commencement du cinquieſme an, & es pays ſuſdits, ne doit commencer d'en boire, nonobſtant que les autres circonſtances le conſentiſſent. Les filles plus tard boyuent du vin, d'autant qu'elles ont le cerueau plus humide & tendre, lequel le vin rempliroit promptement, & en deuiendroyent la face rouge & gaſtee, & pluſieurs inconuenians leur en auientroyent beaucoup plus qu'aux maſles. Faut encore noter, que depuis que les enfans commencent de boire du vin au repas, entre les repas ne leur vaut rien: & ſi lors ils ont ſoiſ, pourueu qu'elle ne ſoit menſongere, ils doiuent boire, ou de l'eau pure, ou du iulep roſat, ou autre ſemblable: autrement ne doiuent point boire du tout.

V I I. *Quelle doit eſtre l'eau pour le boire de l'enfant.*

Galien ordonne que l'eau que doit boire l'enfant, ſoit de fontaine, non trouble, non de mauuiſe couleur, ſans odeur, ſans gouſt, legiere, de bonne ſource, & paſſant par bons lieux, fraiche, & non gardee. A faute de celle de fontaine, on permet celle de riuiera coulante par les ſables, en laquelle n'entrent point diuerſes eaux: & celle pareillement des bonnes ciſternes, amallee en temps de tonnerre, & deſcendue par bonnes terres, & par bons purgatoires: c'eſt a dire, ſoſſes, eſquelles elle laiſſe les plus peſantes ordures en paſſant.

De ce que l'enfant doit faire apres le repas. CHAP. IIII.

QUAND l'enfant ha desieuné, s'il est ia grandet, comme de cinq a six ans, luy faut faire passer le tēps a cognoistre les lettres, & a mener la plume sur le papier, pour les former & escrire, encore qu'il n'ayt l'entendement assez ferme pour ce faire, puis l'enuoyer a l'ébat. Apres disner, l'exercice ne vaut rien incontinant, ni le dormir, parquoy le faut recreer a la musique, & a ouyr des comptes ioyeux, ou a veoir des farces, & des petis ieux d'enfans, ou le faire ioier luy-mesmes, iusques a ce qu'il sera temps de le faire ressiner, se gardant de le laisser courir au soleil. Puis quand il aura ressiné, luy faut faire apprendre ses lettres, & ses prieres, & l'ébatre ainsi comme au matin, apres qu'il ha heu desieuné. Et apres souper, luy faut donner la mesme recreation & passe-temps qu'apres disner, iusques a l'heure qu'il faudra le mener dormir.

D'exerciter l'enfant a proferer & a nommer les choses, & de la maniere de reigler ses appetis & affections.

CHAP. V.

AV LIVRE precedant, j'ay enseigné comme on doit exercer l'enfant a former les parolles avant qu'il soit détrié, parquoy n'est besoin de le reiterer icy, ne d'en dire autre chose, sinon que depuis qu'il est seuré, son gouverneur ou sa gouvernante doit plus soigneusement l'accoustumer petit a petit a cognoistre les personnes, & les choses, & les nommer en purs & propres motz. Mais entre toutes les choses requises au gouvernement de l'enfant, la principale, & qui donne le plus d'affaire, est le reiglement de son affection & volonté, pour engarder que son corps ne

s'en change, & tombe en quelque mauuaise disposition: car de reigler son manger & son boire, & pouruoir qu'il ne s'échaufe ou refroidisse trop, & qu'il se tiene net de son corps, peut estre n'est pas chose tant difficile: mais de faire qu'il ne soit timide, ou qu'il ne se mette en cholere, ou qu'il ne se fache, ou qu'il n'appete desordonnément quelque chose, c'est vne sciéce ou chacun n'est pas maitre, & neantmoins est vne chose certaine, s'il n'y est pourueu, que le corps de l'enfant est en danger de deuenir malade: car les mouuemens & passions de l'ame, quand ils sont desreiglez & desmesurez, amènent beaucoup d'accidans de maladie: par ce qu'ils sont reciproques a la complexion & disposition du corps, ainsi comme Galien escrit en vn liure intitulé de tel propos, de maniere que de la bonne complexion & temperature du corps naissent les bonnes mœurs, & les appetis raisonnables: comme de la mauuaise, les mauuais: & au reciproque les bonnes affections & les bonnes mœurs de l'ame, rendent la bonne disposition du corps, & les mauuaises, la mauuaise, iusques a introduire les maladies. Parquoy le mesme Galien, au Regime de sânté, admonnest, que le Medecin, ou gouverneur de l'enfant, ou les parens, se gardent bien de le laisser encourir en mauuaises mœurs & accoustumances, & en affections & appetis immoderez, lesquels corrompent l'ame & le corps. Et par ce est besoin de sçauoir premierement quelles sont les affections, & quels les mouuemens de l'ame, auxquels l'enfant est enclin naturellement: & de quelles complexions du corps & des parties d'iceluy telles choses procedent: en apres, quelles les maladies & indispositions du corps, lesquelles en sont engendrees: finalement, quelle est la maniere comme icelles

affections & inclinations naturelles estant mauuaises, puissent se changer en bonnes & en meilleures, enseignant d'euiter ce qui les corrompt, & pour suyure ce qui les rend bonnes.

- I. *Quelles sont les mœurs & affections naturelles des enfans, & de quelles complexions du corps elles sont engendrees.*

On met deux genres d'affections & mouuemens de l'ame: car les vnes sont naturelles, & prennent leur origine de la complexion & temperature du corps, par laquelle les enfans sont enclins a icelles, & demeurent infichees en la personne, comme la soudaineté a cholere & despit, la pusillanimité & crainte, la finesse, ou la lourderie, la promptitude & allegresse, ou la paresse & nonchallance, la glouttonnie ou la façon naturelle de ne mâger guiere: & ce genre d'affection, est celuy principalement qui merite d'auoir reiglement & soin continuel du gouuerneur de l'enfant, de peur qu'estant déreiglé, il ne tire l'enfant en beaucoup de maladies. Les autres affections procedent de la volonté, & non de la complexion du corps, lesquelles ne demeurent point inferees en la personne: comme, amour, hayne, couuoitise, hypocrisie, appetit desordonné de iouer ou de faire quelque autre chose: & ce genre encore, quand il est vicieux & immodéré, requiert quelque reiglement & correction, mais non tel ne si grand comme es affections auxquelles l'enfant est enclin naturellement: d'autant que tel mouuement, qui est volontaire, & non venant de nature, ne rend pas l'enfant tant subiect a estre malade, sinon qu'il perseuere & se conuertisse en mœurs & accoustumance mauuaise: car lors peut distemperer le corps, & causer maladie.

Celles du premier genre, quand elles sont démesurées & excessives, demonstrent que les parties du corps qu'elles engendrent, sont indisposées & mal complexionnées, comme la promptitude de la cholere, signifie le cœur chaud & sec : au contraire, la timidité & lacheté, le cœur froid & humide : le trop estre éveillé, la finesse & vitacité d'esprit, declare le cerueau chaud & sec : au contraire, la stupidité & bestise d'entendement, la faute de pensément, la nonchalance & paresse, & estre trop endormy, argue le cerueau froid & humide : La tristesse & melancholie, demonstre le cerueau & tout le corps estre de complexion froide & seche : la gloutonie & ne se pouoir saouler de manger, donne pareillement a entendre l'intemperature froide & terrestre de l'esthmac. Et pour mieux dire sommairement, ceux qui se courroucent, ou qui sont timides, ainsi que dit Galien, & ceux qui veillent trop de nature, ou qui sont trop endormis, & ceux qui sont laches & paresseux, ou qui sont trop prompts & scarbillats, ceux qui sont nonchallās & ne pensent en rien, ou qui ont trop grand pensément & tourment d'esprit, & ceux qui sont rusez & fins, ou qui sont trop stupides & lourds, & ceux qui appetent outre mesure quelque chose, & ceux qui ont vne mauuaise accoustumance de manger & boire, ou de vider les excremens, besoin est qu'ils soyent mal temperez des parties du corps, & animales, & vitales, & nutritiues : desquelles telles affectiōns naturelles ont leur origine.

II. *Quelles maladies & indispositions du corps procedent des mauuaises mœurs & affectiōns de l'ame.*

Or tout ainsi que ces mesmes affectiōns, & ces mœurs

de l'ame estât desreiglees & vicieuses, procedent de la mau-
uaise complexion du corps & de ses parties: aussi quâd ces
affectiôns de l'ame ne sont reiglees & corrigees, elles em-
pirent & corrompent d'auantage ceste mauuaise comple-
xion du corps, & si tirent a dos beaucoup de maladies. Car
le courroux distempere le cœur, & l'échauffe d'auantage,
par ce que c'est vn bouillonnement de sang autour de celle
partie, dont s'enflament les esprits, & l'enfant despit &
prompt a cholere de nature, est disposé a la fieure, & a flux
de sang, & a pleuresie, & a frenesie: & auient encore qu'e-
stant échaufé trop fort, le flegme du cerueau se fond, & en-
gendre epilepsie: d'auantage, ceste mesme affection brusle
les humeurs, dissout les esprits: & si elle perseuere, engen-
dre manie & fureur, & autres maux auiennent par la perse-
uerance & vehemence d'icelle. L'accoustumance de plo-
rer es enfans (comme le trop grand' soyn & tourment d'e-
sprit es grandes personnes) & le trop veiller, dessechent le
cerueau, & ainsi que le courroux, allument la fieure, & don-
nent commencement de grandes maladies. La tristesse, la
timidité & pusillanimité font changer le corps en froide &
seche complexion, & estant ia tel, l'empirent d'auantage.
La paresse & nonchallance naturelle de l'enfant, & le som-
meil ordinaire, procedent de la complexion froide & humi-
de du cerueau, & parce rendent l'enfant subiet a superfluité
d'humeurs, lachent la vertu, debilitent la chaleur naturelle,
font les hommes descolorez, bouffes, & mal sains. Bref, les
„ mouuemens de l'ame, dit Galien, ainsi comme ceux du
„ corps, lesquels excédēt la mesure, rendent l'animal chaud
„ & choleric: & au contraire, ceux qui sont au deffoubs de
„ la mediocrité, le rendent froid & flegmatic: & entre les

„ maladies des mouuemens trop vehemens, dit-il, sont les
 „ fieures, & les maladies chaudes : & les mouuemens qui
 „ sont languides, sont causes des oppilations des intestins,
 „ d'epilepsie, d'apoplexie, catharres, & autres maladies de
 „ descentes de superduitez d'humeurs. Et tout ainsi com-
 me ces mouuemens susdits, que nous disons les mauuaises
 affections, & les inclinations naturelles a vice, sont les en-
 fans mal complexionnez : aussi les autres mouuemens dé-
 mesurez, que nous auons nommez volontaires, comme les
 mauuaises mœurs & accoustumances des appetis desordō-
 nez qu'on permet aux enfans, les rendent mal complexion-
 nez, & subiets a estre malades : tout ainsi que la mauuaise
 accoustumance de manger & boire a toutes heures, sans ne-
 cessité, non autrement que la gloutonnie naturelle déprauē
 la nature de l'esthōmac, rend l'enfant goulū & subiet a
 crudité, & aux oppilations, & par consequant a la pierre, &
 a la repletion du cerueau, & consequemment aux rheumes,
 catharres, toux, epilepsie, conuulsion, & autres semblables :
 & comme aussi l'accoustumance qu'on donne a l'enfant de
 veoir, de iouer, & d'aller incessamment, le fait trop veiller,
 & parce luy desèche le cerueau, & par consequant le rend
 subiet aux maladies venant de celle complexion : & ainsi
 consequemment on peut iuger des autres appetis & volon-
 tez déreiglees qu'on luy accoustume, lesquelles tournees
 en mauuaises mœurs, luy apportent de mauuaises comple-
 xions, & le rendent ou trop chaud, ou trop froid, ou trop
 sec, ou trop humide, & par consequant subiet aux maladies
 qui communément en auiennent.

III. *Quisont les moyens de reigler les affections & les
mœurs de l'enfant.*

Par les raisons que nous auons dit au commencement de ce chapitre, il se faut bien garder de laisser tomber l'enfant es maladies de l'ame, a fin de conseruer les parties du corps qui en sont corrompues, & s'il y est tombé ou enclin, l'en retirer avec les choses qui remettent le corps en bonne temperature, & conseruent la santé. Chacune chose, dit Galien, est conseruee par les mesmes genres par lesquels elle est corrompue: Que si les mauuaises affections, & les mauuaises accoustumances, corrompent la santé, & la bonne complexion du corps, aussi elle est conseruee & restituée par les mesmes choses, quand elles sont bonnes. Puis doncques qu'ainsi est que les mouuemens de l'ame & les mœurs changēt le corps, & le tirent hors de sa propre disposition, faisant mutation d'iceluy a santé ou a maladie, comme au reciproque le corps selon qu'il est complexionné ou disposé, change les mouuemens de l'ame, de sorte qu'en la bonne complexion & disposition du corps consiste en partie la santé de l'ame, & en la mauuaise, la maladie: a ceste cause, pour bien temperer & complexionner le corps, & par consequant, pour bien le disposer & cōseruer en santé, on doit temperer les mouuemens de l'ame, comme au reciproque, pour bien temperer les mouuemens de l'ame, on doit bien temperer & complexionner les parties du corps desquelles ils procedent: nonobstant qu'on doit encore temperer, & les vns & les autres par autres moyens, & par autres choses que par eux-mesmes: sçauoir le corps, par bon regime & vsage d'autres choses que des mouuemens de l'ame: & les mouuemens de l'ame, par mouuemens a eux contraires,

188 COMME IL FAUT NOURRIR L'ENFANT
ou par correction & discipline, & non seulement par la tem-
perature du corps. Socrates, quand Zopyrus a la phy-
sionomie le iugea estre vitieux, respondit : que veritablement
il eust esté tel de nature, s'il n'eust esté corrigé par doctrine,
& par bonnes mœurs. On tempere donques le corps par
deux manieres, par bon regime & vsage des choses cōtrai-
res a son intemperature, & par la moderation & reglement
des affections & mouuemēs de l'ame. On tempere pareille-
ment & on modere les mouuemēs de l'ame, & les affections
& appetis par plusieurs manieres, par bonne temperature
des parties du corps dont ils procedent, vsant de regime, &
par chastiment & correction, & par introduction d'autres
mouuemens, & de choses opposites a leurs occasions: com-
me quand on tempere les affections trop ardentes, & les
mouuemens trop vehemens, par destournement de leurs
occasions, & par applaudissement, par douceur de parolles,
& de façon, ou par autre maniere semblable : & ceux qui
sont lachies & froids, comme stupidité, timidité, paresse,
nonchaloir, melancholie, par incitement a choses alaigres,
par ebatement & exercices, par frequentation de compai-
gnies ioyeuses, & par tous autres moyens qui recreent &
,, éueillent le cœur. Et nous auons ainsi guaris beaucoup
,, de gens tous les ans, dit Galien, reuoquant les mouue-
mens de l'ame a deüe mediocrité. Si donques on voit que
l'enfant soit enclin de Nature a courroux & despit, on luy
doit bailler vne nourriture qui tempere la chaleur de son
cœur, & de son sang, & luy faire éviter toutes choses qui
l'échaufent & rendent choleric. Et s'il est ia courroucé &
despité presentemēt, faut auiser les choses qui luy plaisent,
le ramollir & appaiser de douces parolles, ou autrement, se

gardant de l'irriter, de peur qu'il ne tombe en fièvre, ou en autre mauuaife maladie, engédree de cholere. S'il est nonchallant & trop endormy de Nature, le faut accoustumer aux exercices, & a diuers ieux, en luy ostant les choses qui humectent & refroidissent le cerueau, de peur qu'il ne deuienne rheumatic, pesant, & mal sain. Et au contraire, s'il est trop éueillé & trop mouuant, le regime luy est conuenable, qui rafraichit & humecte, en le gardant de trop aller & courir, & de trop aymer les ieux & exercices, de peur d'encourir en maladies chaudes, ou de deuenir meigre & sec. S'il est morne & sombre, & de complexion melancholique, le faut accoustumer aux cōpaignies ioyeuses, aux comptes plaisâns, a la recreation de la veüe, de loüye, & de tous les sentimens : fuyant solitude, & toutes choses qui déplaisent : & luy ordonnant vn regime de viure, qui tempere le sang, pour la crainte qu'il ne vienne en alienation d'entendement, ou en fièvre quarte, ou en autres maladies qui procedent de melancholie. Entre toutes les choses qui appaisent la tristesse, dit Galien, & qui remettēt l'ame en mouuemens tranquilles & moderez, la musique est la principale, laquelle pareillement, ainsi comme l'exercice moderé, reigle le corps : que quiconque, dit-il, sçaura bien vser de la musique, & de l'exercice, iceluy corrigera merueilleusemēt bien son corps & son ame. Finalement, si on voit qu'il soit trop affectonné a quelque chose, faudra auiser sagement, ou de la luy donner, ou de la luy chastier : car luy permettant tout ce qu'il veut, cela le tire en mauuaife accoustumance, & en certains vices, qui corrompent l'ame & le corps : & si on luy refuse, il vient en tristesse ou en cholere, & en certaines passions de facheries, lesquelles pareil-

190 COM. FA. NOV. L'ENF. ADR. QV'IL EST SEV.
lement corrompent & les mœurs de l'ame, & la cōplexion
du corps, & par consequant la santé. Auicenne dit qu'il faut
applaudir aux enfans, & leur donner ce qu'ils demandent,
iusques au temps qu'on les enuoyera a l'eschole: ce qui ne
se doit entendre simplement, ains seulement s'ils ne demā-
dent rien qui leur nuyse: car s'ils demandoient vn cousteau
trenchant, ne leur faut bailler, d'autant que leurs desirs sont
desfreiglez, & leur seroit a dommage. Et doyuent estre in-
struits leurs peres de les diuertir de tels mouuemens de l'a-
me, & de telles affections, par tous les moyens que verront
bon estre, a fin de ne les laisser tomber par cholere & cour-
roux, en fieure & chaleur excessiue: ne par tristesse ou ti-
midité, en complexion melancholique: ne par paresse &
nonchalance, en humeurs superflues, ni par appetis desor-
donnez, leur defendant ce qu'ils appetent, en tristesse ou
paresse, & leur permettant mauuaises accoustumances,
lesquelles peruertissent les mœurs de l'ame. Prouoyât tou-
tesfois a toutes ces choses en telle maniere, qu'ils ne facent
l'enfant trop sage en son enfance.

Du dormir de l'enfant. CHAP. VI.

LA DERNIERE chose a traiter en ce liure, & laquelle
se doit faire la dernière du iour, est le dormir: a quoy on
doit mener l'enfant quelque peu apres qu'il ha souppé.
Autre grand reiglement on ne donne guiere sur le dormir
des enfans, sinon que comme ils croissent d'eage, il les faut
accoustumer a ne dormir point sur iour, ce qui ha esté de-
claré au liure precedant. Parquoy estant venu sur le dernier
point du gouuernement de l'enfant depuis qu'il est seuré &
detrié, nous ferons fin au present liure.

LA MANIERE DE GVARIR LES

MALADIES DES PETIS ENFANS.

L I V R E V.

P A R

M. Sim. de Vallambert, Medecin de Madame Marguerite de France, Duchesse de Savoie, et de Berry.

N OUS AVONS iusques icy poursuiuy l'une des deux parties de Medecine, en la maniere d'entretenir les enfans en fanté, depuis l'heure de leur naissance iusques au temps de les seurer, & depuis les auoir seurez iusques a ce qu'ils ayent sept ans: ce n'est pas encore l'endroit ou il nous faut arrester pour leur affaire, il est encore besoin de discourir l'autre partie de Medecine, pour quand ils auroient perdu la fanté, la leur recouurer. Car ce n'est pas assez de sauoir cōme on se doit entretenir en bonne disposition, si on ne sçait aussi comme on se doit deffaire de la mauuaise, & chasser la maladie. Parquoy, pour mener a chef mon entreprinse, pour le fait des enfans, j'aiouseray encore ce dernier liure, auquel ie traiteray la maniere de guarir leurs maladies: cōme vne chose qui doit estre traittee a part en Medecine, ainsi que les choses precedantes: & ainsi l'ont fait Paul, Oribase, Rasis, Haly-abbas, & Auicēne: car aucunes choses ne cōuiēnent pas a l'eage tēdre, lesquelles cōuiēnent a l'eage robuste: & au rebours, il est expediant de faire aux enfans des choses qui ne sont pas bonnes aux grandes personnes:

comme il leur auient aussi des maladies, desquelles ceux des autres eages sont exempts: qui est l'occasion pourquoy i'ay tiré sommairement des Grecs & des Arabes, en nostre langue Françoisse, en ce present liure, ce qui sert pour la guarison des maladies des enfans, lequel liure ie diuise en deux Traitez, au premier ie mets comme en general: au second comme en particulier, comme leurs maladies peuuent estre gueries.

PREMIER TRAITTE'.

DE LA CVRE GENERALE DES
MALADIES DES ENFANS.

Pour bien sauoir guarir en general les maladies des enfans, il nous est besoin de sauoir premierement lesquelles maladies leur auiennent plus communément, & qui sont les causes generales d'icelles, & les marques & notes comme on les puisse cognoistre: puis finalement faut venir a leur cure generale, & discerner celle qui est commune, tant a ceux qui tettent, qu'a ceux qui ne tettent plus, d'auec celle qui est propre a ceux qui tettent encore, & celle qui est propre a ceux qui ne tettent plus, & sont seurez.

Des maladies qui auiennent le plus communément aux enfans. C H A P. I.

LES Maladies qui auiennent ordinairement aux enfans, sont distinguees selon la diuersité de leurs eages. On diuise l'enfance communément en trois ou quatre eages: le premier, est depuis la naissance iusques a sept mois, lors que commencent les premieres dents a sortir: le second, est depuis la sortie des premieres dents iusques au bout de deux ans,

ans, quelles font toutes sorties, & que l'on d'étrie l'enfant : le troisieme, commence deslors & finit a sept ans, que les dents se renouellent : le quatrieme, s'étend depuis sept ans iusques a quatorze. Comme donc en ces eages l'enfance est departie, on fait distinction pareillement selon chascun d'eux, des maladies des enfans : ce que semble Hippocrates auoir fait, lequel au troisieme liure des Aphorismes, specifie aucunes maladies qu'il dit leur auenir singulieremēt par la difference de leur eage, en ces parolles :

*Des maladies qui auiennent au premier eage de l'enfance,
Aphorif. XXIIII.*

„ Aux enfans nouuellement nez, dit-il, auiennent com-
 „ munément le mal de bouche, que les Grecs nomment
 „ Aphthæ, le vomissement, la toux, faute de sommeil, peur
 „ en dormant, inflammation du nombril, & humidité d'o-
 „ reilles. Lesquelles maladies Galien, exposant la cause de
 leur origine, dit leur proceder : sauoir, les vlceres de la bou-
 che, a cause de l'échaufaison, & acuité du lait, & de la par-
 tie ou est le mal, laquelle est tendre : le vomissement, a cau-
 se de l'abondance du lait, qui charge le petit esthmac : la
 toux, pour la grand' humidité du cerueau, laquelle tombe
 sur les poumons : le veiller contre leur nature, a cause des
 maux susdits, ou de la force & pointe des humeurs de l'es-
 thmac, qui eleuent des fumees au cerueau, & le desechēt :
 le tressaillement de peur en dormant, a cause du nourrisse-
 ment corrompu de l'esthmac, qui enuoye de mauuaises
 vapeurs au cerueau, & fait songer songes qui donnent fray-
 eur : l'inflammation & apostume du nombril, a cause de ce
 qu'il ha esté couppé nouuellement : l'humidité & ordure d'o-
 reilles, pour l'humidité du cerueau, cōme de tout le corps.

Des maladies auxquelles les enfans font subiets a la sortie de leurs dents, qui est le second eage de l'enfance.

Aphorif. X X V.

„ Et vn peu plus auant de leur eage qu'ils sont ia grandets,
 „ (dit le mesme Hippocrates) lors que les dents leurs com-
 „ mancent de fortir, cōme au septiesme moys, ou peu plus
 „ tard, ils ont le prurit & demangeaison des genciuës, fie-
 „ ures, conuulsions, ou retirement de nerfs, & flux de ven-
 „ tre, & mesinement quand les dents canines, qui sont les
 „ pointues, leur sortent. Ce que Galien expose au Com-
 „ mentaire & en la glose, declarant les causes de chacune des-
 „ dittes maladies. En ce temps là (dit-il) le demangemēt des
 „ genciuës leur vient, pour l'occasion de ce que les dents les
 „ piquent en sortant: & les fieures, a cause de la douleur & de
 „ l'inflātion desdittes genciuës: & les conuulsions, a cau-
 „ se de la crudité du nourrissement, qui estoupe ou foule, &
 „ greue les nerfs & les parties nerueuses, lesquelles ne sont pas
 „ assez fortes: & le flux de ventre, a cause de l'indigestion de
 „ l'esthomas. Et ces choses auiennent principalement lors
 „ que les dents canines: c'est a dire, celles de deuant qui sont
 „ pointues, sortent: qui en sortant excitent les fieures & in-
 „ flammations des genciuës: & les conuulsions, mesmement
 „ es enfans gros & gras, lesquels ont le ventre constipé pour
 „ leur grosseur & plenitude.

*Des maladies auxquelles sont subiets les enfans depuis l'eage de la
 „ sortie des dents, en sus. * Aphorif. X X V I. Avec l'expo-
 „ sition de Galien.*

Et quand ils commencent (dit encore le mesme Hippo-
 crates) de deuenir plus grands: c'est a sauoir, au troiesme
 eage d'enfance, depuis que les dēts sont du tout sorties, ius-
 ques au dessus de sept ans, il leur suruient coustumieremēt

inflammation ou apostume chaude, aux amygdales, & a la luerre, & aux parties qui sont au bout du palais de la bouche: luxation & desnoüement des vertebres du chinon du col, a cause que les nerfs & ligamens se rōpent volontiers en cest endroit: la courte halene, en Grec, *asthma*, pour cause des fluxions du cerueau, qui empeschent les instrumens de respiration: la grauelle, a cause qu'ils sont goulus & glouts, & que par leur gulosité & gloutonnie ils augmentent beaucoup d'humeurs crues, desquelles la partie plus grosse descend avec l'vrine en la vesse, & se fait matiere de calcul & grauelle, y suruenant chaleur: les vers tant longs que courts, lesquels procedēt de pourriture desdittes humeurs: des verrues, dittes en Grec, *acrochordones*, lesquelles leur viennent de grande assemblee d'humeurs enuoyees a la superficie du cuir: des glandes autour des oreilles, que les Grecs nomment *Satyriæ*, ou *Satyriasmî*: & les escrouelles, lesquelles viennent en la gorge, aux oreilles, & aux aignes: & d'autres bossettes & enleueures qui leur sortent en plusieurs endroits du corps, procedant des matieres superflues que leur gloutonnie fait multiplier en eux. Outre ces genres de maladies, y ha d'autres encore qui leur sont propres, cōme celle qui est dite des Grecs *Macrophysocephale*, qui est vne grosseur de teste, laquelle est venteuse, & vne autre appelee *Hydrocephale*, qui est vne grosseur de teste pleine d'eau: & celle qu'on nōme le filet sous la langue, qui donne empeschement de parler: & la deformité des mēbres venant du ventre de la mere, cōme six doigts en vne main, le fondement bouché, les marques des enuies de la mere, & quelques autres semblables: plus le mal sacré, dit autremēt le mal caduque, ou le haut mal, iacoit qu'il peut estre cōpris

sous le genre de conuulsion, cy deuant ditte: & la tigne, & la verole, ou rougeole, & encôres d'autres, combien qu'elles auient aussi aux autres eages, ausquelles generale-ment toutes celles qui auient, peuuent auenir aux enfans.

Des causes generales dont procedent leurs maladies. CH. II.

TOUTES les maladies dessusdittes leur auient volontiers de trois ou quatre causes en general: dont l'une est la naissance des dents, ainsi comme dit Hippocrat. & apres luy tous les autres Docteurs: l'autre, est leur glouttonnie & façon desreiglee a tetter ou a manger, & a se mouuoir, & aussi le trop dormir: la troisieme, vient ou du ventre de la mere, & est comme hereditaire, ou de la faute de la sage-femme: la quatrieme, est le mauuais lait de la nourrice, & aussi le mauuais regime de l'enfant apres qu'il est seure.

Des signes en general pour cognoistre & coniecturer si l'enfant est malade.

CHAP. III.

LES SIGNES pour cognoistre les maladies susdittes, & toutes autres nommément sont particuliers & propres, combien qu'aucunes desdittes maladies se cognoissent d'elles-mêmes sans autres signes, côme la toux, le vomissement, le flux de ventre, l'escorchure, le mal en la bouche, & quelques autres: aucunes se preuoient par certains signes, comme la verole & la rougeole, auant qu'elles soyent auenues: de tous lesquels signes nous ne parlôs point en ce lieu, auquel nous demandôs seulement a sauoir en general, par quel signe on cognoist si vn enfant est malade, ne demandans point de quelle maladie, dont nous parlerons au deuxiesme traitté: car d'une personne qui est malade, on s'enquiert en deux manieres: premierement, comment on cognoist qu'il soit malade, puis de quelle maladie.

Les signes pour cognoistre s'il est malade, sont generaux: pour sauoir de quelle maladie, sont particuliers. En cest endroit donques nous disons qu'il y ha plusieurs signes generaux & communs, par lesquels, sans specifier aucune maladie, & sans demander quelle elle est, on cognoist vn enfant estre malade. Comme quand on voit qu'il crie & pleure sans occasion manifeste, ou qu'il refuse de tetter, ou de manger, ou qu'il ha l'appetit changé, & la maniere qu'il auoit de prendre sa nourriture, comme si es heures accoustumees de tetter, ne le veut pas, & ha a desdain la mammelle, ou si la prenant en sa bouche ne tette pas bien, & succe le lait debilement & lachement, & en prend bien peu a la fois: ou au contraire, tette plus qu'il n'auoit accoustumé, & plus souuant, & plus goulument: ou si estant seuré, il abhorre la viande qu'il aymoit parauant, & ne veut pas manger comme ii souloit, & quand il commence de manger, incontinent il est saoul, ou mange plus que de coustume, & ne se peut saouler. Outre cela, on iuge qu'il est malade, s'il ha la couleur changee, & son habitude naturelle, tellement qu'elle va en empirant: car cela signifie le changement & empirement du dedās du corps, & s'il ne peut tenir sa teste droite, & ne la mene point fermement, l'inclinant sur ses épaules, ou sur celle ou celuy qui le prend: & s'il dort ou veille plus que de coustume: & si toutes choses luy déplaisent, & est chagrin, ne prenant plus de plaisir a ce qu'il souloit: & s'il veut tousiours estre porté, & ne veut se tenir au berceau: & si en le portant il se tourmente, veut, ne veut qu'on se repose, veut qu'on chemine tousiours, veut que non: & si on luy chante ou l'amignotte, s'en fache, ne prenant plaisir ni aux chansons, ni a estre amignotté: & s'il se

laisse caresser & manier seulement a vn a qui il ne souloit, rechigne aux autres, & ne les veut veoir, voire ceux qu'il regardoit volôtiers, & qui luy souloyēt estre agreables parauant, & ne veut souffrir qu'un autre le tienne, ou le touche: & s'il se plaint sans apparoitre dequoy, qui est vn tresmauuais signe: & si a toucher ses mēbres on les sent plus chauds ou plus froids que de coustume: & si son ventre est plus lache ou plus estreint, ou autrement changé de son naturel: & si son souffle est grand ou petit, ou frequent, ou autre qu'il ne doit estre. Par ces choses susdittes, on peut coniecturer aisément que l'enfant est malade, bien qu'on ne die expressément de quelle maladie: car des maladies, que lon peut nōmer & dire incontīnāt quelles elles sont, il y ha certains signes particuliers & propres pour les faire cognoistre: lesquels seront enseignez au Traitté second, en la cure particuliere de chacune maladie.

Des crises & iugemens de la longueur d'aucunes maladies des enfans.

CHAP. II II.

APRES que les maladies sont cogneues, on predit volontiers & baille-on a cognoistre ce qui est auenir d'icelles. Hippocrates donne a obseruer certains prognostics & iugemens notables des longueurs ou breuetez d'aucunes maladies des enfans, au iij. liure des Aphorismes, en l'Aphorisme xxvij. Plusieurs maladies, dit-il, des enfans se terminent en quarante iours: Car le quarantieme iour, dit Galien, est le premier iour critique & iudiciaire des maladies longues: aucunes se terminent en sept mois, comme la fièvre quarte, & la courte halene: aucunes en sept ans, comme le mal cadaque: aucunes vont iusques en l'eage de puberté, qui est l'eage de quatorze

ans: & celles qui persistent & ne finissent point en enfance, communément les accompagnent iusques a la vieillesse, & a la fin de la vie.

De la cure generale des maladies des enfans, tant de ceux qui tettent, que de ceux qui sont seurex & detriex. C. H. V.

MAINTENANT selon qu'il ha esté proposé au commencement de ce traitté, il est tēps d'enseigner la cure generale des maladies des enfans: pour autant qu'en voulant traiter les choses ainsi qu'il appartient, on doit premierement dōner a entendre le general, puis le particulier: car tel est l'ordre de toute bōne doctrine & enseignement. Parquoy auāt que venir a la cure particuliere de chacune desdittes maladies, i'enseigneray la generale & commune de toutes, laquelle consiste en l'obseruation de certaines reigles & precepts generaux & communs, lesquels faut departir en ceste maniere: les vns appartiennent aux enfans qui tettent, & a leurs nourrices: les autres sont pour les enfans seurez: & les autres sont cōmuns a tous deux. Ce tiers & dernier genre est compris en l'explication de plusieurs certaines demandes, lesquelles sont telles. Premierement, s'il est bon de guarir les maladies, tant des enfans qui sont a nourrice, que de ceux qui sont seurez, par medecine: puis si ceux qui tettēt se guerissent par mesmes moyēs que ceux qui ne tettent plus: item quel regime leur doit estre ordōné: en apres, quel genre de medecine: puis de quelle nature & force: d'auantage de quel goust: outre plus a quelle heure est bon de leur dōner: en apres quelle quātité: plus par quel endroit du corps: d'auantage, si par chirurgie on les peut secourir: finalement, si on peut leur bailler clystere & suppositoire. Parquoy expliquerons ces choses par ordre.

I. Si on peut bonnement guarir les enfans par medecine.

D'autant que les maladies interieures des enfans sont pour la plus part difficiles a cognoistre, & que toute intention curatiue de maladie presuppose la cognoissance d'icelle, il est bon d'observer le conseil d'Auicenne, au iiij. Canon, qui est, de laisser faire a Nature, ordonnant seulement bon regime, attendant que Nature pourra de soy-mesmes ou surmôter le mal, ou le manifester. Ce qui se doit entendre auoir lieu, seulement es maladies qui ne sont pas impetueuses ne furieuses : car lors faudroit ordonner ce que lon verroit y conuenir & estre plus expediant, & ne se fier pas du tout au regime : mais es autres maladies qui ne sont pas de grande importance, ni ne nuysent beaucoup, ne faut donner medecine pour les guarir, ains suffit, selon le conseil de Damascene, y remedier par bon regime, laissant faire a Nature : car, dit-il, si tu peus guarir par regime, tu t'en trouueras bien.

I I. Si les enfans qui tettent se guarissent comme ceux qui sont seurez.

Il n'y ha point de doute qu'on doit guarir autrement les maladies des enfans qui n'vîent que de lait, autrement de ceux qui viuent de lait & d'autre nourrissement, autrement de ceux qui sont du tout seurez de la mammelle. Car aux premiers toute la cure gist a faire venir le lait a estre bon, & par consequant, dōner bon regime a la nourrice, par ce que le lait leur sert de nourriture, & de medecine : combien qu'on peut quelquefois leur donner a friper quelque autre chose. Aux secōds, puis que desia ils sont introduits a prendre autre nourrissemēt avec le lait, on peut leur faire pren-

dre par la bouche quelques sirops ou iuleps, a l'intention de ce qu'il fait besoin. A ceux qui sont feurez, puis que le regime de la nourrice n'a plus de lieu, on leur peut bailler hardiment tous genres de medicamens conuenables a leur eage & force.

III. Quel regime leur doit estre ordonné.

On ne doit pas ordonner regime si meigre & de si petite nourriture aux enfans, tant feurez que non feurez, a cause de la grande deffaitte & euaporation de leur humidité, comme aux grandes personnes.

IIII. Quels genres de Medecines on leur peut donner.

S'il faut qu'on donne medecine aux enfans, on leur peut bailler celles qui sont alteratiues: c'est a dire, changeant la qualité contraire, & les apperitiues: c'est a dire, ouurant les voyes & conduits, & les deoppilatiues: c'est a dire, qui ostent les oppilatiōs & estoupemens, ou les restrainctiues & resserantes, & les digestiues, confortatiues, dormitiues, & autres semblables, en forme de sirops, iuleps, apozemes, electuaires, trochiscs, opiates, ou semblables, selon que la maladie requiert: lesquelles ils prennent ou en beuant, ou sucçant, ou lichant: ou s'ils sont vn peu grandets en mangeant, leur profitant autant ainsi, ou plus, telles choses, que si elles estoient donnees aux nourrices. Car si ainsi est qu'aux enfans nouuellement nez, on donne bien du miel, ou de l'huile d'amandes douces: avec sucre, & du methridat, & autres semblables, lesquelles choses on leur donne en santé, ne peut on, par plus forte raison, leur donner en maladie?

V. De quelle nature & force doiuent estre les medicamens susdits.

Les medicamens qu'on donne aux enfans, ne doiuent estre excessifs ni éleuez iusques au quart ou tiers degré: car comme les enfans sont fort passibles, & non encore assez puissans, facilement ils en feroient offensez, d'autant que les trop chauds medicamens feroyēt fondre leurs plus grosses humeurs, & les trop froids les glaceroyēt. Parquoy celuy doit commencer par choses moderees, qui veut introduire bonne accoustumance.

V I. De quel goust.

Quant au goust, on se doit garder que les medecines qu'on baille aux enfans ne soyent mal plaisantes ne abhominables, par ce que les refusant Nature, & les ayant a desdain, elles feroient plus de mal que de bien. Parquoy, les Medecins, en les ordonnant, y meslent des choses douces & agreables: toutesfois il se faut moins soucier du goust es petis enfans, qu'es grādes personnes, d'autant que les petis enfans, a cause de l'habondance de l'humidité, sont moins offensez des saueurs, & prennent les choses ameres & de mauuais goust assez bien, & encore mieux quand on y met vn peu de doux: comme lon voit qu'ils prennent bien de la dragee de la semence contre les vers, & du sirop d'absynce, ou de chicoree: toutesfois qu'on ne doit iamais laisser que les medicamens, que nous voulōs qu'ils passent outre l'esthmac, & viennent au foye & aux venes, ne soyent accompagnez de choses douces & amiables a Nature: parce que Nature tire les choses douces plus voluntiers & plus fort, iusques au profond: mais ceux que nous ne voulons pas qu'ils passent hors des boyaux, comme sont ceux qu'on

donne pour les vers, ne se faut soucier de les meller de choses douces, par ce qu'on ne les veut pas tirer au dedans des venes, ni estre profondes dans le corps.

V I I. En quel temps, & a quelle heure on doit donner medecine aux enfans.

Long temps apres auoir prins le lait ou la viande, & non autrement, se doit dōner la medecine aux enfans, de peur qu'elle n'altère & corrompe le nourrissement.

V I I I. En quelle quantité la medecine se doit donner aux enfans.

On ne peut pas determiner par escript certaine dose & quantité des medecines des enfans: ains faut cela laisser faire a la discretion du Medecin qui les donne moindres aux plus petis, & plus grandes aux plus grands.

I X. Par quel endroit du corps se donnent les medicamens aux enfans.

Il est meilleur beaucoup, & tant qu'il est possible est expediant, de suruenir aux enfans de leurs maladies, par choses appliquees exterieurement, d'autant qu'on craint plus les choses donnees par la bouche, tant pour le regard de leur esthomas tendre, qu'on ha peur d'offencer, que par ce qu'on ne sçait en quelle quantité leur donner bonnement: mais estant appliquees par dehors, sont plus seures: par lequel endroit, puis que le cuir est percé, & plein de pores & de trous, on peut aisément refroidir, eschauffer, humecter, desecher, relacher, constiper, resserrer, & digerer les humeurs, subtilier, espoissir, au alterer autrement, selon qu'il en est besoin, en leur appliquant onctions, linimens, emplastres, epithemes, embrocations, fomentations, baings, & choses semblables: tellemēt que si cela ha lieu es grands, combien plus es petis?

X.

Si on peut bailler aux enfans clystere & suppositoire.

Il ne faut faire difficulté de donner aux enfans qui tectēt & qui sont seurez, clysteres ou suppositoires par le fondement, en lieu des medecines qu'on donne par la bouche, ainsi plusieurs des anciens l'escruiuent, & nous le pratiquons tous les iours, pourueu que tels remedes ne soyēt trop forts, c'est a dire, composez ou avec medicamens trop laxatifs, ou avec decoctions, ou autres choses trop fortes : & faut les leur faire garder longuement, s'il y ha medecine dedans, afin qu'ils puissent faire leur operation, autrement n'est besoin. Le clystere leur apporte ce profit, que sans nuysance il chasse les superfluitez des boyaux, dissipe les ventosittez, appaise les douleurs de plusieurs parties du corps, a cause des humeurs superflues & des vents qui y sont, tellement qu'en tirant les ordures qui sont es boyaux, par consequant & par succession il les tirent aussi des membres superieurs, & des venes, & diuertissent des parties les plus nobles.

X I. *Si par chirurgie on peut secourir aux enfans.*

Peu souuant, & a peu de maladies des enfans, l'operation manuelle est requise: toutesfois si la maladie le requiert, elle peut estre faite aussi bien es petis enfans qu'es grands: pourueu que cela se face plus doucement & avecq' moindre violence: comme si vn enfant auoit six doigts en la main, ou vn arteil superflu au pied, la racine de sa naissance doit estre tranchee avec rasoir, & descharnee, & la ioincture desioincte, & le lien tranché, & le doit osté, & le sang restraict, cum puluere rubeo: id est, cum bolo Armenio nostrate, albuminibus ouorum, & sanguine draconis: puis la playe curee par la cure des autres playes. Plusieurs, comme

dit Auicenne, brulent le lieu de l'incision avec huile bouillant, en faisant venir par ce moyen feureté de corruption de l'issue du sang, & rendant audit lieu la chair & le cuir dur & fort. Le semblable se pratique au filet sous la langue, lequel on coupe, ou avec ligature de fil de foye, ou avec l'ongle, ou avec ferrement: & est pareillement requis d'vser de mesme industrie quand vn enfant est né, ayât le trou de l'anneau bouché & couuert de peau, a quoy est besoin de faire ouuerture. N'ha pas long temps encore, qu'a vn enfant, de l'eage d'un an & demy, lequel auoit vn abces a la sime de la teste, le luy ay fait ouurir avec le rasoir, dont sortit grand' quantité d'ordure, & facilement en ha esté guarry. Ainsi se finissent icy les preceptes de la cure generale, commune aux enfans qui tettent, & a ceux qui sont feurez: S'ensuyuent ceux qui appartiennent seulement aux enfans qui sont a nourrice, & tettent encores.

De la cure generale des maladies des enfans qui tettent.

CHAP. VII.

TOUTE la cure generale des enfans qui tettent, consiste partie en regime ou reiglement de la nourrice, partie en celuy de l'enfant: en quoy y ha plusieurs considerations, sçauoir, quel regime doit tenir la nourrice pour le regard de l'enfant: & si elle ne doit manger & boire autre chose non plus que feroit l'enfant malade: quel regime doit aussi tenir l'enfant qui tette, & si on luy peut bailler medecine, & par quel endroit du corps, & si on luy doit oster le lait en ayant la fieure: Quelles medecines laxatiues on doit donner a sa nourrice pour le regard de luy: & si ce temps pendât que la nourrice prent medecine pour l'enfant, on le doit faire tetter vne autre femme: & si la nour-

rice estoit mal disposée, & non pas malade du tout, quel regime luy est cōuenable, tāt pour son regard que pour celuy de l'enfant, & si on la peut changer elle estāt mal disposée.

I. Quel regime doit tenir la Nourrice pour le regard de l'enfant.

Suyuant donques le conseil des anciens, si on veut medicamenter les enfans qui tettent estans malades, faut regir la nourrice tout ainsi que si elle mesme auoit la maladie de l'enfant : luy ordonnant regime & medecine qui soyent en qualité conuenables a l'enfant, & en quantité proportionnez a elle . Le regime consiste en six choses qu'on dit non naturelles : c'est a dire, qui sont hors de la nature & essence de la personne, comme l'air, le mouuement, & le repos du corps, le dormir & veiller, le manger & boire, l'euacuation & repletion des excremens & superfluitez de la nourriture, les mouuemens & accidens de l'ame: toutes lesquelles choses quand on en vse avec moderation : c'est a dire, en qualité, en quantité, en temps deu, & scelon que la maladie de l'enfant requiert : elles rendent vn laict de nourrice salutaire & profitable a la santé de l'enfant. Car comme l'enfant ne prend que du laict, ou en prēd pour la plus grand part, quād le laict sera rectifié & moderé selon que requiert la maladie, non seulement il nourrit l'enfant, mais aussi il combat contre la maladie, & contre la cause d'icelle, comme ayant en soy deux matieres & substances, ou qualitez, vne nourrissante, & l'autre medicinale. Et parce qu'un tel regime ne peut estre ordonné a l'enfant, ni estre obserué par luy, est besoin que la nourrice l'obserue : car le laict succé par l'enfant, supplie le lieu de tout le regime.

II. Si la nourrice ne doit manger & boire, ne faire autre chose non plus que feroit l'enfant malade?

Touteffois quand nous difons que la nourrice doit obferuer le regime tel cōme fi elle mefme fouffroit la maladie de l'enfant, cela ne s'entend en pareille quantité a l'un cōme a l'autre : car feroyt trop peu a vne nourrice de ne manger & boire non plus qu'un enfant, car par amoindriffemēt du manger diminueroit fon laiēt : mais entendōs de la qualite feule pour muer le laiēt au contraire de la maladie.

III. Quel regime doit tenir l'enfant qui tette.

Nous entendons aufsi quand nous ordonnons le regime a la nourrice pour le regard de l'enfant, que l'enfant l'obferue pareillement es chofes qui luy font poffibles, ne nous arrefant pas du tout a la nourrice : car peu profiteroit le regime d'elle, fi celuy de l'enfant n'eftoit bien ordonnē : Que fi l'enfant fe trouuoit mal de trop dormir, le long veiller de la nourrice ne luy feruiroit de rien . Et ne fuffit de reigler la nourrice en fon dormir & veiller , mais faut aufsi que l'enfant mefme foit prohibē de dormir, fi le long dormir luy nuit, & fi le veiller, luy en oſter l'empeschement . Et ainſi faut iuger des autres chofes comme de l'air , du faliffement & expulsion des ſuperfluitez, des affectiōs & mouuemens de l'eſprit, eſquelles chofes eſt beſoin autant reigler l'enfant comme la nourrice. Et cōbien qu'il faille entēdre a la nourrice ſeulement en beaucoup de chofes , toutesſois es chofes ſuſdittes ne faut omettre de faire obferuer le regime aux enfans : & ne fuffit de dire, la nourrice l'obferue, mais eſt bon que l'enfant aufsi, & que tous deux l'entretiennent.

IIII. Si on luy peut bailler medecine, & par quel endroit.

Au chapitre precedant, ceſte demāde ha eſtē expliquee, & la reſolution ha eſtē, & eſt, que les medecines laxatiues qui cōuiennent aux maladies des enfans qui tettēt, doiuent eſtre

baillées aux nourrices : & les autres medecines qui ne purgent point, partie leur peuuent estre appliquees par dehors, par onctions, linimens, emplastres, embrocations, fomentations, partie par dedans par la bouche, cōme miel, huile d'amandes douces, iuleps, syrops, opiates, elecuaire, que lon verra leur estre propres, au tēps qu'ils sont ia assez grands pour les pouuoir prendre.

V. Si on doit oster le laiēt a l'enfant qui ha la fièvre.

Pource qu'Hippocrates, au cinquiesme liure des Aphorismes, en l'Aphorisme lxiiij. dit que le laiēt est mauuais es fieures principalement aigues, pource qu'il se corrompéroit en l'esthmac: pareillemēt a ceux qui font leurs matieres choleriques & iaunes, pour mesme raison : & aussi a ceux qui ont l'esthmac tendu, & des trāchees dans le ventre, par ce qu'il s'aigrit dans vn esthmac qui est froid, & de cela il augmente les tranchees : sembleroit qu'a l'enfant estant malade de telles maladies, il luy seroit contraire, & ne seroit bon le luy donner a succer. Toutesfois auant que d'accorder cela, & verifier le dire d'Hippocrates, faut faire ceste distinction, que lon accorde bien qu'en telles maladies le laiēt est contraire aux grandes personnes : mais aux enfans ne le faut pource oster du tout, ains plus tost, s'ils mangent autre chose que du laiēt, on peut la diminuer ou soubstraire, & non point le laiēt : d'autant qu'en toutes maladies il leur est besoin du nourrissement lequel leur est plus familier, & de plus facile digestion, & lequel ils prennent avec plus grand appetit, tel comme est le laiēt : & qui plus est, si l'enfant malade estoit seuré de nouueau, encore il cōuiendroit le remettre au laiēt, & laisser l'autre nourriture.

VI. Quelles

V I. *Quelles medecines laxatives on doit donner a la Nourrice, pour le regard de l'enfant.*

Si a cause de la maladie de l'enfant, laquelle ayt besoin de purgation, on ordonne medecine laxative a la nourrice, on la doit élire de celles que lon donne ccustomierement aux femmes grosses, & mesmement de celles qui ne sont purement medicinales, ains qui ont quelque nourrissement: comme pruneaux, obelon, confervue de violette de Mars, tamar-Indes, manne, ou casse: toutesfois que la ou besoin seroit, on peut donner plus fortes medecines aux nourrices qu'aux femmes enceintes. Tant qu'il est possible, dit Auic.
„ les medecines qu'on donne a la nourrice, doivent estre
„ nourrissantes, & non point medicinales du tout, soit qu'on les donne pour restreindre le ventre, soit pour le lacher, ou pour autres intentions: par ce que le lait necessairement prent de la vertu, qualite & nature de ce que la nourrice ha prins. Et pour ceste cause, nous medicamentons la nourrice es maladies des enfans, a fin que par la vertu des medicamens le lait soit fait medicinal a l'enfant: car par ceste maniere on traite le corps de l'enfant plus modestement que si luy mesme prenoit la medecine: & pourtant afin que la vertu de la medecine qui seroit trop forte ne soit cōmuniquee au lait, il est bon que la medecine donnee a la nourrice, pour l'enfant, soit plus nourrissement que pure medecine, a fin qu'elle ne trouble trop le lait.

V I I. *Si ce temps-pendant que la Nourrice prend medecine pour la maladie de l'enfant, on le doit faire tetter une autre femme.*

Nous tenons pour vn arrest, que quand on donnera a la nourrice medecine laxatiue, pour cela que l'enfant auroit besoin d'euacuation, ne faut que la nourrice s'abstienne de l'alaiecter a quelque heure qu'il en sera besoin: car nostre intention est, que la vertu laxatiue voise avec le laiët euacuer l'enfant: parquoy est bon que le laiët qu'il prent, ayt prins de la medecine laxatiue la vertu de lacher & purger. Toutesfois s'il auenoit que le laiët ainsi alteré par la medecine, fust superflu a lacher, & que la medecine fust trop forte, faudroit suyure le conseil d'Auicenne, d'abstenir lors la nourrice de plus donner a l'enfant la mammelle. Quant aux autres medecines, si nous voulons par icelles ou faire voinir la nourrice, ou la faire asseller simplement, ou restreindre le ventre, ou faire autre fait pour le regard de l'enfant, moins faut ce temps-pendant introduire vne autre nourrice, car en l'introduisant, ne se feroit ce que nous voulons.

VIII. Si la Nourrice estoit mal disposee, & non pas encore malade, quel regime luy est conuenable, tant pour son regard, que pour celui de l'enfant.

J'ay tantost declaré quel regime doit tenir la nourrice pour le regard de l'enfant, j'ay a dire maintenant quel luy doit estre aussi ordonné pour le regard d'elle, estant quelque peu mal disposee: car selon la disposition, faut diuersifier ledit regime, & les medecines: comme s'il auient que l'enfant ayt bon ventre, & la nourrice l'ayt constipé, faut donner a la nourrice quelque chose qui le relache: pareillement si elle est replete, & l'enfant non, conuient l'euacuer par vomissement, ou par le bas, ou par flebotomie, ou par scarification, selon le lieu & le genre de la repletion.

IX. Si on peut changer la Nourrice, elle estant mal disposée.

Mais on pourroit douter, auenant que la nourrice fust mal disposée, si lors on la doit changer ou non : Il faut considerer diligemmēt & distinguer ainsi. Si la nourrice estoit bien malade, & l'enfant sain, ou malade comme elle, iacoit que son lait ne s'en perdrait ou diminueroit point, toutesfois on tient pour vne maxime, que lors est bon la changer, & faire qu'une autre alaiete l'enfant. En apres, s'il auenoit encore qu'elle ne fust qu'un peu mal disposée, & que pour cela elle auroit esté medicamentée, ainsi que venons de dire : c'est a sauoir, qu'elle auroit prins medecine vomitive ou laxative, ou que sans estre medicamentée luy seroit surue-
nu vomissement, ou flux de ventre, sans autre mal, a l'occasion dequoy son lait seroit alteré & changé de son naturel, il ne faut douter qu'il sera meilleur lors qu'elle se deportte de donner a tetter a l'enfant, iusques a ce que telles émotions & indispositions cessent, & que son lait soit reuenu en son entier. Parquoy fait bon souuant visiter le lait d'icelle, & dire son auis s'il est rassis ou non. Toutesfois on pourra obseruer quelques conditions par lesquelles on ne la changera point, nonobstant les choses susdites. Car si l'on voit que son lait, pour quelque indisposition qui luy soit auenue, n'est point changé de son naturel, il est meilleur qu'elle alaiete l'enfant que faire venir vne autre nourrice de nouveau. Et aussi si l'enfant est opiniastre, & ne veut tetter d'autre nourrice, mieux est de supporter quelque chose de l'alteration du lait, que permettre l'enfant se tourmenter. Plus, si l'enfant est ia accoustumé a manger de la viande, &

voyons qu'il en ha pris suffisamment, il se pourra bien passer de tetter ce iour que sa nourrice sera ainsi disposée.

Quoy que soit, cela depend du iugement du Medecin prudent, & des gouuernâtes, & en partie de la nourrice meisme.

De la cure generale des enfans detriez.

CHAP. VIII.

L HA esté assez dit iusques icy de la cure generale des enfans qui tettent, maintenant vient a point de dire, selon qu'il ha esté proposé, de celle des enfans qui sont seurez : en laquelle est requis de declarer premierement, quel doit estre leur regime en leur maladie, puis des medecines laxatiues, s'il est besoin de leur en bailler, & quels genres de medecines, en quelle quantité, & en quelle façon : en apres, si la phlebotomie leur peut estre conuenable : & d'auantage, si on peut leur appliquer des ventoses avec scarification : toutes lesquelles choses declarees, mettrons fin a ce premier traitté.

I. Du regime, quant a la nourriture.

Si l'enfant qui est seuré, & n'vse plus de lait vient a estre malade, & on luy ordonne de la viande pour son regime, on ne luy doit nullement oster le pain, ains luy doit estre permis ou tout pur, ou en potage, ou avec quelque pitance : par ce qu'il conforte le cœur de la personne : & si vn tel enfant n'en peut manger en quelque maniere que soit, luy faut donner quelque autre nourrissement qui luy soit plus agreable, & auquel il prenne plus de plaisir, iacoit qu'il ne fust pas si bon. Car ainsi que dit Galien au second liure Catatopous, aux vns aucunes choses sont meilleures qu'aux autres, par certaine propriété de Nature.

II. Des medecines laxatiues, si on en peut ordonner aux enfans seurez & détriex.

Et si la maladie est auenue a l'enfant détrié, a cause de quelque humeur, laquelle soit besoin d'euacuer, conuient luy bailler medecine euacuât icelle humeur. Car nous nous fions que puis que son esthmac digere bien les viâdes plus grosses que le lait, & que le foye en fait du sang, il pourra bien reduire la medecine de sa vertu en effect, & la reigler a faire deuement son operation.

III. Quels genres de Medecines.

Les Medecines qu'on donne aux enfans doiuent estre benignes, & non despoüillees du tout de la nature de viande: & ne faut qu'elles soyent fortes ni en soy & en leur propre nature, ni en leur dose & en quantité, ains estre choisies selon la matiere peccante, & composees ou dosees selon la portee & les forces de l'enfant. Parquoy les praticiens ordōnent, si l'enfant peche en superfluité d'humeurs, le purger avec choses legieres: premierement, avec clystere, puis avec casse, ou avec infusion de rheubarbe, ou avec manne, ou avec tamar-Indes, ou avec mirabolans, ou semblables, en moindre dose qu'aux grandes personnes. Plusieurs donnent le sirop de cichoree avec rheubarbe, qui est vne medecine fort vsitee pour les enfans: aucuns ne font difficulté de leur bailler de l'aloë, comme contre l'épilepsie, ou contre les vers, & pour preseruer de la peste, en mesme dose que le rheubarbe, se confiant que c'est vne medecine benigne, qui ne passe point le foye, & tire les humeurs superflus par le bas: iacoit qu'aucuns dient qu'elle porte nuysance au foye, & aux venes. Aucuns escriuent, comme

Guillaume de Plaisance, auoir donné aux enfans de l'agarric, principalement en infusion, & qu'ils s'en sont bien trouuez. Il en y ha aucuns qui leur donnent de la moëlle de cartami, pour tirer les superfluitez des humeurs, lesquelles elle tire sans faire offense. Toutes autres medecines qui sont fortes, ne doiuent estre donnees aux enfans deuant les premiers sept ans accomplis.

IIII. Qu'est-ce que Medecine forte & debile.

On dit la Medecine estre forte, quelquefois a cause de la violence d'icelle, tirant trop tost les humeurs difficiles a euacuer: & quelquefois a cause de la trop grande quantité, iacoit que de sa nature elle fust benigne, car les enfans ne portent pas la dose si grande que les grandes personnes: & quel- cefois aussi a cause de leur forme & composition, cōme sont les pilules: car telles offensent plus l'estomac, lequel est debile. Au contraire, on appelle la medecine foible, ou laquelle de sa nature est telle, ou laquelle estant forte, est diminuee de sa force, ou par moindre quantité, ou par la façon de la preparer, ou autrement.

V. En quelle quantité & en quelle forme conuient bailler la medecine aux enfans.

Or les medecines, tant celles qui sont de leur nature fortes, que celles qui sont benignes, doiuent estre donnees en quantité conuenable: c'est a sauoir, les benignes en plus grand' quantité, & les fortes en moindre, ne passant point les plus benignes la dose d'une dragme d'infusion de rhuubarbe, ou de trois dragmes de casse ou de catholicon, ou de six dragmes, ou d'une once pour le plus, de sirop rosat laxatif, ou de demye once de sirop de cichoree composé avec

rheubarbe : & doiuent les fortes estre diminuees de leur force par meſlange & aiouſemēt de choſes benignes & reſtrainctiues, en les rendāt du gouſt qui ha eſté cy deuant dit, au chap. vj. Et quant a la forme en laquelle doiuent estre donnees, il eſt meilleur de leur bailler en breuuage en forme de ſirop, ou en poudre avec de la pomme cuitte, ou autrement, qu'en forme pilulaire, pource qu'avec plus grand' peine Nature reduit les pilules de leur puissance a effet.

V I. De la ſaignee, ſielle eſt conuenable aux enfans.

Auant l'age de ſept ans n'eſt permis de faire aux enfans ouuerture de la vene, pour quelque maladie qu'ils ſouffrent : & y ha bien d'auātage, que Galien defend la ſaignee auant l'age de quatorze ans, au liure De la cure par flebotomie, & au liure De la meilleure ſeſte, & en celuy des Fieures, eſcrit a Glaucon, & en autres lieux, encore que les enfans euſſent les fieures, & fuſſent ſanguins, pourautant qu'il ſe fait vne grande & continuelle reſolution de ſang, & euaporation en eux, a cauſe de l'habondance de leur chaleur naturelle, & tendreur de leurs membres. Et ne ſert de rien ce que Gentil allegue d'Auenzoar, qui guarit ſon fils en l'age de quatre ou cinq ans, par la ſaignee: car il fut trop hardy & deſreiglē ce faiſant, & ha eſté d'auanture que ſon fils fut guarý, & ne faut pour cela faire reigle. Toutesſois Razis, depuis les premiers ſept ans, accorde qu'on puiſſe ouurir la vene, y eſtant la neceſſité, comme es fieures ſanguines, & es grands apoſtumes. Parquoy pluſieurs en ce ne ſuyuent pas Galien, & ſont d'aduiſ, qu'au cas que l'enfant malade euſt repletion d'humeurs & de ſang, il peut eſtre ſaignē a dix & douze ans.

VII. *Des ventoses, avec scarification.*

Mais vray est qu'en lieu de la saignée par ouverture de la veine, la scarification par les ventoses se peut faire aux enfans de trois ou quatre ans en sus, quand ils sont malades de repletion, & mesmement de repletion de sang: comme qu'ils ont les fieures, la rougeolle, les phlegmons, ou autres maladies semblables: & cela est permis de faire par le conseil de Rasis, de Haly, & d'Auicenne, lequel met trois commoditez qui en auiennent, l'une est l'euacuation de sang de la partie que lon veut: l'autre, le repos des esprits, lesquels ne s'euacuent point avec le sang, comme ils font es autres manieres d'euacuer: la tierce, que telle maniere de tirer du sang n'affoiblit point, laquelle iagoit qu'elle diminue la repletion du sang, & le tire de loing a loing, d'une partie a autre, & par succession des membres principaux, toutesfois ne le tire prochainement que des petites venes respandues par la chair, & des parties superficielles.

VIII. *En quelles maladies on doit appliquer les ventoses & en quel endroit.*

Maintenant pour sauoir en quel endroit, & en quelles maladies laditte saignée par ventoses avec scarification se doit faire, il n'y ha point lieu determiné absolument, ains se fait en vne ou en autre partie, selon les endroits des maladies. Comme en pleuresie, elle se fait sur le costé malade: en squinancie, en peripneumonie, & apostemes de dedans ou dehors la teste, des yeux, des oreilles, se fait entre les épaules, ou aupres de la nuque: es fieures, entre les épaules, es fesses, & es cuisses. De celle qu'on applique es fesses Auicenne parle ainsi: Les ventoses, dit-il, appliquees sur les

„ fesses, avec scarification, tirent de tout le corps, & par i-
 „ celles est le corps allegé de la repletion de sang, & des ac-
 „ cidans qui en auient : car en iceluy endroit y ha des
 „ venes assez grosses & apparentes, esquelles le sang faci-
 „ lement descend, & lesquelles communiquent de pres aux
 „ grandes venes, & aux grands rameaux de la veine creuse :
 „ parquoy la scarification faite en icelles est prochaine a la
 „ flebotomie, d'autant qu'elle diminue le sang ainsi comme
 „ la flebotomie, & en ostant vne partie du mauuais, le mon-
 „ die ne s'augmente : autant en font les ventoses avec sca-
 „ rification mises sur les cuisses. Celles qui sont ainsi appli-
 „ quées sur les épaules, seruent aux maladies gutturales &
 „ pectorales, & aux maladies sanguines. Et c'est assez dit
 „ iusques icy, de la cure generale des maladies des enfans : re-
 „ ste que nous enseignons la maniere de guarir vne chacune
 „ d'icelles : par ainsi ayant mis fin au premier traitté de ce li-
 „ ure, venons au second.

SECOND TRAITTE' DV V. LIVRE.

 DE LA CVRE SPECIALE ET PAR-
 TICVLIERE DES MALADIES DES ENFANS.

ES MALADIES qui auient aux enfans, aucu-
 D nes leurs sont propres, & auient a eux seuls, com-
 me la sortie des dents, le demangement des genciuës,
 l'enflure du nombril apres l'incision d'iceluy, le begueye-
 ment & long temps auant que pouuoir parler : & celles qui
 viennent du ventre de la mere, comme le filet sous la lan-
 gue, & les deformitez naïues des membres, cōme six doigts
 en la main, ou au pied, les marques des enuies de la mere,

l'anneau bouché, & l'empeschement de l'yssue des excré-
mens: autres sont communes a tous eages, lesquelles ne-
antmoins faut encore departir: car aucunes d'icelles auient
plus coustumierement aux enfans, comme l'épilepsie,
les conuulsions de repletion, la teigne, l'effroy en dormant,
les vlcères d'échaufaison de bouche, l'escorcheure sous les
aisselle, sous la gorge, & aignes, & es cuisses, les vers, la
petite verole ou rougeole, encores qu'elles auient aux
grandes personnes: les autres n'ont aucune distinction des
eages. Toutes lesquelles maladies on doit arranger en ceste
maniere, les departant en vniuerselles, & particulieres: puis
les vniuerselles, en celles qu'on appelle fieures, & en aucu-
nes qui sont sans fieure: puis les fieures, en celles qui sont
sans aucune expulsion en enleueure du cuir, & en celles qui
sont avec expulsion, comme le pourpre, le charbon, la rou-
geole. Celles qui sont en enleueure de cuir, sans fieure,
sont comme la maigreté, le corps bouffe ou l'enfleure, & la
maladie de Naples. Les particulieres sont diuisees en cinq
ordres, dont le premier est des maladies de chacune partie
de la teste: le second, de la poitrine, & de la gorge: le tiers,
de tout le ventre: le quart, des bras, & des iambes, mains &
pieds: le dernier, de celles qui auient au cuir, sans de-
termination de certain lieu. Et pour traiter de la guarison
de chacune, faut tenir vn tel ordre, que celles soyent mises
sur les rances les premieres lesquelles occupēt tout le corps,
comme les fieures, & pource sont dites vniuerselles, puis a-
pres pourfuyure celles de chacune partie du corps, depuis
le sommet de la teste iusques aux pieds: & par ainsi ce trait-
té sera diuisé en deux parties: en la premiere, sera comprise
la cure des maladies vniuerselles: en la seconde, celle des

maladies de chacun membre. J'ay oublié a mettre que de toutes ces maladies susdictes, les vnes sont contagieuses, les autres non: ce qu'on cognoistra apres en traittât de chacune.

PREMIERE PARTIE du second Traitté, laquelle est de la cure speciale des maladies vniuerselles.

Estant donques fait vn certain departement des maladies vniuerselles, en deux genres: l'vn, de celles qui sont les fieures: l'autre, de celles qui sont sans fieure: il conuient parler premierement du premier genre, donnant a entendre quelle chose est la fieure, quelles sont les especes & differences de celles des enfans, quelles les causes dont elles sont engendrees, finalement quels les moyens de les guarir. Le tout en peu de parolles, car en vouloir dire par le menu, ce qui concerne pareillemēt les autres eages, il faudroit en faire vn gros volume, & seroit hors de nostre propos. Apres cela, viendrons a l'explication de l'autre genre des maladies vniuerselles, & comme chacune d'icelles doit estre guarie.

De la Fieure, & des especes & differences d'icelles. C H. I.

LA FIEVRE est vne maladie vniuerselle par tout le corps, car c'est vne chaleur contre Nature, allumee au cœur le premier, puis répandue par le moyen des arteres en tous les membres: de laquelle il y ha plusieurs genres, tous lesquels peunēt escheoir aux enfans: car il leur auient quelquefois d'auoir la fieure de l'inflâmation des esprits, qu'õ appelle ephemere, c'est a dire, la fieure d'vn iour: & quelquefois la fieure de la putrefaction des humeurs, qu'on nomme fieure putride, tant continue qu'interpolee, c'est a dire, laissant & s'en allant par interualle, puis retournant a prendre: & quelquefois la fieure de la corruption des vapeurs, qui est ditte vaporale en nostre langue,

synoche en Grec : c'est a dire, comme continue, autrement ephemere de plus de deux iours, moyenne entre la vraye ephemere & la putride : mais celle qui est hectique : c'est a dire, qui consiste en l'habitude du corps, & es parties folides du cœur & des autres membres, conformant l'humidité radicale, ne se voit sinon bien peu es enfans : d'autant que la cōplexion de leur eage en est bien loing, laquelle est humide : nonobstant que quelquefois deuiennent meigres, & ne profitent point : mais c'est le plus souuant sans fieure. Les fieures qui sont de la corruption des humeurs, aucunes sont pestilenciales, desquelles plusieurs sont, avec quelque eminence de la matiere enuoyee au cuir, comme le pourpre, le charbon, la boce quelquefois, laquelle aucunesfois est sans fieure, item la rougeole & la verole.

De la fieure ephemere, des causes d'icelle, & de sa cure.

CHAP. II.

LA FIEVRE ephemere consiste seulement es parties spiritueuses enflambees, suruenant aux enfans, a cause ou des douleurs qu'ils sentent, comme quand les dents canines leurs sortent, ainsi que dit Hippocrates, ou de trop veiller, ou de plorer, crier, se tourmenter, ou de catharres, & de la toux, ou de durté & oppilation de ventre, ou de repletion, ou de crudité, ou de faim ou de soif, ou de quelque autre cause exterieure : comme du soleil, du froid, d'échauffement, & de morfondure, de quelque forte senteur, ou autres telles choses. Ce genre de fieure est tel, que si on n'y remédie de bonne heure, il se conuertit en autre qualité de fieure plus dangereuse. Elle se guarit par quatre genres de remedes, le premier est empeschier la generation d'icelle,

en ostant les causes susdittes : savoir, les pleurs, cris, veilles superflues, douleurs, mouvemens immoderez, cathartes, toux, oppilations, n'exposer l'enfant a l'air trop chaud, ou trop froid, ni au soleil, ni au serain, ni aux rayons de lune, ni a la pluye, ni en chambre estoufee, ni le faire trop ieu-ner. Le second, est entretenir le benesice du ventre. Le tiers, oster la soif & alteration procedant de la fieure, luy faisant boire entre les repas, & au repas, de l'eau, ou de la tisane, ou du iulep Alexandrin, ou rosat, ou violat, ou autre semblable. S'il tette, la nourrice doit estreensee ainsi comme si elle-mesme avoit la fieure. Et pour preserver que la fieure ephemere ne se tourne en putride, est bon qu'elle soit purgee avec de la casse, ou autre medecine gracieuse. Le dernier remede est, baigner l'enfant apres la purgation de la nourrice : car par ce seul remede Galien guarissoit toutes les fieures ephemeress, & apres le baing, est expediant oindre son dos & sa poitrine d'huile violat.

De la Fieure synoche ou synoque, dicte vaporalle, & des causes d'icelle, & de sa guarison. CHAP. III.

CE GENRE de Fieure synoque n'est ni ephemere, ni putride, Galien le met entre-deux : & est appelee fieure synoque : c'est a dire, continue non putride, ou autrement ephemere de plusieurs iours : engendree de sang non corrompu, mais echauffe outre mesure, & faisant grande euaporation. Et par ce que les enfans habodent de sang, & que pour la complexion de leur cage sont chauds & humides, ils sont disposez a tomber en ce genre de fieure, en laquelle s'eleve beaucoup d'euaporation en iceux : c'est a dire, beaucoup de vapeurs & fumees chaudes & humides, qui se multiplient en leurs corps, & s'enflamment facilement,

a cause ou des oppilatiōs, ou des douleurs qu'ils sentent, ou des mouuemens superflus, ou de catharre, ou de la toux, ou de stipticité & durté de ventre, ou de la rougeole ou verole, ou de quelque galle ou rongne, ou de quelque furuncle, ou autre apostume, ou de quelque vlcere, ou de chaud, ou de froid, ou de quelques autres causes exterieures, de mesmes que celles qui sont les vrayes fieures ephemerres. Si l'enfant qui tette ha ceste qualité de fieure synoque, sa nourrice doit estre traictee ainsi comme si elle-mesme en estoit malade. Son regime doit estre rafraichissant & humectant, d'autant que la nourriture qui humecte est propre a ceux qui ont les fieures, & aux enfans, cōme dit Hippocr. en vn Aphorif. a fin que le lait de la nourrice serue a l'enfant de refrigeration & humectation: & si lon voit qu'il soit besoin, faut faire la nourrice abstenir de vin: sinon qu'aucuns dient qu'en ce genre de fieure, & en aucunes de celles qui sont putrides, on peut boire de petit vin blanc au repas seulement, pour prouoquer la sueur, & chasser hors la cholere: pour laquelle intention Auicenne conseille d'en boire en la cure de la fieure tierce, iacoit que ie ne l'approuue guiere, se trouuant d'autres moyens assez pour faire suer: ostee ceste intention, la nourrice doit boire hors le repas de la tisane, & des iuleps ou syrops, qui rafraichissent & humectent, euitant toutes choses qui échaufent le sang. Quant a medecine, elle doit prendre de la manne, ou de la casse, avec decoction commune, cuitte avecq' tamar-Indes: puis vsfer de sirops froids & apperitifs, ainsi que lon verra estre bon: puis se purger du tout avec rheubarbes, ou autre equipollant, s'abstenant de forte medecine, comme ha esté dit cy deuant. En apres, vsfer de sirops, ou autres choses qui prouoquent

les sueurs. A l'enfant, tout ce temps- pendant que sa nourrice vſe de ſirops ou iuleps rafraichiffans, on pourra faire ſuccer du vin de grenade, ſelon le conſeil d'Auicenne, avec miel ou oximel, ou ſelon noſtre ordonnance, du ſirop de grenade meſme, ou de l'oxyſacchar avec eau bouillie, ou du iulep Alexandrin, ou ſemblable. Si l'enfant ne tette plus, ſon regime doit eſtre de choſes qui rafraichiffent & humectent : & pour toute medecine doit boire deſdits ſyrops ou iuleps, ou de l'eau d'orge avec ſyrop ou iulep violat, ou autre tel, ou quelque iulep fait d'eau roſe, ou d'eau de violette, ou de chicoree, ou de vinette, ou d'abſynce, ſelon qu'on voit eſtre meilleur & plus conuenable. Aucuns font vn iulep de ius de vinette, ou de laiſtue, ou de morelle, ou de pourpié, avec poudre de diamargariton frigidum, y aiouſtant vn ou deux ou trois grains de camphre: autres laiſſent le diamargariton, & le camphre. Aucuns donnent de la limonnade : c'eſt a dire, du ſyrop de conſerue de limons. Aucuns donnent du ſyrop, de acetofitate citrij. Razis au xxj. liure de l'œuure intitulé, Contenant tout : au chapitre du leuain, ordonne vne certaine cōpoſition du leuain fait de ſimila moulue deux fois, & de ſpodion, & quelques autres choſes enſemble, avec ſucre, contre la fieure & la ſoiſ. Et ie trouue qu'vn autre leuain diſſoult en eau chaude, puis coulee & ſucree & refroidie, ne ſera guiere moins bonne. En apres, quand on voit qu'il eſt temps, faut le faire ſuer, comme es iours eſquels les ſueurs ſont louables, en aydant a Nature, ſi d'auanture elle eſt debile a ce faire : par ce que par la ſueur ſort mieux la matiere qui fait la fieure aux enfans, eſquels y ha grande habondance de vapeurs & ſumees.

Des Fièvres putrides & humorales: c'est a dire, qui sont engendrees de corruption d'humeurs, des causes d'icelles, tant en general qu'en especial: & de la maniere de les guarir. CHAP. IIII.

ENCORE sont les enfans bien souuent malades des fièvres qu'on appelle putrides & humorales, tant cōtinues qu'intermittentes: & pour sauoir bien traiter de leur guarison, faut suyure nostre methode accoutumee, laquelle Galien appelle horistique: c'est a dire, laquelle est suyue par definition & par diuision de general en special, & de rechef de special en autres plus speciaux, iusques a ce qu'on paruienne aux derniers, qui ne peuuent plus estre diuisez. Et par ce que nous auous ia parlé de la cure generale de toutes les maladies des enfans, puis sommes venuz a les specifier par diuision, iusques aux maladies vniuerselles de dedans, les diuisant derechef en plusieurs especes, iusques aux fièvres humorales: maintenant auant que parler de la cure speciale & particuliere de chacune desdites fièvres humorales, voulons premieremēt les diuiser en leurs especes: puis dire les causes generales de toutes, puis les speciales: puis leur cure generale, laissant a part a dire en son endroit leur cure speciale & particuliere, pour n'exceder la iuste mesure & grandeur de l'œuure entrepris.

I. Diuision des Fièvres putrides & humorales.

Les humeurs corrompues dans le corps selon leur qualité, lesquelles sont diuerses, & selon les endroits du corps, ou est leur corruption, sont diuerses especes de fièvres putrides & humorales. Celles qui sont corrompues es grandes venes, de quelque qualité ou espece qu'elles soyent, sont les fièvres continues, differentes neantmoins de leur aspreté

aspreté & axacerbations, selon que les humeurs sont différentes : & celles qui ont leur corruption ailleurs, si elles sont pures choleriques, sont les tierces pures, qu'on appelle exquisés : & si elles sont pures flegmatiques & aqueuses, sont les quotidiannes : si elles sont mêlées, & la cholere domine, sont les tierces, qu'on appelle nothes : c'est à dire, non vraies, & non pures, & quasi cômme bastardes : si elles sont melancholiques ou flegmatiques grosses & cuittes, sont les fieures quartes pures, tant es enfans blancs & femmes blanches ou vermeilles, & non melancholiques de Nature, qu'es hommes bruns & de Nature melancholiques : & si parauant elles estoient choleriques, mais par adustion & trop grand' cuisson de cholere, comme par succession de fieures tierces, & par mistion de melancholie sont deuenues melancholiques, elles procreent & engendrent les quartes, laquelle sont dites nothes & bastardes, & non quartes purement.

I I. Les causes generales des Fieures putrides, tant continues, que non continues, des enfans.

Toutes lesquelles fieures putrides procedent aux enfans quelquesfois par faute d'estre bien guaris des fieures ephemerres ou synoques, qu'ils auoyent par auant, dont puis apres les humeurs se sont corrompues es grandes & es petites venes, & es autres espaces du corps : ce qui auient le plus souuant, dit Hippocrates, aux enfans gras & replets, comme qui ont les pores & les petits conduits plus estoupez : parquoy plus facilement tombent en fieures putrides, attendu qu'ils ne peuuent bien estre éuentez, & que l'empeschement de l'éuement & transpiration est la prochaine cause de la putrefaction : quelquesfois elles leur viennent

aussi a cause du lait corrompu, ou d'autre viande corrompue dans leur vêtre, de laquelle corruption montent les vapeurs infectes au cœur, lequel elles échauffent, & par conséquent tout le corps : ce qui auient aux plus grandets, ou a cause d'auoir mangé des fruits cruds, ou a cause des mouuemens desordonnez sur la viande tant bõne soit : ou a cause de leur gourmandise, mettant du crud sur du crud dans leur estomac : de laquelle crudité s'engendrent oppilation & putrefaction es venes, qui sont les prochaines causes desdittes fieures. Tiercement, elles leur auient aussi quelquefois a cause des vers qu'ils ont, ou vifs ou morts, desquels s'éleuent de vilaines fumées chaudes au cœur, & de là s'ensuit la corruption es humeurs, & la chaleur contre Nature par tous les membres.

III. *Les remedes generaux desdittes Fieures.*

En ces genres de maladies, comme en toutes autres, la cure generale consiste en deux choses, en regime par nourriture, & en medecine.

I. *Le regime, sans medecine.*

Pour le regime, Auicenne met ceste reigle : Impossible est, dit-il, de guarir la fieure, sans la cognoistre, & si on ne la cognoist, faut subtilier le regime, & aussi si on la cognoist, faut faire le mesme, se donnant garde que le paroxysme, ou exacerbation, plus grand assaut, & la premiere scousse ne suruienne le ventre plein, & mesmement es fieures intermittentes defend que le paroxysme ne suruienne, sinon le ventre vuyde. Mais ceste reigle ne peut pas tousiours estre obseruee es enfans, lesquels ne peuvent

tant endurer l'abstinence des viandes cōme les grands: parquoy faut a ceux qui tetter, dōner le lait, & a ceux qui sont feurez, autres viādes: es heures qu'il ne seroit loisible, a cause de l'accez de la fieure, de l'exhiber aux autres. Car ceux qui croissent, dit Hippocrates, ont besoin de plus de nourrissement, & vaut mieux pecher en bailler trop, que trop peu, & en plus tost, que plus tard. Parquoy ne faut que nous soyons si opiniastrés & si scrupuleux de garder le regime si compassé & si estroit aux enfans, par ce qu'ils sont de facile resolution, & décheent en peu d'heure, & par defect de nourrissement tombent promptement en defaillance de vertu, a laquelle il faut toujours auoir l'œil pour la refociler & soubtenir, estant celle seule qui guarist les maladies, & soutient la personne. Cela obserué, faut dōner ordre que leur regime & nourriture soit humide, par le cōseil d'Hippocrates, tant pour cause de la fieure, que de leur eage. Boire entre les repas de l'eau froide pure, leur doit estre defendu, laquelle encore au repas leur nuist plus en la fieure qu'en la santé, ainsi comme il semble a plusieurs, d'autant que leurs visceres estant rarefiez, c'est a dire, cler-transperceez par la chaleur fieureuse & suréchaufez, sont faciles a recevoir dommage par l'eau froide, laquelle fait constipation des pores & des premieres venes, augmente la chaleur de la fieure par empeschement de transpiration, fait auoir courte halene, & introduit autres accidans qui procedent de froidure: parquoy doiuent boire de la tisane, ou quelque iulep, tel qu'ha esté dit cy deuant. Ne dormir point au commencement de l'accez, ni a l'augmentation, est vne reigle qu'il faut bien garder: mais en la declination il est permis, & quelquesfois en la vigueur.

Et voyla quant au regime, les principales choses qui doivent estre obseruees. Car de la chambre qu'on doit tenir fraichement, & loin de bruit & de tabuſt, c'est vne chose qu'il ne faut escrire.

II. *Les remedes par medecine, ou outrement.*

Maintenant pour l'autre partie de la cure generale des fieures putrides & humorales, ſont certains autres remedes exhibez par mains de Chirurgien & d'Apotichaire, pour tirer du ſang, & prendre des medecines: leſquels remedes ſont contenus en certaines reigles par ordre, en tel nombre que ſ'enſuyt.

I.

Le premier remede eſt, la phlebotomie, pour les grandes perſonnes, laquelle ne conuient pas aux enfans: en lieu de laquelle, ſi beſoin eſt, comme ha eſté dit cy deuant, on peut vſurper les ventofes avec ſcarification.

II.

D'auantage ſi le flux de ſang leur vient par le nez aux iours critiquis, & il leur viét trop peu, faut luy ayder avec effuſion d'eau chaude ſur la teſte, & avec parſun au nez: & ſi au contraire il flue trop, faut le retenir avec eau froide, & avec ventofes ſans ſcarification, ſur les hypochondres: c'eſt a dire, ſur l'endroit du foye, & de la rate, ou avec eau roſe & vin-aigre, ou avec vin-aigre ſeul, au nez, au front, & a l'entour du col, le renouuellant ſi toſt qu'il commence ha eſtre échaufé, ou avec vn bādeau au front de boli Armeni, & aubings d'œufs battuz, & huile roſat: autrement ſ'il ne fluoit que bien a point, il ne faudroit le reſtreindre.

III.

On doit touſiours entretenir le benefice du ventre, & pour le leur faire auoir, faut leur dōner quand ils ſont ſeurez

de l'eau d'orge ou tifane, par foy ou avecq' de la manne, ou avec du firop violat, & du firop aceteux. Le clystere n'est mouue pas tant qu'une medecine, parquoy Auicenne l'essit plus tost a toutes personnes ayant les fieures, pour leur tenir bon ventre, & beaucoup plus aux enfans.

I I I I.

Ne faut toutesfois mouuoir rien a l'heure du paroxysme, ne par suppositoire, ne par clystere, ne par prise d'aucune chose par la bouche, ni autrement: ou s'il est besoin, mieux vaut le faire apres le paroxysme, & plus pres de la fin du paroxysme precedant que du commencement du subsequant, de peur d'accelerer & faire venir plus tost celuy qui vient apres, & le faire plus long & plus grand.

V.

Si on voit que l'humeur, qui est de vomir, se prepare a vomissement, soit que laditte humeur est celle qui fait la fieure, soit que c'est la viande, ou autre chose qui remplit l'esthomas, laquelle il ha enuie de vomir & mettre hors, & ne peut, faut l'ayder: faisant mettre le doigt dans la bouche, ou une plume ointe d'huile, ou de miel, ou de firop aceteux. Si on voit, dit Auicenne, que Nature mouue a vomissement, ne la diuertis pas, ni ne l'empesche, ains ayde luy selon le conseil d'Hippocrates, qu'en quelque endroit que Nature tourne bride, faut tirer celle-part, par lieux & chemins conuenables.

V I.

Estant la matiere qui fait la fieure diminuee, ou par scarification, ou par une legere purgation, ou par vomissement, il faut apres digerer le reste: puis l'euacuer du tout. La digestion, ainsi que dit Hippocrates, doit tousiours preceder

l'euacuation : sinon que la matiere soit furieuse : c'est a dire, ou trop aigue & forte, ou trop abondante, mouuant de lieu en autre, en danger de tomber en partie noble : ce qui n'auient guiere aux enfans. Et n'est autre chose ladicte digestion, sinon vn chastiment & preparation d'humeur, par l'ayde de quelque sirop, iulep, ou apozeme, comprenant en soy premierement vne certaine vertu alteratiue, faisant cesser putrefaction : en apres, vn également & moderation de la matiere & humeur, par subtiliation & amenuissement du trop gros, ou engrossiment du trop subtil, & par abstersion du visqueux & gluant : afin que puis apres, par la vertu expulsive puisse mieux fortir & estre mise hors : avec lesquels effectz est comprise l'appertion & ouuerture des voyes par ou l'expulsion se doit faire. En digerant ainsi & preparant lesdittes humeurs, ne faut omettre les choses qui refroidissent la fieure, fortifient & confortent le cœur & le foye, lenissent le ventre, ostent les opilations, prouoquent l'vrine, & pareillemēt la sueur. Parquoy au sirop digestif qu'on ordonnera pour les enfans fieureux, pour l'accomplir de toutes choses, faut se proposer huyt ou neuf intentions qu'il doit auoir, lesquelles sont telles : La premiere, est le refroidissement de la chaleur fieureuse : la seconde, le confortement du cœur, par ce que la fieure est la propre passion du cœur, communiquee par les arteres aux autres membres, parquoy la substance d'iceluy doit estre fortifiee & gardee : la troisieme, l'entretenement de la force du foye, avec deoppilation d'iceluy, de peur qu'estant debile, il n'en auienne iaunisse, mauuaise habitude du corps, hydropisie, & autres accidans, par ce que le foye est le principe du sang, & du nourrissement de tout le corps : la quatriesme chose que

doit faire ledit sirop est, qu'il doit ouurir & destoupper les cōduits & passages estroits des humeurs, par ce que ne pouuant les esprits, qui donnent la vigueur au corps, passer par iceux, sont cause de putrefaction, qui est la mere de la fièvre : la cinquième intention est, l'alteration : c'est à dire, la mutation & amādemment des qualitez des humeurs, qui sont la matiere de la fièvre, avec les choses qui resistent à putrefaction, & la font cesser : la sixième est, la reduction desdites humeurs à iuste corpulence, que les Barbares appellent, *adæquatio humorum*, pour les rendre cōmodés à euacuer, engrosissant les trop subtiles, subtiliant les trop grosses, incisant & abstergeant les visqueuses & gluantes : la septième est, l'addoucissement des beyaux, & entretenement du bénéfice du vêtre : la huitième, prouocation d'vrine : la neuvième & dernière, prouocation de sueur. Et entre les sirops qui comprennent vne bonne partie de tout cela, & sont cōuenables aux enfans, sont *Sirupus acetosus simplex*, duquel Mesué & Auicenne celebrent fort les louanges, *oxysacchara simple*, *Sirupus de endiuia vterque*, *oxymel Geleni*, *sirupus de chicorio*, *oxysacchara composita*, *sirupus acetosus compositus*, *sirupus de lupulo*, *sirupus de bugloss*, *sirupus bizantinus*, *sirupus capill. vene.* *sirupus de fumaria*, *sirupus de succo acetosæ*, *sirupus de acetositate citrij*, & de *succo granatorum*, *sirupus violatus*, *sirupus de rosis*, & *serum caprinum*, & les emulsions des semences froides : desquelles choses les vnes sont pour les matieres chaudes & cholériques, les autres pour plusieurs matieres diuerses, en les prenant simplement, ou en les dissouldant avec eaux distillées, ou avec decoctions, que le Medecin prudent ordōne selon qu'il cognoist qui fait besoin : combien que sans lesdits si-

rops on prent seulemēt quelquefois ou des eaux distillees, ou des decoctions avec sucre, & en fait on iuleps ou apozemes, qui sont de mesme effect.

V I I.

Après que les humeurs sont ainsi preparees, incontinant se doit faire l'euacuation d'icelles: & ce par medecines gratuites, conuenables a leur qualité, & proportionnees selon leur quantité, & doses: c'est a dire, mesurees selon la portee de l'enfant.

V I I I.

Puis quand la plus part des humeurs sont euacuees & vuydees, & le corps est purgé, on doit venir au reste, sauoir a fortifier & temperer le cœur, avec Manus Christi perlee, ou avec autre electuaire cordial, & avec epitheme propre a icelle partie. Item, a maintenir en force, & reduire en bonne temperature le foye, avec opiate, ou electuaire propre, & avec epitheme hepaticque. Et pareillement a corriger les acidans qui accompagnent la fieure, comme a la soif, par les iuleps ou sirops qui ont esté dits cy deuant a ce propos, & par lauement de bouche avec eau d'orge, ou eau de vigne, ou de vinette, & semblable: & au defaut de dormir, par orge mondé cuit avec semence de laitue & de pauot en petite quantité: & avec frontal d'oxyrhodin, ou de l'vnguentum populeum, en esté: ou avec frontal sec d'anet, roses, & violettes de Mars, lequel soit vn peu arrousé de la vapeur de vin-aigre en hyuer.

I X.

Si apres la purgation restent encore quelques reliques de la matiere fieureuse, ou s'il y ha quelques autres humeurs superflues dans le corps de l'enfant, lesquelles seroyēt multipliees a l'occasion de trop manger & boire, encore qu'elles ne foyent de la matiere de la fieure, toutesfois de crainte qu'elles n'augmentent la fieure bouillante par la chaleur

fiévreuse, Auicenne dit qu'il faut faire prendre les choses qui prouoquent l'vrine: qui est vne chose necessaire en toutes fièvres humorales, quand quelques humeurs superflues sont contenues au foye, es venes, & es autres parties du corps, afin de les faire oster, distiller, & vuyder par l'vrine, en essayant de tirer pareillement le reste de la matiere qui fait la fièvre, sauoir la cholere & le flegme corrompu: & a ceste intention Auicenne, cōme nous auons ia dit ailleurs, ordonnoit es fièvres tierces, boire du vin blanc, lequel il estime auoir la faculté de faire vriner la cholere, qui fait la fièvre, sinon que Nature de soy-mesmes le fist suffisamment sans ayde d'artifice. Les choses qui font vriner, partie sont a prendre par la bouche, comme l'oxymel diuretique, le sirop de radicibus, le sirop de capilli veneris, de absynthio, de bizantijs, de cichorio, composé avec rheubarbe, ou sans rheubarbe: partie s'appliquent par dehors, comme en oignant le dos, les reins, & le petit ventre, avec huile de camomile, y aioustant vn peu de vin blanc, pour faire penetrer mieux: aucun y aioustent des mucilages de semences froides.

x.

En apres, faut le faire suer, dit Auicenne, subtiliant les humeurs, & ouurant les pores du cuir, comme chose necessaire es fièvres des enfans, lesquelles sont fort vaporeuses, afin que par cela soyent euacuees les matieres qui font la fièvre, ou qui sont coniointes avec la fièvre. Mais on doit noter les iours esquels suruient la sueur bonne & louable, pour la y faire venir, si elle est preparee aucunement par le mouvement de Nature: lesquels iours Hippocrates nombre au quatriesme liure des Aphorismes, le troisieme, cinquieme, septiesme, neuvieme, onzieme: puis le quatorzieme, dix-

septiesme, vingtiesme, vingt-vniesme, vingtquatriesme, & trente-vniesme. Sur-quoy, dit Galien, n'auoir point iamais trouué la sueur bõne auenue au quatriesme iour: iagoit qu'il sache que le quatriesme est le commancemēt des iours critiques.

La maniere de prouoquer la sueur.

On prouoque la sueur ainsi comme l'vrine, par choses a prendre par dedans, ou a appliquer par dehors.

Les choses a prendre par la bouche pour prouoquer la sueur.

Ce qu'on prend par dedans pour prouoquer la sueur, sont comme breuage cõposé de decoction de figues seules, ou avec lentilles, ou de l'vne des deux, ou des deux ensemble, avec la pulmonaire, ditte autrement l'herbe du lait nostre Dame, ou desdictes herbes chacune a part soy, ou ensemble, avec fenoil, anis, orge, & reglice : ou de decoction de la racine d'ache, & de chien dent, ditte en Latin graminis, & de cichoree, & des autres racines communes, qu'on nõtme apperitiues : ou seulement de tisane cuitte avecq' anis & reglice, ou quelque autre breuage semblable, y aioustant le sirop aceteux : ou comme Auicenne enseigne, boire du vin blanc en la cure de la fieure tierce, iagoit que le vin au regime de santé, ne conuient aux enfans : mais en ce cas, il leur conuient par voye de medecine. Aucuns donnent vn iulep, qu'ils nõtment sirop de S. Ambroise, pour ce qu'on en vse a Milan, fait de decoction de mil avec sucre. On peut faire vne autre iulep, lequel est singulierement bon pour faire suer, & pour rafraichir le foye, composé de ius de vinette, seule, ou avec folsy, pilee avec bien peu de vin-aigre, & meslee avec sucre. Et ces choses doiuent estre don-

nees a la nourrice si l'enfant tette, ou a l'enfant s'il est seuré. Et pour faire suer plus promptement & plus facilement, apres auoir prins cela, faut faire dormir, afin de renforcer par le sommeil la chaleur naturelle, & l'inciter a l'expulsion des humeurs, par les pores & petis trous du cuir.

Les choses a appliquer par dehors pour prouoquer la sueur.

Les choses qui sont a appliquer par dehors pour faire suer sont de plusieurs manieres, seruant a ouurir le cuir, lequel de nature est troué comme vn crible, & a faire passage par iceluy aux vapeurs & humeurs, par frottement & essuyement, par fomentation, par onction, & par eschaufatoire.

I.

Le desechement de la sueur, dit Auicenne, avec linges chauds, prouoque la sueur, & aussi fait la mutation de chemise : par ce que si la sueur demeure, en opilant les pores, elle empesche l'autre sueur, & en l'essuyant, les pores demeurent ouuerts, & la sueur abonde.

II.

Le mesme Autheur fait faire des fomentations & frottemens vne fois avec vin blanc, vne autrefois avec eau tie-de, & quelque fois melle les deux ensemble, donnant quelquefois a boire du vin blanc durant lesdittes fomentations. Raymond du Viuier, Medecin tresdocte, en son tiers liure de la Peste, pour prouoquer la sueur, fait tréper deux grandes éponges fines dans la decoction de chamomile, melilot, fleur de rommarin, de stichados, & de roses: puis les fait épraindre & mettre chaudement aux aisselles, & changer souuant, iusques a ce que la sueur flue en habondance :

quelquefois il aiouste a ladite decoction, de l'hysope, calamine & origan, & applique les éponges au dos & sur la poitrine: quelquefois il laisse ces dernieres herbes, & fait fomentier avec lesdittes éponges imbibees de la premiere decoction, sur l'espine du dos, & la poitrine, puis couure de linge chaud les parties fomentees. Aucuns se contentent de la decoction de chamomile, melilot, & violette de Mars.

I I I.

En lieu desdittes fomentations, Gentilis fait vn eschauffatoire d'erain ou d'estain, ou de vescie de beuf, ou de vescie de porc, pleine d'eau tiede qu'il met aux pieds & aux costez du patient.

I I I I.

La quatriesme maniere de tirer la sueur, est l'onction, laquelle Auicēne fait avec huile de chamomile seule, le long de toute l'épine du dos, & presque de tout le corps, deuant & derriere: aucuns meslent avec l'huile de chamomile, l'huile de lis, ou huile violat, & d'amandes douces. Encore ledit Auicenne introduit vne autre maniere d'onction a faire suer: c'est qu'il fait oindre le sommet de la teste, & la plante des pieds, avec ius de canne verte, puis fait couvrir le patient au liēt bien chaudemēt, & le fait dormir, le laissant suer lōg temps, iusques a ce que la sueur froidisse: mais ceste maniere de faire n'est point en nostre vsage. Le temps limité de cesser la sueur, est, ou quand elle froidist, ou quand on ne peut plus l'endurer: car lors faut l'essuyer avec linges secs, puis remettre a suer. Et c'est assez iusques icy auoir traité les principaux pointz de la cure des fieures humo-
rales, lesquelles sont sans contagion de peste.

De la Fieure heſtique des enfans.

C H A P. V.

COMBIEN que pour la complexion de l'âge des enfans, laquelle est humide, la fièvre qu'on appelle hectique ne leur auiënt pas souuant : toutesfois parce qu'ils se cholerent & despitent souuentesfois, ou qu'ils ont vne nourrice qui ha le laiët trop fort, estant ou de complexion cholérique, ou tenant regime de choses qui multiplient la cholere, ou qu'eux-mesmes ont vne telle complexion, ou qu'ils demeurent en lieu chaud & sec, ou qu'ils se tiennent trop au soleil, ou qu'on leur fait boire du vin : a ceste cause, ils peuuent tomber en fièvre hectique premierement, ou en vne autre fièvre, laquelle puis apres deuient hectique. Pour a quoy remedier ne faut autre chose, sinon leur ordonner regime de viure qui refroidisse & humecte, les tenir en lieu froid & humide, les baigner d'eau douce, les oindre d'huile violat, faire vser a la nourrice force laiëtue, vinette, espinnards, pourpié, pruneaux, & choses semblables.

*Des Fieures pestilentialles des enfans, des causes d'icelles,
& de leur cure. CHAP. VI.*

IL S'VY T apres de parler des fièvres qui sont pestilentialles, qui auiennent aux enfans accompaignedes quelquefois de mortels accidans, comme de la boce, du charbon, du pourpre, & de la rougeole.

De quelles causes sont procreees les Fieures pestilentialles.

Les fièvres pestilentialles procedent premierement de corruption d'air, par infection des puantes vapeurs de la terre, ou par mauuais regard & influence d'aucunes estoilles. En apres, l'homme s'en donne l'occasion, baillant a soy-mesme matiere de peste par ses mauuaises humeurs, & par la mauuaise disposition de son corps. Puis on la peut pren-

dre encore par contagion & conuersation es lieux dangereux. Vne quatriesme cause est attribuee au touchement & maniment d'habillemens, ou quelque autre chose venant de lieu pestiferé, & contenant en soy caché & enclos quelque reste de l'air infait & corrompu : mais quelque chose que ce soit, la principale & premiere cause est tousiours l'infection de l'air, & les pestilentes inspirations & halenes de quelconque endroit qu'elles viennent.

La cure des Fieures pestilentialles.

Pour la cure des fieures pestilentialles, faut vser generalement de remedes qui rafraichissent, & aussi qui resistent aux venins de leurs naturel, & qui nettoient le corps, & qui fortifient les esprits : & desquelles choses vne partie cōsiste en regime de la nourriture, vne autre partie en medecine.

La Nourriture.

En premier lieu conuient donner a la nourrice de l'enfant qui tette, & a l'enfant qui ne tette plus, nourriture de choses qui empeschent que l'humidité du cœur ne se consume : comme bouillons de poulaille, ou de chair de veau cuitte avecq' bourrache, vinette, scariole, pourpié, laitue, coucourde, veriuft d'aigrest, avec-quoy pour plus conforter le cœur on aiouste vn peu de safran. Et avecq' ce, doit l'enfant manger peu de chair, & encore la doit manger avec aigreur, comme avec ius d'orange, de limon, de citron, de grenade, de verius, de vin-aigre. Car toutes aigreurs generalement leurs sont bonnes, & encores sont bonnes en tous temps, & mesmement a ieun, & quand l'esthomas est vuyde : toutesfois ceux qui ont mauuaise poitrine & estroite, doiuent addoucir les aigreurs de sucre. Les gresses ne sont

pas bonnes. On farcit quelquefois la poulaille bouillie des herbes susdittes, avec orge mondé, passules, moëlle & semence de citron, & de coucourde, & avec des pruneaux qui veut. Le rosty doit estre arrousé d'eau rose a qui l'ayme. Toutesfois aux enfans ne faut bailler de la chair es premiers iours de la fieure, ni plus tost qu'a la declination d'icelle, ains seulement des bouillons veriutez, comme nous auons dit: sinon qu'ils pourrôt bien ronger des œiles & des pieds de poulets, avec vin-aigre ou ius d'orange & de citron, & apres licher d'une poire ou pomme cuitte & peu sucree. Les orges mondez & les panades sont singulierement bonnes, cuittes comme appartient. Quant au boire, on leur défend le vin, & la nourrice n'en doit boire non plus qu'eux: seulement on leur baille de l'eau d'orge simple, cu avec iulep violat, ou avec sirop de verius, ou avec oxysacchara simple, ou avec vin de grenade, ou du iulep Alexandrin, ou autre semblable.

La Medecine.

On les doit tousiours faire auoir bon ventre, & s'il est constipé, leur donner vn clystere lenitif: & si besoin est, leur oster & tirer les mauuaises humeurs avec medecine gracieuse, sauoir aux enfans qui sont seurez, & ont pres de sept ans, en moindre quantité: & aux nourrices de ceux qui ne sont pas seurez, en plus grâd' quâtité: pour lesquelles pourra estre ordonné ce que s'ensuyt. R. pruna x. florum cord. an. P. j. tamar-Indorum vnc. s. fiat decoct. in qua diss. iulep. vio. vnc. ij. rhab. noctem totam aqua endiuia macerati, drag. j. spic. scrup. s. aut si rha. amarorem refugiant, myrob. citrinarum expressiois q. suff. dicta aqua maceratarum ad drach. ii. j. mannæ granatæ vnc. j.

En apres, il faut corriger les accidans, & mitiguer leur aspreté & vehemence avec epithemes, electuaires, poudres cordiales, sachets de senteurs de roses, violettes, vollets, sandaux, & camphre. On fait prendre a la nourrice du theriaque dissout de quelque sirôp, comme de grenade, ou semblable, ou avec eau de vinette : Item quelques tablettes de diarrhodon ou de diatrionsantalon, ou plus tost de diamargariton frigidum, ou de l'electuaire de bolo, ou des trochisques de camphre, ou autre chose semblable.

Du Pourpre, des causes d'iceluy, & de sa guarison.

CHAP. VII.

ET C'EST assez iusques icy des fieures, entant qu'elles sont confiderees simplement: maintenant faut parler de celles qui auiennent avec eminence de la matiere enuoyee au cuir, & sont pour la plus-part pestilētiales & contagieuses: entre lesquelles est celle qu'on appelle en nostre langue, le Pourpre, laquelle auient tant aux petis qu'aux grands, en plusieurs endroits du corps, & est comme de petites piqueures de puces. Les Italiens la nōment Poncitelli, ou Piccioli-ponciti. Les Latins, Lenticulæ, pour la similitude des lentilles: plusieurs de noz anciens Medecins l'ont appelee Bouille, ainsi que recite Raymond du Viuiet: aucuns luy ont baillé le nom en Latin, Morbilli, qu'on donne a la rougeole: Razis l'appelle du nom commun de pestilence, en vn liure ainsi intitulé, & d'vn autre nom encore, dit Eulogia, ou Chapse, lesquels noms encore il accōmode a la verole, & a la rougeole, mais nous ne nous arrestons pas aux noms. Ceste maladie quelquefois n'est pas pestilente, combien que souuant elle vient par forme d'épidemie: mais quelle qu'elle soit, elle est contagieuse seulement par conuerſation

conuersation avec le malade, & tient quasi la nature des pestilenciales. Et auient quasi communément plus aux riches & aux nobles, qu'aux pouures, contre la coustume des epidemiques. Et le tēps auquel elle se manifeste, est le second ou quatriesme iour de la fieure, ou le troisiēme, ou cinquiēme, ou septiēme.

Les causes dont naist le Pourpre.

La naissance du pourpre est de ferueur & bouillonnement de sang, ainsi comme est celle de la rougeole : mais a cause qu'il vient en partie par la corruption de l'air, ou par quelque influence du ciel, en partie par la malice & mauuaise qualité de sang corrompu, il est pire que la rougeole, estant accompaigné de mauuais accidans tels qu'auiennent es fieures vrayement pestilenciales.

Iugement & announcement des choses a auenir du Pourpre.

On fait prognostication & iugement si on en peut eschapper ou non, par certains signes: entre lesquels ceux-cy sont mauuais : Si le patient se sent auoir le cœur failly. Si ayant prins vn petit & leger medicament, il vient en flux de ventre. Si estant la crise faite par flux de sang, par le nez ou autrement, il ne se trouue point allegé. Si l'vrine est retenue, & ne pisse point. Si le pourpre se cache, & ne sort point de rechef, ou sort a peine. Si les taches sont liuides ou orangees. Que si tous ces signes, ou la plus-part d'iceux, sont ensemble, il ne faut point douter que la mort ne suyue bien tost.

Remedes par Nourriture.

On tient regime pour guarir ce genre de fieure, comme pour la fieure vraye pestilencialle: car d'autant que le venin pestilencial est de qualité chaude, putrescent & corrosif, on

doit ordonner regime qui raffraichisse & humecte, comme bouillons de chair, ou de beurre, cuits avec vinette, scariole, pourpié, borroche, laitue, semences froides, orge, & verius, faisant ronger a disner des pieds de cheureaux, des aeflerons & des pieds de poulets au vin-aigre : aioustant a souper vn quartier d'une pomme cuite, ou d'une poire : & ne manger point autrement de la chair, sinon qu'il fust trop foible : ne l'estant point, en lieu de tout cela, mangera quelquefois de l'orge mondé, vsera de choses aigrettes . Et sera mesuree la quantité de son manger selon sa vertu . On ne le laissera ieuner de peur que les venes vuydes n'attirent les mauuaises humeurs & les transportēt iusques au cœur . On defend le vin a la nourrice, & a l'enfant qui est ia grandet, de peur que l'enfant ne tombe en resuerie, parce qu'il se fait grande euaporation au cerueau en ce genre de fieure : mais on fait boire de la tisane cuite avec racine de dēt de chien, racine de vinette, & des pruneaux qui veut, & de la poudre de corne de cerf, ou bien du sirop acetoux avec de l'eau, ou du sirop de ius de citron, ou du sirop de ius de vinette, ou de l'oxisacchara simple, ou d'autre sirop ou iulep semblable.

Remede par autres choses.

Si ainsi est, comme conseille Hippocrates, qu'on doit suyure Nature, & tirer la part ou elle guide : c'est a dire, tourner & conduire les humeurs de nostre corps la part ou elle les enuoye : puis qu'elle enuoye le pourpre en dehors, on doit bien se garder de le repousser au dedans. Parquoy faut euitier le froid exterior, le dormir profond, la medecine laxatiue, la saignée, lesquelles choses poussent les humeurs au dedans du corps : & au cōtraire, faut vser de choses qui ay-

dent Nature a pouffer au dehors, & a defendre le cœur.

I.

Donques on ne doit ne saigner ne purger en ce genre de fièvre, tandis que le pourpre se manifeste : sine n que pour cause de la ferueur & bouillonnement du sang de l'enfant, on peut saigner la nourrice, & purger doucement pour temperer son lait. Mais incontinent des le commencement, pourueu qu'il n'y ayt ne oppilatiō ne crudité, & apres auoir procuré le benedice du ventre, si besoin est, par clystere, faut trouuer moyen de le faire fuer, a fin qu'aucune mauuaise humeur ne soit retenue en aucune part du dedans du corps, & que les visceres soyent defendus & gardez. Et pour ce faire plus facilement, on doit faire ce qui s'ensuyt :

II.

Premierement, on doit couvrir l'enfant d'escharlatte, ou autre couuerte rouge, & le tenir en l'eau tiede pour ouurer les spiraux du cuir: en le gardant du vent & du froid, comme ha esté dit, iusques a ce que le pourpre & toute l'humeur mauuaise soit sortie.

III.

Puis luy faut bailler a boire la decoction de lentilles, de figues, & de l'herbe ditte en Latin, Pulmonoria, en France l'herbe du lait nostre Dame : Ou de la decoction de fenail, & de figues, & de lacca, y aioustant de ce qui resiste a la contagion, comme semence de citron, du scordion, du trifolium odoratum, de l'ozeille ou vinette, de la scabieuse, ou autre semblable. Parquoy on en pourra composer vne recepte, en ceste maniere. R. caricar. vnc. j. fiat decoct. ad vnc. iij. sirupi acetosi s. vnc. j. s. pul. laccæ scrup. s. croci gran. ij. ou autrement comme le Medecin verra.

Laquelle decoction faudra faire prendre a ieun, ou apres dîner, a l'heure que le ventre est vuyde. Ceste decoction est merueilleusemēt bonne pour faire sortir le pourpre. Aucuns approuuent de faire boire du Gaiac, comme Fracastor de Veronne, par ce qu'il est de parties subtiles, chaudes & seches, parquoy il desechefort, & consomme les humeurs, les faisant sortir par sueur, & les tirant du profond en dehors: ils le cuisent avec vn peu de vin-aigre, de peur d'augmenter la fieure. Et quand Nature est paresseuse a pousser dehors, on l'ayde encore, dit le mesme Fracastor, avec les choses qui enuoyent au cuir: & avecq' ce, sont contraires a la contagion, comme est le dictamum, le cost, la racine de personatia, la racine de canne, & quelques autres.

I I I I.

Et si la sueur ne sort par breuuage, on la doit prouoquer encore par application exterieure: laquelle maniere de faire nous auons cy deuant declairee en la cure generale des fieures putrides: c'est a sauoir, en faisant tremper des éponges dans la decoction de chamomile & fleur de rommarin seulement, ou dans la decoction de chamomile, melilot, fleur de stichados & dudit rommarin, ou de quelques autres herbes: lesquelles éponges ainsi mouillees, on exprime & applique chaudement sur la poitrine & l'épine du dos, en les changeant auant qu'elles froidissent, & couurant la partie fomentee de linges chauds, a ieun & a toutes heures que la digestion est faite.

V.

Et apres la sueur, on baille a boire de l'eau de licorne, avec eau de buglose, ou de vinette, pour raffraichir & preseruer le cœur, qui doit tousiours estre preseruē & defendu.

V I.

Toutes ces choses susdites doiuent estre faites des le premier iour que le pourpre cōmance de sortir, lequel sort cōmunément du tout dans trois iours. Durant lequel tēps ne faut laver ses mains d'eau froide, ne de vin-aigre, ni ne faut rien prendre qui ne soit tiede: comme aussi au iour critique & iudiciaire ne faut rien appliquer de froid par dehors, ne prendre par dedans: car par les choses froides le cuir est oppilé, & l'humeur s'espoissit, laquelle ha accoustumé de se fondre en sueurs, & par ainsi est empeschée l'action de Nature, laquelle doit mettre dehors ceste humeur. Combien qu'aux gens charnuz & robustes, & qui ont accoustumé a boire de l'eau, & aussi l'appetent & demandent, on leur permet d'en boire es iours susdits, ce que neātmoins ne se doit permettre qu'avec grand' discretion. V I I.

Quand les sueurs sont passées, & que le pourpre est sorty du tout, il est bon encore de faire vriner par choses diurétiques: c'est a dire, prouocatiues de l'vrine: par ce qu'on voit le pourpre bien souuant estre guarý par telle crise.

V I I I.

En tout autre temps, & tous les iours, sinon quand on baille a suer, ou a vriner, ou a repaistre, on defend le cœur avec la terre sigillée, ou bol d'Armenie, ou avecq' conserue de rose, de buglose, & violette de Mars, ou avec electuaire de diamargarithum frigidum, ou avec manus Christi perles, ou avec poudre de coral, de corne de cerf, d'yuoire, la prenant avec les caues cordiales, ou avec vn bouillon de poullaille cuite avecq' oseille & borroche, ou avec de la tisane cuite avec corne de cerf, ou avec les sirops ou iuleps qu'auons dit cy dessus.

De la cure de la Boce pestilentielle des Enfans.

CHAP. VIII.

COMBIEN que la boce n'est pas maladie vniuerselle de tout le corps, comme la fieure pestilentielle, toutesfois par ce que le plus souuant elle l'accompagne, il est seant de la mettre icy apres elle : en laquelle on ordõne vn tel regime qu'en la fieure pestilentielle seule. En quoy faut tousiours procurer benefice de ventre. Si doncq' la nourrice l'a constipé, doit quelquefois vser de clystere, & au cominancement se purger avec rheubarbe, thamar-Indes, ou autre medecine gratieuse. Quant aux enfans qui sont ia grandets & vont a quatre pieds, en lieu de medecine & de clystere, on leur donne vn suppositoire de coton de fueille de chou, engraisié d'huile d'oliu, ou d'huile violat, ou vn autre d'vn brin de penide, ou d'vn demy noyau de noix engraisié pareillement d'huile, ou en lieu de cela on engraisie son petit ventre de beurre frais, avec autant d'huile violat. En apres faut mettre sur la boce des estoupes mouillees de la decoction de mauue & chamomile, tous les iours, a toutes heures, soir & matin, laquelle chose on appareille en ceste maniere: On prend des estoupes de chanure, molles & bien battues, afin qu'il n'y demeure aucun piquon, & on les accoustre en forme d'emplastre, puis on les trempe en la decoction susdite, puis on les exprime entre deux assiettes de bois, puis on les applique chaudement : & se changent a toutes heures iusques a ce que la boce soit de tout éuanouie, ou apostumee, & deuenue liuide comme le charbon. Apres auoir osté les estoupes, on doit mettre le marc dessus : puis apres faut vser des autres remedes qu'on vse en la cure des apostumes. Cõtempendant, faut epithemiser, & donner

les choses qui preferuent le cœur.

De la cure du Charbon.

CHAP. IX.

ET TOUT ainsi comme la boce, laquelle vient seulement en vne partie du corps, quelle qu'elle soit, est mise cy dessus avec la fièvre pestilentielle, maladie vniuerselle, par ce qu'elle l'accompagne quelques-fois : aussi ie mers icy le charbon, avecq' la fièvre pestilentielle, sans laquelle il n'est iamais, nonobstant qu'il soit maladie particulière : tout ainsi aussi comme le regime de la boce & de la fièvre pestilentielle doit estre, tel sera le regime du charbon par nourriture, qui refroidit & tempere le sang, & fortifie le cœur. Et quant aux medecines, incontinant & des le commencement on les doit appliquer sur le charbon pour le rompre, de celles qui sont benignes & gratieuses, non fortes, ne caustiques, ne bruslantes, de peur de gangrene, ou esthiomene. Parquoy, pour le rompre, ne faut sinon broyer de la scabieuse entre deux pierres, & l'incorporer avecq' vieil oingt de porc salé, car ce remede est seur. Aucuns mettent seulement vn' emplastre de iaune d'œuf, avec vn peu de sel. Puis on scalpelle le charbon a l'entour, pour faire sortir l'humeur veneneuse. Cela fait, incontinant on le bafine avec saumeure, a fin que le sang ne se concree, ou s'il est concreé & grumeleux a fin de le dégru-meler. Apres cela, on couure l'ulcere d'estoupes, & non d'autres choses : d'autant que par les estoupes qui sont rares & a cleres-voyes, plus facilement les mauuaises vapeurs de l'ulcere sortent, & ne retournent point au cœur. Finalement, on vse de mondificatifs & sarcotiques, comme en tous autres vlcères.

ENCORE entre les fieures qui sont avec eminence de la matiere enuoyee au cuir, & lesquelles auient le plus communément aux enfans, on comprend la rougeole & la verole, que les Grecs en vn mot appellent Exanthemata: c'est a dire, comme boutons ou bourgeons. Hippocrates au iij. des Epidemiques les nomme ecthemata. Pline, papulæ: les bonnes gens de Medecins du temps passé, bouillæ: & ceux qui sont venuz depuis ont baillé nom a la verole, variolæ, & a la rougeole, morbilli, laquelle Razis appelle en vn lieu blactiæ, en autre lieu eulogia, & chapse du mot d'aucuns ancicis non Grecs: plusieurs en François la nomment, la picote: les Italiens, lo smapio: toutes deux d'un mot commun sont appellees pustulæ, par les plus anciens Latins. Lesquelles maladies sont du genre des contagieuses, & quelquefois signifient la Peste auenir, comme quand par la corruption & mauuaise qualité de l'air, elles se respendent par le pays: & en temps de peste, regnent le plus souuant, accompagnant les fieures pestilentes, toutesfois non pour cela elles sont pestilentes: car aussi bien souuant, sans aucun danger de la vie, & sans aucun indice de la fieure pestilentielle, elles viennent par ferueur & ebullition de sang, procedant d'autre occasion que non la peste. Et pourtant que nous sommes venuz a l'endroit ou il est seant de traiter de leur guarison, d'autant que sont maladies vniuerselles, tant au dedans du corps, a cause que sont fieures a leur commencement, qu'au dehors, a cause que sont petites taches & enleueures repandues par le cuir, est besoin pour bien ce faire, de donner premierement a entendre quelles

maladies sont, & quelle difference y ha entr'elles : puis qui sont les causes dont elles sont engendrees, & la maniere cōme elles sortent : puis par quels signes on cognoist qu'elles veulent sortir : en apres quel iugement on peut faire, a quelle fin peuuent venir, & qu'est-ce qu'on peut esperer ou craindre qu'il en auienne : finalement, quel remede on peut trouuer pour les guarir : toutes lesquelles choses i'ay traitees bien amplement en vn autre liure, que i'ay composé a part de ceste matiere : icy ie les traiteray assez amplement par ce qu'ils en arriuent de grans inconuenians.

I. *Quelles maladies sont la Verole & la Rougeole, & quelle difference il y ha entre-elles.*

La verole & la rougeole sont petites pustules & enleueures, en grād nombre, qui apparoiſſent en la superficie de chacun membre, soit dedans, soit dehors du genre des maladies contagieuses, procedant par ebullition de sang ou d'autres humeurs. Entre lesquelles on met ceste differēce, que la rougeole est d'humeur plus chaud & plus subtil, & la verole d'humeur plus froid & plus gros : en apres, la rougeole est plus éleuee en pointe, parquoy est appelée de Galien exantheme sublime & éleué : au contraire, la verole ne sort guiere auant hors du cuir, mais est plus large, parquoy Galien la nōme exantheme bas : toutesfois qu'il ne se faut pas haster de iuger au premier ni au second iour de leur difference, par ce qu'elles sont au commencement semblables : depuis la rougeole demeure rouge a la superficie du cuir, & ne croist point, la verole blanchit en croissant, auant qu'elle vienne en crouste : cōbien que si on veut iuger au commencement de leur difference, on le peut aucunement, par ce que la rougeolle en sortant pique & demange : la verole

est sans pointure & sans demangeaison, pour—autant que l'humeur qui la fait, n'est pas si aigu ne si piquant, tesmoin Hippocrates, au vj. liure des Aphorismes, en l'Aphor. iij.

II. Qui sont les causes dont la Verole & Rougeole sont engendrees, & la maniere comme elles sortent.

La verole & rougeole sont engendrees, ou des restes du sang mēstrual de la mere, soit que l'enfant en ayt esté nourry ou imbibé au ventre d'icelle, ou qu'il en ayt retenu seulement la qualité mauuaise apres qu'il est né, & ceste est la cause pour laquelle chacun presque l'a vne fois en sa vie: ou elles viennent du sang propre de l'enfant contenu en ses venes, excessif ou en quantité, ou en qualité: ou des superfluitez de la derniere digestion d'un chacun membre, lesquelles regorgent es venes, & corrompēt le sang: & ce par le bouillonnement qui se fait en la mixtion desdittes matieres avec le bon sang, par la chaleur contre nature, & par la vertu naturelle discretive ou sequestrative, discernant & separāt l'impur d'avec le pur, & par la vertu expulsive de chassant & pousant hors l'impur & le corrompu a la superficie des membres, & de tout le corps.

III. Par quels signes on cognoist que la Verole & Rougeole veulent sortir.

Les signes lesquels, comme messages, annoncent la venue de la verole & rougeole sont tels, la fièvre continue qui va deuant la douleur du dos, le prurit & frottement du nez, bagler & s'estendre souuāt, pesanteur de cerueau, douleur de teste, mal de cœur, & enuie de vomir, mal en la gorge, enrouëure de la voix, douleur de poitrine, courte hale—ne, yeux flamboyans, foiblesse & lachete de corps, cōme si tout tournoist, chagrin, poulx languide, vrine rouge & trouble, toutes ces choses ou la plus-part ensemble.

IIII. *Presage & iugement de la fin de Verole & Rougeole.*

On fait bon augure de la verole, quand elle est blanche & chaude, & que les boutons sont grands & espars, separez d'ensemble, en petit nombre, sortis aisément & sans grand'fièvre, & a iour de crise, & le malade ne se tormenté guiere, & encore qu'ils fussent en grand nōbre, & pres l'un de l'autre, pourueu que le patient apres toute leur sortie, les porte aisément, & sans grand torment, ce n'est encore que bon signe: mais s'il s'en tormenté beaucoup, & sont grand mal, la chose est en doute. On est assuré au contraire, que la fin ne peut estre bonne, quand lesdits boutons blancs s'entretiennent ensemble, ou sont l'un dans l'autre, ou ont un grand cercle entour, & reluisent comme graisse, & quand ils s'estendent au large, & couurent tout le corps: ils sont pareillement tresmauuais quand ils sont petis, & comme verrues, vuydes d'humeur, & ne peuuent suppurer, & sortent avec peine, & s'épandent par tout en grand' quantité, & le patient ne se sent point allegé apres qu'ils sont tous sortis. Ceux qui sont verds, ou violets, ou noirâtres, sont tresdāgereux, & encore plus, si avec cela le patient ha mal de cœur: & si la fièvre perseuere, & ne se relache point, il n'y ha guere d'esperāce. La rougeole n'est pas beaucoup mauuaise, laquelle n'ha pas grand' rougeur, la bleime ou iaunaistre est pernicieuse, ainsi cōme est la verte ou violette: laquelle si elle s'efface ou se cache avec enuie de vomir, & continuation de la fièvre, apporte signe manifeste de mort prochaine, encore plus manifeste suruenant syncope, & defailemēt de cœur. En general, l'un & l'autre genre dōnent mauuais presage de quelque couleur qu'ils soyēt: quand ils rentrent accōpaignez de mal de cœur, enuie de vomir, foiblesse, & autre accidās.

V. *Remedes de la Rougeole & Verole pestilentiales.*

Il est temps maintenant d'enseigner comme on puisse guarir la verole & rougeole, & pour bien ce faire, premierement faut distinguer leur qualité : car ou elles sont pestilentiales, comme en temps de peste, ou elles ne le sont pas. Si elles sont pestilentiales, on les guarira comme le pourpre, en faisant vser a l'enfant ia grandet, ou a la nourrice, si l'enfant tette encore, des choses aigrettes: comme de ius de vinette avec la viande, ou de verius, ou de vin de grenade, ou de ius d'oranges, de limons, de citrons, ou des mesmes choses entieres en forme de salade, avec sucre, ou en confiture, ou d'autres fruits cuits qui ont quelque aigreur, & vn peu sucrez : boire de la tisane cuitte avec pruneaux aigrets, & avec racine de vinette, ou avec la rapure de corne de cerf, ou quelque iulep de ceux que cy deuant i'ay ordonné es fieures pestilentiales : le tout pour mitiguer la chaleur fieureuse, & empescher le venin de monter au cœur : combien qu'il ne faut rien donner qui soit aétuellement froid en ce genre de fieure, encore que la matiere soit chaude. En la rougeole on donne des choses qui ont la vertu plus grande de refroidir qu'en la verole, mettant en leurs iuleps & breuuages quelque petit de camphre, ainsi comme l'ancien docteur excellent M. Michel Boeth ordonne. Et nonobstant toutes ces choses, on doit tenir l'enfant en chambre chaude, & ou le vêt n'entre point, enuveloppé d'escarlatte, ou d'autre drap rouge, iusques a ce que la verole ou la rougeole soit sortie du tout. Et en cas de chose purement medicinale, on luy donne des le commencement de la fieure, demye dragme de methridat, ou de theriaque vieille, pour le moins

de huyt ans, avec du vin de grenade, ou avec du ius de vinette, ou de citron, deux heures deuant manger. Puis si on voit que les boutons desdittes maladies foyent tardifs a sortir, & que Nature trauaille a les mettre hors, adonques on s'abstient des choses qui refroidissent trop, & espoississent le sang, & on tasche de prouoquer la sueur, en baillant loin du repas a boire la decoction de lentilles, avec safran, vinaigre & sucre, ou quelque autre, comme de celles qui ont esté cy deuant ordonnees en la cure du pourpre. Quand les boutons seront sortis du tout, on les traittera au reste comme lesdittes maladies de verole & rougeole qui sont sans pestilence. Si le ventre est dur, on le peut ramollir quelquefois au matin avecq' bouillon de mauue, violette de Mars, borroche, pruneaux, raisins de damas mondez de leurs pepins: autrement ne le faut mouuoir par clystere ne suppositoire, sinon au commencement, ou apres que tout est sorty, & sur le declin ou decadance de la maladie, de peur de tirer la matiere de verole ou rougeole es boyaux, & faire venir vne dysenterie dangereuse.

Remedes des maladies de Verole & Rougeole qui sont sans pestilence.

Si lesdittes maladies de verole & rougeole ne sont pestilenciales, & ne viennent de corruption d'air, ains seulement ou des restes du sang m̃strual acquis au ventre de la mere, ou de mauuais laiçt corrompu au ventre de l'enfant, le regime de viure, lors qu'elles cōmencent d'apparoistre, est autre que de celles qui sont avec pestilence, & ne peut encore estre tel en ce genre de fieures, quel il est es autres fieures aigues, esquelles les choses qui refroidissent beaucoup & estaignent la chaleur fieureuse sont necessaires: icy sont a

euter, de peur d'empescher qu'elles ne sortent. Parquoy pour remedier a icelles, on doit au commencement qu'elles se monstrent, tendre a ceste fin d'ayder a Nature a les mettre hors, & ne luy donner aucun empeschement. Mais pour dire mieux, & pour les guarir par ordre, & ainsi qu'il appartient, le regime & les autres remedes doiuent estre diuersifiez selon le temps auant qu'on les voye sortir, & selon le temps auquel elles sortent, & commencent de se monstrier, & selon le temps apres qu'elles sont sorties du tout.

Qu'il faut faire a la Verole & Rougeole auant qu'elles commencent de sortir, sans qu'il soit besoin qu'elles sortent.

Si tost donques que la fieure ha faisi l'enfant, & qu'on voit les signes de la verole ou de la rougeole auenir tels qu'auons dit cy dessus: sauoir, basglemēt par plusieurs fois, douleur du dos, les yeux rouges, battement de teste, mal de cœur, de gorge, de poitrine, le poux langoureux, l'vrine rouge & trouble, lors on doit tascher de guarir la fieure, & le tout, & faire tant qu'il ne soit besoin que les deux susdites maladies sortent, ainsi comme enseigne Rasis au liure qu'il ha escrit de ceste matiere, sous le titre de Pestilence, selon la traduction de sa langue Syrienne. Parquoy la premiere chose qu'on doit faire a l'enfant, mesmement s'il est fort sanguin & plein d'humeurs, apres auoir purgé son ventre avecq' vn clystere ou suppositoire, c'est luy appliquer des ventoses avec scarification, depuis l'age de quatre ans en sus, combien que le mesme Rasis les luy applique depuis qu'il ha cinq mois. En apres, faut esteindre la fieure, & refroidir le dedans du corps qui brusle, en donnant a boire a l'enfant ia grandet, de l'eau refroidie en la neige, s'il estoit

possible, comme ordonne ledit Docteur, ou d'autre eau bien froide en grand' quantité, puis la luy faire vomir, puis luy en redonner d'autre encore autant: & ne cesser iusques a ce qu'il sente la froideur en son ventre, & que la grand' chaleur & la force de la fièvre soit amoindrie: que si elle reuient, ou si elle continue, faut de-rechef bailler a boire de ladite eau en bonne quantité, & la faire reuomir, puis luy en bailler de-rechef dans demye ou quart d'heure: & si on voit qu'elle passe sans vomir, & que l'enfant suë, ou qu'il pisse, c'est signe que la fièvre s'en va estre guarie, & qu'il n'aura point la verole ne la rougeole. Que si l'eau ne passe, & la chaleur ne s'appaïse, faut laisser l'eau, & venir aux autres choses qui refroidissent d'auantage, comme sont les sirops de ius de vinette, de limons, de verius, oxyfacchara simple, le sirop de fructibus, & semblables. Le lendemain ne suruenant aucun empeschement, on doit donner a la nourrice, si l'enfant tette encore, de la manne, ou de la casse, avecq' des tamar-Indes, pour la purger, ou du sirop de cichoree avecq' rheubarbe: & pareillement a l'enfant ia grandet, selon sa portee. Et durant toutes choses, faut que l'enfant grandet, ou la nourrice du petit, es repas mange des potages de pourpié, vinette, lactue, cichoree, borroche, ou d'un orge mondé, ou de la mie de pain trempé en l'eau, & sucrée, quelquefois du poisson, bien peu de chair, seulement des eslerons de poulets, avec verius, ou ius de vinette, ou d'orange, ou de citron: doit euitier les douceurs, & les fruits humides, & qui sont faciles a corrompre: & entre autres fruits, les figues, & les raisins, comme tres-bien le conseil le Razis, par ce que les figues & raisins, dit-il, engendrent les purons, amassent les superfluitez dans le corps,

& les mettent dehors : & les raisins, dit-il encore, engendrent ventositez dans le sang, le font enfler, & rendent indoine a bouillir & faire escume. Faut boire de la tisane cuite avec racine de vinette, & la boire seule, ou avec du sirop de limon, ou oxyfacchar, ou autre semblable. Bref, tenir le regime accoustumé es fieures pestilenciales, & autres ardantes. Et si pour cela le patient se porte bien, & la maladie se diminue, ne faut rien bailler qui soit pour échauffer le sang, & faire sortir la verole ou la rougeole. Mais si nonobstant toutes ces choses, la fieure perseuere, & ne s'en va point, & le malade se deult & tormente incessamment, lors faut penser que la verole ou la rougeole se mouue, & veut sortir, & pour ceste cause faut auiser de changer le regime, & faire ce qui s'ensuyt.

II. *Quand la Verole & Rougeole commencent de sortir, pour les faire sortir du tout.*

Or pour declarer encore mieux cela, le redisant : Si tost qu'on voit que pour tel regime la fieure ne cesse point, laquelle n'est sinon l'émotion & bouillonnement du sang, & que la matiere est furieuse, laquelle Nature traueille a sequestrer d'avec le bon pour la pousser dehors, adonques faut s'abstenir dudit regime, & de donner chose qui refroidisse, & encore plus deslors que la verole ou la rougeole sort, comme volontiers au troisieme ou quatrieme iour, ains faut s'estudier a ayder Nature a mettre hors lesdittes superfluités, & les meschansetez qui sont dans le corps : cōme ainsi soit que les choses refroidissantes espoississent la matiere, & la rendent inhabile a sortir, i'entends les choses lesquelles refroidissent beaucoup, & en refroidissant resserrent : car vser aucunement des ius susdits avecq' la viande au repas est permis,

permis, pour la temperer, & pour resiouyr le cœur : & quelquesfois aussi des sirops susdits entre les repas, hors la sueur, pour estancher la soif, & contenter le patient. Pareillement la purgation & toute émotion de ventre est lors a euitier, & aussi la saignée, encore que des le commencement il n'ayt esté ne purgé ne saigné : comme ainsi soit que ces deux choses ont leurs mouuemens cōtraires a celui de Nature en ce genre de maladie, en euoquant de dedans au dehors, l'vne aux intestins, en danger de dysenterie, l'autre aux visceres & iusques au cœur, sans esperance de guarir. Et par ainsi, faut tascher par tous autres moyens d'attirer la matiere au cuir, tant par regime de viure soustenant, pour sa plus-part, les forces de Nature, que par les remedes lesquels font suer, en preseruant avec autres remedes les parties du corps lesquelles sont subiettes a estre verolees, & a estre gastees de ceste maladie.

Le regime de viure, pour faire sortir la Verole & Rougeole.

Premierement donques, l'enfant doit estre tenu chaudement, & dans le liēt, couuert moyennement, & enuelpé de couuerte rouge, & s'il est possible d'escarlatte. Et quant au manger, s'il est a nourrice, doit s'abstenir de bouillie, & de choses qui referrent les pores interieurs du corps : s'il est ia grandet, Rasis ne luy permet de māger chair iusques a ce que la fieure soit pāssee ou amoindrie, & que la verole ou rougeole soit sortie du tout : ordonne seulement des purees de pois, de lentilles, du gruaut, qu'on appelle autrement, auenat, de l'orge mondé ou amandé, d'un potage de poulet cuit avec choses qui amollissent le ventre. Aui-cenne veut qu'on luy baille nourrissemēt qui ayt faculté de nourrir & esteindre la fieure, sans refroidir ni espoissir le

sang : comme des lentilles, & du pain mouillé en eau froide, avec vn peu de sucre, estimant qu'à l'occasion du sucre, la qualité stiptique & restrainctiue, qui est es choses froides, est oïtee, & demeure la qualité qui lenit le ventre : parquoy les pruneaux de Carlesme sont bons cuits avec sucre, & semblablement les potages de coucourde, ou la coucourde mesme. On peut outre ces choses, leur bailler de l'amydon cuir avec lait d'amande, comme ordonne Gordon, & des raisins de damas ou de cabas, des figues, & des iuiubes, lesquelles abondent en Prouence. Touchant le boire, en donne de la tisane vn peu attiedie, avec laquelle, entre les repas, on mesle du sirop violat, & non du rosat. La nourrice doit vser de viandes gracieuses, de bonne nourriture, & de facile digestion, s'abstenant de fruits crus, d'épiceries, salures, de pourreaux, oignons, & semblables, de vin doux, ou fort, de bains, de cholere & mouuemens desordōnez, tant du corps que de l'esprit : bref de toutes choses qui échauffent, & font bouillir le sang de leur nature. Le dormir de l'enfant doit estre moderé, & non trop profond, de peur de profiler les matieres, & augmenter la chaleur de la fiure. Si l'enfant ha le ventre constipé, la nourriture le doit ramollir, & non la medecine, pour la raison que tantost nous auons ditte, de crainte d'attirer les matieres aux boyaux, & engendrer dysenterie. Que s'il le faut mouuoir par clystere ou suppositoire, faut differer iusques a ce que la verole ou rougeole soit sortie du tout.

Les remedes pour faire suer.

Estant l'enfant ainsi entretenu, si la matiere ne peut sortir, faut la tirer hors par sueur : ce qui se doit faire loin du re-

pas, & se fait en plusieurs manieres, tant par applicatiōs exterieures, que par choses a prendre par la bouche. On ordōne au petit en fant qui ne peut encore boire, de l'envelopper chaudement sous la couuerte rouge, d'un linceul mouillē de decoction de figues, & de fenail, & exprimē bien fort, ou de decoction de marrochenin, & de semence d'ache, ou comme ordonne M. Michel Boeth, Medecin du Roy Richard d'Angleterre, de decoction d'ache, & de lentilles : en ceste maniere. R. apij M. j. lentium P. iij. decoquātur, decocto made fiat linteum, quo expresso inuoluatur infans, & sudet. Ce qui se fait aussi a l'enfant qui est ia grandet, & prent autre chose que le lait : auquel Rasis ordōne de donner a boire petit a petit de l'eau froide, principalement quād la verole commence fort a sortir : Car, dit-il, si on boit l'eau froide petit a petit, cela fait venir la sueur, & ayde a chasser les superfluitez a la superficie du corps. En apres, il ordōne des eschaufatoires de vaisseaux pleins d'eau chaude, pour les appliquer es costez, & a la plante des pieds, & ailleurs, loin du visage, a fin de rarefier le corps, & faire sortir les superfluitez par les pores, & trous du cuir : & ce tēps
„ pendant, on doit rafraichir la face, & le nez du patient,
„ dit-il, avec vn ventail doucement, de peur qu'il ne tombe en syncope, par la chaleur, & par la sueur : car ce fait,
„ la vertu est conseruee, & les superfluitez sortent
„ mieux. En lieu de ventail, on fait sentir de l'eau rose, avec vin-aigre, ou d'autres senteurs, qui ont vertu de refroidir : ce qui sert encore pour defendre le nez de la verole, qui est la cause pourquoy ie n'approuue pas ce qu'Auicēne ordōne, de luy faire sentir du safran, pour faire sortir la verole, lequel il dit auoir propriētē de prouoquer au dehors.

La principale chose qui fait sortir la verole ou la rougeole, c'est lors que la fièvre est relachée, & le patient est vn peu mieux a son aise, luy faire prédre les choses qui ouurent les pores, subtiliēt les humeurs, & les font sortir par sueur. Par quoy on luy ordonne en breuuage, la decoction de figes seches, & de semence de fenoil, ou de semence d'hache, ou de chicoris, ou de persil, & semblables: avec lesquelles choses on aiouste pour autres intentions, des lentilles écorcees, & des raisins de damas, de la gomme de lacca, du dragagât, & quelquefois du safran, quelquefois des dattes, quelquefois du reglice, & quelquefois de la semence de citron, en composant les ordōnances & receptes avec plus grāde ou moindre dose des ingredians, c'est a dire, aēs medicamens qui y entrent, selon les intentions du Medecin. On y met des figes pour faire sortir la verole, par ce qu'elles sont bonnes pour cela, & pour faire suer, ainsi comme escrit Dioscoride: & aussi par ce qu'elles lenissent & abstergent doucement, & que pour ceste cause sont conuenables a la courte halene, & aux poumōs, lesquelles encore estāt meslees avec les choses incisives & subtiliatives, comme avec fenoil & lacca, ont pareille faculté. On y aiouste de la semēce de fenoil, & semblables, a fin d'ouurir les voyes a la sortie de la rougeole ou verole. On y met des lentilles, non pour enuoyer les superfluitez dehors par sueur, comme pensent aucuns, mais au rebours pour defendre la bouche, la gorge, les poumons, l'esthōmac, & les boyaux qu'ils ne soyent verolez, a cause qu'elles ont vne certaine adstriction moyenne, & pour engarder aussi le flux de vêtre: & les y met on escorcees, pour ce qu'en l'escorce, la stipticité & vertu reſtraintiue est trop plus grande qu'il n'est necessaire en tel cas.

On y met encore de la gomme de dragagant, pour empêcher le mal de la gorge, & l'enrouëure de la voix, & pour defendre que la verole ne vienne aux poumons. On y met la gôme de lacca, laquelle aucuns cudent estre le cancamum de Dioscoride : & on la y met, dit Razis, pour le confortement du foye, laquelle gomme pareillement, ainsi que dit Auicenne, au second Canon, est bonne contre le battemēt de cœur, qui est a craindre en ceste maladie : & est encore, dit-il, profitable au foye, le fortifiant, & a l'hydropisie, & a la iaunice, par ce qu'elle ouure les conduits, chose fort necessaire en la cure de la verole, & de la rougeole. Ceux qui y aioussent des dattes, le font a cause de l'esthmac. On aiousse quelquefois de la semence de citron, comme aussi du safran, pour la defence du cœur. Quelquefois du reglice, tant pour adoucir la gorge, & empêcher l'enrouëure, que pour ayder a faire suer. Et quelquefois des roses, comme fait Razis, pour temperer le bouillonnement du sang, & la chaleur du foye. De tous lesquels ingredians, le Medecin fait les doses plus grandes ou moindres, ou égales, selon que la qualité & force de la maladie & des accidans luy enseigne estre de besoin.

Les remedes pour preseruet & guarantir les membres subiets a estre gastez de la Verole.

Et voila comme nous auons depesché les deux genres de remedes a obseruer quand la verole commence de sortir, l'un par regime de viure, l'autre par sueurs: reste la troisieme chose, qui ha esté proposee qu'il faut faire ce temps-pendāt, c'est qu'on doit guarantir & defendre les yeux, le nez, la gorge, les poumons, & les intestins, qui sont les membres lesquels sont subiets a estre gastez, & perdus de la verole,

dont quelquefois ensuyt la mort.

Pour defendre les yeux.

On defend les yeux au commencement avecq' eau rose, & vn peu de camphre : ou comme conseille Razis, avec eau rose & sumac : c'est a dire, avecq' infusion ou decoction de sumac, ou avec la substance en poudre meslee en forme de collyre : ou avec la decoction de balaustes, mettant les tuniques interieures des grenades en poudre, pour respan- dre dessus, & oignant les sourcils d'acacia & d'aloës, en é- gale portion, avec vn peu de safran : ou avec des trochis de poudre de sumac, & de balaustes formez avec eau rose, puis dissouls avec la mesme eau rose, ou avec antimoine, ou tut- tie dissoulte en laditte eau rose. Le ius de grenade mis au- tour des yeux pour mesme intention, est bon par l'auis de Razis & d'Auicenne. Quelqu'vn des Anciens faisoit vn collyre de coriandre & sumac, formé avec blanc d'œuf bat- tu & escumé, & avec eau rose. Beaucoup ne mettent aux yeux pour les preseruer, autre chose sinon de l'eau rose, & du lait de femme, qu'ils y mettent souuant. Bref, pour leur defense, au commencement les choses froides & lesquelles repoussent y sont bonnes. Toutesfois, si on voyoit que la matiere de la verole fust trop habondante & trop forte, ou de grosse substance, & tout le blanc des yeux rouge, lors Razis desent de repousser ou repercuter du tout : mais veut qu'on vse de choses resolutiues & abstersiues, & qui ayent vertu de cōforter la veuë, entre lesquelles le safran ayt lieu, en y meslant neantmoins quelque portion des choses qui refroidissent & repercutent aucunement, comme au pro- grez & auancement du mal, & auant que tout soit fort y.

Parquoy on prent de l'antimoine subtilement puluerizé, & dissout en eau rose, comme ha esté dit, ou avecq' eau d'eufraise, ou de fenoil, ou d'esclere, ou avecq' leur ius, ou de veruene, ou de rue, en l'une desquelles eaux, ou desquels ius, aura trempé du coriandre sec, par l'espace de six iours, y aioustant, qui voudra, vn peu de camphre. Ou autrement, on reçoit le conseil d'Auicenne, qui dit, que le collyre blanc de Rasis est fort bon, distilé souuant aux yeux, l'y appliquant premierement & au cōmancement avec camphre : puis quand la verole ne sort plus, sans camphre, avecq' eau rose : & a la fin, avecq' eau de fenoil, ou avecq' vin blanc. Ou autrement encore, on les defend avecq' collyre de ius de verbene, ou de ius des herbes susdittes, avecq' blanc d'œuf battu, ou de leur eau distilée, avec antimoine, ou aloë, ou tuttie. Et ce temps-pendant, s'il y ha grand' rougeur aux yeux, ou grand mal autour, faut oster l'enfant de la grand' clarté, & de la veüe des choses rouges. Et par ainsi, les medicamens, pour la defense des yeux, quand la verole commence, doiuent estre repercusifs, comme ba-laustes, sumac, myrtilles, coriandre, camphre, blanc d'œuf battu, eau rose. Et quand elle est a son plus fort, & sort en habondance, & apporte rougeur aux yeux, doiuent estre desiccatifs, partie ayant force de resoudre, & de conforter la veüe, comme antimoine, aloë, tuttie, le collyre blanc, le safran, les ius ou eaux distillées de verbene, de fenoil, d'eufraise, & d'esclere : partie ayant vertu de repercuter & empescher que la matiere n'y flue plus, comme camphre, eau de plantain, eau de rose, & semblables.

Pour defendre le nez.

On defend aussi le nez au commencement, qu'il ne luy vienne de la verole, faisant sentir du vin-aigre seul, au avec eau rose, y aioustant, par l'autorité de Razis, des santaux, soit lors qu'on fait l'enfant suer, de peur qu'il ne vienne en syncope, soit apres la sueur. Le mesme Razis fait mouiller le nez souuant avec vn linge trempé d'eau rose, verius, & vin-aigre: combien qu'avec du cotton en lieu de linge, & sans verius cela se peut faire. Et aux parties superieures des narines on fait defensif avec decoction de santaux, & quelque ius de choses refroidissantes.

Pour la defence de la gorge, & pour engarder que le soufle ne soit empesché.

En mesme temps on obuie au mal de la gorge, en mettant parmy les breuuages qui prouoquent la sueur, des lentilles, & du dragagant: & en faisant mascher es autres heures, & hors la sueur, des grains de grenade, ou de l'ozeille, ou des fueilles & fruits de berberis, ou licher du rob d'aigrest, ou des trochis de berberis mesme, ou tenir souuant en la bouche des nouëts de semence de psyllion, ou de coing, ou d'autre semence froide, ou lauer la bouche d'eau avec vin-aigre ou verius: ou gargarizer, cōme ordonne Razis, du vin de more, avec eau d'orge. Car les choses stiptiques singulierement entre autres choses, preseruent la gorge, & la bouche.

Pour la defense des poumons, & de la courte halene.

On preserue les poumons, & quand on fait suer, avecq' decoction de figues & lentilles, & apres les sueurs avec loch de lentilles, de semence de pauot, de dragagant, & de sirop

violat, ou de sirop de iuiubes, ou de sirop rosat, ou de sirop de papauere, ou de sirop de granatis acido dulcibus, ou de sirop de neneuphare, ou de sirop de fructibus, ou autre semblable.

Pour defendre qu'il ne vienne vlcere aux intestins.

On doit craindre quand la verole ou rougeole sort, que de leur matiere il ne vienne mal aussi aux boyaux: parquoy la decoction de lentilles y est singulierement bonne, & avec les breuuages qui font sortir la verole & la rougeole par sueur, y doiuent tousiours estre mises.

III. Quand tout ce qui ha peu sortir de la Rougeole ou Verole est sorty du tout.

Après qu'on voit qu'il n'en sort plus rien, & que Nature ha poussé dchors tout ce qu'elle ha peu, cōme volontiers au septiesme iour, on se propose cinq ou six choses, qui sont a faire, & a poursuivre l'une apres l'autre, pour la guarison entiere de l'enfant malade. La premiere, est le regime de viure: la seconde, l'euacuation ou purgation, si on voit que besoin en soit: la troisieme, le remede pour oster du tout & effacer la verole ou rougeole, qui est au cuir, & a la superficie de tout le corps: la quatrieme, le moyen de guarir & oster la verole qui est a la superficie des mēbres verolez, tant interieurs qu'exterieurs: la cinquiesme, est pour les accidans qui accompagnent la verole apres qu'elle est sortie: la sixiesme & la derniere, oste du tout & efface les cicatrices & les places qui sont demourees de la maladie.

I. Le regime de viure.

On ne change pas grand' chose du regime precedant, sinon qu'on ne tient plus la chambre si chaude, ni le pa-

II. *La saignée & la purgation, & le benefice du ventre.*

Si la fièvre perleuere es grandes personnes sanguines, & pleines d'humeurs, la saignée est conuenable, si elle n'a esté donnée au commencement: aux enfans non, sinon qu'on les peut ventosier entre les espaules, & fesses, & es cuissesses, avec petite scarification: car cela sert encores a tirer tousiours en dehors la matiere, & a desecher plus tost la verole. Mais quant a la purgation, si elle n'a esté donnée au commencement, auant que la verole ou rougeole sortist, on la peut donner, par l'auis de Razis, au declin, & vn peu deuant que les grains de ladicte maladie sechent, & mesmement si la fièvre perseuere encore: autrement, on se doit garder de trop émouuoir le ventre. En lieu de purger l'enfant qui tette, on purge la nourrice avec vne medecine benigne, telle que s'ensuyt. R. flor. cord. P. j. tamar-Indor. vnc. j. fiat decoct. in qua percolata dissolue cassie vnc. j. mannae, granat. Delphinatis vel bruttiæ non rancidæ, vnc. ij. fiat potus. Et a l'enfant ia grandet, on en peut donner de mesme, selon la portee de son eage, & de ses forces, ou du sirop de cichoree, avec rheubarbe, ou autre semblable. Autrement, s'il n'a besoin d'estre purgé, toutesfois il ha le ventre constipé, pour le lacher, on luy fait prendre du miel parmy sa viande, ou vn bouillon d'herbes remolliuiues, ou vn clystere lenitif, ou vn suppositoire de miel avecq' saumon, ou de chandelle de suifauec sel, ou d'vn coton de choul avec fiel, ou de therbentine: se gardant neantmoins de trop émouuoir le ventre: car aux grandes personnes mesmes ne faut donner medecine forte, de peur de reuoquer quelque matiere du dehors en dedans, & d'engendrer dysenterie, &

principalement en la rougeole, laquelle est faite d'humeur aigue & corrosive.

III. Les remedes pour guarir la V^eerole, ou la Rougeole, qui est au cuir, & a la superficie de tout le corps.

Ce temps-pendant faut maturer la verole, & faire apostumer, puis l'ouurir, puis la desecher & faire tóber les croustes.

De maturer les grains de la V^eerole.

La rougeole ne se meurist point : on la fait secher & tomber seulement . On meurist la verole avec beurre frais ou salé, ou avec le gras du bouillon de lard , ou avec le dedans d'une coefne de lard lauee d'eau tiede, ou avec l'onguant de dialthæa, ou avec vne fomentation de decoction de figues, mauue, guimauue, semence de ferugrec, de lin , & autres semblables. Raz is fait la fomentation de chamomile, melilot, violette, guimauue, & son de froment. Toutesfois si on voit les grains de la verole aspres & scabreux côme verrues, & le malade estre fort mal, & le mal' croistre, ne faut entreprendre de les meurir ne suppurer, par ce qu'ils ne pourroyét l'estre, & que l'accroissement & pululation du mal est pernicieux : autrement cela n'estant point, on les suppure . En quoy faut noter, qu'on doit s'abstenir de toute chose desiccatue iusques la suppuration soit faite.

De les ouurir.

Quand les grains de la verole sont meurs, on les doit ouurir, ou avec des forcettes, ou avec vne aiguille d'or ou d'argent, ou avec quelque bois aromatic pointu en forme d'épine : sinon d'auanture qu'elles creuent & s'ouurent d'eux-mesmes : car s'ils ne sont ouuerts, la sanie demeure & corrompt la chair, puis fait de petites fossettes, puis quand ils sont secs, la face en est deshonorée.

De les desecher & faire tomber.

Après qu'ils sont creuez & ouuers, on les seche premierement avec vn vieil linge delié, puis on applique plusieurs remedes pour les secher, & faire tomber les croustes. Oribase, Medecin de Iulian Empereur, & apres luy Paul d'Ægine, ordōnēt les baigner & estuuer de la decoctiō de fueilles de myrthe, ou de lentisque, & de roses rouges : puis les oindre d'huile rofat, ou d'huile de mastic, ou de l'onguant de ceruse. En lieu duquel onguant, on applique de la farine de froment, ou d'orge, ou de ciches, de lupins, de veces, de feues, de panis, de mil, de ris : ou avecq' les poudres de litharge, de ceruse, d'aloës, de racine de canne, de myrthe, de roses, & de toutes ces choses, ou d'une partie, avecq' vn peu de safran, ou sans safran : lesquelles choses non seulement desechent, ains cōsolident & engendrent la chair. Ou si on veut autrement, on dissout & destrepe quelques vnes desdittes farines avec eau rose, & avec vn linge mouillé dedās, & on en oingt le malade. Ou bien autrement encore, on les destrempe toutes, ou vne partie, dans la decoction de myrtilles, de cypres, de tamaris, de faule, de lentisque, de roses, & semblables, avec vn peu de sel, ou dans de l'eau rose, cōme ha esté dit que lon fait, puis cuire avec du beurre ou autre graisse, avec la vertu du safran. Si on ayme mieux autrement, on les graisse de lard avec eau salee : puis on respand dessus les poudres ou farines susdittes. Aucuns prennent de la breche des mouches a miel, avecq' farine d'orge, & en oignent la verole pour la secher & faire tomber. Si on voit qu'elle soit trop humide & sanieuse, on se doit garder de l'estuuer, ains la faut seulement parfumer, comme conseil-

le Rasis, des fucilles d'amandiers seches, ou des fucilles seches de roses, ou de lentisque, de myrthe, de cyprez, d'olive, & des sandaux : puis repandre dessus des farines & poudres susdittes. Ou autrement, mettre dessus de l'onguant blanc, composé de ceruse, huile rosat, & camphre, broyez ensemble. Puis quand les croustes sont seches du tout, on les fait tomber avec huile tiede. Ou bien, premierement on l'estuue de la decoction de myrtilles, de roses, & semblables, selon le conseil d'Oribase & de Paul d'Aegine : a laquelle decoction Rasis aiouste des balaustes, c'est a dire, des fleurs ou boutons de grenade, avec vn peu de sel: puis on l'oingt d'huile rosat, ou d'huile violat, si elle est trop seche. Auicenne les fait tomber vite ment, pour les lauer d'eau salee, avec vn peu de safran: & cōseille, si on veut, d'y aiouster de l'eau rose : il la fait autrement encore lauer de la decoction de tamaris, de lentisque, ou de lentilles, & de roses, avec du sel, en y aioustant quelquefois des sandaux & du camphre. En lieu de les lauer ou estuuer, Rasis les fait parfumer de fucilles de myrthe, & de tamaris, pour les faire tomber, tout ainsi comme il fait pour les faire secher.

IIII. *D'oster les accidans qui suruiennent quand la Verole est sortie.*

Communément deux accidans auiennent apres que la verole est sortie, lesquels portent grand' nuyssance: sçauoir, le prurit, ou enuie de gratter, & par cela quelquesfois de grands vlceres & écorchures.

Le Prurit.

Quand donques on verra que la verole demange a l'enfant, & qu'il veut gratter les lieux verolez, pour ce que le

grattement est cause d'irriter la matiere, & de faire vlcere, dont les cicatrices puis apres & le visage demeureront laids & difformes, il luy faudra lier de bandes les mains, qu'il ne touche les lieux qui demangent, & specialement les yeux, dont plusieurs sont deuenus auceugles: autrement il faudra que la nourrice, ou vne autre femme, frotte doucement avec vn linge l'endroit ou il demange: ou qu'elle l'estuue avec eau salee de la decoction de guimauue, violette seche, orge mondé, & fueilles de coucourde en leur saison, ainsi que conseille Rasis, ou de quelque autre chose conuenable au prurit, comme la decoction de fenegrec, de iotte, & de son de froment, ou d'orge, ou le frottement de la farine de lupins, ou des autres susdittes ordonnees pour le desechement. Et si a la plante des pieds ha demangeaison, le mesme Rasis les fait estuuer d'eau chaude, puis oindre d'huile, ou de beurre, & de dattes broyez ensemble: car cela, dit-il, cede la douleur, mollifie & fait la matiere facile a sortir.

L'écorchure.

Et quand il auient que le cuir est vlcéré & écorché de la verole, Rasis ordonne de l'aloë, de l'encens, & du cinabre en liniment: Auicenne de l'onguant blanc meslé avecq vn peu de camphre: & conseille encore d'y aiouster, qui voudra, du litharge nutrit, & broyé long temps, pour en faire l'onguant que nous appellons, vnguentum nutritum camphuratum: & prise fort encore pour cela, le lauement d'hydromel simple ou composé de la decoction de myrthe, rose, lentisque, & squinante, auant qu'oindre la verole écorchée.

V. *De guarir la Verole qui est en la superficie des membres, tant intérieurs qu'extérieurs, qui n'en ont peu estre guarantis.*

Reste a guarir les membres offensez de la verole, lesquels on n'a peu guarentir, quelque chose qu'on ayt peu faire, pour l'empescher, a cause de la trop grande habondance de la matiere qui y est venue.

De guarir les yeux verolez.

Si donques apres que la verole est sortie, il est venu mal aux yeux, nonobstant quelque empeschement & defense qu'on y ayt peu faire : premierement on doit oster l'enfant de la grand' clarté, & de la veüe des choses rouges : puis incontinant apres faut desecher la matiere demeuree es yeux, avec medicamens desiccatifs, & qui confortent la veüe, comme l'antimoine detrempe avec eau de fenail & d'eufraise, ou l'onguant blanc avec l'une desdites eaux. Et s'il y est aduenue quelque autre maladie, faut la guarir encore selon que sera icelle maladie.

De guarir le nez verolé.

Si pareillement il est venu des grains de verole, & des croustes au nez, on y doit remedier en ceste maniere : On compose vn onguant d'huile violat, de dragagant, & de cire, qu'on applique dedans avec du linge ou du cotton, en maniere d'une tente, ainsi en vsoit Rasis : on peut faire d'autres onguans non moins vtiles, composez de cadmie, ou d'aloës, & quelques autres choses dessicatiues & abster siues, avec huile rosat, & vn peu de cire, a mesme intention.

Contre le mal de la bouche, & de la gorge.

La bouche & la gorge sont souuent paffiõnees de la verole, & y auient écorchure avec enrouëure de la voix, & difficulté d'aualer la viande en l'estomac. Pour y remedier, si le mal n'est grand, suffit de gargarizer d'eau sucee chaude, & la licher peu a peu, cõme vn loch, ou tenir en la bouche tablettes

de sucre rosat, ou de diagragant froid, ou du sucre candi, ou des pilules blanches, ou aualler peu a peu de l'huile d'aman-
des douces extraite sans feu, & sucrée: ou prendre vne pa-
ste ou masselpain tel que Razis ordonne. Rec. amygd. dul.
purgatarum partem vnā, sem. cucurbitæ partes duas, sac-
chari partes tres, tere & coque vt decet. Mais si l'écorcheu-
re est grande, faudra vser de gargarisme de vin de grenade,
ou de vin de mores de toutes especes, simplement, ou avec
eau d'orge, ou du diamorum dissoult en eau de plantain, ou
en eau rose, ou en eau de chieure—fueil.

A la verole des Poumons.

S'il y ha de la verole aux poumons, ce qui se cognoist par
l'enrouëure de la voix, & par la courte halene: Razis fait v-
ser de l'electuaire de diapaouer, ou de diacodion.

A l'écorcheure des boyaux, & au flux de ventre.

Et si la verole est es boyaux, & y ha vlcere, qu'on appel-
le disenterie, Oribase ordonne de manger du mil: autres
ordonnent du ris: Razis du bouillon de chair cuitte avecq'
vinette, ou aigrest, ou ius de grenade. Que si le mal est grād
& perseuere, faut donner premierement vn clystere lauatif,
de decoction d'orge, & de miel rosat: puis vn autre restrain-
tif, de laiët ferré, avecq' suif de bouc, ou autre plus ressierrant,
tel que s'ensuyt, de l'ordonnance de Boeth, ou autre sem-
blable. R. ex succis mespilorum, sorborum, cornorum fru-
ctuum, aut foliorum, an. quart. j. succi quercus vnc. iiij. sem.
anethi, sumach, berberis, hypocystid. gallar. an. vnc. j. se-
min. plantag. vnc. f. fiat decoct. in qua percolata diss. al-
bumina duorum ouorum in aceto per totam noctem cocto-
rum, adipis renum caprar. vnc. j. ol. citonior. ol. mastich.
an. vnc.

an. vnc. f. fiat clyster. Puis apres faut bailler les choses requises en la cure de telle maladie, comme le sirop de ribes, de berberis, de plantain, de coings, d'aigrest, de roses seches, de consolide: & comme les trochis, ainsi que Rasis ordonnoit, de semence de sumach, de coriandre, & de spodio Arabum, composez avec ius de vinette ou d'oseille: ou les trochis de semine acetosa, de bolo armeno, de carabe, ou de berberis: lesquels on fait prendre, ou en breuuage en decoction commode, ou en elactuaire en sorte d'opiate: & pareillement la gomme Arabique, & la gomme de dragant, avec ius de coing, ou autre semblable. Aucuns font prendre la fumee de pomme de pin bruslee, par le bas du ventre, par deffoubs la selle percee, & cela est bon.

V. I. Pour oster du tout & effacer les cicatrices qui sont demourees de la verole.

Les cicatrices de la verole viennent communément en deux lieux: sçauoir, en la superficie de tout le corps, & es yeux, ausquels vient blancheur, & bien souuant perte de la veüe. Et ceste est la derniere chose qu'il faut faire en la cure de la verole & de la rougeole, d'oster lesdittes cicatrices, & les taches qui en sont delaissees: a quoy on trouue beaucoup de remedes & de receptes, dont les vns sont poudres seulement respandues sur le cuir, apres le bain ou estuement, les autres sont linimens simples, meigres ou gras, d'eaux ou de graisses, les autres sont linimens composez de poudres, & desdittes eaux ou graisses.

Pour oster les cicatrices des yeux.

Le sucre candi est bon a oster la blancheur des yeux, & aussi l'amoniac mis en poudre, la myrrhe, & le miel bruslé.

Pour oster les cicatrices du cuir par esbatement & asperſion de poudres.

Il conuient premierement baigner ou estuuer l'enfant, puis répandre sur les cicatrices de la poudre de cancre brulé, ainsi comme conseille Razis, ou de la cendre de vin-aigre seule, ou avec myrrhe & musque. Ou autrement, faut battre de l'eau long temps avecq' la racine de canne ou de faule, ou la faire bouillir avec, & en lauer ou estuuer l'endroit des taches : puis répandre dessus vn peu de poudre de litharge.

Par liniment composé de poudre, & de quelque liqueur grasse ou meigre.

On prend, par l'ordonnance de Razis, de la poudre de litharge blanche, des os bruslez, de la racine seche de canne, des coupeaux de sandaux, des amandes ameres, des semences de rayfort & de pepon, des farines de ris, de feues, de lupins, de ciches blanches, de fasoels, en telle quantité qu'on veut, que lon fait dissoudre & broyer avec eau rose : puis on en oingt les cicatrices du corps apres l'auoir baigné, ou apres l'auoir parfumé de la vapeur d'eau chaude en chauderon : aucuns font bouillir en l'eau de la paille d'auoine, ou de froment, ou d'orge, pour en parfumer le visage.

Encore vn autre leniment du mesme authcur.

On prend des coignes d'œufs, & des os bruslez, de la racine seche de canne, ainsi que dessus, de lamydon, des farines & semences susdittes, des grains de ben, du coste, de l'aristolochie longue, en grande ou petite quantité, comme on voudra : desquelles choses on fait poudre subtile, & a-

uecq' eau d'orge on en forme vn liniment, duquel on oingt les lieux qui sont tachez, les laissant ainsi l'espace de vingt-quatre heures : & après on les laue avecq' eau d'orge & de violette de Mars.

Encore vn autre, fait par certaine dose, d'une partie des mesmes choses, bien experimenté.

Prenez de la farine de ciches blanches, drag. vj. de farine de lupins, drag. iij. du coste doux, & de litharge blanche, de chacun drag. j. faictes en poudre, & en formez liniment avecq' eau d'orge, & en oignez ainsi que dessus est dit.

Encore vne autre d'une partie des choses susdittes, & d'autres, fait autrement.

Prenez de l'amydon de froment, des amendes pelées, de chacun drag. ij. du coste doux, & du dragagant, de chacun drag. f. de racine de canne, drag. iiij. de semence de melon entiere, de feues seches pelées, de farine d'orge, de chacun drag. iiij. de safran, scrup. j. faites poudre passée par vn sas, ou tamis, mellez avecq' égale mixtion d'eau rose, & de ius d'écorce d'orange, & faites liniment, duquel oignez souuant les lieux tachez, avecq' vne plume, & les laissez ainsi toute la nuyt : le lendemain matin lauez les avecq' la decoction de chamomile, melilot, & violette de Mars.

On en fait encore vne autre de farine de feues, & de lupins, avecq' vrine de taureau, tant que suffit, duquel on oingt la face, le laissant ainsi toute la nuyt, & au lendemain matin, on la laue d'eau pure, avecq' assurance de guérir en bref temps. Encore vn autre, en ceste maniere.

On prend des coques brulées, & de la fiente de vache brulée, que lon broye avec de l'eau, dequoy on oingt toutes cicatrices de quelque cause qu'elles soyent venues.

Plus encore vn autre, qu'on fait de l'écorce de poupon, & de violettes seches tant que suffit, les faisant cuire dans de l'eau, que puis apres on broye avec beurre frais.

Par liniment simple d'humeur grasse.

La graisse d'oye, de canard, & de chapon, comme dit Auicenne, est bonne a cela. On ha experimenté, que la graisse d'asne fondue avec huile rosat, est pour cela mesme vne chose singuliere. Et dit-on que l'huile de lis y est bonne. Mais sur tout, l'huile de pistaques, dittes en Latin, pistaciorum, es boutiques des Apoticaire, fisticorum, efface toutes les cicatrices de la verole.

Par liniment simple d'humeur non grasse.

Le sang de lieure tout chaud appliqué souuant, remplit les cautez, & fait le cuir égal & plein, & comme Dioscoride escrit, oste les taches du corps, & corrige la noirceur & brusleure du soleil. Autant en fait le sang de taureau, avec farine d'orge fritte, ou avec gruaut, ostant & amolissant les duretez du cuir. L'eau distillee de fleur de feues, est bonne aux cicatrices de la verole. Semblablement l'eau de fleur, ou racine de lis. On ha experimenté que l'eau qui sort des ongles des pieds bruslez, de mouton, ou de chieure, vaut merueilleusement a cela. Et dit on encore que l'eau distillee de la racine de canne, y est fort bonne. Et pareillement celle de coques d'œuf.

De la grosse Verole, dite autrement la gale de Naples.

C H A P. X I.

C E L L E maladie qu'on appelle en France, gale de Naples: en Italie, mal François, cōmunément la grosse verole, est semblablement contagieuse comme l'a-

tre gale, & l'autre verole: & ie l'ay mise du nombre des maladies vniuerselles de tout le corps, par ce que la cause dont elle est engendree, est vne qualité veneneuse, laquelle infecte les humeurs, & est répandue parmy les venes: combien que les douleurs & les pustules, & autres symptomes peuvent estre fichez en certain endroit, & non par tout.

Elle auient aux enfans, comme aux grandes personnes, lesquels la prennent, ou de naissance tant du coste du pere que de la mere, ou de la mammelle de la nourrice verolee, ou du baisement & attouchement de la langue & salive d'elle mesme, ou d'auoir esté vestu ou couché en linge mal net de quelque infect d'icelle maladie. I'ay veu a Tours vn orfeure qui depuis quatorze ou quinze ans qu'il auoit sué la grosse verole, n'en auoit senty aucun mal, & sembloit estre bien sain: & neantmoins tous les enfans qu'il ha heu depuis, peu de temps apres qu'ils ont esté nez, comme enuiron vi. ou viij. iours, ont heu la verole, & l'ont dōnee a leur nourrice: encore que la mere fust honneste femme, & bien renommee, laquelle (qui est vne chose merueilleuse) n'ha iamaïs prins le mal de son mary, & n'en ha esté attaincte en aucune maniere. Or pour guarir les enfans qui ont ce mal, s'ils l'ont du ventre de la mere, conuient faire vser a la nourrice du boys de guaiac, la purger & la nourrir tout ainsi cōme si elle-mesme en estoit malade. Et si l'enfant l'ha prins de la nourrice, faut la changer, & faire faire a l'autre nourrice la mesme diete qu'on feroit faire a l'enfant, s'il estoit en cage, a fin que la vertu du medicament soit prinse de l'enfant avecq' le lait. Et ce temps-pendant faut lauer & baigner les pustules de l'enfant avecq' vn linge trempé dedans ladicte decoction du bois de guaiac,

ou de la faïſſe parrille, ou de la racine deſquines, & les oindre avec l'huile dudit boys, meſlé avec beurre frais, ou avec muſtilage de racine de guimaue : puis mettre deſſus de la poudre deſiccatiue d'antimoine, litharge, ceruſe, tuttie, plomb braſlé, roſes, & ſemblables: laquelle poudre, ſ'il y ha vlcere, ſera appliquee ſeche, apres auoir eſtuué l'vlcere d'eau de plantain, & de la decoction ſuſditte, avecq' miel roſat. Et pour le faire ſuer luy-mefme, nonobſtant que ſa nourrice ſue pour luy, toutesfois pour luy prouoquer la matiere, qui fait la maladie, lu dedans en dehors, par autre voye que par le laiſt de la nourrice qu'il prent, faut mouiller des eſtoupes de la meſme decoction de guaiac, & les luy appliquer chaudement bien exprimees, ſoubs les aïſſelles, au dos, & ſur le ventre: ce que j'ay pratiqué heureuſement. Et ſi d'auanture il ha mal en la bouche, il conuient faire bouillir en celle decoction de l'écorce de grenade, ou de ſes boutons, des roſes, du ſimac, & des myrtilles, y meſlant vn peu d'eau de plâtain, puis apres l'auoir coulee, y diſſoudre du diamoron, ou du miel roſat, & luy en faire gargarizer: ou autrement, toucher le mal avec le meſme diamoron, ou miel roſat, vn peu deſtrempé de celle decoction ainſi faite. L'enfant ia grandet, pourra luy-mefme prendre en breuuage, la pure decoction du guaiac, & faire la petite diete, ſelon ſon eage tēdre, & ſa petite portee. J'ay guarý a Tours vne petite damoiſelle, de l'eage de trois ans, qui auoit le viſage mǎgé de verole, la faiſant vſer de la racine deſquine ſeule, ſans luy faire autre choſe. Ne faut oublier ce temps-pendant, d'entretenir le benefice du ventre du petit enfant, avec ſuppoſitoire ou clyſtere, & ſ'il eſt ia grandet, le purger vne fois avec de la caſſe, ou de la mǎne, ou avec ſirop de cichoree cō-

posé de rheubarbe : suyuant la diétine generale declairee au Traitté premier de ce cinquiesme liure.

De la maigreté ou langueur de l'Enfant.

CHAP. XII.

ON MET encore entre les maladies vniuerselles de tout le corps, celle dont quelquefois il auient que l'enfant est en langueur, & ne profite point : laquelle indisposition est semblable a la fièvre hectique, iagoit qu'elle soit sans fièvre : les Grecs l'appellent Atrophie, c'est a dire, n'amander point par manger beaucoup : plusieurs la dient estre vne espece de Cachexie, c'est a dire, de mauuaise habitude de corps, faisant deux especes d'icelle, l'vne qui est boufe & blafe, laquelle auient plus cōmunément aux vieilles gens, a cause de la debilité de leur faculté vitale, combien que les enfans n'en soyét pas exempts : puis ceste espece cy a laquelle les enfans sont subiets, a cause, dit Aëce, de la rarité & mollesse de leur cuir, par laquelle les vapeurs grassettes, & les bonnes humeurs transpirent & sortent, & ainsi deuiennent meigres & chetifs : combien que ceste raison n'est suffisante eomme celles qui s'ensuyuent.

Les causes dont procede Atrophie & langueur es Enfans.

Elle auient a l'enfant de plusieurs causes : ou pour ce que le lait de sa nourrice ne vaut rien ce temps-pendant qu'il tette : ou pour ce qu'il n'est pas tenu nettement ne chaudement : ou pour ce qu'il ha esté détrié trop tost, & ne veut point tetter d'autre nourrice : ou pour ce qu'apres estre détrié, encore qu'il ne l'ayt esté deuât le temps, il n'vse pas de bon regime, ne de bōne nourriture : ou pour ce qu'il ha esté malade au parauât, & encore qu'il soit guarý ne se peut re-

mettra, ou pour ce qu'il ha quelque debilité des viscères, comme de la rate, & spécialement comme ce qu'on appelle le carreau, a quoy les enfans sont subiects, a cause ou de crudité, ou de gourmandise, ou de boire trop d'eau, & mesmement de mauuaise eau.

La maniere de guérir l'Atrophie & langueur des enfans.

Pour remedier a laquelle indisposition, faut regarder a chacune desdittes causes. Car si ce mal auient de la debilité des viscères, faut premierement oster icelle, & si c'est d'autre cause, il conuient proceder aux remedes en ceste maniere. Premierement, quant en maniere de nourriture, si l'enfant est en rage de tetter, le faut remettre a nourrice: ou s'il ne la veut, le nourrir de lait de chieure sucré, & de lait d'aman-
de, & luy faire boire encore de bonne bouillie sucrée, de bonne panade cuite au pillon de chapon, de bon coulis ou consommé, du blanc manger, fait de lait d'aman-
de ou de lait de chieure, avec amygd. blanc de chapon, & sucre, & quelquefois de masse paine de pinons, d'aman-
des, de moelle de raisins de damas, & blanc de cha-
pon, & de sucre: & luy faire boire de l'eau de... principa-
lement s'il ha le ventre enflé. Si l'enfant est de... il con-
vient le nourrir de mesme, & outre ce, luy faire manger du
beurre souuant, & des œufs cuits mollets, & des Syues at-
tiedies d'eau rose, & des raisins de damas, &... et
tiedies, mondez & sucrez. Et quant aux autres genres de re-
medes, on doit tous les iours deuant le repas baigner l'en-
fant d'eau douce pure, ou d'eau de decoction de... &
pieds de mouton, ou de tripes grasses: puis ou sortir du
bain, l'oindre doucement tout le corps de graisse de porc

fraiche, de graisse de quené de mouton, & d'autre graisse douce : de beurre frais avecq' huile violat, ou huile d'aman-
des douces : toutes lesquelles choses on peut composer en-
semble, qui veut, en forme de liniment ou d'onguant, avec
un peu de cire vierge. Les clysteres de broüet de tripes luy
sont bons, & ceux qui seront composez de lait & de bouil-
lon de chair, non seulement pour oindre les boyaux, & en-
tretienir le benefice du ventre, mais aussi pour nourrir : car
les venes meseraïques les tirent au foye, & par ainsi ils
nourrissent. Et tout ainsi que l'enfant au ventre de la me-
re prenoit nourrissement par la vene umbilicale, aussi nous
pouvons iuger que le semblable se peut faire par le clystere.
Tout ce temps pendant le faut garder de chagrin & de fa-
cherie, le tenir nettement & ioyeusement, avec ébatemens
& chansons.

De corps bouffé, & enflé.

CHAP. XIII.

ENCORE y ha une autre maladie vniuerselle, sans fie-
vre, ditte des Grecs Emphysema, enflure en nostre lan-
gue: comme quand le corps est bouffé, au rebours de
celle que venons de dire: laquelle enflure iacoit qu'elle sem-
ble a hydropisie, neantmoins est differente d'icelle.

Les causes dont elle procede.

Elle vient de certaine aquosité épaisse, ou de ventosité
grosse, par la force de Nature enuoyee au cuir, ou comme
Aucenne escrit au troisieme Fen du premier Canon, d'y-

ne ferueur & bullition qui se fait es humeurs, par vne chaleur estrange, de laquelle la matiere aigueuse & veteuse souleuee au cuir, & le trouuât espois & reserré, a cause de quelque froidure ou pourreté que l'enfant ha souffert, ne pouuant transpirer ne sortir par sueurs, ou autrement, enfle le cuir, & rend le corps tout enflé. Et peut encore en estre cause, la chaleur naturelle debile, tant de l'esthomas, que celle laquelle regit les facultez nutritiues des autres membres, laquelle ne peut bié digerer ne reigler les humeurs, qui pour ceste cause demeurent crues, aigueuses, & pleines de vents. Et la cause primitive de tout cela, est l'aliment prins par la bouche, excessif ou en qualité mauuaise, ou en quantité trop grande, lequel par la chaleur naturelle debile ne peut estre digeré, & par ce, engendre crudité, & par consequant substance aigueuse & veteuse.

La guarison.

On guarit ceste maladie, en ostant la matiere qui l'engendre: en rarefiant le cuir qui la contient: en fortifiant les parties debiles, qui sont causes d'icelles. On oste la matiere, partie par dedans, en purgeant l'enfant ia grandet, ou la nourrice du petit, & en prouuant les vrines & les sueurs: partie par dehors, en frottât, en estuuât, en appliquât échauffatoire, & en oignant le cuir de choses a ce cōuenables. Les choses pour purger sont medicamens hydraguogues & flegmaguogues, qui doiuent estre gracieux & benins, avec ceux qui dissipent les vëtositez: cōme le sirop rosat laxatif, le catholicon, le sené, le rheubarbe en substance ou en infusion, avec la decoction de galanga, d'anis, de coriandre, & semblables. Les choses qui prououquent les sueurs, sont cōme

figues, semence de fenoi, reglice, & quelques autres. Celles qui enuoyent par les vrines, sont comme l'oxymel diuretique, le sirop de radicibus, le sirop de cichoree composé, le sirop de bizance, la decoction des racines de graminis, d'asperge, semence d'anis, de coucourde, de melon, & d'autres assez cogneuz semblables: finalement la decoction du bois de guaiac, ou de la racine d'esquine. Les choses pour estuuer en ceste maladie, afin de tirer la matiere par sueur, sont telles: on fait bouillir les sommitez de feuz & d'yeble, avec vin blanc, pour y tremper quelque linge, dequoy on estuue ou enuoloppe l'enfant chaudement. Autrement, on luy applique aux aisselles & sur le ventre, des échaufatoires de vescies ou vaisseaux propres pleins de la dite decoction, ou d'eau pure chaude. Puis on l'oint soir & matin d'huile de chamomile, ou du ius, ou de l'onguant d'agrippa, y aioustant du ius de sauge, & de la poudre de semence de coumin, & d'ache, ou de persil, ou de baques de laurier. On rarifie & ouure le cuir par les frottemens & applications des mesmes choses, qui font transpirer les humeurs & suer. On fortifie les visceres & parties interieures debiles, par bonne nourriture, & par entretenement de la netteté du corps, sans vsfer d'autre medecine.

De la couleur blasarde, & mauuaise habitude du corps de l'enfant quelque peu bouffe. CHAP. XIII.

VN E semblable maladie a ceste-cy, est celle que les Grecs nommēt Cachexie, c'est a dire, mauuaise habitude, en laquelle la charnure & les parties qui sont autour des os, sont remplies d'aquosité, & sont mollaſſes, & le cuir est lasche & blasé, & de mauuaise couleur, cōme entre

blanc & verdastre, & tout le corps du malade las & debile, ne se pouuant quasi soutenir, accōpaigné d'une courte haleine : & est ceste maladie quasi comme vn commencement de disposition hydropique, ressemblant a peu pres celle espece d'hydropisie, qu'on appelle en Grec Anasarcha, & Hyposarcha, & Leucophlegmatia : combien qu'il y ha encore vne autre espece de cachexie par laquelle l'enfant n'est pas bouffe, mais est meigre, chetif, & en langueur.

Les causes de la maladie.

Cachexie ou mauuaise habitude procede de certaine intemperature froide & humide de toute l'habitude du corps : on appelle habitude du corps, la charnure, les parties autour des os, & le cuir. Et celle intemperature vient de ce que le foye ne sanguifie point, & pource est cause d'engendrer hydropisie. Parquoy Paul l'appelle commencement d'hydropisie, & le prince des Arabes, disposition qui va deuant hydropisie. Et la faute de faire le sang, procede de toutes choses quelconques peuuant refroidir le foye, & l'habitude du corps, comme de longue maladie, de debilité de la chaleur naturelle, mesmement es vieilles gens, d'oppilation ou durescé de la rate, de mauuaise nourriture, & de trop boire, & boire eau froide, de flux de sang, de flux de ventre, de la retétion des superfluitez, & faute de se purger des ordures & excremens ordinaires : pour lesquelles choses, le foye refroidy & debile, fait & distribue vn sang froid, aigueux & flegmaticq'.

La cure par regime de viure.

Le regime doit estre chaud temperément, & subtil, & sec. Parquoy on doit tenir l'enfant en lieu qui ne soit ne

froid ne humide: l'engarder de dormir de iour, & s'il est ia grandet, de trop dormir la nuyt, l'exerciter & frotter avecq' linge, luy faire vser de bonne viande, & de facile digestion, ne luy bailler point de bouillie, ni aucune nourriture visqueuse & trop humide: bailler peu a boire, & seulement de l'eau sucee & canee: & s'il ha soif entré les repas, luy donner celle mesme eau en laquelle on ayt fait cuire de la racine de graminis, ditte autrement, dent de chien, avecq' de la rapure de corne de cerf.

Par medecine.

Quant a medecine, il faut purger l'enfant ia grandet, ou la nourrice du petit, avec catholicon & sirop rosat laxatif, ou rheubarbe, ou mirabolans, & sirop de cichoree, ou avec la bierre de Galien. En apres le faut mettre aux bains alumineux premierement, puis nitreux & sulphurez: sinon luy faire vser du guaiac, ou de lesquine, ou de la false-parille. Ce temps -pendant, secourir au foye, de quelque endroit que le mal soit venu, & aux parties debiles, qui communiquent avec le foye. On le fortifie par le sirop d'absynce, & par les trochis de dialacca, & de eupatorio, en beuant incontinant apres la decoction sucee, ou des mesmes choses, ou de la racine d'yringue, d'absynce, commun, & d'agrimoine.

De la iavnice des Enfans. CHAP. XV.

LA IAVNICE est vne effusion & éparsement du fiel ou de l'excrement melancholique, par tout le corps: & pour ce elle est du nombre des maladies vniuerselles, iaçoit qu'elle ne se monstre qu'au dehors, & a la superficie du cuir.

Les causes, avec leurs signes.

Elle vient aux enfans quelquefois de morsure de serpent,

quelquefois de la corruption du sang conuerti en habondance de cholere, a cause d'auoir trop mangé de viâdes qui engendrent tel sang, ou pour auoir vsé d'autre mauuaise nourriture: & quelquefois de l'oppilation de la ratte, ce qui se cognoist par la courte halene, & par le mal du flanc gauche, & par la tristesse, & par les vrines tannees ou noires: quelquefois de la debilité de la vescie du fiel, qui ne peut l'attirer du foye, ou de l'oppilation de ses vaisseaux: ce qui est manifeste par la pesanteur qu'il sent au costé droit, sans fieure: & quelquefois de l'estoupemēt du conduit qui porte la cholere aux intestins, dont il auient que la matiere fecale est blanche, sans sentir pesanteur au droit costé.

La cure.

La cure se diuersifie selon les causes qui sont diuerses: car si la maladie est causee de morsure de beste veneneuse, faut faire boire de la theriaque, & appliquer sur la morsure vne ventose, avec scarification, puis emplastrer dessus de la theriaque mesme, ou autre chose attractiue, resistant au venin, & empeschant qu'il ne monte au cœur: autrement venant la maladie des autres causes, on doit purger avec rhuubarbe, & sirop de cichoree, au avec catholicon, & decoction cordiale: faire vser du sirop d'absynce, de bizance, d'endiue, & de capilli veneris: tenir regime subtiliant & apperitif: euitier fruits cruds, & salades: boire vin blanc: faire baigner l'enfant, & dedans le baing luy bailler a boire ius de parelle, qu'on dit en Latin, lapathum acutum, ou du ius de vinette, ou d'endiue, ou du ius de l'écorce de rayfort, avec vin blanc: apres le baing, frotter son corps, & le faire suer. Et pour oster la mauuaise couleur des yeux & de la

face, il conuient luy faire attirer par le nez du ius de mouron, dit en Grec & Latin, anagallis, & du ius de bette, pilez avec bon vin-aigre fort: & tout cela s'entend pour l'enfant qui n'est plus a nourrice. Et voila iusques icy ce qu'on peut enseigner en bref des maladies vniuerselles du corps, des causes d'icelles, & de leur guarison: qui est la fin de la premiere partie du second Traitté de ce liure cinquiesme.

LA DEUXIESME PARTIE

DV SECOND TRAITTE' DV

cinquiesme Liure: laquelle est de la
cure particuliere des maladies de
chacune partie du corps
de l'Enfant.

LEST temps maintenant de venir a la cure speciale & propre des maladies de chacun membre du corps de l'enfant: qui est la deuxiesme partie du second Traitté du cinquiesme liure, entrepris pour enseigner la maniere de guarir les maladies des enfans. En quoy faut presupposer, qu'autant & toutes telles maladies auiennent aux enfans comme aux grandes personnes, & plus encore: mais nous traiterons seulement celles qui leur sont peculieres, & leur auiennent plus communément, & ce sommairement, & sans recercher par le menu leurs differences, ni d'ou elles sont engendrees, sinon bien peu: remettant a deduire & discourir amplement les origines & sources de chacune, les marques & enseignes pour facilement les discerner & cognoistre, & les iugemens qu'on en peut faire, avec les opinions & practiques des anciens Medecins, en vn autre plus grãd liure, que i'ay escrit de ceste matiere.

Lesquelles maladies, qui le plus communément surviennent aux enfans, ie distribue & arrange en certain ordre, selon qu'elles doiuent estre traitees par escrit. Au premier, sont les maladies des parties de la teste: au second, celles de la gorge, & de la poitrine: au tiers, celles de l'esthmac, & de chacune partie du ventre: au quatriesme & dernier, celles qui viennent au dehors du cuir.

Le rolle & denombrement des maladies de la teste.

On depart les maladies de la teste en plusieurs endroits d'icelles: les vnes sont de tout le circuit du cerueau, les autres du cerueau mesme, les autres des yeux, les autres des oreilles, les autres des dents, des genciues, de la bouche, lesquelles de rechef sont departies en la maniere qui s'ensuyt.

Des maladies du circuit de la teste. C H A P. I.

LES MALADIES du circuit de la teste & du cerueau, sont comme la grosseur enorme de toute la teste, qui est ditte macrocephale: & l'enflure venteuse d'icelle qu'on appelle physocephale, autrement emphysema capitis: & l'enflure aigueuse, qui est appelée hydrocephale, autrement hydrops capitis: & certains apostumes qui naissent en aucuns endroits entre chair & cuir.

De la grosseur enorme de la teste.

On voit quelquefois aucuns enfans naistre la teste grosse outre mesure, non de ventosité ou aquosité, cōme il auient a aucuns, mais de la grande estendue du crane & test, & des os qui enuironnent le cerueau, & des peaux & chairs qui sont autour, dont la mere traueille beaucoup a l'enfantement & auient quelquefois apres qu'ils sont nez, que la teste leur

croist

croist tellement que ne la pouuant soustenir ilz meurent, comme tesmoigne Razis. Combien que i'en ay veu aucuns qui n'en sont pas morts : & encore au-iourd'huy a Chastellerault, ou ie demeure a present, y ha vne fille d'un apothicaire qui l'ha monstrueusement grosse, laquelle ha sept ou huyt ans, & mange fort bien, mais elle ha les cuisses & iambes fort menues, & ne se peut soustenir. Et ceste grosseur de teste est nommee des Grecs Macrocephale, & ceux qui l'ont Macrocephali : laquelle plusieurs autres ont appellé Elephantia capitis. Et n'y ha moyen de la guarir, non plus que celle qui luy est contraire, ditte en Grec Microcephale, c'est a dire, Petite teste : d'autant que l'une & l'autre procedent de l'erreur de Nature en son action d'accroistre & nourrir, & non d'excez de trop ou moins de nourriture, & pource les Medecins n'en traitent point en la cure des maladies.

II. De l'enflure de la teste ditte venteuse.

Celle grosseur de teste est seule traictee, laquelle ha seulement apparence de grosseur, & n'est ni ossee ni charnue, ni autre chose, sinon vne enflure ou enleueure de la superieure partie de la teste, depuis le front iusques a la nuque : laquelle est faicte d'abondance d'eau ou de vent là engendrez ou enuoyez des autres parties du corps : Et par-ainsi elle est de deux especes, l'une venteuse, l'autre aigueuse : & tant l'une que l'autre est vraye maladie, d'autant qu'immediatement & du premier coup elles offensent les actions de Nature, dit Auicenne en la premiere Fen du troiesme liure, & les offensent tellement, comme dit Razis, qu'elles introduisent bien souuent la mort.

L'enflure donques de la teste a cause des ventositez, est dite Physocephale par les Grecs, autrement Emphysema. Laquelle n'est autre chose, sinon vne apparence de grosseur de teste, en laquelle entre le test & la peau de dessus est vne ventosité grosse, espoisse & enclose, ne pouuant sortir, & pource enfle la teste, & la fait sembler estre grosse: quelquefois aussi elle est entre le test & les peaux qui environnent le cerueau, en telle force & abondance qu'elle pousse & ébranle les os du crane & du test, & fait separation & ouuerture de leurs commissures & assemblage, en sorte que, cōme dit Auicenne en la premiere Fen du troisieme, lesdits os s'enleuent, & font grosseur de teste, avec grand' douleur, tellement que les enfans quelque fois en meurent.

Les causes dont procede la grosseur de la teste ventense.

La cause qu'on appelle coniointe & plus prochaine, est celle ventosité engendree ou amassée en la teste, & enclose dedans ses parties. Et la cause antecedente, dite autrement efficiente, interieure, est l'humidité superflue contenue en la teste ou ailleurs, de laquelle s'enleuent vapeurs grosses & espoisses, malaisées a resouldre, lesquelles degenerēt & passent en cause coniointe, c'est a dire, en ventosité. La chaleur imbecille peut estre aussi vne desdites causes qu'on nōme antecedentes, laquelle cachee sous l'abondance des humiditez crues & visqueuses, & ne pouuant les surmonter, engendre des ventositez, lesquelles, comme j'ay dit, entreouurent les commissures du test, & sortent entre le test & le cuir, & font ceste apparence de grosseur de teste: a quoy ayde encore le cuir mesme, quand il est espois, par lequel les ventositez ne peuuent sortir, & mesmement quand elles

sont espoissies & grosses. La cause qu'on appelle primitive ou efficiente, extérieure, prouient de nourriture ventueuse, ou de repletion & crudité.

Les signes pour discerner & cognoistre la grosseur de la teste estre ventueuse.

On cognoist la grosseur de teste estre ventueuse, par cela que quand on la presse avec le doigt, elle resiste sans faire fosse, & fait douleur a l'enfant en la pressant.

Le iugement qu'on fait de ceste maladie.

Le prognostic & augure qu'on en fait est tel, qu'elle est plus facile a guarir & avec regime & avec medecine, que celle qui est aigue use, & est sa matiere plus aisée a resoudre. Touthois, si l'enfant qui ha ce mal estoit tormenté de flux de ventre, Auicenne dit, le mal estre dangereux, de peur qu'il apporte dysenterie, & la force de l'enfant se diminue.

La guarison de la grosseur de la teste ventueuse.

Le but de la guarir par regime, est engarder l'enfant de nourrissemēt ventueux: & de repletion par medecine, rarifier le cuyr, & subtilier la vëtosité grosse: ce qui se fait par choses de faculté chaude & seche, comme le castoreum, l'origan sec, & le commin, également meslez ensemble, reduits en poudre, & donnez a boire a l'enfant le pois de troys grains d'orge, par le conseil d'Auicenne au troisiésme Fen du premier liure. Rasis ordonne d'oindre la teste d'huyle d'anet & de been. On peut ordonner emplastre a mettre sur la teste des choses susdittes, & d'autres semblables, avec oliban ou gomme de geneure ou therebintine, & autre chose qu'on verra estre bonne.

III. *De la grosseur de la teste ditte aiguesse.*

T i j

L'autre espece de grosseur de teste, laquelle est seulement en apparence, ni ossue, ni charnue, est celle laquelle est aqueuse, que les Grecs nomment Hydrocephale ou Hydrocephalon : & est vne maladie en laquelle s'acueille vn amas d'eau entre le cuyr & pericrane, ou entre le pericrane & le test, & parmy les espaces qui sont dans la chair : laquelle aucunefois passe du dehors du test en dedans, & du dedans en dehors par les commissures. Et de ceste espece aucunes sont simples, aucunes coniointes avec l'autre espece, laquelle est venteuse, estant les vents & les eaux ensemble : & l'une & l'autre espece quelque-fois contiennent tout le circuit de la teste, devant & derriere, & es costez : quelquefois se manifestent plus en vn endroit qu'en l'autre. Il auient bien aussi quelquefois que les enfans ont abondance d'eau entre le test & le cerueau, & sans enflure ou apparence de grosseur de teste, laquelle est vne tresdangereuse maladie, de laquelle nous parlerons cy apres en son lieu. Et ces especes de maladie auiennent seulement ou plus communement, aux enfans, non pource qu'eux estant au ventre de la mere l'assiete de la teste est en bas, a laquelle descendent les humeurs, comme dient aucuns, car ceste raison n'est probable, d'autant qu'il s'ensuyuroit que tous enfans seroyent malades de ceste maladie : mais plus tost pource que le cerueau, qui entre toutes les parties du corps est le plus humide, l'est beaucoup plus es enfans, mesmement en ceux qui l'ont de ceste complexion, plus que les autres : ou plus tost encore, parce que les reumes & catharres n'auiennent gueres aux enfans, & ils retiennent seulement les superfluitez humides, & l'eau en la teste : lesquelles si par reumes ou catharres descendoyent du cerueau, ils seroyent exempts de ceste maladie.

Les causes de la grosseur de teste aigueuse.

Son commencement vient, ou du ventre de la mere, ou depuis que l'enfant est né: Si du ventre de la mere, c'est que celle superfluité aigueuse contenue au cerueau de l'enfant, lors qu'il estoit au ventre de sa mere, n'ha point esté purgée par la bouche, ni par la vescie, ni par autres voyes naturelles, ains est demouree au cerueau, ou enuoyee hors du test entre les os, & le cuir: de laquelle la cause primitive ha esté le mauuais regime de la mere en sa grosse, ay ant vescu de fruits, d'herbes, & d'autres choses de substance aigueuse: & la cause antecedente, la cõplexion de l'enfant mesmes, trop humide, & la debilité des facultez naturelles de son cerueau. Si depuis qu'il est né, c'est que celle mesme superfluité aigueuse, laquelle n'ha pas esté purgée au ventre de la mere, s'est depuis multipliee & augmentee: de laquelle multiplication & augmentation, la cause primitive ha peu estre la faute & indiscretion de la sage-femme, laquelle en la naissance de l'enfant, voulant façonner sa teste, ha mal comprimé & serré les os & les commissures du test, parquoy les orifices & les bouts des venes ont pareillement esté dilatez & estendus, ou distraits, sans toutesfois les ouurir ne rompre, par ce qu'elles sont molles: & par ainsi le sang estant au large, & courant facilement celle-part, mesmement le sang aigueux, par maniere de suer, sort des venes: & venât maintenant hors du test entre os & cuir, maintenant deffoubs, apres s'estre augmenté peu a peu, passe & repasse par les cõmissures. Encore vne autre cause primitive peut estre le lait trop aigueux de la nourrice, & les autres nourrissemens que prend l'enfant de substance aigueuse, ou le trop dormir, tant

de la nourrice que de l'enfant, & en lieux humides, ou faute de purger le cerueau. La cause antecédente, est premierement l'abondance des vapeurs enuoyees des parties inferieures au cerueau, lesquelles par la froideur d'iceluy s'espaississent & conuertissent en eau: puis la debilité de la vertu digestiue du cerueau, ou la complexion trop froide & trop humide, laquelle conuertit la plus grand' part de son nourrissement en aquosité, de laquelle se fait petit a petit vne maniere de congestion & amas en la teste. Car comme ainsi soit que le cerueau soit le plus froid & humide de tous les membres, quand vne grand' quantité de vapeurs y monte de tout le corps, il est besoin qu'il s'y amasse beaucoup d'humidité aigueuse, laquelle si elle n'est purgée par lieux conuenables, introduit ceste espee de maladie.

Les signes pour cognoistre la grosseur de la teste aigueuse, & les differences entre-elle & les autres especes de grosseur de teste.

On peut comprendre entre les signes pour la cognoistre vne partie des causes euidentes d'icelle: comme du costé de la mere, si son regime ha esté humide en sa groisse: & si elle n'ha pas esté bien purgée de ses eaux sur le point d'enfanter: ou si elle ha heu des euenemēs semblables au parauant, comme si la mere ha heu d'autres enfans malades de telle maladie: lesquels signes sont generaux a toutes especes d'eaux de la teste: mais les signes particuliers de l'enflure d'eau hors du test, sont tels: si quand on la presse du doigt elle fait fosse, & le test s'abbaisse: si en la pressant, ne fait pas douleur, si la couleur du cuir n'est point changée, d'autant que l'eau ne dōne point tainture de foy. Les signes de l'enflure quand l'eau passe & repasse par les commissures du

test, de dedans en dehors, & de dehors en dedans, sont autres : car premierement il y ha douleur & troublement des sens, tant interieurs qu'exterieurs : puis il se fait quasi comme vne epilepsie, ou bien vne vraye epilepsie, quand on presse du doigt l'enfleure : d'avantage, la fosse faite par le pressement du doigt, ne se remplit pas incontinent, si-non qu'il y ayt habondance au dehors du test : outre plus, l'enfant crie & pleure, & ne dort guiere, a cause de la douleur, & est en anguisse continuelle.

Augure & prognostic, tant de l'eau qui est dessus le test seulement, que de celle qui passe de dessus en dessous.

L'eau qui est hors du test seulement, combien qu'elle soit de difficile cure, toutesfois elle est possible a guarir : & est la difficulté de la cure plus grande ou moindre, selon que l'eau est grosse & subtile, & en plus grande ou moindre quantité, & selon l'endroit ou elle est. Car celle qui est subtile, se resoult & euapore plus facilement, & celle qui est en moindre quantité, est plus facile a tirer dehors, & avecq' moindre douleur & nuyssance, autrement Avicenne se desie de la cure : & celle qui est entre chair & cuir, ou dedans la chair, plus facilement se guarit : entre la chair & le pericrane mediocrement : entre le pericrane & l'os du test, plus difficilement. Celle qui passe de dessus au dessous le test, ne se guarit iamais, ou a peine, par ce qu'elle debilitte continuellement le cerueau, le greue de sa pesanteur, & finalement tue la personne, ne pouuant Nature supporter la difficulté & longueur de la cure, attendu qu'en ceste dite maladie, le test est quasi comme entre-ouvert, & les commissures desioinctes, ce qui nuit totalement au cerueau :

& tant que dure ceste humidité, ne peuuent estre restituez en leur deu estat : & encore ce passage d'eau d'un lieu a autre, signifie que Nature est debile a pousser hors ses excremens : & auient encore que se parforçant a la pousser hors, elle fait tomber l'enfant en epilepsie. Toutesfois qu'il peut auenir qu'en passant l'eau de dehors en dedans, & se diminuant l'enflure, Nature euacue le dedans par le Nez, ou par le palais, ou par autres voyes : qui est vn tresbon signe, mais cela ne se peut pas faire par artifice : & quand cela se fait, voluntiers les commissures ne sont pas relachees : seulement l'artifice peut seruir a consommer le reste, qui peut estre demeuré hors du test, & consolider ce peu qui est relaché des commissures, par emplastre restrainctif, & consolidatif. Mais si Nature n'euacue point ce qui est passé de dehors en dedans, cela est mortel. On cognoist qu'elle passe de dehors en dedans, en pressant l'enflure, laquelle obeit au doigt : & cela signifie que les commissures sont laches, parquoy est mauuais signe : mais si elle ne passe point sinon bien peu, sachant qu'il n'y en ha point dedans, on cognoist que les commissures ne sont pas si laches, & qu'il y ha esperance de guarir ce qui est demeuré dehors, & que Nature euacuera le dedans.

La maniere de la guarir.

On remedie a ceste maladie par trois genres de remedes : sauoir, par regime de viure, par medicamens, & par main de barbier. Le regime de viure doit estre opposite aux choses qui entretiennent la maladie. Si l'enfant tette, on doit ordonner a la nourrice comme si elle mesme auoit la maladie de l'enfant, le regime de choses qui desechent & con-

fortent la teste, qu'elle habite en air sec, soit vigilante, prenne exercice, se purge bien son cerneau, & celuy de son enfant, par le nez & par la bouche: vse de choses qui font vriner, s'abstiène de fruits, salades, potages, & nourritures qui engendrent humiditez superflues, ne boiue guieres. Les medicamēs requis en cest affaire, sont pour purger premierement par le ventre: puis pour diuertir par capipurges, par gargarismes, & par esternumens: puis refoudre & desecher par linimens, embrochations, vnguans, emplastres: finalement conforter le cerneau en desechant, par fenteurs, par electuaires & confectiōs confortatiues de celle partie. Si l'enfant malade tette encore, faut que la nourrice soit purgee & euacuee par toute maniere d'euacuation, nonobstant que l'enfant n'ha pas la maladie a cause d'elle, ni de son lait: & que cependant elle ne laisse de l'alaieter, a fin que son lait ayt vertu d'ayder a euacuer & desecher les humiditez de la teste d'iceluy. Et apres cela, faut venir a oindre la teste de l'enfant, par l'ordonnance de Razis, avecq' huile d'aneth, huile d'amandes ameres, huile de ben, huile de mariolene, ou de son ius: & si avec cela on voit que le mal ne se diminue, mettre vn' emplastre sur la teste, cōposé d'oliban, farcolla, gomme Arabic (laquelle ha vertu de secher & conioindre les os) gomme de pruneaux, amydon, semence de rayfort, & quelques autres choses semblables: duquel emplastre, la composition est telle, R. olibani vnc. ij. farcolla, vnc. j. gummi Arabici, sem. raphani, anethi, an. vnc. f. quibus adde olei de spica, & terebinthinæ aliquantum, cum cera modica, & fiat emplastrum. On l'applique en forme d'une coëffe, apres auoir couppé les cheueux, le renouuellant tous les iours, & desechant la teste avecq' linges.

chauds, de lin ou de chanure: ce qui se fait tant aux enfans qui ne tettent plus, qu'a ceux qui tettent. Aucuns font vn' autre emplastre d'autres choses, lesquelles font partie resolutiues & diaphoretiques, partie restrainctiues & reserrantes, en ceste maniere. R. origani, calaminthæ, sauinæ, stechad. serpilli, gallarum nucum, cupressi, an. drach. ij. cinnamomi, nucis odoratæ, corticum citrij, macer. an. drach. j. olei de lilio, & de costo, an. vnc. s. succi maioranæ, vnc. j. s. ceræ vnc. iiij. fiat emplastrum. On en fait, qui veut, de choses plus fortes, comme d'aristolochie, de farine de lupins, de semence de nasitort, & d'autres choses semblables. Que si par cela, l'enfleure ne diminue point, Razis prent des noix vieilles entieres, avecq' leurs coques, les pile & broye en vn mortier, tant que tout vienne en forme d'onguant. Autres mettent premierement les coques en poudre, & en pilant peu a peu, aioustent vn peu d'oliban. Et de cest onguant oignent la teste rase, la couurent de coton, & laissent cela ainsi par l'espace de quelques iours, sans le remuer. Cest onguant reserre les commissures du test, desenfle la teste, en preparant vne partie de l'eau a expulsion manifeste par les voyes naturelles de la purgation de celle partie. Et dient aucuns, que si on voit que cest oignement soit desia trop sec en la teste, faut la lauer avecq' du vin chaud salé, ou sans la lauer, tirer ledit oignement avec vne des huiles susdittes, puis l'oindre de rechef du mesme oignement prins de frais au boétier.

Le mesme Razis en fait encore vn autre beaucoup plus fort, lequel fait des ampoules au cuir de la teste, & attire vne grande quantité d'eau par icelles, diminuant par ce moyen, la grosseur de teste. Prends, dit-il, du fouchet d'

Indie, dit autrement, curcuma, c'est vne racine iaune, & la broye avecq' huile d'amandes ameres, & en oings la teste, apres l'auoir lauee de vin, avecq' du sel.

Auicenne en la premiere Fen, du troisieme Canon, le compose avecq' vin-aigre, huile rosat, & curcuma: & Gentil, avecq' des vers de terre, ou avecq' leur huile.

Après cela, ainsi comme on voit que l'enflure & grosseur de teste se diminue, Rasis ordonne de mettre vne emplastre d'écorce de grenade, & de noix de cyprez, broyez avec vin-aigre, sur les commissures relachees, pour les reserrer & pour desecher.

Ce temps—pendant qu'on fait ces choses, comme ainsi soit que toute l'eau ne se peut resoudre insensiblement, ni estre tiree par les pores du cuir: lors est bon, dit Rasis, d'vser de capipurge, & mettre au nez de l'enfant du fiel de loup, avecq' vn peu d'ambre gris: & cela suffit d'estre fait vne fois seulement le moys: par ce que l'eau qui est en la teste requiert vn long temps auant qu'une partie apres l'autre soit prestee a estre euacuee en ceste maniere.

Aucuns font esternuer l'enfant tous les iours, par quelque espace de temps, avecq' vn esternument tel que s'enfuyt, qui est fort approuué a desecher le cerueau.

On prent du fiel de grue, & de vautour, & du castoreum, & de la rue sauage, du macis, & du safran, de chacun égale portion, lesquels on broye avec sucre, & incorpore avec ius de rose, ou de l'herbe de graine de pulco, en Latin, & en Grec, Psyllion, en forme de grains de lentille, puis on les fait secher a l'ombre, desquels on en dissout vn tous les iours d'eau rose, & le met on au nez de l'enfant.

Outre ces choses, aucuns ordonnent des fenteurs desechantes, comme musc & rue, & autres choses semblables: comme est cestuy-ci. R. castorei, rutæ siccæ ana. cum glutino tragacanthæ, fiat odorummentum. Puis encore on conforte & desèche le cerueau, avec electuaires & confections qu'on prent par la bouche, cōme diacorus, plirisarcoticon Nicolai, theriaque, mithridat, & semblables. Toutes ces choses accomplies, si on voit que la maladie ne se guarist point, mais va empirant, ne faut plus esperer de la guarir par chose medicinale: parquoy ne reste sinon venir a la cure par operation manuelle, laquelle Razis ordonne a faire par application de cautere sur les cōmissures de la teste. Guillaume de Plaisance, Medecin excellent, n'approuue point les incisions qu'on fait dessus, encore qu'on les face selon l'ordonnance de Razis, & dit n'auoir iamais veu, ni ouy dire qu'aucū en fust guaruy: car, s'il est ainsi, dit-il, qu'il n'y ayt que les petis enfans qui en soyent malades, ils sont trop tendres & delicats pour estre pensez heureusemēt en ceste façon. Il trouue meilleur de leur donner medicamens desiccatifs, (comme il ha experimenté en l'enfant d'un sien amy qu'il guarit) & faire les autres choses ainsi que s'ensuyt. Il luy oingt premierement toute la teste avec huile de camomile, & du soulfhre, faisant la recepte en ceste maniere. R. ol. chamæmeli vnc. iij. sulphuris vnc. j. puis mist dessus de la leine seche, ou vne piece de drap, & continua cela vn moys. En apres, cela ne suffisant, luy appliqua vn cautere potential sur le deuant de la teste, & en fist sortir de l'eau euidentement, & en fist autant au derriere de la teste, sans omettre l'vsage des linimens susdits, & ce faisant, se gardoit que l'eau ne sortit toute a vn coup: ob-

seruant le conseil d'Hippocrates en ses Aphorismes, en la cure chirurgique d'hydropisie, de n'euacuer tout en vn coup, mais peu a peu, & par intervalle de temps: & avec ces remedes guarit l'enfant en demy an.

III. De la teste pleine d'eau, sans estre enflée.

Il se trouue aussi quelques-fois que la teste de l'enfant est pleine d'eau sous le test, sans estre enflée par dessus, qui est pire maladie que l'autre: l'enfant qui est ainsi, ha tousiours la teste baissée, & ne la peut soustenir, tombe souuent en spasme & conuulsion, ses yeux rouges, a cause des vapeurs chaudes, & font mal a cause desdictes vapeurs subtiles & piquantes: sont humides, comme qui pleurent tousiours, a cause que le cerueau ne se descharge de l'humidité par autre voye sinon quelque peu par le nez: les tient ouuers & fichez en vn lieu, a cause que la matiere greue les nerfz optiques & les muscles qui mouuent les yeux, tellement que la paupiere d'enhaut demeure racourcie & retirée, & ne se peut estendre a clorre l'œil. Quand ceste abondance d'eau est entre la substance du cerueau & la prochaine peau qui le couure, impossible est que l'enfant ne meure bien tost. Si elle est entre les deux peaux qui enuironnent le cerueau, qu'on appelle, pia mater, & dura mater, l'enfant tombe souuent, & est souuent en resuerie. Si elle est entre le test & la prochaine peau, l'enfant ne tombe pas si souuent, ni n'ha tant griefz accidens. Et de la vient qu'on dit, qu'en la teste des bestes lesquelles sont subiectes au haut mal, il se trouue vne vescie pleine d'eau vileine. Les iugemens qu'on en fait, sont telz: Si ceste eau estant sous le test perseuere longuement, & Nature ne la vuyde point manifestement, ni

par les yeux, ni par le nez, ni par l'os colatoire, ni par la bouche, ni par autre voye, elle est incurable: & si elle augmente de iour en iour, tue l'enfant, ne se trouuant aucun moyen par art de l'euacuer: car ni les emplastres qui tirent & conformment les humeurs, ni les gargarismes, ni les capipurges, n'ont pas assez de force pour ce faire: & les cauterres & choses semblables, par-ce qu'ilz sont trop chauds, sont dangereux, ne pouuant les enfans, qui sont delicatz & tendres, les souffrir.

IIII. Des petites enflures & apostumes qui auient entre cuir & chair sur la teste de l'enfant.

Autres enflures & de toutes especes, mais qui sont plus petites, auient aussi quelques-fois a la teste des enfans, entre chair & cuir, comme phlegmons, furuncles, œdemes, loupes, herisipeles, scirrhes, dits autrement nodus, apostemes pleins de vent, apostemes avec sanie, & quelques autres semblables: desquelles pour ce qu'il n'y ha point de cure speciale pour les enfans, on la remet a celle qui est generale & commune des maladies des personnes de tous eages.

Des maladies du dedans de la teste sous le crane, qui sont maladies du cerueau & des peaux qui l'environnent.

C H A P. II.

APRES les maladies de la teste depuis le test en sus, on arrange celles du cerueau, & des peaux qui l'environnent: comme celle premierement que Paul, & deuant luy Oribase, appelle Siriasis, espece de flegmon ou a-

posteme chauld, sous le test: puis le trop veiller & fante de dormir: puis les peurs en songeant: & le foulon, dit Incubus en Latin: & le tournement de cerueau qu'on appelle Vertigo: apres l'epilepsie, qu'on nomme le haut mal, ou le mal S. Iean: & le spasme ou conuulsion, c'est a dire, retirement de nerfz, & roidissement de membres: & la perclusion du corps ou de quelque partie, laquelle est dite Paralyfie du nom des Grecs: & le trop grand esternuement, & quelques autres, desquelles nous omettons vne partie, en celiure, pour la raison cy deuant dite.

I. D'une grand' ardeur & inflammation dedans la teste de l'Enfant.

Il aduient quelquesfois inflammation sous le test, aux parties qui enuironnent le cerueau: laquelle maladie Oribase & Paul d'Aegine appellent Siriasis: Auicenne, Vlagro, & par ses truchemens, aposteme sitibunde, tant pour ce qu'il attire a soy les humiditez du corps, comme vne ventose, que pour ce qu'il donne vne grâde soif qui ne se peut estancher, accompagné d'une fieure ardente, avec vne grande secheresse de gorge, de langue, & de l'entree d'esthmac: luy mesme la nomme encores ailleurs, comme vne endartre du cerueau, ou comme vn Erysipele, d'un nom commun a toutes inflammations procedât de sang & de cholere ensemble. Razis, par ceux qui l'interpretent, la nomme descente ou abbaissement de la fontanelle, qui l'appelle Iasir, ou lesur en sa langue, c'est a dire, du deuant de la teste, ou de l'os coronal de dessus le front. Plin l'appelle Ardeur de la teste: & semble estre ce qui est appelé de Galien Cephalgie de cholere.

Les causes de ceste maladie.

La matiere de ceste maladie, est vn sang cholerique, ardent & chaud outre mesure, es venes du cerueau, procedant a l'enfant qui tette du lait trop fort de sa nourrice, & a tous enfans, de toutes choses qui échaufent le sang & la teste.

Les signes pour la remarquer.

On la cognoist a ce que la fontanelle, c'est a dire, le deuant de la teste, est abbatu & encaué, a cause de la grand' secheresse : les yeux enfoncez & retirez au dedans, & avec ce enflambez & rouges, tirans sur le iaune : la langue seche & iaunatre, comme aussi le visage : le ventre pareillement sec & constipé : l'enfant ne peut aualler la viande, pour la douleur de la gorge, ne peut soustenir sa teste pour la douleur qu'il y sent, ni ne dort point.

Iugement de la maladie.

Elle tue dans trois iours, ainsi comme dit Auicenne, que si elle passe le quatriesme, il y ha esperance d'en guarir : par ce que la force de Nature est si grande, qu'elle pourra surmonter la maladie. Ce qui semble estre tiré de l'autorité d'Hippocrates du septiesme liure des Aphorif. Que ceux, dit-il, qui ont le cerueau sphacelé, c'est a dire, prest a estre brulé ou corrompu, dans trois iours perissent : ilz guarissent s'ilz passent outre.

La guarison.

On remedie a ce mal tout ainsi comme aux frenaisies, & aux fieures ardentes. Oribase & Paul ordonnent vn iaune d'œuf avec huile rofat, a mettre sur la fontanelle, apres apres auoir couppé les cheueux : par ce que ce medicament appaise

appaife la douleur, digere & refout aucunement la matiere, & faut le renoueller fouuent, auant qu'il s'efchauffe. Razis & Auicenne appliquent du ius de morelle, avec la-ditte huile, dans du coton, sur l'endroit du mal. Et quand l'ardeur fe relasche, on fait embrochation de laiët de nourrice, ou de chieure, tiré chaudement, feul, ou avec huile violet & d'amandes douces.

I I. De ce que l'enfant ne peut dormir, & crie conftamment.

Hippocrates au troiſieſme liure des Aphoriſmes, nombre entre les maladies des enfans, le trop veiller, & ne pouoir dormir, & le met eſtre maladie: par-ce que les enfans pour la plus part du temps dorment, & que dormir beaucoup leur eſt naturel, & ſelon nature: & au contraire, le veiller, quand il paſſe outre meſure, & les limites du temps de dormir, il corrompt la temperature du cerueau, affoibliſt les ſens, proſterne la vertu, diſſipe & conſomme les eſpritz, engendre crudité & indigeſtion, & finalement diſſout & deſtruit le corps. Parquoy dit le meſme Auteur en vn Aphoriſme, que le dormir & le veiller, s'ilz excedent meſure, ſont mauuais.

Les cauſes de ce mal.

Razis, au liure de ſes Experimens, teſmoigne que ce mal vient au premier aage des enfans, a cauſe de la corruption du laiët: & l'attribue auſſi a la douleur de la faille des dents, & auſſi a la repletion & charge de l'eſthomac qui enuoye des vapeurs a la teſte, & quelques-fois aux ventofitez engendrees dans le cerueau, & quelques-fois a la chaleur & ſiccité de ceſte meſme partie: laiſſant là en derriere les cauſes primitiues, qui a toutes perſonnes peuuent empescher le dormir.

Remedes.

La maniere de guarir vn tel mal est, premierement en oster la cause, puis faire venir le sommeil. On oste la cause, si quand le mal vient de la corruption du lait, on fait purger la nourrice, & vser de bon regime, se gardant de choses qui corrompent le lait: si de repletion d'esthmac, & l'enfant est detrié, on le fait vomir, ou on le purge, & fait on auoir benefice de ventre, on fortifie l'esthmac, euitant les viandes de facile corruption. On fait venir le sommeil a l'enfant, en le berçant, luy chantant chansons basses, le tenant en lieu fraiz, & s'il est possible pres d'une eau courante, en faisant tomber l'eau d'une chante-pleure goutte a goutte dans vn bassin, euitant tout bruyt, luy faisant sentir des odeurs froides. S'il est encore a nourrice, on doyt faire manger a la nourrice le cuer de laitue: s'il est detrié, luy mesmes en manger de crues, de cuites, a la discretion de son goust. La semence de laitue est bonne en poudre prise en broüet, en breuuage, ou autrement: aussi est la semence de pautot, avec autant de sucre, laquelle peut estre meslee avec les viandes, comme avec orge-mondé, ou avec du gruau, ou avec soupe de pain trempee d'eau fraische, & vn peu sucree. La gelee aussi est bonne, faite avec muscilage de semence de coing, ou de psyllion, & de gomme de dragagant, & des semences susdittes: car si on donne par dedans chose somnifere, elle doit estre plus tost nourrissement que pure medecine, a fin que Nature l'attire & profonde mieux dans le corps: autrement est meilleur que la medecine qui prouoque le dormir soit appliquee par dehors: laquelle on doit appliquer chaudement, & ne la laisser longuement sur la partie, ains plus tost la renoueller souuent, iusques a tant que le

sommeil soit venu. L'heure commode de les donner, est l'heure accoustumée de dormir. Et ne se doiuent donner a l'enfant qui ha esté long temps sans manger, de peur que la chaleur naturelle du corps ne les attire trop ardemment, en danger de s'esteindre: ains est meilleur apres le repas, par-ce que tât plus y ha au corps de choses humides, micux se pro-uoque le sommeil. Pour faire dormir, on met dans le nez de l'enfant, par l'ordonnance de Rasis, de l'huile violat, ou rosat, avec ius de lactue, y adioustant quelque peu d'huile d'anet, pour corriger la froideur, & met on encore sur le sommet de la teste, & sur le front des mesmes huiles, & de l'huile de pauot, ou de nenufar, avec ius de lactue, & eau rose, (sinon que l'enfant ayt le cerueau trop humide) y adioustant quelquefois vn grain d'opium, si besoin est, y mettant autant de safran pour le corriger. Et encore on peut faire vn autre liniment frontal, tel que le mesme Rasis ordonne, lequel est composé en ceste maniere. R. semin. anethi, drag-j. croci, myrrhæ an. scrup. j. hyosciami scrup. f. opij, mandragoræ, an. gr. ij. f. cum mucagine semin. psyllij & scœnogræci, fiat linimentum, applicetur quando & vbi decet. Et encore vn autre de la façon qui s'ensuyt. R. semin. lactucæ, portulacæ, capitum papaueris, alkekang. an. drag. ij. opij, gr. ij. aggregentur cum mucagine semin. psyllij & scœnogræci: duquel liniment il faut oindre le test de l'enfant. Le Medecin sçauant qui pensera l'enfant malade, en composera selon sa fantasie de choses semblables.

III. De la peur des enfans en dormant.

Aupres de ce mal est faite mention de la frayeur qu'ont les enfans en songeant, en l'Aphorisme vingt-quatriesme du troisieme liure des Aphorismes d'Hippocrates.

Les causes dont cela procede.

Cecy leur auient plus souuent de repletion, par leur gourmandise, & de corruption de la nourriture en l'esthomas mal digeree, enuoyant vapeurs mauuaises a la partie imaginative : ce qui auient pareillement aux grandes personnes.

Les signes pour le cognoistre.

*On le cognoist par le cry de l'enfant en dormant, & par la chaleur qu'il ha quand il est éueillé, & par la senteur forte qui sort de sa bouche.

Le remede.

A cela faut premierement donner ordre, qu'estant l'enfant saoul, il ne dorme incontinent apres : ains le faire porter ça & là tout bellement, & l'esbatre iusques a ce que la viande soit descendue au font de l'esthomas : a quoy est bon luy donner du miel a licher, par—ce que par sa vertu absterfue il enuoye la viande en bas : & aussi ayder a la digestion, en oignant son ventre d'huile de been, ou de coucombre sauuage, comme conseille Haly-abba, ou plus tost d'huile de mastic, ou de muscade, comme nous conseillons. Et est bon aussi luy donner a ieun du diamustum avec le lait, la quantité de demy scrupule, ou de la theriaque avec du lait, comme aucuns ordonnent. Aussi on doit garder l'enfant de plus tant manger, & mesmement des viandes grosses & flegmatiques : & s'il est encores a nourrice, & que le mal vienne du lait, qui est trop gras, ne luy en donner a tetter qu'il ne soit subtilié, par regime qu'elle vsa pour le subtilier.

IIII. De l'esternuement.

On met entre les dispositions contre Nature, l'esternuement continuel & excessif de l'enfant: laquelle disposition est vn tel mouuement du cerueau, comme la toux du poulmon, & le hoquet de l'esthomas: car c'est vn mouuement violent, propre du cerueau, lequel en se retirant & dilatant pousse hors ce qui luy nuit & offense. Et combien qu'il soit naturel, & veritablement action naturelle a faire expulsion des superfluitez & nuisances du cerueau, touteffois quand il excede mesure, il est contre Nature, & cōme vne maladie.

Les causes.

Il y ha beaucoup de causes exterieures qui émouuent l'esternuement: comme vn festu qu'on met dedans le nez, & quelque poudre forte, qui ha la vapeur piquante, & le froid sur la teste descouuerte, pressant le cerueau, & exprimant les humeurs d'iceluy, lesquelles par leur quantité ou qualité excitent la vertu expulsive a esternuer: & l'air froid aussi ou le vent qui entre dans le nez & repousse la chaleur au dedans du cerueau, lequel se fortifiant puis apres se parforce a le repousser dehors: ou le mesme vent piquant le nez par sa froidure, dont la vertu expulsive est incitée a faire esternuement: semblablement la chaleur du Soleil qui frappe sur la teste & fait fondre les humeurs du cerueau: ou la chaleur attirée par le nez incite la chaleur de dedās a esternuer, & a la pousser hors: mais de toutes telles causes en ce cas nous ne faisons pas compte: nous recherchons la cause interieure, cōme principalement celle qu'on appelle coniointe & materielle, laquelle est vne humeur aigüe, ou vne vapeur aigüe, ou vne ventosité, ou vne autre superfluité aggrauant le cer-

ueau, tellement que se sentant offensé, la force d'iceluy se retire, puis s'efforçant la poulser, se dilate, & fait vne expulsion violente & impetueuse, qu'on dit esternuement : & ceste force est excitée par la chaleur dudit cerueau, lequel est comme cause efficiente : ainsi comme on interprete ce que dit de l'esternuement Hippocrates, au septiesme des Aphorismes, qu'il se fait alors quand les espaces vuydes du cerueau sont humectez, & vient l'air en icelles : c'est a dire, quand l'humeur enclose dedans par le moyen de la chaleur se dissout en ventosité : laquelle ne pouuant sortir aisément par le destroict, est poulsee hors par force, & fait vn son : lequel poulsment se fait moyennant l'ayde de l'air attiré par le nez, & des muscles de la teste, de la langue, du col, & de la poitrine.

Le moyen de l'appaiser.

Des remedes pour appaiser l'esternuemēt venant de quelque humeur, les vns sont propres tant a la matiere chaude, qu'a la froide : les autres communs, de quelque cause que l'esternuement procede. Sans donques regarder ni a chaud ni a froid, quand on voit que l'enfant esternue, on le doit faire regarder en haut, comme ordonne Auicenne, ou luy frotter les yeux, pour diuertir la matiere qui fait l'esternuement, & semblablement les oreilles avec la main nue, ou avec vn linge : ou luy mettre vn linge chaud sur son col : ou le faire coucher sur son dos : ou mettre dedans le nez quelque goutte de l'humeur qui tombe des roignons des animaux qu'on rostit, comme de cheureau ou de mouton : & ne le laisser regarder trop fiquement a vne chose. Que si on voit que le cerueau s'eschauffe, & la chaleur es parties su-

perieures du nez & du deuant de la teste en est cause, cōme est le plus souuent, selon Hippocrates & Aristote, lors est bon mettre au nez de l'enfant de l'huile rosat, ou de nenufar, ou autre semblable, & en y respandre aussi sur la fontanelle de la teste, comme ordonne Mesué: faire boire aussi de l'eau froide, & en lauer le visage, & en tirer par le nez. Auicenne ordonne a fleurir la rose esglantine, qu'il appelle *īscfīm* en sa langue, & l'odeur des pommes, comme des pommes de Paradis. Autres conseillent de sentir l'eau rose, ou vne esponge bouillie en eau & vin-aigre, & font vn frontal d'oxyrrodin commun. Si au contraire on cognoist que l'esternuement viēt de froid exterieur, soit qu'il estoupe les pores de la teste, & empesche l'yssue des fumees, soit qu'il entre dans le nez: ou de froid interieur, & de matiere froide contenue dans le cerueau, Auicenne ordonne basilic aquatic, qu'il appelle *Bedaringi*, faisant souffler de sa poudre dans le nez: laquelle herbe en complexion chaude prouoque l'esternuement, & l'appaise en complexion froide. Mesué conseille de mettre au nez des huiles chaudes, & sur la teste, & aussi des senteurs chaudes. Gordon fait vn emplâtre a mettre sur la teste, d'huile de mastic, avec myrrhe, encens, cumin, cloux de girofle, macis, & vn peu de cire.

V. Du mal caduque.

Le mal caduque, autrement dit, Le haut mal, anciennement le mal S. Ian, est vne maladie a laquelle les enfans sont subietz a cause de leur grande humidité, & pour ce est appelée par Hippocrates, *Pedicos noufos*: c'est a dire, la maladie des enfans, & par l'eschole de medecine Arabique, la mere des enfans: les grecs cōmunément l'appellēt *Epilepsie*,

les Latins, la maladie Comitiale : pour ce que se voyant que quelque vn estoit tombé de ce mal, les assemblees de la tribu du peuple de Rome, qu'on appelle Comitia, ne se tenoyent point. Aristote la nomme, Maladie diuine, & Hippocrates, Maladie sacree, comme estant enuoyee par punition speciale de Dieu, ainsi comme nous appellons Mal de saint. Combien qu'Hippocrates, & nous aussi, disons que Dieu ni les Saints ne font point de mal aux hommes, & que ceste maladie ha sa cause naturelle, comme les autres maladies. Le mal caduque, est vne conuulsion vniuerselle de tout le corps, laquelle se fait par intervalle de temps, avec lesion & defaillance des sentimens & operations principales de l'ame, venant pour la plus-part de grosses humeurs, lesquelles oppilent les ventres & capacitez du cerueau, & empeschent le passage des espritz, avec la scouffe que fait le principe & origine des nerfs, se parforçant de poulsier hors ce qui leur nuist.

Les causes de ceste maladie.

Les enfans par trois ou quatre causes sont subietz a ce mal : ou pour ce qu'ilz ont le cerueau de complexion trop humide : ou pour ce qu'ilz se remplissent trop de nourriture, & de mauuaise nourriture : ou pour ce, comme dit Hippocrates, qu'ilz n'ont pas esté bien purgez de leur cerueau dans le ventre de leur mere, & depuis qu'ilz sont nez n'ont point heu la tigne, ni ne se mouschent, ni ne rendent point de salie : ou pour ce qu'ilz ont amasse beaucoup de mauuais sang & nourrissement flegmatic en leur cerueau par le mauuais regime de la nourrice.

Les signes.

Ceux qui naissent du ventre de la mere & de complexion le manifestent a leur naissance: & les autres qui l'ont de mauvais regime & de gourmandise, le prennent sur le point qu'ils s'endorment. Les signes pour cognoistre le mal, ceux qui en sont malades tombent & bauent, sont comme endormis, si non que la teste leur bat au ferrement des nerfs.

Le Prognostic & iugement qu'en on fait.

Se l'enfant l'apporte du ventre de sa mere, & se purge puis par vomissements, & met hors par la bouche beaucoup de superfluité d'humours, c'est signe qu'il en guarira, autrement non. Si l'enfant subiet a ce mal, ha esté engendré du temps que la mere auoit ses fleurs, a peine en guarira iamais; par-ce qu'il ha prins origine de cause mauuaise, & de chose infecte.

Si l'enfant qui est maladi de ce mal (ainsi comme escript Hippocrates au liure de ceste maladie, intitulé Le mal-far-ré) ha les venes estroites, & le peu de sang, & neantmoins se remplit trop, & est subiet a se charger de superfluité d'humours, il luy est impossible d'en guarir: par-ce que les venes trop petites ne sont capables de la grosseur & abondance des flegmes, & le sang se refroidit & congele, qui est cause de mourir. Le mesme Hippocrates au septiesme Aphorisme du cinquiesme liure: Ceux, dit-il, qui sent attains du mal caduque au deffoubz de l'eage de puberté, prennent changement: mais s'ilz passent vingt & cinq ans, ilz en ont iusques a la mort.

Les remedes.

Or puis que ceste maladie ne tient pas tousiours, mais vient & reuiet par interualle, & par acces, on establit les remedes en deux manieres: les vns pour guarir durant l'ac-

ces, les autres pour preseruer & engarder d'y retomber.

On preserue l'Enfant de ce mal, quand a l'heure qu'il est né on luy donne avec le bout du doigt de l'huyle d'amandes douces succree, auant que le mettre dormir, le reiterant a son reueil, le pois d'un escu, c'est a dire vne cuilleree, faisant ce par plusieurs iours, ainsi cōme nous auons enseigné au second Liure, qui est de l'instruction de la sage-femme au gouuernement de l'enfant nouveau né : car cela est vne chose laquelle non seulement nourrit l'enfant, mais nettoye les ordures & superfluites qu'il ha acquises dans le ventre de sa mere, & les fait vider par le bas de son ventre. Aucuns luy baillēt vn peu de methridat, ou de la thieriaque, qui sont deux choses lesquelles passent toutes autres contre ce mal : a en prendre aux autres eages chascun selon son eage, plus, moins, avec eau de cichoree ou autre liqueur, loing deuant le repas. A tous enfans petis ou grands subiets a ce mal, on pend au col de la racine recente de peonie, laquelle est bōne a ce mal, cōme Galien dit l'auoir practiqué & experimenté : ou vne pierre d'esmeraude, comme aucuns enseignent. La poudre de la racine & semence de laditte peonie est bonne a en prendre en breuuage, ou autrement : & aussi est le guy de chefne : semblablement la pierre qui se trouue au nid des arondelles, a en vser aucunes fois : & la poudre du test brullé d'un homme : & la poudre de corne de cerf. Le cardamome est bon, que la nourrice le masche souuent, & mette avec le lait dans la bouche de l'Enfant maladiſ de ce mal, pour le preseruer, & pour le guarir aussi en son paroxisme : car Dioscoride escript qu'il est fort bon pour ce mal, le beuant avec de l'eau. Et est bien fait encore, que la nourrice face souuēt licher a l'enfant, iour & nuict, du syrop de cichoree :

par-ce qu'on dit que la cichoree ha vne propriété de chasser ce mal : & quand l'enfant est ia grandet, qu'il en boyue luy-mesme avec de son datte, c'est a dire, son vrine, pour desecher & subtilier les humeurs superflues . l'ay trouué que luy faire vser de la decoction du bois de Gaiac, ou de la racine d'esquine, ou de la falseparille, ou des branches menues du bois de Figuier, avec vn peu de semence de chardon benedict, est vn singulier remede a ceste maladie, faisant bouillir ensemble de la racine & semence de peonie, du guy de chesne, de la cichoree, & de la corne de cerf, l'adoucissant avec du sucre, ou du miel escumé . Et encore i'ay experimenté que c'est vne fort bonne chose faire vser quelquefois de l'eau de vie distillee in balneo Mariæ, avec la racine susditte, & la racine d'angelique, & de carline, s'il s'en peut trouuer, & les poudres susdittes, y adioustât, qui voudra, de l'eau distillee de fleur de rommarin, de sauge, de betoine, d'isope, de veruene, de calaminte, & autres bonnes herbes semblables, l'adoucissant & aromatisant de sucre, & de canelle ; mais ce remede est plus conuenable aux grandes personnes . Touchant la façon de viure, pour-ce qu'Hippocrates au second liure des Aphorismes dit, que les enfans guarissent de ce mal par mutation d'aage, de saison, & de nourriture : & au v. que ce mal se change en eux quand ilz viennent en puberté, & commencent auoir du poil au petit ventre: voulant donner a entendre, que les humeurs grosses qui sont causes de ce mal en enfance, par succession de la ieunesse, laquelle est plus chaude de chaleur seche & forte, se viennent a subtilier & consumer: a ceste cause faut ordonner regime chaud & sec, cōme est la ieunesse, attēdu aussi que la nourriture humide est souuēt cause de ce mal : parquoy faut

donner ordre, premierement q. la nourrice de l'enfant qui est subiet a ceste maladie, soit de la sorte que i'en ay descript au commencement : qu'elle soit de bonne habitude, & bien temperee en toute maniere, a fin que son lait soit bon: ayt tous les iours benefice de ventre, non oyssue, ne trop endormie, ni ne mange rien qui rende son lait aigieux ou glueux, ou qui le corrompe, ne couche avec l'homme : Et quant a l'enfant, ne luy baille autre nourriture que le lait, sinon qu'il soit ia grandet : & qu'on se garde qu'il ne se fasche ou tourmente : & qu'il ne voye les choses qui tournent & qui courent. Et l'enfant qui est hors de nourrice tiene pareillement bon regime en sa nourriture : s'abstienne de fructs cruds, de laitues & herbes froides, & aussi d'ache & de persil, qui par certaine propriete sont contraires a ce mal. La bouillie n'est pas bone, & le vin n'est pas meilleur : boyue de l'hydromel ou de l'hyppocras d'eau, auquel on aura fait bouillir de la corne de cer, vse des poudres susdites avec ses viandes : se tiene net, euite le regard des eaux courantes, & des choses qui tournent, & les fumees de iait, ditte en Latin Gagates, & des cornes qu'on brusle, & les puateurs. Ne dorme sur la terre, mesmemet en lieu humide, ne coure incontinent apres d'isner au Soleil.

A l'heure que l'acces le tient, premierement luy faut vn peu haulser la teste, torcher la baue, & luy ouurir la bouche, & baglonner avec vn baston de reglice, ou de poenie, & avec le doigt engressé d'huyle d'iris, ou autre semblable, luy faire sortir ses flegmes : puis l'estraindre par le petit doigt, le frotter fort, & luy oindre la teste, le col, & les mains, lesquelles se retirent, avec huyle d'amandes douces, seule ou meslee avec eau de vie : & luy appliquer sur la teste vn empla-

fire composé de mariolaine, fleur de rommarin, boys d'aloes, & autres choses semblables, incorporez avec methridat outheriaque, huyle d'anet, ou autre telle, & vn peu de farine d'orge ou amydon, ou du methridat seul avec eau de vie. Et ce temps pendant luy bailler au nez des senteurs de rue, & choses semblables, pour l'exciter, ou luy en mettre en la bouche, ou du methridat, ou de la theriaque, avec eau de vie ou de cichoree: & a l'enfant qui tette, du ius de peonie en iulep avec du lait de femme: on met aussi au nez, dudit ius, seul, ou meslé avec vn peu de vinaigre, fange, auquel aura esté trempé de la hierre. Arnould conseille de l'oindre d'vne mixture d'origan, aristolochie rōde, fange, & peonie, incorporez avec vn peu de miel.

Si on veoit que l'acces reitere souuent, & il y ha peu d'interualle entredeux, on doyt prouoquer en cest interualle vomissemēt avec vne plume ointe d'huile de lis ou d'aman-des douces, ou luy frotter la racine de la lāgue avec le doigt oingt de miel, ou luy donner clystere ou suppositoire, puis faire des parfuns, & mettre au nez du castoreum ou du methridat, & chose semblable.

V I. De Conuulsion & retirement de nerfz.

Aucuneffois les Enfans a la faillie des dents, a cause de la douleur, aucuneffois en autre temps pour autre occasion, tombent en cōuulsion & retirement de nerfz: laquelle maladie est appelée des Grecs Spasmos: en laquelle les muscles & les nerfz se retirent vers leur origine, & avec eux les membres, maugré qu'on en ayt, avec serrement de dents. Il y ha deux genres de conuulsion, l'vn se fait de repletion, ou deffaut d'humeur, & les Medecins l'appellent, Connul-

sion proportionee a la matiere: l'autre se fait ou de douleur, ou de piqueure, ou de quelque autre disposition, sans auoir esgard a l'humeur, & pour-ce est appellee Conuulsion non proportionee a la matiere. Et de l'un & l'autre genre sont troys especes, selon la figure du mouuement ou retirement: car il se fait ou en deuant, ou en derriere, ou tout droit: le dernier est appellé, Rigueur ou roideur, Tetanos en Grec, c'est a dire, Tension, quand le col & l'eschine se tiennent droits & roides, & le corps immobile: quand il se fait en derriere, est appellé Opisthotonos: en deuant, Pro-stotonos. Toutefois il aduient que le retirement se fait encore, & n'est pas arresté, & lors la conuulsion est ditte seulement commancee & imparfaite.

Les causes.

Le premier genre de Conuulsion, lequel nous auons dit venir de repletion d'humeur, est le plus commun, & duquel promptement les enfans sont malades, dit Galien, & principalement ceux qui tettent, cause quelque-fois de la grosseur du lait: cōbien qu'il leur peut aduenir, cōme dit Hipp. iusques a sept ans, pour-ce que iusques a cest eage ils ont la substance nerueuse debile: & par ainsi il procede premierement de la corruption, de l'indigestion, ou a cause de la douleur de la naissance des dents, laquelle affoiblit la chaleur naturelle, ou a cause de repletion de l'estomac tendre & delicat, lequel ne la peut assez digerer: en apres de la debilité des nerfz en cest eage, a cause dequoy Nature y enuoye ses superfluitez, & s'y descharge, comme on voit aduenir volontiers a ceux la qui ont le corps gros, gras, humide, & le ventre constipé.

Augure & prognostic.

Si la fièvre suruient à la cōuulsion de repletion d'humeurs, bon, dit Hipp. car elle eschauffe, subtilie & dissoult l'humeur froid, gros & glutineux.

La conuulsion des enfans est plus facile à guarir : par-ce que les enfans se reduisent facilement en leur premier estat, par l'abondance de leur chaleur naturelle. Celle qui vient de secheresse & deffaillement d'humeur, c'est à dire, apres les fieures & les euacuations superflues, comme apres les grandes sueurs, vomissemens, flux de ventre, de sang, ou apres auoir trop veillé, trop enduré la faim, ou beaucoup de fortes émotions, dont les nerfs se desechent, elle est maladie pres-que incurable.

Remedes.

Touteffois on doyt essayer de remedier à ceste-cy cōme on fait à la fièvre hectique, & à la secheresse & meigreur de tout le corps : car on doyt oindre les nerfs & les membres retirez avec huyle violat, par l'aduis d'Auicenne, puy humecter & nourrir le corps attenué, comme à vn qui est sec & hectique. À celle qui vient de repletion, Oribase ordonnoit estuuer l'enfant de la decoction d'heliotropium, puy l'oindre de l'onguent dit Gleucion, & de l'onguent fait d'iris, en lieu duquel nous prenons auourd'huy celui qu'on appelle Vnguentum de catellis, ou nous prenons seulement de l'huyle d'iris, par l'ordonnance d'Auicenne. & celle de lis, & Keiri, qu'on appelle Petites giroflees jaunes : pour-ce que ces troys sont diaphoretiques, appaisent les douleurs de matiere froide, l'échauffent & mollifient : & pouuons prendre encore de l'huile de coste, de chamomile, de laurier, de lumbrics, de renard, & celle qui est ditte Sycionium,

faitte de coucombre sauuage, & de chascune d'icelles ou de plusieurs faisons oindre & froter les nerfz & les iointures: ausquelz endroits Auicenne applique vn vnguet composé de miel, avec racine de lis, & semence d'anis, & vn peu de safran. Rasis ordonne vn liniment composé d'une once de cire, & demie once d'euphorbe, avec suffisante quantité d'huyle, a en oindre l'eschine. Aucuns autres conseillent l'huyle de castor, avec vieille huyle: aucuns vne veschie pleine d'eau chaude: aucuns vn liniment de la decoction de coucombre sauuage, lequel est diaphoretique, eschauffe & ramollit: aucuns meslent aux linimens de l'eau de vie, pour faire mieux penetrer, & de la thirebentine. Il trouue fort bonne pour les enfans l'onction qu'ordonnent aucuns, d'huile violat, & d'huile de coucombre sauuage, autant d'une que d'autre, pour-ce que l'une & l'autre remolissent, & la chaleur de l'une est temperee par la froideur de l'autre.

Des maladies des yeux.

C H A P. I I I.

LE s principales maladies a traiter a part des yeux des enfans, sont le regard louche & bicle, & les yeux chauffez d'une humidité gluante, qui tient aux paupieres: car les autres maladies, comme l'enfleure des paupieres: la dureté & le cal qui y vient, que les Arabes appellent Zarnach: la cheute du poil, ditte en Grec, Ptilosis, & par Auicenne, Sulach: la couleur de l'humeur cristalline changée en bleu, ditte Glaucoma: la cataracte, ditte en Latin, Sufusio, en Grec, Hyposchyfis: la taye ou magle, ditte des Grecs Ptorygion, & onyx, & des Latins, Vnguis: le phlegmon &

gmon & cuysson, ditte Ophthalmia par les Grecs : le prurit & demangeaison en l'extremité des paupieres, appelée en Grec Psorophthalmie : par-ce qu'elles sont communes aux grandes personnes, nous les remettons au traité des maladies communes a tous eages.

I. Des yeux chaffourrez & chassieux.

Quelques-fois les paupieres des yeux tiennent si fort aux enfans, par vne humidité gluante & chassieuse, qu'ils ne les peuuent ouurir : & ceste maladie est appelée des Latins Lippitudo, que les barbares nōment Infiltratio palpebrarum

Les causes.

Cecy procede des superflues humiditez du cerueau, enuoyces au bout des paupieres, lesquelles s'espoississent & gluent en dormant, & quelque-fois aussi en veillant, pour la grand' abondance de la matiere visqueuse : ce qui aduient aux enfans qui tettent a cause du lait gros & visqueux qu'ilz succent, & aux autres a cause de la complexion humide du cerueau, & de la nourriture trop humide, & a ceux qui sont grands beueurs.

Les remedes.

Il ne faut aux enfans ordonner autre chose, sinon que la nourrice leur iette sur les yeux du lait de sa māmelle, pour les descoller : ou les essuyer avec vn linge mouillé de mesme lait : ou s'il y ha chaleur, d'eau rose, sinon de la decoction de violette, melilot, & scœnugrec, y adioustant, si besoin est, de plus forte abstersion, du miel, ou vn peu de vin. A ceux qui de ceste maladie ont la veüe plus debile & empeschee, on adiouste a celle mesme decoction, du fenail &

de l'euphrase, ou vne autre herbe de faculté pareille : ou en lieu de cela, on estuue leurs yeux des eaux distillées desdites herbes, avec miel ou sucre, ou sirop, comme on voudra. Et ce pendant faut tenir regime de s'abstenir de toutes chose qui remplit le cerueau d'humidité superflue.

I I. Du regard louſche.

Le regard oblique, c'est a dire, bigle & louſche, est vne indisposition de tout l'œil, en laquelle il est tourné de biaïſ, & ha ſa pupile ou prunelle non tournée directement a la chose qu'il regarde : Elle est nômee des Grecs, Strabismos, & ceux qui l'ont Strabones, c'est a dire, bigles & louſches : laquelle indisposition vient quelquefois de naissance (& est celle que nous entendons de guarir toſt apres que l'enfant est né) quelquefois de mauuaïſe accouſtumançe, quelquefois par accidēt & par force de maladie, mais ce dernier genre est plus toſt dit tournement des yeux en la teſte, que regard louche : parquoy n'entendons d'en parler en ce lieu.

Les cauſes.

Celuy qui vient de naissance est fait, ou de la ſituation déprauée des muſcles de l'œil, tellemēt que ie mouuon est mal ſitué ſur ſon tour, ou de trop grande abondance d'humidité de cerueau : laquelle relasche & mollifie les nerfz & muſcles, inſtrumens du mouuement de l'œil. Celuy qui vient de mauuaïſe accouſtumançe, deſreigle tellement le mouuement & tournement de l'œil, que par cela eſtant les nerfz d'iceluy debilitiez, reçoýuent les humiditez du cerueau, d'ot ils ſe relaschent pareillement, & ſe mollifient, & ne ſe peuvent plus remettre en leur forme premiere. Celuy qui vient

d'accident & par force de maladie, vient ou de relaschemēt & molliſication des nerfz & muſcles, qui tournent le mouvement de l'œil, comme les deux genres ſuſdits, a cauſe de l'abondance des humeurs qui y deſcendent du cerueau, ſoit non ſoit, que deſcendant, leſdites humeurs ſe croiſſent, cōme aucuns penſent, & vont les vns du coſté droit, les autres du coſté gauche, parquoy mouuent les eſpritz viſoires deſordonnement, & font ainſi l'œil regarder en biaiſ : ou plus toſt il procede de conuulſion & retiremēt des nerfz de l'œil ou a cauſe de ia trop grande humidité qui les oppile, procedant du cerueau, comme en appoplexie, epileſſie, & ſpaſme : ou a cauſe de ſiccité, comme on voit auenir es fieures trop aſpres & longues.

Le iugement qu'on en peut faire.

Il eſt tenu vn arreſt entre les Medecins, que le regard bigle & louſche des enfans, ne ſe guarit ſinon en l'enſance, auant que les membres deſechent de leur humidité naturelle, & lors qu'il eſt encore recent.

Le moyen de le remettre en façon naturelle.

Tout ce qui peut faire mouuoir & tourner l'œil d'autre coſté que de ſon regard oblique, on le doyt inuenter : a fin de le remettre au regard droit & ſelon nature. Et pour ce que Paul d'A Eſſene ha opinion que ceſte diſpoſition n'eſt ſinon conuulſion des muſcles de l'œil, il ordonne premierement qu'on mette vn maſque ſur le viſage, en façon que l'œil puſſe regarder droit par les trous a l'endroit des yeux : puis qu'on mette de la lumiere a l'opposite & vis a vis de la partie de l'œil louſche, & non du coſté ou la prunelle eſt tournée.

Que si la destorse de l'œil est vers le nez, il veut qu'on luy mette des loppins de laine rouge du costé du coing de l'œil vers le temple : afin qu'en retournant l'œil & regardant fiquement de ce costé par le trou du masque, il puisse se remettre au regard naturel : autant peut on dire de luy mettre autres choses de diuerfes couleurs & luy santes, a fin que l'enfant traueille a tourner son œil celle part. Et en cela Paul est suiuy de Rasis & d'Auicenne. Aucuns donnent grand' vertu a vn miroir d'acier, le mettant visa vis de la partie lousche, a fin qu'il tire la prunelle de l'œil, & la pointe du regard de son costé. Oultre cela, Rasis fait distiller du sang de pigeon & de tourtre dans l'œil, & souuēt : peut estre pour fortifier par certaine propriété les muscles & les tuniques de l'œil.

Des maladies des oreilles.

C H A P. I I I I.

I L E S T seant de parler des maladies des oreilles : desquelles la plus part, comme le siflement, le flegmon ou apostume, les auripeaux, qu'on appelle parotides, du nom Grec, la douleur a cause ou de ventosité, ou de reume, ou de quelque coup, sont renuoyees au traité des maladies communes : en apres l'eau & les perce-oreilles, & autres bestes qui entrent dedans, sont delaissees au maniement de la chirurgie : puis les purons & les vlcères qui leur auient, nous les remettons au quatriesme rang qui vient apres, Des maladies du cuyr. Ne nous reste donc a traiter sinon de l'humidité & orduere que les oreilles rendent, pour vne maladie qu'Hypp. & Paul d'AEgine mettent entres les plus notables maladies des enfans : combien que nous les voyons aduenir bien souuēt aux autres personnes.

I. *Des eaux & ordures que les oreilles rendent, sans apostume ni ulcere.*

Or elles sont mises du nombre des maladies, pour-ce que ce n'est point le naturel que les humiditez du cerueau se vuidēt par les oreilles: lesquelles doiuent estre enuoyees par le nez, ou par le palais, & la bouche. Car les superfluitez iaunes qu'on appelle choleriques, lesquelles s'amaissent dedans les oreilles, ne sont point reputees, par les anciens, excremens du cerueau, ains plus tost certaines superflus humiditez engēdrees là des fumees espoisses d'iceluy, meſlees avec l'air qui entre dedans.

Les causes.

Eiles procedent non seulement de ce qu'estant le cerueau humide de nature, l'est beaucoup plus es enfans: mais de ce que, peut estre, elles sont acquises au ventre de la mere: ou qu'ilz ont succé trop de lait: ou que le lait de la nourrice est trop humide: ou si l'enfant est détrié, qu'il boit & mange trop, dort trop, & vse de choses qui remplissent son cerueau d'humidité.

La maniere d'en guarir.

Pour en guarir, premierement il faut ordonner tel regime que la nourrice s'abstienne de choses qui rendent son lait aigueux & flegmatic, que l'enfant ne tette point la nuit: & s'il est détrié, qu'il mange & boiue & dorme peu. En apres, faut aduiser aux medicamens qui mondifient & dessechent, a les appliquer telz & comme on doit: & auant que rien mettre dedans les oreilles, obseruer les reigles qui s'ensuyuent.

*Reigles generales de la maniere de mettre
medicamens aux oreilles.*

Premierement, faut regarder dedans au clair du iour, puis nettoyer les ordures qui y sont. En apres, mettre dedans le medicament doucement, & sans faire mal. Qu'il ne soit actuellement froid, ne trop chaud. Soit plus liquide & fluide qu'autrement, a fin de courir plus promptement au lieu du mal: & afin aussi de l'essuyer & nettoyer mieux. Soit mis non en grand' quantité, pour le plus iusques a quatre ou cinq gouttes, de peur qu'il n'entre au lieu ou n'est besoin. Ne soit de choses stiptiques, c'est a dire, qui reserrent & repoussent au dedans. Et y soit mis avec vn instrument auriculaire & propre, que les Grecs appellent Otanchite, qu'on peut tourner en François, Auri-fusoire, ou Entonnoir d'oreille, ou avec du cotton, sans baston, trempé au medicament, & exprimé vn peu. Faut apres cela coucher le patient sur l'oreille saine, vne bonne heure, a fin que le medicament se profonde & entre a loisir: puis le remettre coucher sur le costé de l'oreille malade, a fin que l'ordure puisse mieux couler, & ne face nuyssance a l'oreille par sa longue demeure. Toutes-fois on y doit laisser le medicament cinq ou six heures, pour auoir assez temps a faire son operation: sinon qu'il soit narcotif, comme l'opium, ou caustic & corrosif, comme litharge, & autre semblable, lesquels n'y doyuent faire longue demeure: ou qu'il soyt de facile corruption, comme le lait, lequel y doyt peu demeurer, & estre renouvelé souuent: autrement n'en faudroit point vsr.

Ces reigles obseruees, faut maintenant venir a declarer les remedes de l'humidite qui sort des oreilles. Le premier, est de laine trempee en de gros vin rude, vieil, avec vn peu de safran: ou de mesme vin tout pur: ou de l'hydromel: ou du vin mieilé sans safran: ou du commun avec safran, en gros vin rude: ou du sucre avec le mesme vin, ou avec autre liqueur desiccative: ou du syrop d'absynce, ou autre mondificatif: ou de la poudre de colophonie en vin de grenade: ou vn peu d'alun & de nitre ou salpêtre, avec vne partie des choses susdittes, en forme d'onguent, que lon compose en ceste maniere. R. mellis & vini austeriani. vnc. ij. aluminis vsti drag. j. nitri drag. s. croci, scrup. j. bull. simul. Aucuns meslent seulement de l'alun brulé avec de l'huile, ou mouillent premierement la laine d'huile, puis respandent l'alun dessus. Plusieurs instillent dedans l'oreille de l'huile de cheneué, ou de son ius, quand on voit que la bouë en sort: ou de l'huile d'iris avec vin-aigre, ou de la terebenthine ou resine de pin, avec miel, ou de l'huile d'amandes ameres, avec myrrhe, ou du ius d'absynce, ou d'autre herbe amere, seul, ou avec miel, y adioustant du safran, qui veut: ou de la poudre de myrrhe, safran, amandes ameres, & miel, meslez ensemble: la mente aussi dissoulte avec vin-aigre, nettoye les oreilles de toute pourriture.

Si les humiditez qui sortent des oreilles, sont chaudes & picquantes, pour les reprimer, & appaiser la douleur, on prend du ius de myrthe, ou des noix de galle, destrempees en bon vin-aigre, ou du ius de la renouëe, ou de plantain, avec autant de ius de roses rouges, ou de l'huile rosat, avec vin-aigre, & vn peu de myrrhe,

comme Galien escript au liure des Remedes aisez a faire sans grand coust, que lon met dedans l'oreille avec cotton ou laine. Haly, trempe le cotton de collyre blanc, fine opio. Toutesfois quand la douleur cōtraint, & est trop vehemente, aucuns adioustent ledit opium, ou autre medicamēt narcotif & stupefactif, c'est a dire, estourdisant le sentiment, en petite dose, avec laiēt de femme, ou avec miel, ou d'un aubin d'œuf, instilé avec vin doux, moyennement chaud: non sans le consentement de Galien, au troisieme liure, Cata-topous, c'est a dire, Des maladies particulieres, chapitre septiesme.

II. Des vers qui s'engendrent es oreilles.

On voit quelquefois des vers qui sont engendrez dans les oreilles, ce qui aduient ainsi comme en tous lieux caues du corps, a cause d'humeurs corrompues, procedant de repletion & crudité, ou de mauuais nourrissement. On les tire ainsi comme la bouë, avec miel: & s'ilz ne sortent, on les fait mourir avec ius d'absynce, ou de thanasie, ou avec lesdittes herbes cuytes en vin: puis on les tire avec les mondificatifz telz que cy dessus.

Des maladies dedans la bouche.

C H A P. V.

EN TRE les maladies des parties de la bouche, celles qui sont les plus notables aux enfans, sont cōme la douleur de la sortie des dents, & les accidens qui l'accōpaignent, scauoir les inflammations & apostumes des gēciues & des maschoüeres, le prurit & piquement des genciues, par les petites vescies & escorcheures de la bouche, & du bout de la langue, & du palais, que les Grecs nomment Aphthæ,

le prince des Arabes Alcola: puis le beguaiment, puis le fillet sous la langue.

I. Des douleurs de la sortie des dents, & des accidens qui les accompagnent.

La sortie des dents, communement & le plus souvent se fait enuiron sept moys: combien qu'a aucuns plus tost, a aucuns plus tard. Car i'ay veu des enfans auoir des le quatriesme mois leurs premieres dents: d'autres au contraire, ne cōmancer de les auoir plus tost qu'a dix mois. Et quand elles veulent sortir, elles font douleur plus ou moins, & sont accompanees de plus ou moins d'accidens, selon la saison de l'annee, & selon qu'elles sont tardiues & soubdaines a se monstrier: car celles lesquelles des le temps qu'elles cōmencent a sortir ne sortent pas si promptement, font plus de douleur: & celles qui viennent en Esté donnent plus d'affliction, comme de chaleur de bouche, d'inflammation de genciues, & de fieure, a cause que telles choses aduiennent aussi communement en temps chaud. Or les accidens, qui volontiers suruienēt sur le point qu'elles veulēt sortir, sont, comme le prurit & piquement des genciues, flegmon & apostume chaud des mesmes genciues, & des chordes qui mouuent les maschoïeres, fieures, & quelque fois conuulsion, puis flux de ventre, & au contraire quelquefois le ventre restraint: parquoy est besoin d'y obuier, & de remedier a la douleur, & ayder a faire sortir les dents aisément. Mais premier faut cognoistre quand les dents commencent de vouloir sortir.

Les signes pour cognoistre si elles veulent sortir.

Quand les dents veulent sortir, alors les genciues sont chaudes, rouges, & enflees, a cause de l'humeur enuoyee

celle part pour les dilater, & preparer l'ysſue a la dent, laquelle humeur eſt chaude: & y ha prurit & demangeaiſon, a cauſe que ladite humeur eſt aigue, pour faire mieux penetrer & fortir la dent: combien que la meſme humeur eſt aucunemēt groſſe, pour dilater la genciue. Et ce prurit ſe cognoiſt, par-ce que l'enfant qui ne peut parler, met ſouuent le doigt en la bouche, & ſur les genciues, ou quelque autre choſe, pour les frotter. On voit auſſi comme quelque bauc fortir de ſa bouche, meſinement lors quelle pouſſe & commande de fortir.

Les cauſes de la douleur.

L'vne des principales cauſes de la douleur de la ſaillie des dents, eſt la chaleur de la matiere aigue, laquelle vient deuant que la dent ſorte, & luy prepare le chemin: l'autre eſt le perçement de la genciue, & la ſolution de continuité, tant a cauſe de l'acuité de l'humeur, que de la pointe de la dent, laquelle perce la peau & la chair de la genciue, qui eſt ſenſible & tendre.

Le prognostic & iugement tant de la douleur, que de l'eſpace du temps de la ſortie des dents, & des accidens qui ſuruiennent.

On prend iugement de la douleur & de la longueur, ou breueté du temps de la ſaillie des dents, & des accidens qui „ en ſuruiennent, par la ſaiſon de l'annee, & par la comple- „ xion de l'enfant. Ceux (dit Hippocrates, au Liure de ce- „ ſte matiere) leſquelz commencent d'auoir leurs dents en „ Hyuer, portent plus aiſément la ſortie des dents. Et „ encore au meſme lieu: Ceux, dit-il, a qui en Hyuer les „ dents commencent de fortir, ſi toutes les autres choſes „ vont bien, ſont en ſeureté de conuulſion, & quittes des

„ douleurs & des maux qui surviennent. La cause, ie pense que c'est, pour-ce que lors la matiere n'est pas si aigue.

Quant a la complexion, on iuge aussi qu'a ceux qui sont flegmatiques ou melancholiques, la naissance des dents est plus tardive, & avec moins de douleur : a ceux qui sont sanguins & choleriques, le rebours. Des accidens qui surviennent lors, Hippocrates au liure susdit, prononce aussi, si son iugement & sa sentence, en ceste maniere : Ceux, dit-il, qui a la saillie des dents ont flux de ventre, sont moins subiectz a convulsion. Ceux encore, dit-il, qui, quand leurs dents sortent, ont la fièvre aigue, ont convulsion bien peu. Ceux d'avantage, dit-il, qui au temps de la sortie de leurs dents, sont frais & en bon point, & dorment profondement, sont en danger d'estre surprins de convulsion. Mais toutes-fois, dit-il apres, tous ceux qui a la sortie de leurs dents souffrent convulsion, n'en meurent pas : ains plusieurs en eschappent. Ceux outre-plus, dit-il, qui ont la toux quand leurs dents leurs veulent sortir, elles leurs sortent plus tart, avec picquement, & deviennent plus grasses & plus meigres.

*Les remedes pour faire sortir aisément les dents,
& appaiser la douleur.*

Le regime qu'on doyt tenir pour faire sortir les dents aisément, & appaiser la douleur, est de diminuer le tettemēt de l'enfant : ne luy donner rien qui soit, a macher : ni autre chose a manger que le lait : entretenir toujours le benefice du ventre.

En apres ne faut rien mettre en la bouche de l'enfant, ni sur les gencives qui soit actuellement froid, de peur de retarder l'issue de la matiere, qui appreste l'issue de

la dent: ni aussi actuellement chaud, de peur d'irriter ladicte matiere & l'endurcir: mais ce qu'on y met, soyt lenitif, & dilatant la gencieue, & apaisant la douleur.

Donques la nourrice doyt frotter doucement & chatouiller longuement la gencieue avec le doigt, tant pour la dilater que pour en tirer l'humidité qui y est: tenant la teste de l'enfant clinée en bas, a fin que la baue forte mieux. Et combien qu'Oribase & Paul ordonnent de ce faire dans le bain, pour-ce qu'ils faisoient baigner l'enfant tous les iours: toutes-fois baigné ou non baigné, le frottement se doit faire a toutes heures qu'il se deult de ses dents. Et n'est pas assez de frotter la gencieue simplement, ains faut l'oindre ou d'huile chamomile ou de gresse douce, ou de ceruelle de lieure, laquelle en toute maniere est bonne, crue, bouillie, rostie, seche au four, ou bruslée, soit par vne qualité cōmune lenitiue, soit par proprieté occulte commode a tirer l'humidité de la gencieue, laquelle mise en poudre est bonne aussi contre le chancre de la bouche: soit aussi qu'on la prenne simple, soit qu'on la mesle avec les gresses crues, ou cuittes apart, ou qu'on les cuise ensemble: aucuns y adioustent du miel, ou du sucre, & du sel bruslé. On l'oint aussi avec miel seul, (avec lequel on frotte aussi le palais & la langue) ou avec miel, & sel bruslé, ou avec sucre & vn peu de mesme sel, ou avec beurre fraiz, ou vn peu salé, pour faire mieux filer l'humidité de la gencieue, car celuy qui est trop salé, eschauffe & desèche: ou avec beurre & moelle de iaret de beuf: ou avec beurre & huile de lis & de chamomile ensemble: ou avec huile de lis seule: ou avec ladicte huile & les gresses douces, & vn peu de poudre de fouchet ou d'hysope, ou sans ladicte poudre: ou avec les gresses de canard,

d'oye, & de geline, ensemble, ou seules sans autre chose : ou avec du lait de chiène seule, ou meslée avec ceruelle de cochon. Mesué fait mascher ou mordre de la chair grasse, & tenir sur la genciue. Et ce temps pendant, si la douleur croist, faut faire embrochation, & espandre sur la teste de l'eau chaude, simple ou de decoction de chamomile & d'anet, tant pour desouldre les superfluitez du cerueau, par les commissures du crane, que pour destourner la matiere de l'endroit malade. Puis desecher & couvrir la teste & le col de laine blanche, par le conseil de Haly : combien qu'Oribase & Paul aduisent de ce faire lors seulement quand la dent commence de se monstrier : ou en lieu de cela, mettre quelque chose anodine & mitigatiue de douleur, en forme de cataplasme, selon que Razis conseille. Si la douleur est mediocre, on applique les anodins chauds mediocrement, faisant embrochation avec huile simple, ou huile d'amandes douces, ou huile de chamomile, ou huile de lis : & y mettant dessus de la laine avec son sain. Et si on veut, on respand deuant sur la teste la decoction de chamomile, melilot, anet, semence de lin, & de fenugrec. Puis on fait encore vn emplastre, ou vn ciroine tel que s'ensuyt. R. ceræ, vnc. j. ol. cham. vnc. iiij. cœsypi vnc. iiij. adipis gallinæ & anatis, medullæ cruris bouis an. vnc. s. fiat ceratum.

Auicenne fait mention que la racine d'ache pendue au col de l'enfant, luy oste la douleur de la sortie des dents.

Quand la dent cōmance de sortir, & de se monstrier, comme vne chose blanche & d'arete, lors se faut abstenir de toute chose dure a mascher, principalement a la sortie des dents canines & œilleres, de peur de les faire mouffes, estât encores tendres, & non assez endurcies. Puis quand elles

commencent de s'endurcir, lors dit Auicenne, il faut faire marcher a l'enfant vn brin de racine d'iris, vn peu verdelette, que la nourrice tiendra, de peur que l'enfant ne l'aualle : car elle oste la douleur des genciues, nettoye les humiditez qui y sont, & celles qui sont en la racine de la langue, & en la poitrine: & par ainsi fait que le reste de la dent sort plus aisément, & se fortifie en la cassette, & la langue se prepare a former mieux la parolle, & les parties pectorales se mondifient, & le souffle en est meilleur. Aucuns louent le reglice vn peu conquisé: autres la racine de mauue: autres vne crouste de pain, alors que les dents œillieres sont ia sorties. Les femmes leur donnent vn iouet d'vne dent de Loup, fichée en vne canule d'argent: qui peut valoir a ce que dessus & a luy donner passetemps: mais a la douleur de la dent, il n'y ha raison ni experience qu'elle vaille rien.

II. Pour corriger les symptomes & accidens qui suruiennent a la naissance des dents

Vn peu cy deuant ha esté fait mention des symptomes & accidens qui suruiennent aux enfans, lors que les dents cōmencent de percer les genciues, lesquels Hypp. racompte au troisieme liure des Aphorismes, sçauoir Prurit des genciues, fieures, conuulsions, & le flux de ventre, lequel suruient, & mesmement, dit il, quand les dents œillieres, dittes autrement canines, sortent: principalement aux enfans grassetz, & qui ont le ventre cōstipé, a cause, dit Galien de leur repletion, & abondance de superfluitez d'humeurs: ou plus-tost a cause que Nature, pour la douleur, ne peut bien diger, & est empeschée la digestion & distribution du nourrissement au foye, en ce petit corps debile. Oultre ces symptomes, Oribase & Paul en adioustent deux autres, qui

suruiennent du prurit susdit, sçauoir est, l'inflammation des genciues, qu'ils nomment Parulide, laquelle quelque-fois s'apostume:& vne chair superflue venant de ceste inflammation en la genciue, mesmemēt aupres des deux maschelières, laquelle ils appellent Epulide: dont ceste la est ditte d'Auicenne Aucalis,& ceste cy Abulis, que les truchemens de Razis appellent Vescie en la bouche de l'enfant: lesquelles maladies se cognoissent assez par signes euidents a l'œil. Quant a la conuulsion & a la fiure, leur cure ha esté traitée cy dessus. Touchant le flux de ventre, on le guarira cy dessous, au troisieme rang des maladies.

Au prurit ou piquement de la genciue.

Estant d'opinion que le prurit vient de la douleur de la naissance de la dent, laquelle attire a la genciue abondance d'humeur salee, c'est a dire, participant de flegme & de cholere: c'est bien fait d'oindre la genciue de beurre avec miel: lequel vnguent oste celle douleur, par-ce qu'il resoult & desèche la matiere qui picque & demange. Oribase & Paul font vn vnguent de cire fondue avec huile crue, & aduisent encore vn autre, de chair longuement salee: parce que le premier addoucit la douleur, relasche la chaleur, & abbaisse la tumeur, le second absterge la genciue, & desèche les superfluités. Haly n'ordonne sinon le frottement avec gresse d'oye, de geline, de beurre, & de cervelle de lieure. Et là ou le prurit n'est sinon d'humeur chaude, aucuns mouillent vn linge de la decoction de plantain, & d'escorce de morier blanc, & en estuent la genciue: & par dehors on gresse la iouë & le col d'huile violat, ou rosat, avec vn peu de cire. Et font tenir regime a la nourrice comme si elle auoit la fiure.

*A l'inflammation de la genciue, que Paul appelle Parulide,
Aucenne, Aucals.*

On cognoist l'inflammation de la genciue, a la rougeur qui est dedans & dehors la maschoüere, au col, a la ioue, & a la face : & qu'il y ha fieure & douleur grande . Pour a quoy remedier, la nourrice se doyt traiter comme si elle-mesme auoit la fieure : & a l'enfant bailler a boire du iulep Alexandrin, ou comme Haly conseille, de la decoction d'yuoire, qu'il appelle Spodium, avec semence de pourpié, ou du sirop de limons, de grenade, ou autre semblable . Au reste, ce qui est bon au prurit, il est bon a ceste maladie. Haly-abbas, oingt les temples, le col, & la iouë d'huile violat tiede, & en met quelque peu dans l'oreille du costé qui deult le plus, & emplastre le mēton de farine d'orge cuitte avec laditte huile, ou avec du laiçt . On oingt aussi les genciues avec mucilage de semence froides, comme de psylum, ou de semence de coing, avec lesquelles on peut mesler celle de mauue. Aucuns prennent de l'huile rosat tiede, avec ius de morelle, & en mettent quelques gouttes dans l'oreille, avec de la laine, & en appliquent ainsi sur la teste, sur le col, & sur la machoüere.

A la vescie & excrescence de la genciue, que les Grecs nomment Epulide, Aucenne Abulis & Bocalis.

En corrigeant le laiçt de la nourrice, on frotte ce temps-pendant la superfluité de la genciue avec huile violat, par le conseil de Razis: au avec amydon & eau rose: ou avec ling mouillé de ius de grenade, ou de coing, ou de pourpié, & semblables: ou avec decoction de lentilles, ou d'autre chose estraignant & desechât: & apres cela, le mesme autheur ordonne

ordonne de myrrhe & de safran, de chascun drag. s. de sucre drag. ij. pour l'en froier, a fin de resouldre la matiere, & conforter la partie.

III. Du mal dedans la bouche.

En la bouche de l'Enfant qui tette, cōme escript Hypp. au iij.liure des Aphorismes, quelque-fois auiennent des vlceres, comme chancres, que les Grecs appellent Aphthæ, Auicenne Alcola, Haly-abbas Calaba, les Latins simplement Vlceras oris, en nostre langue, Mal de bouche : lesquelz encores auiennent aux grandes personnes : & auiennent plus communement aux genciues, comme dit Celse, puis occupent le palais & la langue, puis toute la bouche, descendant iusques a la luette & aux amygdales : ce qu'estant auenu, mal-aisé que l'enfant en puisse guarir. Et sont de plusieurs especes, selon la diuersité des humeurs dont ilz sont engendrez : car les vns sont rouges, demonstrent l'affluence du sang : les autres iaunatres, signifiants la cholere : les autres blanchastres, lesquelz viennent de flegme salé : les autres noirastres, qui donnent entendre la cholere bruslee, ou le sang melancholic corrompu.

Les causes.

Parquoy s'ensuyt qu'ilz procedent des humeurs susdittes, lesquelles sont engendrees es petis enfans, de mauuais lait, tant du costé de le nourrice, que de ce que l'enfant n'en ha peu digerer, & s'est corrompu en son esthmac : & pareillement des vapeurs & fumees, lesquelles produittes du lait ou de la viande corrompue en l'esthmac, montent & gassent les parties de la bouche, lesquelles en l'enfant sont tendres & passibles.

Le prognostic & iugement de l'aduenir.

On en fait le prognostic & augure selon la couleur qu'ilz ont, & la qualité des humeurs dont ilz sont engendrez, & selon l'endroit ou ilz sont, & selon les accidens qui les accompagnent. Ceux donques qui viennent sans apostume, & ne serpissent point, ni ne sont profonds, & sont blancheastres ou iaunastres, sont faciles a guarir. Les noirastres sont mortelz, dit Auicēne. Ceux qui serpissent, & ne meurissent point, c'est a dire, de qui l'humeur est crue & rebelle a Nature, sont tres-mauuais & tres-dangereux.

Hippocrates au liure de la naissance des dents, iuge de ceux qui viennent a la racine de la langue, & aux amygdalles, en ceste maniere.

Les vlceres, dit-il, qui sont es amygdales, sans fieure, ne sont pas si dangereux.

Ceux qui sont avec la fieure, & la toux, danger est qu'ilz ne rengregent & serpissent.

Quand l'enfant peut aualler la viande, quelz que soyent les vlceres des amygdales, c'est signe de sauueté.

S'il ne peut deglutir ni aualler, danger que beaucoup de cholere ne sorte par vomissement, ou par le bas du ventre.

Es vlceres des amygdales, s'il y ha quelque chose pareille a du sable, il n'est pas bon.

Es vlceres des amygdales, si depuis il flue de la pituite par la bouche, laquelle ne fluoit pas par-auant, est bonne chose, & la faut faire sortir. Et si des le commencement des vlceres elle flue, puis se relasche, il s'en faut resiouyr : mais si elle ne flue pas du tout, il faut craindre.

Les vlceres des amygdales faittes en Esté, pires qu'en au-

tre saison : car plus tost ilz serpiſſent & s'estendent.

Ceux qui serpiſſent autour la luette, changent la voix a ceux qui en eſchapent.

Et ceux qui serpiſſent pres de la gorge, ſont plus grieſz & plus aiguz, & pour la pluſ-part, ſont auoir difficulté d'—halene.

Les remedes.

La premiere intention pour y remedier, eſt corriger le laiſt de la nourrice : la nourrir de choſes qui refroidiſſent, & repriment l'acuité des humeurs. Et ſi l'enfant eſt ia grandet, luy faire manger potages de laiſtue, vinette, pourpié, cichoree, & des lentilles cuittes, en forme de panade. Puis faut mondifier les vlceres pour le commencement, en les deſechant, & empeſchant touſiours la dilatation, avec eſt—uement ou gargarisme d'hydromel cuit en eau d'orge, de plantain, roſes, myrtilles, & ſemblables : Ou mettre deſſus de la poudre de violette blanche, avec miel, par le conſeil de Galien : ou de la poudre de roſes, & de lentilles, pareillemēt avec miel, en forme de liniment : ou eſtuer encore avec vn linge, ou gargarifer des ius, ou des eaux, ou de la decoction de plantain, de morelle, de roſes, de vinette, laiſtue, pour—pié, triquemadame, avec miel ſimple ou miel roſat, ou rob de meures, dit autrement diamoron, lequel ſuffit quelque—fois appliqué ſeul : ou avec hydromel ou miel encore, & le ius de grenade cuit eſpois : ou le rob de ribez : ou le rob de meures : ou le rob de verius, c'eſt a dire, d'aigreſt cuit avec ſa grape, puis ſeché au Soleil : ou avec les ſirops de plantain, de myrtilles, & de roſes ſeches, & les decoctions ou eaux diſtillees ſuſdittes. Et toutes ces choſes appartiennent ſeule—ment ou principalement aux vlceres iauneſtres ou rougeaſtres, & qui ſont de matiere chaude & aigue.

On mondifie & digere les blancheaftres, & qui font de flegme corrompu, & les noiraftres, avec la decoction de chamomile, melilot, anet, & fenugrec, & avec le ius de reglice, lequel par fa chaleur & humidité temperee digere & meurit le mal, & mitigue la douleur, en y adiouftant le ius de cheurefueil, & tousiours les choses qui refroidissent, dessechent, reftreignent & engardent de serpir les vlceres, comme les ius, les robs, & les premieres decoctions susdittes: par ce qu'a telle maniere d'vlceres, avec les refrigeratifz & dessicatifz doiuent estre meslees les choses qui ont quelque peu de chaleur. Comme Oribase & Paul ordonnent vn peu de myrrhe, & d'escorce d'encens, avec noix de galle, chacun par soy ou tout ensemble, incorporé avec miel, en forme de liniment: pour ce que cela digere l'humidité, desseche, consomme, & meurit la matiere, & conforte la partie. Autres ordonnent du mastic avec noix de cyprez: autres du safran avec les choses qui refroidissent & dessechent les vlceres iaunes. Ainsi donques on mesle au commencement avec les mondificatifs, les choses qui digerēt, refroidissent, appaisent la douleur, dessechent, reftreignent, & engardent de dilater l'vlcere.

Après auoir fait tout cela, on vient finalement a dessecher seulement & a consolider l'vlcere: comme premierement avec gargarisme ou estuement de decoction de noix de galle, de noix de cyprez, balaustes, psydies, sandaulx, myrtilles, roses, & autres astringens semblables, seuls, ou la plus part cuits ensemble: ou avec les robs, ou ius, ou eaux distillees susdittes, plus, moins, cōme on verra bō estre: ou avec frottemēt & linimēt des poudres d'uyoire brulé, dit spodion des Arabes, de corne de cerf, sandaux, de roses, ou de leurs

fleurs jaunes, dittes *Antheræ* des Latins, de sumac, myrtilles, balauftes, escorce de grenade, coriandre, lentilles escorcees, semence de pourpié, avec vn peu de camphre, y adioustant du chrystal, quand l'vlcere est chancreux & corrosif: en incorporant tout ou la plus part, avec eau rose ou huyle rosat, ou autre huyle astringente.

IIII. Du Begueyement de l'Enfant au temps qu'il deuroit bien former ses parolles.

Quand l'Enfant ha troys ans, il est ia temps qu'il comance de bien former ses mots, lors que l'humidité du cerueau cōmance de secher, & que l'enfant domine sur sa langue: & ne pouuant ce faire, on le dit trop tardif de la parolle, & Begue en nostre langue, en Grec *Traulos*, Blesus & *Balbus* en Latin: lequel vice n'est sinon vne desobeissance de la langue a la volonté de celuy qui la mouue, pour cuyder bien parler, & ne peut.

Les causes.

Cela procede d'humidité superflue du cerueau: ou de l'abondance de la salieue es glandules, qui sont en la racine de la langue: ou de la repletion des venes, arteres, & muscles d'icelle, & de toute sa substance: laquelle chose mollifie ses nerfz, & la rend comme paralytique & debile en ses mouuemens. Il y ha bien plusieurs autres choses qui empeschēt l'enfant, & toute autre personne, de bien pronōcer ses mots: cōme quand la langue est trop couste, ou trop longue, ou trop large, ou trop grosse & espoisse, ou monstrueusement fourchee au bout: ou que le ligament & le filet qui est dessous la retire: ou qu'elle ha quelque apostume dessous, comme celle que les Grecs nomment *Batrachus*, les Latins

Ranula, qui est vne petite tumeur semblable a la raynette, procedant d'humour visqueux: laquelle se guarit par gargarismes des choses qui repriment, consomment & dessèchent: ou que l'enfant n'oyt point, & pour ce est muet: ou quand les autres parties qui seruent a former la parolle avec la langue, ont quelque vice ou defaut, comme les leures, les dents, & maschouzières, les amygdales, le palais, la luette, la gorge, le canneau, le poulmon, le diaphragme, la poitrine: mais de telles causes & empeschemens nous ne faisons pas compte en ce lieu, ni aussi des causes primitives, cōme d'y-urongnerie, d'ordure, ou de quelque mal en la langue suruenant de dehors.

Les signes pour cognoistre l'empeschement venir ou du cerueau, ou de la mollesse de la langue.

Si nous voyons que l'Enfant, lequel ne parle point au temps qu'il deuroit, est lourd es operations des sens & des organes sensitifs du cerueau, comme a veoir, ouyr, gouter, toucher: & si nous voyons aussi qu'il ne se peut bien soustenir, ni bien aller, ni faire les autres euures de mouuement volontaire, c'est signe que la tardité de la parolle vient du cerueau, & non du vice de la langue. Mais s'il se soustient bien, chemine bien, tient bien la teste eleuee, voit & oyt, & ha l'entendement suffisant a conceuoir & former la parolle, lors nous pouuons coniecturer que la cause de l'empeschement de la parolle est es nerfs, ou au ligament, ou aux muscles de la langue, a l'occasion de l'humidité superflue, ou sanguine, ou subtile & aigueuse, ou grosse & visqueuse. La sanguine se cognoist par la rougeur & chaleur de la langue: l'aigueuse & subtile par la multitude de la salie & fluxion inuoluntaire de la bouche, & aussi par-ce que la chose qui

moûille, nuist, & ce qui est sec & astringeant, donne ayde : la visqueuse & grosse, par-ce qu'il y ha peu de salive, & les choses qui subtilient profitent, & les stiptiques & astringentes l'engrossissent, & nuyfent d'avantage.

Le prognostic & iugement qu'on en faict.

On fait iugement que la paralyfie & mollesse de la langue, laquelle est de long temps, & dure longuement, & laquelle aussi vient de naissance, a peine se guarit iamais, sinon en la puberté & adolescence, que la mutation de l'eage par diminution d'humeur corrige, avec le bon regime & les remedes conuenables. Car Galien, sur l'Aphorisme du vi. Liure, auquel Hyppocrates escript que les begues sont subiects a flux de ventre, dit que le begueyement par dessechement d'humidité se guarit avec le temps : tellement que les maladies chaudes, dit Auicenne, quelquefois par la fondure des humiditez le guarissent : de laquelle sentence on tire ce propos, que toutes maladies, & toutes autres choses qui dessechent, guarissent la difficulté de bien prononcer, prouenante de l'humidité superflue, qui est retenue au ligament, ou au nerf, ou en la substance de la langue.

Les remedes.

Il sera bien fait en la maniere de viure, euitier les choses froides & humides, dormir peu, ne manger point de choses douces ni huyleuses, cōme les noix, ni gluantes, ni rien qui relasche la langue, ou l'engrosse, ou la rende aspre ou espoisse : boire peu, efforcer l'enfant a parler, & pour l'y contraindre le faire courroucer : & afin que la langue se desseche mieux, la mouuoir incessamment, & la frotter souuent, pour faire escouler l'humidité & la salive. En autre regime que

du viore, & des choses fufdittes, troys choses font de faire : ſçauoir, vuyder de la langue la matiere qui fait le begueye-
ment, deſtourner celle qui y flue, deſſecher, reſouldre &
conſommer celle qui eſt demonree. L'euacuation ſe doyt
faire ſelon l'age & la portee de l'enfant. Le deſtournemēt,
par application de ventofe : ſur les eſpaules, par frottemens
des extremitez, par nettoiyement de cerueau, par le nez, &
par enuoy en bas, par clyſtere, & par la voye des veines : ſe
gardant de vomiffement, lequel tire de l'eſthomac a la par-
tie ou eſt la cauſe du mal, l'humidit  qui eſt en la langue. Le
deſſechem t ſe fait par application & a la partie oppoſite de
la langue, & a la langue meſme. Il ſe fait a la partie oppoſi-
te, appliquant les medicamens reſolutifs & deſſicatifs vſitez
en la cure de paralytie, a la poupe du cerueau, a la nuque,
& aux ſpondiles du col, comme a l'origine des nerfs & des
muſcles de la langue, auſquels eſt communiquee l'humidit 
du cerueau : & quelquefois les appliquant ſur la c miſſure :
mais il faut commencer par les plus debiles, procedant aux
plus forts, iuſques aux rubifians, ſi beſoin eſt, leſquels mis en
ce lien reſoluent & deſſechent les humiditez de la gorge, de
la langue, & de ſes nerfs. Il ſe fait a la langue meſme, pre-
mierement la frottant ſouuent avec vin-aigre, miel, & ſel
gemme, par le conſeil de Raziſ : ou avec miel & ſel ſans vin-
aigre : ou avec origan, ou ſauge, meſmem t trempee en gros
vin : ou avec racine d'iris ou d'acorus, par l'ordonnance de
Paul : ou avec vn baſton de boiz d'aloes, ou avec vn autre
enuelopp  au bout d'un linge tremp  en vinaigre, miel & ſel
gemme enſemble : ou avec pyretre, poiure, ſtaphiſagre, &
caſtor, enſemble ou chaſcun d'eulx a part, mis en poudre :
maſcher des raiſins ſecs, cuytz au four, eſt bon pour faire

cracher la salive & secher la langue : le ius de chou imperial avec l'oxyfacchar retenu en la bouche, fait filer la salive : & au cōtraire là ou la salive abonde trop, le vinatier & les choses aceteuses stiptiques sont bōnes. Si l'enfant pouuoit gargarizer du vin chauld, pur, ou du vin de faulge, bon a tout. Puis au progrez de la cure, on luy doyt donner de la theriaque ou du methridat quelquefois.

V. Du filer sous la langue.

En la base & au pied de la langue, son ligament quelquefois s'estend iusques au bout, & est si court qu'il l'engarde d'estendre, & empesche de mascher & de parler : les femmes l'appellent cōmunement le filet sous la langue.

L'enseigne pour le cognoistre.

Quand on cuide tirer la langue, elle se plie en rond en bas, & quasi se rodouble, ne se pouuant estendre iusques a sa pointe.

La maniere d'en guairir.

Combien que c'est chose de chirurgie, qui se doyt traiter en autre liure a part : touteffois en passant, pour le peu qui en est a dire, ie la mettray en ce lieu. On souleue le ligament avec vn suspensoire, fait en forme d'hameçon. puis on passe vn fil de soye double avec vne aiguille pour le lier, & on l'y laisse iusques a ce qu'il se rompe de soy mesme : & cela se fait pour le plus seur, craignant qu'avec le rasoir on ne coupe la vene, & vienne vn flux de sang : apres il faut mettre dessus quelque medicament corrosif, pour empescher la consolidation, comme du vitriol, avec lequel on le frotte : aucuns ne prenent que du sel & de la sauge : les femmes le coupent aux enfans nouveaux nez avec l'ongle.

Des maladies de la gorge & de la poitrine.

Estant les maladies de la teste exposees au premier rang, les plus pres a exposer & traiter apres, sont celles de la gorge & de la poitrine desquelles y ha quelque nombre: comme les escrouelles, lesquelles auient a ceux qui sont ia grands d'eage, la squinantie, la toux, la pleuresie, la courte haleine: mais parce que les petis enfans sont plus communement molestez de la toux, nous remettons les autres maladies ailleurs, aux traitez plus amples de celles qui sont communes aux autres eages, & nous suffit icy de parler de la toux, a laquelle les enfans sont plus subiets.

De la toux des enfans.

C H A P. I.

LA TOUX est vn mouuement de poulmon, fait avec quelque effort, a poulser hors par le hault ce qui luy nuist, avec l'ayde des muscles, de la poitrine, & du diaphragme, c'est a dire, de la cloison trauerfant le milieu du corps. Elle est de deux especes, l'une est ditte seche, l'autre humide: lesquelles deux sont distinctes selon les causes dont elles procedent,

Les causes.

La toux seche vient de la froidure de l'air, qui entre aux poulmons & a ses canaux: celle qui est humorale procede de trois choses: la premiere est le glout & desordonné sucement de lait, duquel se fait quelque petite entree dans le canal de la gorge, & de ceste-cy la sollicitude n'en est pas grande: l'autre est le reume ou descente d'humeur grosse ou subtile au poulmon, par morfondure ou autrement, comme d'auoir heu la teste descouuerte au froid, ou au soleil,

ou de l'auoir heu trop couuerte, faisant l'un fondre, l'autre exprimer (comme d'une esponge mouillée) les humeurs du cerueau, qui ia est fort humide es enfans : lesquelles humeurs sont engendrees des fumees de ce qu'ils tettent ou mangent beaucoup. La troisieme, est la congestion & amas de quelque matiere es canaux du poumon, de quelque part ou endroit qu'elle soyt venue, laquelle irrite le poumon a la poulsier hors.

Les signes de chascune cause.

On s'enquiert de la toux seche, & sans reume, si l'enfant ha esté descouuert, & s'il ha prins froid. On cognoist qu'elle vient du laiët qui est entré au canal de la gorge, si l'enfant est goulu, & s'il touffe en tettant, & quelque espace de temps apres. Celle qui vient de reume, est volontiers accompagnée de l'enroueure de la voix, & de coryze, c'est a dire, mornissement, & de ce que l'eau fluë du nez : & encore communement l'enfant qui ha ceste toux est chaud au front & es mains, & ha quelque moiteur par le corps, parce qu'il se fait lors vne grand' euaporation de tout le corps a la teste, de la matiere du reume, & de la toux, ou par ce que l'enfant est gourmand, & la nourrice se nourrit beaucoup, ou que l'enfant mesme mange beaucoup de chair : car le sang engendré de chair, est fort vaporeux. En quoy on note aussi, que si l'humeur est subtile & aigue, elle mort & pique, & fait toufsir fort. On iuge que la matiere est congeste & amassée dans la poitrine, & de long temps, quand l'enfant touffe souuent, & sifle, & crache gros & espois, & avec difficulté.

Le prognostic & iugement de l'aduenir.

Si la toux dure longuemēt, il est a craindre de la greueure :

en apres de suffocation, par faute de libre attraction de l'air, & du soufle du poumon: puis de secheresse & de cōuulsion, par faute de dormir: outre-plus de faute d'appetit, & debilité du foye, par faute de rafraichissement du cœur, & d'evaporation de la chaleur, dont l'enfant vient a estre extenué & en langueur, & ne profite point.

Les remedes.

Parquoy celuy qui ha la charge de l'enfant, doit pourueoir diligemment a sa toux, par les remedes qui s'ensuyuent, lesquelz il faut diuersifier selon la diuersité des causes d'icelle.

A la toux seche, venant de froidure, on doyt chauffer la poitrine de l'enfant avec linges chaulds, & l'engraisier de gresie douce, ou de beurre frais, ou d'huile d'amandes douces, adioustant vn peu de safran & de cire: puis mettre dessus des fueilles de chouls amorties sur la cendre chaude. Et s'il ha le nez estouppé, mettre dedans de l'huile violat & d'amandes douces, avec vn peu de vin, & d'eau de mariolaine, ou de l'huile de mariolaine mesme.

A la toux qui vient de reume chaut & subtil, ne le faut pas tant couvrir, ains le traiter comme s'il auoit la fieure: luy engraisier la poitrine & la gorge d'huile violat, avec vn peu de dialthæa: & pour diuertir le reume, luy froter au matin les iambes, les bras, & entre les espaules: le nourrir d'amidon, & d'orge-mondé, avec amandes, mettant parmi de la semence de pauot: luy faire humer du lait de chieure, avec vn peu d'eau bouillie, & de sucre rosat, ou de sucre simple, ou de penides, ou de tablettes de diagragant froid, ou de miel: ou luy faire manger de la bouillie avec

luy faire humer du laiſt de chieure, avec vn peu d'eau bouillie, & de ſucre roſat, ou de ſucre ſimple, ou de penides, ou de tablettes de diagragant froid, ou de miel: ou luy faire manger de la bouillie avec laiſt d'amandes, ou des pommes cuittes avec ſuere, & des raiſins de damas cuytz en vn pot, y meſſant puis du ſucre de penides: & luy faire boire de la tiſane, cuitte avec pruneaux & iuiubes, au repas, & du ſirop violat entre les repas, ou du ius de grenade douce. Et quant au fait de medecine, ſi l'enfant tette, faut purger la nourrice avec de la caſſe, entretenir le benefice du ventre de l'enfant: & ſ'il eſt feuré, luy faire prendre du ſirop roſat ſolutif, ou de cichoree, avec reubarbe. Apres, on fait prendre tant a l'vn qu'a l'autre de l'huile d'amande douce, extraitte ſans feu, avec du ſucre, ou du ſirop violat, ou roſat, ou de iuiubes, meſmement a l'heure de la toux: & ſouuent du loch de muccilage de ſemence de coing, de gōme arabic, & dragagant, & de ius de reglice, en égale portion, diſſoult en eau roſe, & meſlez avec l'vn des ſyrops ſuſditz, ou vn autre loch fait de laditte ſemence de coing, & de ſemence de pauot, trépees en de l'eau tiede, puis cuittes avec du mouſt, y adiouſtant du ſucre de penides, & vn peu d'huile d'amandes douces: ou des penides & pilules blanches, diſſoultes avec du laiſt frais tiré: ou encore vn autre loch fait des muccillages de laditte ſemence, & de ſemence de coucombre, tirees en decoction de ſebſtes, & meſſees avec penides, a quoy on peut adiouſter du ius ou ſirop de grenades douces, ou des pilules compoſees de ſemence de pauot blanc, amydon, dragagant, gomme arabic, moelle de ſemence de coucourde, & de ſemence de coing, le tout broyé & diſſoult avec penides en eau roſe: lesquelles pilules on prend ou par

foy, ou on les dissout avec sirop violat, ou avec huyle d'aman-
 des douces, ou bien on en fait des tablettes avec sucre
 dissout en eau de vinette, ou en telle maniere qu'on veut.
 On luy baille aussi des tablettes de diagragant, a laisser fon-
 dre en la bouche. Rasis fait vne composition, en maniere
 de paste, de quatre onces de raisins de damas mondifiez &
 bouillis en vn pot de fer, avec eau de fenoil, si la matiere
 n'est trop subtile, ou avec eau violette, si la matiere est chau-
 de, puis pistez avec autât de penides: dequoy on dōne a l'en-
 fant seuré quelque peu, soir & matin, & quelquefois auant
 coucher de la conserue de roses, vieille: & s'il ne peut dor-
 mir, du sirop de pauot: & met on sur sa teste des estoupes
 respandues de poudres de roses, de coriandre, de mouffe
 d'arbres, & de quelques autres choses desiccatiues: ou bien
 on parfume ses couuertes de teste, de mastic ou vernix
 trempé en vin-aigre, & mis sur vn réchaud: ou d'vn autre
 parfun tel que s'ensuyt, R. rosar. rub. myrtill. santalorum
 omnium, ligni aloes an. drag. j. gr. iuniperi macerati aceto
 drag. ij. caphuræ gr. ij. fiat puluis, quo imposito carboni-
 bus fiat suffitus: vel cum aceti & aquæ ros. æquis partibus
 fiant trochisci: è quibus imponatur vnicus prunis cu'n o-
 pus erit. Le matin on parfume le bōnet de mesmes parfuns,
 ou de la fumee de son, fricassé & arrousé de vin-aigre: de-
 quoy on en met dans des sachetz, qu'on applique chaude-
 ment l'vn apres l'autre sur la teste, sans la mouuoir fort.

Si le reume vient de morfondure, & est de matiere fleg-
 matique & espoisse, Oribase & Paul ordonnent de luy res-
 pandre a ieun de l'eau chaude sur la teste, tirant cela de la
 sentence d'Hyp. Que le chaud lasche la pesanteur de teste,
 en subtiliant, euaporant, & consommant le reume: mais

soudain faut l'effuyer, que l'eau ne refroidisse, & le mal n'en empire : puis oindre la teste de miel, en bonne quantité, en apres presser la langue de l'enfant, & frotter la racine d'icelle avec le doigt oingt de miel, a fin de faire venir le flegme : & ce faire deuant que tetter ou prendre le repas : & apres encore luy faire souuent licher du miel en forme de loch. Aucuns font vn loch d'amandes, de miel & de laiët : aucuns laissent le laiët & adioustent des passules, & du ius de grenade douce. En son regime de viure, si l'enfant tette, faut corriger le laiët de la nourrice : & s'il est seuré, faut l'engarder de long sommeil, le faire coucher la teste haute, ne luy tenir la poitrine serree, luy faire manger des figues, raisins de damas ou de cabas mondez, pignolas, amandes peelees, & succrees, & vn amandé soir & matin, cuyt en eau de fenoil, avec du laiët : Razis fait tout cuyre avec eau de fenoil, & fait boire quelquefois de l'eau de l'infusion de son ou bran trempé par l'espace d'une nuyt, puis coulee & vn peu exprimée : mais l'hydromel est beaucoup plus en vſage.

Si la toux est a cause de congestion & amas de grosse matiere glueuse, retenue au poumon, on fait vn loch d'huile d'amandes douces, avec autant de miel, y ad'oustant vne ou deux dragmes de semence de fenoil : ou vn autre d'un peu de myrrhe, avec miel & huile d'amandes douces : ou vn autre de miel seul, bouilly avec eau de fenoil, & quelques feuilles d'hyſope. Et aussi on fait vſer du sirop de capil. veneris, ou de prafsion, ou d'hyſope, ou de reglice, ou de l'oximel squillitic, en maniere de loch. Et aussi on fait boire de l'oximel simple, lequel soit fait de huyt parties d'eau, vne de sucre, vne demye de miel, & d'un quart de vin-aigre, & fait on bouillir dans laditte eau, du capil. vener. ou de la cōserue,

ou des fueilles d'ysope, avec fleurs de violette, raisins, figues seches, semence de fenoil, reglice, & autres choses semblables. On donne aussi a tenir en sa bouche des tablettes de diaris simple: & aussi a prendre au matin & au vespre de la conserue de capilli vneris, seule, ou meslee avec celle de violette, & avec de la poudre de semence de fenoil.

Si avec ceste toux y ha courte halene, & siflement ou ronflement, que les Arabes appellent Oregmon, ou que la fluxion est si grande, & remplit tellement de flegme la poitrine, que (comme Galien sur l'Aphorisme d'Hyppocrat. donne a entendre) il est a craindre que l'enfant ne se suffoque, & meure soudainement: Rasis ordonne du Galban, & du dragagant, de chascun deux grains, a les prendre en poudre avec vn iaune d'œuf cuyt mollet: semblablement la poudre de semence de coton, dit en Latin Bombax, prise en mesme maniere: mais sur toutes choses luy & Auicenne, par l'autorité de Dioscoride, donnent a licher le loch de mucilage de semence de lin, avec miel, le gros d'vne febue chascune fois, auquel loch le miel surmonte le mucilage de deux parts: le coumin est bon aussi broyé avec miel. Ce temps-pendant on oingt la poitrine de l'onguent resumptif ou de dialthæa, de beurre, d'huyle d'amandes douces, ou d'iris, ou de lis: & incontinent on respand dessus de la poudre d'iris, hysope, sauge, coumin, fenoil, calaminte, & semblables. Les bonnes gens du pays fricassent de la pourree, & mettent dessus. Auicenne oingt la racine de la langue avec huile d'olif chaude, & semblablement le palais, pour dissoudre le flegme, & les superfluitez qui viennent a ces parties: puis on vient par ordre a faire les choses susdites.

ORDRE TROISIÈME.

Des maladies de l'estomac, & de tout le ventre.

Au troisièsm rang des maladies particulieres, laissant a part vn grand nombre de maladies d'estomac, & des parties du ventre, il rous suffit pour le present traiter seulement & en peu de paroles de celles qui sont les plus communes & ordinaires aux enfans, cōme de l'enflure du nombril, des tranchées de ventre, des vers, du flux de ventre, & du ventre constipé, de la difficulté d'vrinede, la grauelle, du pissement au liēt en dormant, de la greueure, ou descente du boyau, & du fondement qui sort.

I. De l'enflure du nombril.

Hippocrates au troisièsm liure des Aphorismes, & Galien en l'exposition, enseignent qu'il vient quelquefois apostume au nombril de l'enfant nouveau né, ou pour auoir esté mal coupé, ou mal lié, ou pour quelque aquosité qui s'y est amassée. Rasis au liure des maladies des enfans, dit, qu'il s'enfle quelquefois ou de trop plorer & crier, ou de toussier, ou de quelque cheute, & est comme vne espece de greueure telle qui vient en la bourse.*

La guarison.

Contre ce mal Auicenne ha inuenté vn remede singulier, duquel on peut vser communement : On prend nardiceptica vnc. s. mise en poudre, puis de therebintine trois onces, & avec huyle d'amandes douces on en forme vn oignement. On fait aussi vn emplastre de ceruzelauee, & de luharge, avec therebintine & huile d'amandes douces. Rasis enseigne de brusler quelques drappeaux & des lupins, puis les destremper avec du vin, puis en mouiller des estoupes, & les appliquer sur le mal.

I I. *Des tranchées du ventre.*

Le plus souuent les enfans qui tettent sont malades des tranchées du ventre: Ce qui leur aduient ou de trop grand quantité, ou de mauuaise qualité du lait qu'ilz ont pris, lequel estant corrompu dans l'esthomas, engendre matiere venteuse, qui fait distention es boyaux, & par consequant douleur: de l'autre se fait matiere bilieuse, baillant vn piquement, qui fait crier l'enfant: combien que cela peut auenir encore des vers, ou d'auoir prins du froid au bain, ou de morfondeure.

La guérison.

Nous remedions a ce mal, quand nous mettons sur l'esthomas & sur le ventre vne vésicie pleine d'eau chaude, pour ouurir les pores, eschauffer le dedans, & dissiper les vents: ou quand nous le fomentons & estuons de la mesme eau en laquelle ayt bouilly de l'anet & de la chamomille: & puis l'engraissons de vieille huile d'olifchaude, par le conseil d'Auicenne, ou de l'huile d'anet, ou de lis, ou de chamomille. Rasis met sur l'esthomas vne emplastre de myrrhe, aloes, & safran, avec farine de febues. S'il y ha chaleur trop grande, ce qui se cognoist par l'attouchement, & par les selles iaunes ou vertes, faut oindre le ventre d'huile rosat: ou mettre dessus vn chapelet de roses, en forme d'emplastre, ramolloy de vin-aigre tiede: ou le cirouer refrigeratif de Galien. On baille communement a prendre par la bouche de l'huile d'amandes douces, extraite sans feu, a l'enfant nouveau né. Ce temps-pendant la nourrice doit corriger son lait par bon regime, & ne donner point tant a tetter a l'enfant en vne fois, ni a toutes heures.

I I I. *Des Vers.*

Entre toutes les maladies qui aduiennent communement aux enfans, l'une des plus notables est celle des vers, que les Grecs nomment *Elminthes*, & Hippocrates la *Thiriodygastros*, c'est à dire, bestes cruelles du ventre : desquelz on fait trois especes, les vns sont ronds & long, appelez des Grecs, *Elminthes strongilæ* : les autres sont ronds & courtz, nommez en Grec, *Ascarides*, a cause du prurit qu'ilz donnent : les autres longs & larges ou plats, ditz du langage des Grecs, *Ciriæ* & *Tæniæ*, a cause de leur longue estendue : & ceux-cy tiennent tout le long des boyaux, & sont comme vne substance morueuse, de laquelle s'engendrent de courts excremens, semblables a semences de coucourdes : les ronds longs s'engendrent es intestins graisses, & entrent dans l'estomac : parquoy souuent ilz se reiettent par la bouche, & quelquefois par le nez : les *Ascarides* naissent aux boyaux d'embas. Et toutes ces especes Galien les nie estre engendrees en l'estomac, suyuant ce qu'Aristote c'cript, que nul animal se fait en la concoction de la viande, ains seulement en sa distribution es boyaux, apres qu'elle ha commencé d'estre corrompue en l'estomac : esquelz boyaux elle se corrompt, & pourrit d'auantage, & de là naissent les vers.

De l'age auquel ilz auiennent le plus communement, Hippocrates au quatriesme liure des Maladies, escript, qu'ilz s'engendrent quelques-fois deslors que l'enfant est au ventre de sa mere, a cause de la mauuaise nourriture qu'il prend d'elle : tellement que nous pouuons penser qu'ilz aduiennent a tous eages, & mesmement a ceux qui sont dissolus & gouluz.

Les causes.

Leur generation est de matiere grosse & crue, laquelle se corrompt dans l'esthmac, & venant aux intestins toute excrementeuse, n'estant pas bien chiliee, se pourrit du tout, & pour sa muccosité adherante a iceux, ils ne la peuuent poulsier : & par ainsi Nature prudente, & qui n'est iamais oisive, pouruoit que celle matiere ne demeure ainsi corrompue en ce lieu, & produyt des vers, lesquels puis apres consomment celle matiere : laquelle estant consommee, si on ne baille promptemēt vne autre nourriture pour les saouler, ils montent quelquefois en l'esthmac, & se pourmenent par les boyaux, donnant a le' personne de grandes passions. Tout ainsi comme les papillons s'engendrent de chenilles, & les chenilles de feuilles vertes, mesmement de choux : lesquelles, leur defaillant nourrissement, puis apres se nourrissent des choux mesmes, & les consomment : aussi les charantons s'engendrent du blé, puis le mangent. Ainsi plusieurs animaux prennent de mesme chose & leur generation & la matiere de leur nourriture, comme escript Thcophraſte au troisieme liure des causes des plantes, chap. trente-septiesme. Combien qu'Oribase die que les vers s'engendrent de toutes sortes d'humeurs : toutes-fois il dit que les Ascarides naissent principalemēt du suc noir : les longs & ronds du suc bilieux meſlé : les longs & larges, du pituiteux. Plusieurs pensent que les viandes douces engendrent les vers, mais ilz s'abusent, car les viandes douces se conuertissent en cholere, & en suc amer : mais quand les vers sont engendrez, bien vray est que les viandes douces les attirent a l'esthmac.

Les signes pour les cognoistre, & en quel endroit ilz sont.

On cognoist qu'il y ha des vers es intestins superieurs, quand l'esthomas fait mal, n'ayāt faim, & qu'on vient quelquefois en syncope, l'enfant frotte son nez, ha l'halene forte, est assommeillé, le ventre s'enfle quelquefois, le dormir avec tressaillement, petite fièvre, petite toux sèche, les yeux connillans, changement de couleur souvent au visage. On coniecture les larges estre es intestins, si avec les selles il y ha des excremens semblables a semences des coucourdes. Les Ascarides se cognoissent par le prurit qu'ilz donnent au fondement.

Le prognostic & augure.

Paul au quatriesme liure, chap. cinquiesme, escript qu'il ha veu des vers qui estoient sortis par les aignes : & Avicenne dit, qu'il en ha veu qui ont persé le petit ventre. On prend augure de leur effect par leur nombre, par leur grandeur, par leur couleur, & par les accidens qui les accompagnent. Les grands vers sont pires que les petits : le plus grand nombre pire que le moindre : les rouges pires que les blancs : les vifs que les morts. Les vers qui sortent avec du sang, sont de mauuais signe, par ce qu'ilz signifient que les intestins sont offensez. Et aussi la vomissement de vers est mauuais signe, par ce qu'il demonstre que l'esthomas est plein d'humeur corrompue. Et si l'enfant qui ha des vers ne peut avoir son soufle qu'a peine, & est moite & froid, signifie que le lendemain il mourra. Es commanchemens de fièvre aigue, si les vers longs & ronds sortent en vie, c'est signe de maladie pestilente, donnant a entendre qu'ilz ne peuvent endurer la force de la corruption : & s'ilz sont morts,

touſiours ſignifient qu'ilz viennent de matiere malicieuſe, & fort corrompue. En la vigueur ilz portēt touſiours mauuais preſage, quelz qu'ilz ſoyent, ſignifiant la malignité de la maladie. En la declination, ſignifiēt mutation en mieux, & eſt bonne criſe, comme teſmoigne Hippocrates au ſecōd des prediſtions, Aphoriſme dixhuytieſme. S'ilz viennent ſans fieure, & puis apres elle ſuruient, eſt vn mauuais ſigne: mais ſi quand ilz ſortēt, il ne ſuruient apres aucun mauuais accident, c'eſt vn bon ſigne. A ceux qui en ſont malades, quand on ferme les yeux, & ilz ne ſe peuuent fermer, la mort eſt prochaine.

La cure.

Toute l'intention d'en guarir, eſt pouſſer les vers dehors, mortz ou viſs: & ne le pouuant faire incontinent, au moins engarder qu'il ne s'en engendre d'autres, & ne donnent paſſion ni tourment. Et par ce on doyt donner a manger ſouuent, & de bonnes choſes, de peur qu'ils ne mor- dent & rongent les inteſtins: & euitier le pain non leuē, le laictage, les legums, les fruiſtz cruds, le poiſſon, & toutes choſes de difficile digeſtion, & de facile corruption. Et par autant que la corne de Cerf ha certaine propriētē contre les vers, eſt bon d'en meſler parmy la panade, & donner a boire du vin avec de l'eau en laquelle on ayt fait bouillir de la poudre de ladicte corne, ou de la racine de graminē: & entre les repas faire boire du ſirop de limon avec ladicte eau, ou du ſirop de grenade. Le pourpiē en bouillon, & en potage, & en ſalade, fait mourir les vers: autant en fait la triquema- dame, ditte en Latin, Sedum minus, & ſa decoction, avec du vin, ou avec du ſucere, en forme de iulep, ou avec vn des ſi-

rops susditz. Semblablement le ius de cichoree, & la decoction de Sebestes, avec vn peu de mente : laquelle decoction Razis dit estre bonne a en boire deuant le repas: les mesmes Sebestes sont bons a manger cuitz comme les pruneaux. Et ces choses sont bonnes, tant en la fieure que sans fieure. Communement on baille aux enfans a manger de la poudre de la semence ditte contre les vers, dans la bouillie, ou avec vne pomme cuitte & succree, ou en forme de dragee. Apres auoir baillé ce qui les fait mourir, on doyt oingdre l'esthormac de choses astringentes, avec du gros vin. Pour les faire mourir, & sortir promptement, le sirop de cichoree avec reubarbe, est singulierement bon: mais qu'on ayt donné auparavant vn clystere de lait, avec miel ou sucre, auquel se faut garder de mettre de l'huile ou gresse, ou chose amere, de peur de les repousser en contre-mont : par ce que le doux les attire, & l'amertume & l'huile les repousse. Nous donnons aussi quelquefois dans vn Biberon, que les Grecs appellent Zomiris, vne petite expression de reubarbe, ou de la casse avec le sirop de limon, ou d'endiue, en vne decoction de semences de pourpié, de choux, & de celle qui est ditte contre les vers, & de celle de citron: en obseruant ceste regle, qu'avec les choses ameres il faut mesler les choses douces, a fin que par la douceur les vers attirent ce qui les fait mourir. Razis n'est d'aduis de donner aux petits enfans les medicamens a boire, ains seulement les leur appliquer par dehors. Parquoy il ordonne de prendre du coumin, avec du fiel de beuf recent, & l'appliquer sur le nōbril, & sur l'esthormac, en forme d'emplastre: & conseille aussi prendre de la farine de lupins, de psyllion, & de baques de laurier, avec ledit fiel, & avec huile d'amandes douces, ou ameres.

Mais pour n'estre en faulte d'autres remedes, toutes choses généralement lesquelles resistent a putrefaction, ameres, non ameres, sont bonnes contre les vers: comme les fueilles d'artichaut, de marrochemin, de chardon benedict, d'absynce, d'auroine, de thanasie, de rue, de pescher, & semblables: les semences de nielle, de coumin, de lupins, de citrons, ou d'orenges, les amers ameres, la coloquinte, & quelques autres: les racines de zedoar, d'angelique, de gentiane, & quelques autres telles: la myrrhe, l'aloë, la corne de cerf rapee, le coral: le fiel de beuf, ou d'autres bestes: l'huile d'amandes ameres, d'absynce, & semblables. D'une partie de toutes lesquelles choses on fait ou emplastre, ou cataplasme, ou onguent, pour appliquer sur l'esthmac, & sur le nombril.

IIII. Du flux de ventre.

Il a esté fait mention cy deuant du flux de ventre, entre les accidens qui surviennent aux enfans, quand les dents leurs sortent, & spécialement les canines & œillieres: icy le lieu est opportun d'en parler de rechef au rang des maladies du ventre: duquel flux, comme ainsi soit qu'ilz soyent plusieurs especes, lesquelles aduiennent a tous eages, nous n'entendons parler de celuy par lequel la viande sort telle qu'elle ha esté mangée, que les Grecs nomment Lienterie: ni aussi de celuy qui est avec escorcheure de boyaux, qu'on nomme Dysenterie en Grec: ains seulement de celuy lequel n'a rien de tout cela, & est dit des Grecs, Diarrhæe, & par Hippocrates, en nostre langue, émotion de ventre, a quoy les enfans sont le plus souvent subietz.

Les causes.

On en met plusieurs causes, l'une, la douleur de la nais-

sance des dents, qui lui a esté exposée, laquelle empesche la digestion du nourrissement: l'autre, la morfondure que prie l'enfant en estant souvent remué de la nourrice, laquelle morfondure refroidist & humecte le ventre: la troisieme, est la gourmandise de l'enfant, prenant en son estomac plus qu'il ne pourroit diger, ou digerant plus de nourriture que le foye n'a besoin, parquoy le superflu n'estant attiré du foye, coule promptement en bas: quelquefois aussi l'abondance de la cholere qui descend aux boyaux en est cause, irritant la vertu expulsiue a excretion: ioint aussi que la vertu expulsiue est quelquefois plus forte, & la retentive plus debile: & aussi quelquefois l'affluence de cholere le fait, engendree dans l'estomac, d'humeur corrompue, verte, iaune, ou autrement, procedant de crudité, & de chaleur estrange, laquelle humeur Nature enuoye par le haut & par le bas: mais la maladie venant de ceste cause est plus tost ditte celle qu'on appelle communement Cholericque-passion, que flux de ventre.

Les signes pour cognoistre de quelle cause procede le flux de ventre.

Celuy qui vient de morfondure ou d'indigestion, ne rend gueres que du flegme & des eaux, sans tainture, avec quelque tranchee: Celuy de cholere & chaleur estrange, rend les matieres vertes ou iaunes, avec chaleur de corps, grand soif, & alteration de langue.

Le prognostic & iugement.

Quand il est meslé d'un peu de cholere, avec le flegme & les eaux, meilleur: par ce que la cholere seule signifie abondance par le corps de celle mesme humeur, & de chaleur

étrange & de putrefaction: les eaux sans taincture, refroidissement & crudité: ainsi donques estant moyen de couleur, voire encore qu'il soit plus blancheastre, n'ha rien de mauuais au cōmancement, & se peut supporter es premiers iours. Hyppocrates au liure De la naissance des dents, parlant du flux de ventre des enfans, Ceux, dit-il, qui rendent par le bas des cruditez tainctes de sang, le plus souvent sont endormis en la siebure. Et ceux, dit-il encore, qui rendent par le bas les humeurs crues, & ne pissent guere a la raison de ce qu'ils boyuent, sont maladifs.

Remede.

Si tost qu'on voit que le flux de ventre perseuere trop, c'est a dire, que par cela l'enfant s'affoiblit, il est temps de le restraindre, mais avec discretion: car s'il est iaune & vert, & l'enfant est ia grandet, faut premierement donner, s'il est possible, vn peu de poudre de reubarbe, avec du sirop de roses seches, & le lendemain vn clistere de decoction d'orge & de plantain, avec bien peu de miel rosat, puis vn autre d'amydon, & de ius ou decoction de plantain, ou d'autre chose astringente, avec huyle rosat, & huyle de coing, ou autre semblable: puis epithemizer le ventre avec de la laine mouillee d'eau distillee, ou de la decoction de myrrhe, de rose, ou de plantain: puis l'emplastrer de sandaux, roses, bolli-armeni, & semblables, incorporez avec huyle astringente & vn peu de cire: ou d'vn cataplasme de spelte ou de seigle, cuyt en vinaigre, & destrépe avec ladicte huile: dōner a māger de l'amydon en forme de bouillie, & des laitues cuittes en eau & vin-aigre: faire boire au repas & entre les repas du sirop de grenade, ou de coing, ou de roses seches, avec eau ferree: au matin du spodium, c'est a dire, poudre d'iuoi-

re, seule, ou avec semence de pourpié, ou de plantain, dissoute en eau fraische, simple, ou eau ferree, ou eau d'orge: quelcun fait boire de la semence de concombre, avec trois doigts de la ditte eau: quelque autre d'une poudre faite de semence de lapallele, en Latin *Lapatum acutum*, & de grains de raisins cuyts au four, autant d'un cōme d'autre, avec plus grande quantité de glands ou de cormes seches, & de semence de pauot blanc la moitié moins, avec bien peu de safran, le tout pisté ensemble, pour en prendre vn petit avec ius ou sirop de coing, ou de roses seches. Si le flux est melleé, & n'a point de matieres estranges, on donne a manger vn œuf cuit, & mis en poudre avec encēs, ou avec bol-arme, ou avec les deux ensemble, ou avec semence de lapallele: aucuns donnent l'œuf tout seul, cuit, dur, en vinaigre: on fait manger du ris cuit avec poudre d'amandes, ou noisettes seches, ou des lentilles, ou du mil, ou d'un potage de coing, ou d'un autre fait avec poudre de farine cuite parauant. Vn neud dans de l'eau, sechee & endurcie en forme de paste. Son boire sera ou du lait de chieure auquel on ha estaint vn fer d'acier, ou de l'eau ainsi preparee, seule, ou avec sirop de coing, ou de roses seches, & quelquefois du cormé: les mesmes sirops se doiuent boire en la soif entre les repas, avec sirop de menthe, & eau ferree. Deuant le repas on luy baille vn scrupule de galle, ou autant d'encens, avec ius de coing, ou du codignac, ou de la conserue du fruit de cornalier. Et vn peu deuant, on estuue son ventre de la decoction de semence de roses, de coumin, d'ache, d'anet ou d'anis, par le cōseil d'Oribase: puis on met dessus chaudemēt du coumin, & des roses ramollies en vinaigre, broyez ensemble en forme de cataplasme, ou de la farine d'orge, ou de febue, cuytte avec sumac & miel.

Si le flux vient de flegme seulement, & de morfondure, Auicenne fritte des noix peelees, & les met puis en poudre avec sucre, & en fait prendre le gros d'une auellane, avec eau froide: & quelque autre met sur le ventre vn ciroine de safran, myrrhe & cire, cuyts en gos vin.

Au flux qui vient de la naissance des dets, on baigne l'enfant deuant le repas dans de l'eau ferree, & bouillie avec du plantain, absynce, roses, balauftes, myrtiles, & autres choses semblables: ou on estuue son ventre, & on l'emplastre tout ainsi qu'il a esté dit cy dessus. On luy donne a manger parmy la bouillie de la poudre de myrtiles, & de sang de dragon, ou de cornes seches, & d'autres astringeans semblables. On luy fait succer du ius de grenade, ou de vinatier, ou de coing, en sirop ou autrement. Auicenne ordonne vne poudre de pauot, myrtiles, fouchet, & encens, dissoulte en lait, a en succer ou boire. On luy peut bailler suppositoire de ceruze, d'acacia, ou d'autre chose semblable.

V. De ce que l'enfant ne peut salir, & ha le ventre constipé.

Le ventre au contraire quelquefois se resserre aux enfans & ne peuuent aller a la selle, ou pource qu'ils dorment trop, & la faculté sensitive par cela est assopiee ou pource que la faculté retentive est trop forte: ou pource que les venes attirét trop: ou que la trop grand' chaleur du foye desseche les excremens: ou pource qu'il ne descend rien de la vescie du fiel aux intestins, pour les irriter a l'expulsion de la grosse matiere: ou pource que, comme dit Hyppoc. au liure De la sortie des dents, l'enfant baue & reiette beaucoup du lait qu'il ha pris. Remede a cela. On baille a l'enfant du miel parmy la viande, ou du sucre: & si cela ne fait rien, on luy

donne suppositoire commun de miel & de sel, pour irriter la faculté expulsiue: Oribase & Paul en baillent vn de calaminte broyée avec miel: Auicenne vn de mente sauuaige, ou de racine d'iris, crue ou bruslée, pareillement avec miel: aucuns de racine de cyclamen, ditte autrement, artanita: autres de fiel: aucuns d'vn scrupule de fiente de rat, avec gresse douce, ou avec miel: Auicenne donne a boire de laditte fiente trois grains en vne cuilleree d'eau froide: mais cela est trop mal plaissant: ie voudrois plus tost d'ener de la therebintine, comme Paul & Oribase conseillent, le gros d'vn pois ciche. On oingt aussi son nombril & le bas du ventre d'huile tiede, ou de fiel de beuf, avec beurre, ou avec miel.

V. De la greueure ou descente du boyau.

On voit auenir quelque-fois a l'enfant greueure, & descente du boyau, & enfleure en l'aygne, ou en la bourse: laquelle maladie est ditte en Grec, Cele, en Latin, Hernia & Ramex, prenant diuers noms selon la diuersité du lieu ou elle est, & de la matiere dont elle est. En l'aygne, on l'appelle Bubonocèle: en la bourse, s'il n'y ha que le boyau descendu, Enterocèle: s'il n'y ha que de l'eau, Hydrocèle: si du vent, Physocèle. Et n'y ha que ces quatre especes aux enfans, deux intestinales, vne venteuse, & l'autre aiguëse. Car les autres especes, comme celle de la coësse, ditte Zirbale vulgairement, en Grec, Epiplocèle, & la charnue, Sarcocèle: & la variqueuse, Virsocèle, n'auient point en cest age la.

Les causes.

Celle du boyau vient ou de la naissance, ou par accident: & se fait par la rōpüre ou dilatation du siphax, dit en Grec,

Peritoneon : c'est vne peau qui enuironne & embrasse tous les intestins, & ha deux trous pres les aygues, par où passent les suspensoires des testicules : & quand ses deux trous se dilatent, les intestins descendent, & lors se fait l'hernie ditte intestinale, laquelle se fait aussi quand ladite peau se rompt. Et tant la dilatation que la rompure se fait es enfans, ou de trop crier & plorer, ou de quelque effort, comme de la toux, ou de vomissement, ou de trop grande repletion : mesme-ment de ce que le peritoine en cest eage la est humide, tendre & delié, facil a s'estendre & a se rompre. Celle qui est ventreuse & aigueuse, vient a cause de la rare & tendre tiffure dudit peritoine, par lequel passe le vêt ou l'habondance d'eau.

Le prognostic & iugement.

Si le boyau descend, & le peritoine, c'est a dire, la peau interieure du ventre est rompue, cela est malaisé a guarir : mais si laditte peau seulement se relasche & s'estend, de forte que le boyau se relasche & tombe, il se peut guarir : Et ce dernier auient aux enfans, parce qu'ilz sont humides de nature, & quelques-fois se guarit seulement par ligature bien faite, & application de medicamens conuenables.

La cure.

En la nourriture, faut euitier les bains, & toutes choses qui mollifient, les fruiçts crudz, les salades, les potages, la trop grâde repletion, le cry, la toux, le traual sur les pieds. En matiere de medicamens pour guarir le boyau relasché ou anallé : faut premierement estuuer l'endroit avec gros vin, ou avec decoction de mauues pour le repousser, apres auoir deschargé le ventre, & apres reduire le boyau en son lieu doucement : puis appliquer dessus l'emplastre, contra rupturam, avec vn braguier, ou l'emplastre qui s'en suyt.

R. aluminis, gallarum an. drach. ij. terantor & coquantur vino stiptico ad spissitudinem, fiat emplastrum, & super pone spongiam imbutam oxycrato tepido: ou de la colle de parchemin, & l'y laisser iusques a ce qu'elle tombe, tenant l'enfant au berceau, ou au lit couché, les genoux hauts, l'espace de xxx. ou xl. iours, s'il est possible. Et ce temps pendant, luy faire prendre par la bouche, a ieun, ou de la poudre de l'herbe ditte nouuellement en Latin, Herniaria, & en François, l'herbe du Turc, le pois peu moins d'un eseu, ou vn scrupule de la poudre de limax rouge, avec de la bouillie ou avec du bouillon de la racine de consolide. On peut composer assez d'autres emplastres de semblable matiere astringente a mesme fin, comme ceste-cy. R. myrrhæ, cortic. cupressi & eius nucum, aloes, acaciæ an. drach. ij. quibus optimè tritis, & cum glutino in aceto dissoluto conformetur emplastrum: & ceste-cy. R. mastiches cortic. thuris, nucum cupressi, myrrhæ, collæ seu glutini piscium, farco-collæ an. partes æquales, & cum glutino pergamini similiter dissoluto in aceto, fiat emplastrum. Ou ceste-cy. R. diachalciteos vnc. j. s. mediæ corticis vlmi diligentissimè tritæ drach. vj. terebinthinæ vnc. s. ladani, mastiches, aloes, myrrhæ an. drag. s. spici nardi scrup. j. cum oleo myrtil. & cera alba, fiat emplastrum. Pour guarir la greueure ventuse & aigueuse, Auicenne ordonne deux remedes: la semence d'ammeos, & la farine de lupins. Il destrépe la semence d'ammeos avec blâc d'œuf, en forme de cataplasme, par ce qu'elle eschaufe, de sseche, subtilie, ouure, resoult, & dissipe les ventositez, & restraint avec le blanc d'œuf. Il fait cuire la farine de lupins avec du vin, laquelle dissout les vétositez, & la mesle avec myrrhe & choses qui restraignēt.

Aucuns prennent du coumin, des baques de laurier, des semences qu'on appelle carminatives, de spic. nard. d'ireos, de l'huile de rue, ou de keiry, & d'aneth, & en font emplastre. Guidon de Gauliac donne a boire de la limure de fer, par plusieurs iours. Le Medecin scauant qui fera appellé pour la cure de l'enfant, composera des remedes a sa fantasie, & comme il verra bon de faire.

V I. De ce que l'enfant ne pisse point.

Cela quelquefois auient aux enfans qu'ilz ne peuuent pisser : lequel accident est dit des Grecs, Ischourie : ou qu'ilz pissent a peine, ce que les mesmes Grecs appellent Dysourie : car ce qu'ilz nōment Strangourie, & nous disons chaudi-pisse, communement est eslongné de cest eage.

Les causes.

Cest empeschement ou difficulté d'vrine procede a l'enfant, ou de ce que les parties par où l'vrine passe ont quelque cas de mauuais, comme les reins, la vescie, ou de quelque morfondure, qui rend les nerfs & le muscle du col de la vescie de moindre sentiment pour auoir esté descouuert, & qu'apres le bain il n'ha pas esté essuyé, & ha prins du froid, ou de ce que l'vrine est grosse & flegmatique, ou que parmy descend quelque grosse humeur pituiteuse, laquelle estoupe le passage de l'vrine, ou de quelque pierre ou gravelle, ou d'auoir gardé son vrine trop long temps.

La cure.

Or maintenant pour le faire pisser, de quelconque cause vienne l'empeschement, les bonnes femmes fricaissent de la paritoire avec huile ou beurre, ou gresse douce, aucuns de l'agrimoine, autres des fueilles de guimaue & d'armoise,

ou

ou d'auroine, ou de creffon, ou de berle, & l'appliquent entre deux linges chaudement sur son ventre: plusieurs y appliquent yne vefcie de pourceau pleine de la decoction de chamomile, de fueilles de rayfort, ou raphane fauuage, & des herbes fufdittes: puis l'engreffent d'huile de fcorpion, ou de lis, ou de chamomile, ou d'amandes douces, de beurre frais, de greffe de conuil ou de teflon, ou des greffes communes douces. Razis efcrypt que la greffe de pigeonneaux diffoulte en vin blanc, & donnee a boire a l'enfant, le fait incontinent piffer: quelques autres font bouillir de l'oignon dans du vin blanc, & en font boire pour mefme intention: a quoy eft bon encore donner a boire de l'oxymel fquillitique, ou de celuy qu'on appelle diuritique fait des cinq racines communes apperitiues, avec decoction de femence de melon, de fenoil, de ciches, & de quelques autres chofes femblables. Tous lesquelz remedes font bons, principalement contre l'empeschement du refroidiffement, ou du flegme qui eft au col de la vefcie: combien qu'on en peut vfer aufsi contre la grauelle, de quoy i'ay fait le chapitre a part, qui s'enfuyt.

V I I. *De la grauelle.*

Hippocrates au troiefme liure des Aphorifmes nombrele calcule, dit autrement la grauelle, entre les maladies des enfans: laquelle maladie auient fpecialement aux enfans ia grandets, & leur auient plus communement en la vefcie, cōme efcrypt Paul d'Aegine: car celle qui vient aux reins, Razis & Auicenne l'attribuent aux autres eages, iufques a la vieilleffe, contre l'oppinion d'un Medecin affez fameux de Chaffelleraut, qui dit vne fois en ma prefence a vne damoyfelle fubiette a la pierre des reins, que cinquante ans

passer, la personne est hors de ceste peine, oubliant qu'Hippocrates au mesme liure que venons de dire, met que les vieilles gens sont subiectz ha estre nephritiques, c'est a dire, mallades de ce mal des reins.

Les causes.

La gloutonnie des enfans, par ce qu'elle leur engendre humeurs crues, desquelles la plus grosse descendent avec l'urine dans la vescie, leur donne matiere de generation de ceste maniere de grauelle, moyennant la chaleur qui la cuit & l'endurcit. Et pour entendre pourquoy plus tost elle vient en la vescie aux enfans qu'aux vieilles gens, c'est pource que la debilité de chaleur naturelle, & l'impuissance de digerer es vieilles gens, faisant amas d'humeurs crues & grosses en leurs reins, ne les peut poulsier des reins en bas, & la chaleur estrange des reins les retient & endureit: mais es enfans, toutes puissances naturelles sont plus robustes, & eux sont plus chauds de chaleur naturelle: parquoy la matiere espoisse & glutineuse descendant aux reins, par l'habondance de la chaleur naturelle qui y est, & par la vertu naturelle, se fond & dissout, & de là aisément descendent en la vescie, laquelle est receptacle froid, nerueux & exangue, & de capacité ample, auquel pour l'estroitesse & longueur du conduit, & de l'issue, la matiere susdite se retient, & par la chaleur de l'urine se mue de rechef en grosseur & dureté.

La cure.

Les remedes qui sont pour la pierre de la vescie, doyvent estre, selon Paul d'Aegine, de plus grand'efficace, & plus forts: toutesfois selon le commun usage on traite ainsi l'enfant graueleux: On estuue ou baigne son ventre, & au-

tour de sa pine, de decoction de mauue, guimauue, paritoire, berle, pimpenelle, saxifrage, fleur de genest, semence de l'n, & semblables: ou seulement de decoction de lapabelle, ditte en Latin, *Lapathum acutum*, dans du vin, puis on engraisse ces parties la, & notamment l'endroit du col de la vescie, dessus & deffous, d'huile d'amandes douces, ou de lis, ou de scorpion, simple ou meslee, avec elle du sang de bouc, & de la poudre de scorpion brulé. Et si besoin est, on siringue le dedans avec la decoction susditte, y adioustant du ius de limon, si on veut, & quelque autre des choses qui brisent la pierre, ou seulement avec huile de scorpion. Puis on luy baille a boire des baques de houx en poudre, ou des noyaux de mesplier, ou de la semence de saxifrage, ou de mil-de-soleil, ou autre semblable, avec du laiët, s'il tette: ou avec eau de senelle, & sirop de capilli veneris, ou de limon, s'il est ia grandet. Et si la grauelle descent en la pine, & ne peut sortir, on met la pine dans du laiët, ou eau tiede, pour dilater le conduit.

V I I I. *De ce que l'Enfant ne peut retenir l'urine,
& pisse au liët.*

Quand l'enfant est ia fort & grand, comme de cinq ou six ans, & en dormant pisse dans le liët, cela est dit maladie qu'on appelle, Pissement involuntaire: laquelle chose vient, ou que l'enfant dort trop longuement, & ce temps-pendant Nature incite le muscle du col de la vescie, qu'on appelle Sphyncter en Grec, a ouurir la vescie pour pisser: ou que ledit muscle est relasché, par la trop grand' humidité: ou que l'enfant ha trop d'urine, a cause de boire beaucoup.

Les remedes : On les depart en forme de viure, & en choses medicinales. En forme de viure, on se doyt garder de choses trop refroidissantes, par ce que la froideur est cause de paralysie : & aussi de choses trop chaudes. Faut le faire pisser auant qu'aller coucher, & ne l'accoustumer a pisser souuent le iour. Le fesser toutes les fois qu'il aura pissé au liét, & luy dire iniure, & luy faire honte, luy attachant vne queue de regnard a la robbe. Ne luy laisser point mager d'herbes, de fruietz cruds nouveaux, ni de choses qui prouoquent l'vrine, ains luy faire manger des chastaignes, & des fruiets stiptiques, c'est a dire, qui resserrent, toutesfois entretenir benefice de ventre: boire peu, & dormir sur la soif. Quant aux choses medicinales, Auicéne dit, que la ceruelle de lieure cuytte & destrempee en vin blanc, est bonne. Haly donne a boire a ieun le gossier, dit autrement le iabot, d'un coq, brulé ou seché au four, le pois d'un obole ou de deux, avec de l'eau vn peu tiede. Razis met que la creste d'un coq mise en poudre, & respandue dans le liét, sans le sceu de l'enfant, l'engarde de pisser en dormant: autant en fait la vescie de taureau, ou de sanglier, ou de cheure, mise en poudre, & beüe avec la decoction de chastaigne ou de gläd: & aussi le syrop de myrtilles, & tout ce qui est composé de cest arbrisseau, comme eau de myrthe, poudres de feuilles de myrthe, conserue de fleurs de myrthe, robob de myrthe.

*I X. Du fondement qui sort, & du gros boyau qui
rumba ou descend.*

On appelle le fondement qui sort, quand le muscle qui est a l'aneau, dit des Grecs, Sphincter, se relasche, & ne peut soustenir le boyau qui descent, maladie qui auient quelque-

fois aux enfans. Il leur aduient communemēt de trop grande humidité du ventre, descendāt au muscle susdit, laquelle le ramollit & relasche : au contraire il procede aux vieilles gens de la secheresse des nerfs & muscles, receuant l'abondance de flegme & superfluité aigueuse. Et pour remedier a ce mal de l'enfant, on le doyt engarder de trop longuemēt dormir, de boire beaucoup, de manger potages & fruits, mesmement cruds. Avec ce regimē, on doyt incontinant & premieremēt estuuer le fondement de decoction de choses astringentes, cōme d'escorce de grenade, de myrtilles, de sumach, de roses rouges seches, d'alun, de corne de pied de cheure, de noix de galle, ou de cyprez, cuits en gros vin : & y faire asseoir l'enfant iusques au nombril : puis remettre le fondement doucement avec les doigts enhuilez, ou avec de la laine engressée d'huyle rosat : apres s'ant appliquer dessus de la poudre de galle, de sang de dragon, de coupe de gland, myrrhe, aloes, corne de cerf bruslee, poix, mumie, encens, & d'autres choses semblables : & le parfumer de bdell, ou de pomme de pin. Paul d'Aegine enseigne que l'vrine du patient respandue toute chaude dessus y est fort bonne.

ORDRE QUATRIESME.

Des maladies qui viennent particulièrement en certains endroits du cuyr.

Estant breuement exposees iusques icy les maladies de la teste, de la poitrine, & du ventre, reste maintenant parler de celles lesquelles particulièrement viennent au cuyr, & non de toutes, ains seulement de celles qui viennent en certains endroits, comme la tigne de la teste, la tigne du visage, l'es-

corcheure derriere les oreilles & es cuisses : car de celles qui viennent vniuersellement par le cuyr, comme la rougeole, & la verolle, ha esté parlé au premier traité : & de celles qui n'ont point certain ni special endroit, mais viennent maintenant ça, maintenant là, cōme les flegmons, les furuncles, la gratelle, la roigne, les feux volans, les endartres, & quelques autres semblables, lesquelles sont dittes generally d'un nom Arabe, Bothore, en François, Enleueures, soit avec vlcere ou non, nous les remettons au traité des maladies communes à tous eages.

I. De la galle & tigne de la teste.

Au cuyr de la teste se font des vlcères, avec crousttes, qui percent le cuyr avec petit trous, dont il sort de la sanie : les Grecs les appellent Achores, & Ceria, a cause de l'humour qu'ils rendent de couleur de cire, & semblable au miel. Et pource qu'ils rongent le cuyr de la teste comme la tigne les robbes, on appelle ces vlcères la tigne, Auicenne Saphatis sous lesquels quelquefois s'engendrent des pouls. Et ceste maladie aduient cōmunement aux enfans, de laquelle sont deux especes, l'une qui est seche, l'autre humide.

Les causes.

Et l'une & l'autre procede de flegme salé, ou de sang superflu, meslé avec cholere, soit que ceste maladie vienne du ventre de la mere, soit depuis, de mauuais lait, ou d'autre mauuaise nourriture : mais l'humide est faite de flegme ou de serosité salee, aigue, corrompue, & corrosiue : la seche de sang aduste, ou de l'une & l'autre cholere, coniointe avec flegme cuyt & salé.

Les remedes.

En la nourriture, il faut euer les dattes, parce qu'elles pronoquent les humeurs au tuyr, semblablement les salures, espiceries, herbages, grands breuuages, fruitages. Au reste, faire ce que Paul & Razis conseillent: premierement, raser la teste souuent: puis l'estuuer de lessif auquel on ayt fait bouillir myrtilles, roses, lentilles, lupins, racine d'asperge, fueilles de saule, fueilles & racines de lapalelle, si la sanie qu'elle rend est iaune, & l'enfant est seuré: & si elle est blanche, c'est a dire, flegmatique, & espoisse, faut l'estuuer de lessif bouilly avec mente sauuage, mariolaine, hyssope, bete, fume-terre, chamomile, racine de guimauue, escorce d'orange, semence de fenugrec, ou quelque autre semblable. Puis apres appliquer vn vnguent tel que Razis compose, en ceste maniere. R. olei rosacei, ceræ oleo liquatæ, an. vnc. j. cerussæ, lithargyri & lixiuij de cineribus vitis, aut vrticæ an. vnc. s. cum duobus luteis affatis ouorum, fiat vnguentum, quo illinatur mane & vespere. Et s'il y ha grand prurit & demageaison, on fait vn vnguent tel que s'ensuyt. R. lithargyri, cerussæ an. drag. ij. sulphuris, hydrargyri extincti an. drag. j. olei rosacei partes duas, aceti partem vnā. Si l'enfant n'est seuré, sans l'estuuer, Razis applique des fueilles d'arroches, Atriplicis en Latin, comme qui succent & attirent ce venin. Celle qui est seche, doyt estre estuuee souuent de lessif, auquel auront bouilly mauue, guimauue, violette de Mars, melilot, fume-terre, fenugrec, & autres semblables. Puis la faut oindre de gresse de geline & de porceau sans sel, & de mucilage de fenugrec, en égale portion, avec vn peu de safran, ou de coesne de lard seule-

ment. Toutesfois en matiere aigue & corrosiue, on pense que les oignemens de gresses & d'huiles, par ce que facilement s'enflament, ne profitent pas beaucoup.

II. *De la tigne du visage.*

Ceste-cy est aucunement differente & d'autre façon, laquelle est plus espoisse, & tient quasi comme vne crouste au visage, iusques a couvrir quelquefois les yeux, & a la teste: combien qu'elle porte le mesme nom en Grec, & Latin, & Arabic, que la susditte. Et parce que plus cōmunement elle aduient aux enfans qui tettent, on l'appelle encore Lactumen, & Lactitium, & pour la couleur de cire, Cerium, & Fauum, & pour la forme & habitude, Crusta, du langage des Latins.

Les causes.

Elle est engendree de matiere moitié grosse & visqueuse, moitié aigue & subtile, parquoy elle fait crouste: laquelle matiere procede, ou des restes du sang mēstrual, ou du lait de la nourrice, qui est trop fort, ou d'autre mauuaise qualité, de soy, ou qui depuis s'est corrompu en la premiere & seconde digestion de l'enfant, ou du mauuais sang, & de la mauuaise nourriture qu'il ha apporté du ventre de la mere: & auient au visage & a la teste plus tost qu'ailleurs, a cause de l'humidité superflue de celle part, corrompant l'aliment qui y est enuoyé.

Le iugement de telle maladie.

Quelquefois elle est si espoisse, qu'elle fait perdre la veüe, & gaste le visage de l'enfant: parquoy est bon d'y remédier, sauf l'avis des femmes qui dient qu'il n'y faut rien faire.

La cure.

L'Enfant qui tette, malade de ce mal, on le peut guarir sans crainte, par bon regime de la nourrice, & par applications de choses conuenables. Quant au regime, on deffend a la nourrice, entre plusieurs autres choses, les herbes, & specialement le pourpié, pour vne certaine propriété qu'il ha contraire a ceste maladie, le prenant par dedans, combien qu'il est propre a l'appliquer par dehors. Quant aux remedes applicables, on doyt euitier les repercussifs, pour ne faire rentrer la matiere, laquelle se pourroit cōuertir en apostume dans le crane & les peaux qui enuironnent le cerueau: & pourroit aussi engendrer epilepsie, & autres maladies dangereuses. Les vlceres descouuers & nuds, on ne les doyt estuuer, ains seulement mettre dessus des fueilles de choux, ou de bete, ointes de miel, ou d'arroches, comme ha esté dit cy dessus. Les croustes peuent estre estuuees de decoction de chamomile, & de fenugrec, ou de petit laiët clair, autrement dit megue, ou de laiët tout pur de cheure, ou de laiët de nourrice ietté dessus, ou de laiët cuyt avec fumeterre, melilot, guimauue, bete, myrthe, roses, & semblables. Ou sans estuuer doyuent estre gressées (s'il y ha chaleur grande) avec muccilages froides, & dragagant, & gomme Arabic, avec huyle rosat ou violat, & beurre fraiz: & s'il n'y ha pas grand' chaleur, avec huyle chamomile, ou d'amandes douces ou ameres. Plusieurs vsent de beurre fraiz, aucuns de lard, aucuns de gresse de geline, ou de canard, ou de cheureau, lauee en eau de fume-terre, ou de vinette, ou de rose: aucuns adioustent cire blanche au liniment, aucuns du miel. A celle qui est sur la teste, parce que ceste partie n'est pas si

delicate que le visage, on ne craint point d'y appliquer choses moins debiles: cōme quand on l'estuue avec de l'vrine seule, ou meilee avec du vin, ou avec hydromel, mesmemēt les pustules sanieuses, ou avec decoction de myrthe, rose, cyprez, & semblables: puis on emplastre dessus de la pou-
dre de capilli-veneris, avec beurre fraiz, comme Paul conseille: ou du miel avec farine de pois, ou de ciches. Quelquefois la gresse de cheureau seule, ou la coesne de lard defalee suffit: la gresse recente du ventre de porc enuolopee d'estoupes, mouillees de vin blanc, cuitte sous la braise, est fort bōne aux parties vlcerenses de la teste & du visage & encore sur les vlceres, apres l'absterfion d'eau mielee, engressez ou non engressez, on respand de la poudre de myrtilles, & farine d'orge, ou de febues, ou de la poudre de myrthe, aloes, mastic, encens, myrtilles & roses. A l'enfant ia grandet, & qui est seuré, on applique choses vn peu plus facheuses: cōme quand on emplastre dessus de la guimaue, avec l'vrine de l'enfant mesmes; ou du pourpié pisté avec du vin: ou vn vnguent de gresse de canard, ou autre gresse douce, avec vn peu de nasitort, dit en Latin Nasturtium: ou vn liniment que Galien ordonne, de papier bruslé, destrem-
pé avec vin-aigre: ou vn autre vnguent composé d'huyle rosat, gresse de bouc, & vn peu de suye de four: ou l'vnguēt blanc, mesmement sur les parties vlcerées.

III. Des iarssures ou escorcheures entre les cuisses, es aygnes, sous les aisselles, & derriere les oreilles.

Les Grecs appellent ce mal Paratrimmata, les Latins Intertrigines, Plinie Attrita, & quelquefois Cōfricata membra, que nous appellons iarssures & escorcheures, lesquelles viennent derriere les oreilles, es aisselles, es aygnes, & es cuisses.

Les causes.

Celles des cuyffes viennent volontiers a cause de l'vrine, laquelle est forte, & des excremens lesquels y demeurent, par faute d'estre soigneusement essuyez par la nourrice: celles dailleurs sont a cause de la retention des sueurs es parties qui s'entretouchent.

Remede.

Razis les estuue de decoction de violette seche, d'orge-mondé, & de guimaue, & quelquefois de decoction d'aman-
des, de racine de cannes, ditte Alcanna par les Arabes, & de roses. Et nous les pouuons estuuer de toutes choses qui mondifient, adoucissent, restraignent & dessechent: puis on respand dessus poudre de roses, & de myrthe, farine d'orge & de febues, ou de lentilles, & quelquefois on y ad-
ioust de la poudre d'iris, & de fouchet: parce que le myr-
the restrainct & desseche, la racine d'iris remplit les cautez de chair, les roses refroidissent, dessechent, fortifient & re-
stituēt le cuyr, le fouchet eschauffe & desseche doucement, la farine d'orge desseche, refroidit, & absterge quelque peu, la farine de lentilles astraint fort, tenant moyen entre chaleur & froideur, & sans aucune mordication: & aucuns les meslent avec huyle rosat, en forme d'onguent, & aucuns autres y adioustent du dragagant en mucilage. Les femmes de nostre pays ne prennent sinon les vnes des cendres, les autres de la poudre des traines & vieux boys de la maison.

F I N.